

کلیات قواعد لیسان عثمانی

مجلس معارف عسکریه جانب عالیستند عموم مکاتب رشديه
واعتمادیه عسکریه شاگردانه تدریسی تصویب
و قبول بیورلشدر

مکتب حربیه شاهانه کتابت معلمی پیاده بیکباشیلرندن
راشد

معارف نظارت جلیله سنک فی ۱۷ رجب سنه ۱۲۱۷ و فی ۶
تشرین ثانی سنه ۱۲۱۹ تاریخ و ۵۰۰ نوسرولو
رخصه تنامه سنی حائزدر

استعمال

باب عالی جاده سی — رشید افندی خاندن ۳۸
نوسرولو مطبعه ده طبع اولونمشدر

۱۳۱۷





کتابت قول عبدالستار محمد

مجلس معارف عسکریه جانب عالیستادن عموم مکاتب رشدیہ
و اعدادیہ عسکریه شاگردانہ تدریسی قبول و تصویب
بیورلشدر

اثر

مکتب حریریہ شامانہ کتابت معلمی پیاده بیکباشیلرندن



راشد

—•••••—

معارف نظارت ملیہ سنک رفہصننامہ سنی مازدر

انتشارات

باب عالی جاده سی — رشید افندی خاتمه ۳۸ نومرولی مطبعه ده
طبع اولونفشد

۱۳۱۷

مَدْخَلُكَ


اقوام و طوائف متمذنه نك افاده مقصد ضمننده سويله ذكرى لفظلر
مجموعه « لسان » اطلاق اولونور .

اشبو افظلر ايله انسان يالكر قارشوسنده كنه مقصدينى افاده ايده بيلوب
غائبه بولونان شخصه مرامنى تبليغ ايده مديكندن حرفلره علامت اولوق
اوزره بر طاقم شكللر ايجاد وبونلر بر برلرينه توصيل ايديله رك الفاظ
وبو واسطه ايله معانى بيان وافاده اولونميه باشلامشدر كه اشكال مذكوره يه
حرف، نقطه اشارت، دينلمش وبونلرى بر برلرينه ربط ايتمه يه ده « يازى »
تسميه اولونمشدر .

برلسانى بيلمك ديمك اولسان ايله كرك شفاهآ وكر كسه تحريرآ مقصد
ومرامنى كوزلجه آكلامقى اقتدارينى حائز اولوق ديمك اولديغندن قواعد
لساتنى تحصيل ايتك هر كسه الزمدر .

لسانمك اصلى تركبه در . فقط صوكره دن عربى وفارسيدن برچوق
كلمات وقواعد لازمه قاريشاروق رونق ولطافت بولمش بو جهتله باشقه
بر رنك لطيف اخذ ايده رك « عثمانلى » عنوان جلاله اقترانيله توسيم
ويجمل ايديلمشدر .

هرلسانك قواعدى اولسانك مفردات الفاظنك بالمله قواعديله تركيب
كلام اصولندن وبرده فصاحتنه رعائتله برابر الفاظى مقتضاي حاله مطابق
قيلاق مزين كلام ايله اداى مرام ايتك قواعدندن عبارتدر كه برنجيسى
« علم صرف » ايكنجيسى « علم نحو » اوچنجيسى دى « علم بلاغت »
ديمك اوله يور . بناء برين بزه اشبو كتابمى لسان عثمانينك قواعد
صرفيه ونحويه سنى مفصلاً جامع اولوق ولزومى قدر علم بلاغتن دى بحث
ايله مك اوزره بعون الله تعالى اوچ قسم اوزره ترتيب ايلدك . وقوعى
طبيعى اولانك سهو وخطائك ارباب فضل وكمال طرفندن دامن عفو له
مستور بيورلمه سى مسترحمدر .



بِسْمِ اللَّهِ الرَّحْمَنِ الرَّحِيمِ

قسم اول

— ❧ صرف عثمانی ❧ —

صرف عثمانی — عثمانلی لسانی طوغری سویله یوب یازمق
ایچون عثمانلیجه کله لرك اصلدیر یله صورت اشتقاق [*] واملالری
بیلدیرن بر قدر .

هما — بر ویا بر قاچ حرفله بر حرکه دن عبارت اولارق
بردن سویله نیلن صدایه دینو : (کلدی) کله سی ایکی هجالدیر؛
بری وکل، دیکری «دی». (شو) (کنج) بر رجادن و (استانبول)
کله سیدخی اوچ هجادن عبارتدر .
هجالر، حرفلردن مرکبدر .
حرفلر، حرکه یار دیميله ظاهر اولور .

[*] آرالنده لفظاً و معنی مناسب بولونمق شرطيله بر کله دن دیکر
بر کله چیقارمق .

{حرف}

حرف، صوته عارض اولان بر کیفیتدرکه خفت و ثقافته
کندینه مائل اولان صوت آخردن اوکیفیت واسطه سیله کسب
تمیز ایدر.

ترجیه سوزلری یازمق ایچون قوالانیلان حرفلر عربجهدن
آلمشدر. آنلرده شکللری آشاغیده کوستریلان یکریمی سکز
حرفدر:

ا ب ت ث ج ح خ د ذ ر ز
س ش ص ض ط ظ ع غ ف ق
ك ل م ن و ه ی

بو حرفلره ترجیه وفارسی کله لرك هپسی یازمق ممکن
اولمادیغندن صوکره دن فارسی به مخصوص اولان (پ، چ، ژ،
گ) حرفلریله ترجیه به مخصوص اولوب [و، ن، ی] کی
اوقونان کاف ترکی علاوه اولونمش و بونکله ترجیه نك حرفلری
اوتوز بیه بالغ اولمشدرکه بونلره [هجا حرفلری] ویا [الفبا]
دینیر.

فأمره - [عثمانلیجه ده بش درلو کاف واردر]

۱ - کاف عربیدر. کمیک، امک، کاتب کله لرنده کی کافر کی.

- ۲ — کاف فارسیدر. کورکو، کل، کوهر کلمه لرنده کی کافلر کی .
- ۳ — کاف یائیدر که «ی» کی اوقونور. دکر می، بکک، دکل کلمه لرنده کی کافلر کی .
- ۴ — کاف واوی «و» کی اوقونور. اوکی بابا، اوکونمک کلمه لرنده کی کافلر کی .
- ۵ — کاف نونی یاخود اضافتدر که صاغر کاف دینمکله مشهوردر. بو کافده «ن» کی اوقونور. دکز، سنک، صوک کلمه لرنده کی کافلر کی .

حرفلر املا جهتیه ایکیه آریلیر . بولردن بر قسمنه
«حروف منفصله» و دیگرینه «حروف متصله» دینور .

حروف منفصله — یازیلشده الت طرفنه بیتشمه بن حرفلر
اولوب آنلرده اشبو: (ا د ذ ر ز ژ و) یدی
عبارتدر .

حروف متصله — یازیلشده الت طرفنه بیتیشن حرفلر
اولوب آنلرده حروف منفصله نك غیر ی اولان حرفلردر .
حروف منفصله و متصله کلمه نك اولنده، اورته سنده،
آخرنده بولوندر قیرینه نظراً آشاغیده کی شکلدرده یازیلیرلر .



{ حروف متصله نك رسم خطی }

مثال	حروف نك در کتب اصليه	حروف نك در کتب اولونورسه	حروف نك در کتب اولان	حروف نك در کتب اولونورسه	حروف نك در کتب اولان
بش	ب	ب	ب	ب	ب
بتك	پ	پ	پ	پ	پ
تذك	ت	ت	ت	ت	ت
ثواب	ث	ث	ث	ث	ث
جوز	ج	ج	ج	ج	ج
چيكن	چ	چ	چ	چ	چ
حسد	ح	ح	ح	ح	ح
خرار	خ	خ	خ	خ	خ
سود	س	س	س	س	س
شكر	ش	ش	ش	ش	ش
صباح	ص	ص	ص	ص	ص
ضرر	ض	ض	ض	ض	ض
طرف	ط	ط	ط	ط	ط
ظهور	ظ	ظ	ظ	ظ	ظ

[*] حروف متصله، صوك حرفي حروف متصله دن اولان كله نك
 صوكنده بولونورسه اشبو اشكالده رسم اولونوب حروف منفصله ايله
 نهايت بولان كله نك صوكنده اشكال اصلیه سنی دكشدر منزه.

ع	ع	ع	ع	ع	ع
غ	غ	غ	غ	غ	غ
ف	ف	ف	ف	ف	ف
ق	ق	ق	ق	ق	ق
ك	ك	ك	ك	ك	ك
ل	ل	ل	ل	ل	ل
م	م	م	م	م	م
ن	ن	ن	ن	ن	ن
ه	ه	ه	ه	ه	ه
ی	ی	ی	ی	ی	ی
واسع	معقول	عسکر	ع	ع	ع
مبلغ	مغلوب	غیب	غ	غ	غ
خلف	نفر	فرق	ف	ف	ف
شفق	مقدار	قدر	ق	ق	ق
کک	مکدر	کدر	ك	ك	ك
دلیل	بیلامک	لقردی	ل	ل	ل
اهم	ممنون	ملک	م	م	م
سن	بندہ	نسنہ	ن	ن	ن
عتہ	ہرہ	ہر	ه	ه	ه
ولی	غیب	یر	ی	ی	ی



{ حروف منفصلہ نك رسم خطی [*] }

بابا	ا	-	-	ا
پدر	د	-	-	د
لذت	ذ	-	-	ذ
ہنر	ر	-	-	ر

[*] حروف منفصلہ الت طرفہ بتشمہ دیکی ایچون کلہ نك باشندہ بولوندی زماں شکل اصلینی دکشدرمہ یہ جکی کبی اورتہ سندنہ بولوندی صورتہ دخی اوست طرفہ بتشدیکی شکلدن ماعدہ ہیچ بر شکل اخذ ایدہ منہ .

ز	-	-	ز	کز
ژ	-	-	ژ	مژده
و	-	-	و	سوز



حروف هجا، تلفظ اولونه لری جهتيله اوج قسمه آریلیرکه بر قسمی خفیف دیکری ثقیل و آخری دخی باشقه حرفلرک یاردیميله هم خفیف و هم ثقیل اوقونانلردرکه بونلرده مثالاريله برابر آری آری آشاغیده کوستریشدر.



{ خفیف تلفظ اولونانلر }

حروف	مثال		
ت	تذکره	تجارت	تیشه
ث	ثواب	ثیاب	ثمن
ج	جمال	جلاد	جمله
د	دره	دیل	درت
ذ	ذره	ذراع	ذنوب
ز	زنبه رک	زیاده	زبده
ژ	ژنک	ژیان	ژول
س	سپت	سرکه	سکود
ش	شکر	شفا	شبهه
ک [عربی]	کلام	کتاب	کوروک
ک [فارسی، واوی، یائی]	یکن	دوکونمک	اوکی
	بکنمک	دکری	



{ ثقیل تلفظ اولونانلر }

خطبه	ختم	خبر	خ
صوئوق	صیجاق	صای	ص
ضروب	ضحك	ضالات	ض
طیور	طلاء	طراق	ط
ظهور	ظلال	ظفر	ظ
غروب	غیاب	غباوت	غ
قعود	قیامت	قضاً	ق
یاكلق	آكا	آكلامق	ك (نونی)



{ باشقه حرف يارديميله بعضاً خفيف، بعضاً ثقیل }
{ تلفظ اولونانلر }

مثال

حروف	خفیف	ثقیل
ا	اکمک	آق، آل
ب	بکجی	بولق
پ	پکمز	پاچاورہ؛ پورتقال
چ	چکی، چکیچ	چالنی، چوقور
ح	حسد	حاضر
ر	رأس	راقم
ع	عفت	عاطل
ف	فتحہ	فاصل
ل	لذت	لقمہ

م	مکان	مطبخ
ن	نفس	ناظر
و	ولد، وفا	واصل، وقعه
ه	همت	هارون، طهران
ی	یشیل	یووارلاق



اوتوز بش حروف هجاءن (ژ، چ، پ، گ) عربی-یده
اولمایوب ترکارله عجملر ییننیده مشترک اولدینی کبی (ث، ح،
ص، ض، ط، ظ، ع، ق) حرفلری عجملرده و (ث، ح، ذ،
ص، ض، ط، ظ، ع) حرفلری ترکارده ولسان ترکه مخصوص
اولان اوچ درلو کاف دخی عربی و فارسی-یده یوقدر. بناءً
علیه کلهلرک شو واسطه ایله هانکی لسانه منسوب بولوندینی،
ومثلاً: (حکیم، ذاکر، ژاله، عقل، دگر می، روضه، اوک)
کلهلرینه نظر اولوندقده [حکیم، ذاکر، عقل، روضه] کلهلرینک
عربی و [ژاله] کلهسنک فارسی و [دگر می، اوک] کلهلرینک
دخی ترکی اولدینی قولایلقله آکلاشیلیر. انجق مشترک اولان
حروفات ایچون لغت کتابلرینه مراجعتله حل مشکل ایدیلیر.

حرفلر تقسیمات مذکورده دن باشقه «حروف متقاربه»، «حروف
متباعده»، «حروف فم»، «حروف ذلاقه»، «حروف خلق»،
«حروف متشابه»، «حروف قریه»، «حروف شمسیه» کبی
اقسامه ایریلیرلر.

حروف متقاربه — (د ب) ، (د ذ) ، (ض ظ) ، کبی
مخرجلری بربرلرینه یاقین اولان حرفلردر .

حروف متباعده — (ب ع) ، (م ج) کبی مخرجلری اوزاق
اولان حرفلردر .

حروف فم — تلفظلری دوداق واسطه سیله اولان (ب م ف و)
حرفلریدر .

حروف زلاق — لسانه سرعت و کسینلک ویرن (ب و ف ل م ن)
حرفلریدر .

حروف غلبه — (ح ح ع غ ه ء) حرفلریدر .

حروف مشابهه — صدالری بربرینه زیاده بکزه یین اشبو :

ا	ء	ع
ت	ط	
ث	س	ص
ح	خ	ه
د	ض	
ذ	ز	ض ظ
ك	(نونی)	ن
ك	(یائی)	ی
ك	(واوی)	و

یکرمی اوچ حرفدن عبارتدرکه بونلر املا خصوصنده بر چوق
مشکلاته بادی اولدیغندن شوراده بعض قواعد اساسیه ایله ملاحظات
بیانی مناسب کورولدی .

۱ — حرفی بر حرف هوآیدرکه عربیده حرکه لیسنه [همزه] [*]
 وحرکه سز اولاننه دخی [الف] دینور . فقط عثمانی لساننده
 همزه دنیلیدیکی زمان شو «ء» اشارت فهم اولونارق همزه
 هیچ بروقتده الف طانیلماز وحرفدن دخی معدود اولامااز .
 ترکیه الف ایکی درلودر : بری «الف مقصوره» دیکری
 «الف ممدوده» در . (الف مقصوره) حرف اولارق
 تلفظده آشکاراولان القدر . اکشی، اتلی کله لرنده اولدینی کبی .
 الف مقصوره کله نك اولنده حرکه نك اوچ درلوسنی ده الایلیر .
 اتمك ، ایصیرغان ، اوکوز کله لرنده اولدینی کبی .
 (الف ممدوده) مدلی اولارق یازیلان القدر . آقشام کله سننده
 اولدینی کبی .

الف مقصوره کله نك صوکنده بولونورسه الف ممدوده حکمنی
 آیلیر . فقط مد اشارتی یازلماز . آغلا، باغلا کبی .

ع — «ع» حرفی یالکز لسان عربیه مخصوصدر . فارسی و ترکیده
 بو حرف یوقدر . کرچه فارسیده بو حرفله یازلش بعض کله لر
 وارسه ده انلرده سائر اساندن نقل اولونمشدر . ترکیه ده
 بو صدایی ویرمك ایچون (ا) یازمیلیدر : آلاجه ، آبالا ،
 آبلایق ، آتلاق کبی .

ت ، ط — بو ایکی حرفك مخرجلری فرقسز کبی اولدیغندن کسکین
 و قالین «ت» لر اکثریتله «ط» یازلقده ایسه ده «ط» حرفی
 اساساً عربیه مخصوص اولدیغندن ترکیه کله لرک قالین و کسکین
 تالرینیده «ت» ایله یازمیلیدر . مثلاً : یوطقی یرینه (یوتمق)
 و چاطی یرینه (چاتی)، طونج یرینه (تونج) یازمیلیدر .

[*] عربی کلماتده بولونان همزه لرک صورت املاسی ایلروده فصل
 مخصوصنده بیان اولونا جقدر .

ث، س، ص — « ث » حرفی لسان عربیہ مخصوص اولوب ترکیه کله لرده اصلاً موجود دکدر . بونک یرینه « س » وسینک دها قاباسی « ص » ایله یازلق تعمیم ایتشد .

عربیہ مخصوص اولان (ث، ح، ذ، ص، ض، ط، ظ، ع) حرفلرندن بعضلی لسانک اصلی اولان چغتای لسانده موجود ایسه ده انلرده عربجه دن آلمه قرق الی کله ده موجوددر . بو حرفلرک ترکیه ده بولوندیغی لفظلر چغتای لسانده یوقدر . از جمله : ترکیه ده (ایصلق) چغتای اولان « ایسلغ » دن (ایصلاق) « ایسلامک » دن ، (باصمق) « باسحق » دن ، (صوک) « سونک » دن ، (صول) « سونقول » دن ، (طار) « تار » دن مبدلدر . لکن لسانک شیوه و تلفظنه تمامیه ملایم اولمهی جهتیه سینک قالین وقاباسی « ص » ایله یازمقده تردد ایتیز .

ح، خ، ه — « ح » حرفی دخی حروف عربیه دن اولدیغدن کلمات فارسیه ایله اصلی ترکیه اولان الفاظ عثمانیه ده استعمال اولونماز . بناء علیه : « حاج » کله سنی حاج ، « هایقیرمق » کله سنی هایقیرمق یازما یوب صدالری بربرندن فرق ایچون ثقیللری « خ » و خفیلری دخی « ه » ایله یازمیدر .

د، ذ، ض — « ض » حرفی لسان عربیه مخصوصدر . ترکیه ده یوقدر . بوسدایی ویرمک ایچون « د » حرفی یازیلیر .

کلمات عربیه ده بولونان « ض » حرفی ترکیه ده بعضاً ، ض و بعضاً ، ظ کی اوقونور : قاضی، ضرب، ضحک - رضا (ظ)، ارض (ظ)، ضرر (ظ) کی .

لسانمده قولانیلان کلمات عربیه ضادلرینک هانکیسی « ض » و هانکیسی « ظ » کی اوقونا جغنی کوسترمک لغت کتابلرینک وظیفه اساسیه سندن ایسه ده بو وظیفه یی ایفا ایدر هنوز بر لغت کتابمز موجود اولمادیغدن کتابک خاتمه سنده هر ایکی صورتله اولان ضادلی کله لرک بعضلی یازیلا جقدر .

ذ، ظ، ز — ترکیه ده [ذ، ظ] اولمادیقندن بو حرفلرک صدالری
ویرمک ایچون « ز » یازمایدیر .

ک — اوچ درلو اوقون کاف ترکی یوقاروده ذکر و بیان اولوندی .
[املا] ترکیه برکلهده مطلقا کافدن صوکره « کاف نونی »
کلوب ایکی کاف بر اراده جمع اولورسه اول وقت کاف نونی
« ن » رسمنده یازیلیر .

ککش = کنیش } کبی
ککز = کنیز }



حروف شمسیه - حروف قمریه

چوق کره عربی اسملرک اولنه حرف تعریف دینیلان
شو : (ال) کله می کلیر و بو اعتبارله یکر می سکز حروف هجا
عربییه ایکی قسمه آیریلوب بر قسمه « حروف شمسیه » و دیگر
قسمه دخی « حروف قمریه » دینیر .

حروف شمسیه : [ت، ث، د، ذ، ر، ز، س، ش، ص،
ض، ط، ظ، ل، ن] حرفلرندن عبارتدر که بونلردن برینک
اولنه « ال » کله می داخل اولدینی زمان مذکور کله نک لامی
اوقونمادینی کبی حروف مذکورهده تشدید ایله اوقونور .

مثال :

التوبة - الثبات - الدلالة - الذكر - الزيادة - السماء -

الشمس - الصّلاح - الضّحی - الطّواف - الظّاهر - اللّازم
- النّاس .

حروف قمریہ : [ا ، ب ، ج ، ح ، خ ، ع ، غ ، ف ،
ق ، ک ، م ، و ، ه ، ی] حرفلرندن عبارتدرکه « ال » حرف
تعریفنک لامی کندیلرندہ لفظاً ظاہر اولور . فقط حروف
شمسیہ کبی تشدید ایله اووقونما یوب حرکہ اصلیه سیله تلفظ
اولونورلر .

مثال :

الارض - الباب - الجواب - الحاج - الحنفی - العزة -
الغائب - الفجر - القمر - الکتابه - المؤمن - الولد -
الهجرة - الیوم .

[اخطار] ترکیه کلماتک اولنه هیج بر زمان حرف تعریف
الحاقی جائز اولامااز .

{ حرکه }

حرفلرک اووقونا ییللمه سی ایچون حرکه یه محتاج اولدقلری
بوقاروده ذکر اولونمش ایدی . حرفلرک آغزندن جیقیدی
کبی اووقونمه لرینه خدمت ایدن بر طاقم اشارتلر واردرکه اینشته
آنلره « حرکه » دینیر .

عرب مجده اولدینی کبی لسان عثمانیده دخی اوج درلو حرکه
وارددر. آنلرده: عربلرک فتحه، کسره، ضمه تسمیه ایندکلری
اوستون، اسره، اوتره در.
اشبو حرکه عثمانلی لساننده ایکی یه آریلوب برینه «حرکه
رسمیه» دیکرینه «حرکه حرفیه» نامی ویریلیر.

حرکه رسمیه — لسان عربدن آلمان مذکور اوج حرکه نك
اشبو [ب، پ، ب'] اوج اشارتله کوستریلنلریدر که برنجی
واوچنجی اشارت فتحه و ضمه ایچون قوللانیلوب حرفلرک
اوستونه وایکنجی اشارت دخی کسره ایچون قوللانیلوب
حرفلرک آلتنه وضع اولونور. [*]

اشارت مذکوره ترکیه کله لردن (ضرورت اولمادقجه)
حذف اولونور. فقط حرفلر مذکور اشارتله قونلمش کبی
اوقونور.

ذکر اولونان حرکات رسمیه نك ایکیشر قات اولملرندن
عبارت برر نوعلری ده وارددر که اسمنه «تنوین» دینیلوب
عربی کله لرده استعمال اولونور.

تنوین اسمک آخرینه ساکن نون حرفی کتیرمکدر. بو
نون یالکیز اوقویشده ظاهر اولوب رسم خطده یازلماز، آکا

[*] اشبو اشارات قرآن کریمی لحن وخطادن حفظ ایچون اوائل
اسلامده ایجاد واختراع اولونمشدر.

بدل تنوین اشارتی وضع اولونور . اسمک آخرینک مفتوح ،
مکسور ، و یا مضموم اولسنه نظر آ تنوین اوج درلودر که اشارتلی
شونلردر : [بَ ، بِ ، بُ] ،

مثال :

یا زیلشلی	اوقونشارلی	تنوینک نوعی
طَوْعًا	طَوْعَنَ	مفتوح
أَسَاسًا	أَسَاسَنَ	»
عَنْ قَصْدٍ	عَنْ قَصْدِنَ	مکسور
بِمَصْلَحَةٍ	بِمَصْلَحَتِنَ	»
أَلْمَأْمُورُ مَعْذُورٌ	مَعْذُورُنَ	مضموم
أَلْعَدْلُ حَسَنٌ	حَسَنُنَ	»

{ ضوابط }

کلمات عربیه نك رسم خطی ایچون حرکه و سکوندن ماعدا
بر طاقم ضوابط و علامات دها واردر که آنلرده بوجه آیدر:
شده — شو (-) اشارتدن عبارتدر که بر حرفی ایکی
کره اوقوتمی ایچون قوللانیلوب حرفلرک اوزرینه قونور .
هر نه وقت کلمه بر جنسدن ایکی حرف یان یانه کلوبده

برنجیسی حرکه سز ، ایکنجیسی حرکه لی اولورسه ادغام اولونمق
یعنی برنجی حرفی [*] حذف اولونوب آکا بدل ایکنجی حرفک
اوزرینه شده اشارتی قونمق قواعد لسان عربدنر: حدت ،
شدت کله لری کبی که اصللری حدوت ، شدوت ایدی .

کلمات ترکیه ده بو قاعده معتبر اولمایوب بر جنسدن یان یانه
کلن حرفلر ایکی کره یازیلیر : الله مک ، تله مک ، بلله مک کبی .
یاصی ، اوقه ، اسی ، اصی [*] کبی کله لر شاذدر . عربیده
مستعمل اولان اشبو شده اشارتی اصلا الفک اوزرنده بولونماز .

مر — شو (~) اشارتدن عبارتدر که الف حرفنه
مخصوصدر .

بوندن باشقه لسان عربی وفارسیده فتحه ، کسره ، ضمه یی
مد ایتک ایچون (و ، ی ، ا) حرفلری قوللانیلوب
«حروف مد» اسمی آلیرلر . بونلردن الف فتحه یی مد ایدر:
ضابط ، خاور کله لرنده اولدینی کبی .

اگر مد اولونان فتحه الفک حرکه سی ایسه ایکی الف
بر آرایه کله مک ایچون بر الف یازیلیر اما اوزرینه مذکور مد
اشارتی وضع اولونور : آمر ، آهن کله لرنده کی مد لر کبی .

[*] برنجی حرفه «مدغم» وایکنجی حرفه «مدغم فیه» دیرلر .

[**] اسی : صاحی ، بر شیشه مالک اولان . اصی : صیجاق .

یا کسرمبی مد ایدەرك اکثریتله آلتنه شو () اشارت قونور،
(حبیب ، ریگدان) کلمه لرندە اولدینی کبی .

واو ضمه پی مد ایدرە . (مجنون ، دلسوز) کلمه لرندە اولدینی
کبی .

وصل — شو (ˆ) اشارتدن عبارتدر که عربی کلمه لردە
اوقونما یا جق همزه نك (*) اوزرینه آتیلیر : آ

قطع — شو (ء) عین بتری شکندە اولان اشارتدن عبارتدر که
بو دخی عربی یه مخصوص اولوب مفتوح اوقونما جق همزه نك اوستنه
ومکسور اوقونما جق همزه نك آلتنه قونور : آ

حرکه صریفه — یالکز ترکیبه یه مخصوص اولوب « حروف
املا ، دینیان [ا ، ە ، ی ، و] حرفلرندن عبارتدر . اشبو
حروف املانك باشلیجه خدەتی اوست طرفندە کی حرفك
حرکه سنی کوسترمکدر . اوست طرفندە کی حرفك حرکه سنی
کوسترمدیکی تقدیرده حرکه اعتبار اولونما یارق باشلی باشنه
حرف صاییلیرلر : او ، کوی کلمه لرندە اولدینی کبی ،

بونلردن (ا ، ە) اوستونه (ی) اسره یه (و) اوتروه
بدل قوللانیلیر . نته کیم « احمد بورجنی اوده دی » جمله سنندە کی
(اوده دی) کلمه سنه نظر اولوندقدە واوک اوتره هانك اوستون
یانك دخی اسره مقامندە قوللاندینی نمایان اولور .

[*] اشبو همزه یه (همزه وصل) تسمیه ایدرلر .

حرفلرک او قونشجه بعضیسی اینجه و بعضیسی دخی قالین اولدیغنه و حرکهلر ایسه حرفلره تابع بولوندیغنه کوره مذکور حرکهلر خفیف و ثقیل نامیله ایکیسر قسمه و بواقسامدن باشقه اوتره دخی آروجه مبسوط (آجیق) ، مقبوض (قبالی) نامیله ایکی قسمه دهآ آریلوب ترکیهک حرکات طبعیه سی سکره بالغ اولمشدر که یازیلشلری بروجه آتیدر .

تَهْ تَهْ
تَهْ تَهْ

قحه } () (٤٥) فتحه خفیفه (اینجه اوستون) سن ، دره ، تپه
() (١) فتحه ثقیله (قالین اوستون) آغز ، بارداق

کسه } () (ی) کسره خفیفه (اینجه اسره) بز ، ایز
() (ی) کسره ثقیله (قالین اسره) آجیق ، صاجیق

ضمه } (') (و) ضمه خفیفه مبسوطه (اینجه آجیق اوتره)
درت ، کؤز ، سؤز
(') (و) ضمه ثقیله مبسوطه (قالین آجیق اوتره)
طقمان ، قول ، چوق
ضمه } (') (و) ضمه خفیفه مقبوضه (اینجه قبالی اوتره)
گل ، اوزوم ، توتون
(') (و) ضمه ثقیله مقبوضه (قالین قبالی اوتره)
شو ، بنو ، چوقوز

بالادہ کی مثال لردن دخی آکلاشیلہ جنی اوزرہ (ضمۃ خفیفۃ
مبسوطہ) اینجہ ودواقلر براز آجیلہ رق (ضمۃ ثقیلۃ مبسوطہ)
قالین ودوداقلر آچیق و براز اوزانارق تلفظ اولونان (ضمۃ
خفیفۃ مقبوضہ) اینجہ ودوداقلر براز صیقیلار اق و (ضمۃ
ثقیلۃ مقبوضہ) دخی قالین ودودقلری صیقوب اوزادارق
اوقونان ضمہ در .

ترجہ کلمہ لری (دیگر لسان لردن آلنان کلمہ لری دکل) ترکیب ایدن
ہجاءلر بینندہ آہنکجہ موافقت بولونمق یعنی کلمہ خفیف حرکہ
ایلہ بدأ ایدرسہ صوکرہ کی حرکہ لری دخی خفیف واکر ثقیل
حرکہ ایلہ باشلارسہ صوکرہ کیلر دخی ثقیل تلفظ اولونمہ سی
شیوۃ لسان ترکی مقتضاسندندر . کوسترمک ، اوقومق ، کیرمک ،
چیقمق کی . فقط قہوہ ، لیمون کی کلمہ لری اساساً ترجہ
اولمدقلرندن بونلردہ آہنکی محافظہ ایتک مقتضی اولمدینی کی
آہنک خارچندہ قالان بعض ترجہ کلمہ لری دخی شان اولارق
قبول اولونور . ایسانمق کی .

{ کلمہ }

معناسی اولان ہر بر لفظہ کلمہ دینیر .
لفظ ، انسانک آغزندن نطق طریقہ چیقان شیئہ دینور .
الفاظک معنایہ دلالتی ایکی طریقہ در .

۱ — وضعیبر: انسان، طاش، میوه کبی.

۲ — طبیعیبر: اوکسوریک و بوکا عمائل اوله رق حالات طبیعییه دلالت ایدن اصوات کبی.

تفهیم و تفهیم خصوصاً رنده دلالت طبیعییه نک اهمیت اولمادیغندن بورادن بحث ایتیه جکز.

دلالت وضعیه نک اقسام و تعریقاتی «میزان المقال» نام منطق کتابمزده مفصلاً بیان ایدلدیکندن اورایه مراجعت لزومی توصیه اولونور.

{ الفاظك اقسامی }

الفاظ ايله انلرك دلالت ايتدكلرى معنالر بيننده كى نسبتته نظراً الفاظ، (الفاظ مترادفه)، (الفاظ متباینه)، (الفاظ متفقه)، (الفاظ منفرده) ناميله درت قسمه آریلیر.

الفاظ مترادفه — ایکی وایکیدن زیاده لفظلرك بر معنایه دلالت ایتیه سنه «ترادف» و او لفظلره ده ایری ایری «مترادف» دینور: ایدینلق، ایشیق — ایت، کوپك — انسان، بشر، آدم کبی.

الفاظ متباینه — بهری ایری ایری معنالر دلالت ایدن لفظلره «متباین» تسمیه اولونور: طاش، طوپراق، انسان، اغاچ کبی. متباین لفظلر بیننده بعض کره بر نوع مشکالۀ لفظیه بولونور. اگر بو مشکاله معنایه عائد ایه او لفظلره «الفاظ مشتقه» اطلاق اولونور: کلن، کلیجی — حاکم، محکوم کبی. و اگر مشکالۀ مذکورده معنایه عائد و تابع دکاسه «الفاظ متجانسه» نامی ویریلیر: خلق، خلق — رجل، رجل — نفس، نفس — دكمك، دكمك کبی.

[اخطار] — لغتکړک اصلی تحری اولونما یارق اکثریا الفاظ متباینه مرادف ظن وعد ایدلدهکړی جهته بوخصوصه بغایت اعتنا ایتک درجه وجوده در نته کیم : سیف، حسام - مرور، عبور لفظلری مترادف ظن ایدلمکده ایسه ده اصللرینی آراسه ق «سیف» مطلقا قلیج، «حسام» کسکین قلیج «مرور» مطلقا کچمک و «عبور» صودن کچمک معناسنه کلدیکی تظاهر ایدر .

الفاظ متفقه — بهری بر قاج معنایه دلالت ایدن لفظلره «الفاظ متفقه» دینیر . بوده ایکی قسمدر، شویله که :

اگر الفاظ متفقه دلالت ایتدکړی معانیدن اولجه بر ویا بر قاجنه موضوع ایکن بالاخره مشابهت ویا سائر بر مناسبتله دیکر معنالره اطلاق اولونورسه بو مثللو لفظلره «الفاظ متشابهه» دیرلر. انسانک آدم و آدم صورته دلالتی کبی .

اگر لفظک دلالت ایتدیکی معنالر وضع جهتیه مساوی ایسه لر بو مثللو لفظلره دخی دلالت ایتدکړی معانیدن بهرینه نسبتله «الفاظ عجمه» وجهلشنه نسبتله «الفاظ متشارکه» اطلاق اولونور . «یتمک» لفظنک هم نشو ونما وهمده انتها بوله یه، «کوز» لفظنک چشم، صو بیکاری، ترازینک بر قطعه سی و بوکا مماثل معنالره، و «چرخ» لفظنک کوکه، واپور چرخنه، اوستوره جی چرخنه دلالتی کبی .

بر لفظ متشابهک اولجه وضع اولوندینی معنادن آخر معنایه اطلاق علی سبیل التساوی اولورسه اکا «نقل مجرد» واکر من جهة الترجیح اولورسه آکا «نقل متعارف» دینور .

نقل متعارف دخی یا عمومک توافقیله ویا خود بر قومک ویا اهل فن وصنعتک توافق و ترجیحیه حاصل اولور. برنجیسنه «عرف عام» یاخود «تعارف» ایکنجیسنه «عرف خاص» یاخود «اصطلاح» تعبیر اولونور .

نقل مجرده مثال :

آی، یاش، یان، صول کبی. چونکه بو لفظلر هم وضع اولوندقلری
معنالر و همده جهت ومدت معلومه ایله ایضلاق معنارینه مساوات
اوزره دلالت ایتمکده درلر.

تعارفه مثال :

روزکار، دابه، مرکب، مسافر کبی. چونکه بو لفظلر وضع
اولوندقلری معنالر دلالت ایله دیکی کبی عمومک توافقه استناداً «روزکار»
متوج هوا «دابه» آت «مرکب» حیوان معهود «مسافر» مهمان
معنارنده قوللانمشدر.

اگر لفظ معنای لغویدن بر معنای شرعی به نقل ایدلش ایسه اکاده
«عرف شرعی» دینور. مثلاً صلات لفظی لغة دعا معناسنده مستعمل
اولدینی حالده شرع اصطلاحنده نماز معناسنه وضع اولونمشدر.

عرف خاصه مثال : بغدادی، دنک، فعل کبی. چونکه
بونلر لغة موضوع اولدقلری معانی معلومه ده مستعمل ایکن حسابیون
اصطلاحنجه «بغدادی» بر درهمک التمش درتده برینه، «دنک» درتده
برینه، فعل لفظی دخی نحو یون اصطلاحنجه کلدی، کلیور کبی کلهلره
دینور.

الفاظ منفرده — یالکز بر معنایه دلالت ایدن لفظلره «الفاظ
منفرده» دینور که اقسام وتفصیلاتی محل مخصوصنده کله جکدر.

یوقاروده اسمی کچن کله اوچدر. انلرده : اسم، فعل، حرفدر.

اسم — زمان قیدی اولمق سزین باشلی باشنه بر معنی افاده
ایدن شیدر : احمد، کتاب، قاره، شو، بو، کندی کبی.

فعل — معناسی اوج زمانك برینه مقترن و مصاحب حدث اولان کلمه در : کلدی، کله یور، کله جک کبی.

اوات — باشلی باشنه معنی افاده ایتمه یوب بر فعل و یا اسمک یاردیمیه معنی افاده ایدن کلمه در : کلدیمی کله سنده کی « می » لفظی کبی که کلدی فماتك یاردیمیه سوال معناسی افاده ایدر . لکن یالکیز « می » دیناسه هیچ بر معنی افاده ایتمز .



— برنجی مقاله —

{ اسم }

اسم — (اسم مطلق، صفت، کنایات، مصدر) نام لریله درت قسمه آریلیر که بونلرک هر بری برر بایده بیان اولونا جقدر .

{ باب - ۱ }

{ اسم مطلق }

اسم مطلق — زمانه دلالت ایتمه یهرک خارجده موجود اولان و یا موجود اولما یوبده عقل و خیال و یا خود حس ایله بیلتن شیلری آچیقدن آچیفه بیلدیرن کله لره دینور : [انسان، آت، جنت، ملک، عنقا، آجی، قاتی] کبی که بونلردن

(انسان، آت) خارجدہ موجود اولدقلری ایچون حس وعقل
ایله بیلندکاری کبی (جنت، ملک) یالکز عقل ایله (عنقا)
خیال و (آجی، قاتی) دخی یالکز حس ایله بیلنیر .

اسم مطلق مدلولی خارجدہ موجود ایسه یعنی قابل لمس
ورؤیت ایسه اکا (اسم عین) ویا (اسم ذات) واکر دکل
ایسه (اسم معنی) دینور . نته کیم : (باش، اغاج، طاش)
اسملری اسم عین و (الم، کدر، عقل) اسملری اسم معنادر .

اسم هنیس — علم :

اسم مطلق ایکی درلودر . برینه «اسم جنس» دیرلر که
بر جنسک هر فردینه آری آری سویله نه بیان اسمدر :
(انسان، اغاج) کبی که هر آدمه آری آری انسان وهر
اغاجه، اغاج دینلمک صحیح اولور .

دیگرینه «علم» دیرلر که یالکز بللی برشیئه اطلاقی صحیح
اولور : (مکه، طونه) کبی که هر شهره مکه وهر نهره طونه
دینله میوب یالکز معلوم اولان بلدة مقدسه ایله مشهور اولان
صویه اطلاق اولونور .

قطعه، مملکت، قصبه، کوی، دکر، ایرماق، نهر، کول، طاغ،
آله وسائر کبی جغرافیا اسملریله بالعموم انسان وعطارد، زهره کبی
کواکب اسملری علمدر .

عدد قبول ایدن اسملر «اسم جنس» در . یعنی : اسم جنسلر
صاییلر . علملر ایسه صاییلماز . مثلاً : اوج الما، بش آرمود،

سکز قویون ، طقوز کچی دینیاوب بش علی ، سکز مصطفی ، ایکی ادرنه دینلمز .

بناءً علیه علم ایله اسم جنسی طانیق ایچون اولنه بر صائی کتیرملی .
اگر معنی صحیح اولورسه اسم جنسی والا علمدر .

اسم جنس لرك اولنه « بو ، شو ، او » کتیریلیرسه علم لركی معرفه اولوب بر فرد معینه دلالت ایدر : او شهره کیتدم . شو آته پندم دینیلیر که معلوم اولان آته پندم ، شهره کیتدم دیمک اولور .

نمونه

آشاییده کی اسملردن هر بری « اسم جنس » می ، یوقسه « علم » میدر ؟ خارجه موجود میدر ، دکلیدر ؟ عقل و خیال وحسدن هانکیسیله بیلینیر ؟

او . بروسه . طاغ . چوجق . ادرنه . علم . جان .
بری . عقل . دکر . شام . اکشی . یومشاق . جهنم .
الما . طاش . قویون . اریک . مالتبه . قاکلیجه .

سؤال — کله قاج قسمدر ؟ اسم نیه دیرلر ؟ اسم قاج قسمه آیریلیر ؟ اسم مطلق قاج قسمدر ؟ اسم جنس نیه دیرلر ؟ علم نیه دیرلر ؟ بونلره مثال کتیریکز .



[خاصیت اسماء]

اسملرده « کمیت » ، « کیفیت » نام لریله ایکی خاصیت واردر .
کمیت — بر اسمک مفرد و جمع اوله سیدر . ترکیه اسم

جذسلر برشیئی بیان ایدرسه آکا «مفرد» و بردن زیاده شیئی
 بیان ایدرسه آگاده «جمع» دینیر .
 بر اسم مفردی ترکیه جمع یایمق ایچون آخربنه ترکیه
 ادات جمع اولان (لر) لفظی الحاق ایدیلیر : اولر ، کیمیر
 کبی .

شیوه — صوک هجاسی حرکه ثقیله ایله نهایت بولان اسم
 مفردلره «لر» ادات جمعی الحاق اولوندقده «لار»
 کبی او قونمق شیوه لسان ترکی مقتضاسندندر : قوش
 — قوشلر (قوشلار) ، طاش — طاشلر (طاشلار) ،
 لیمون — لیمونلر (لیمونلار) کبی .

علملر جمع ایدازلر . فقط بر اسمده اولان افرادی بیان ایتک ویا
 بر اسمده بولونان شخصلره تشبیه مرام اولونورسه ویا خود مشهور
 قاملیا اسملری اشعار ایدلک قصد ایدیلیرسه اول وقت علملر جمع
 ایدیه بیلیرلر : (نابولونلر) — (فارییلر ، ابن سینالرشرقده یتشمشلدرد)
 — (غوللر ، بوربونلر) کبی .

کلامده شدت و مبالغه کوسترمک مقصود اولورسه ینه علملر جمعلیر:
 سلطان محمد ، اسکندرلره بیه غبطه بخش اولش برسطوت جهانگیرانه به
 مالک ایدی کبی .

بعض اسملر واردر که لفظلری مفرد اولدینی حالده جمع معناسنی
 افاده ایدرلر . بویه اولان اسملرده «اسم جمع» دینور : سوری ،
 اردو کبی .

یوقاروده بیان اولوندینی اوزره بردن یوقاروسنه جمع دینور . مثلاً
 آتلیر دنیلدهکده بردن یوقاری الی نهایت آتلیر مجموعی آکلاشلیر . بنا علیه

جمعك تحديدي قصد اولونورسسه اسم جنس ، اسماء اعداددن بريله
برلكده كتيريلوب اصلا « لر » اداتي آماز . مثلا : اوچ ليون ، بش
پورتقال دنيلوب اوچ ليونلر ، بش پورتقالر دينلمز .

[تنبيه] عبارات تركيه آراسنده مستعمل عربى و فارسى
اسملرى تركيه « لر » اداتيله جمعلندرمك جائزدر : (ضابطلر ،
خانه لر) كې .

نمونه

آشاغيدهكى اسملردن مفرد اولانلرى جمع و جمع اولانلرى مفرد ياپيگز .
اكك . سودلر . شكر . قلم . كاغلدر . بارداق .
صاعت . كمى . قايقار . باغچه . چانطه لر . سجاده .
تسبيح . چشمه . دكنكلر . آراهه .



كيفية — اسملك مذكر ومؤنث اولمه سيدر . مذكر
(ارلك) ، مؤنث (ديشى) ديمكدر .
تركيه اسملك مذكر ويا مؤنث اولديفننه دائر علامت
مخصوصه يوقدر . آنجق مذكر بر اسمى بيلدرمك ايچون
اسمك اولنه « ارلك » ومؤنث بر اسمى اشعار ايچون « ديشى »
كلهسى كلير : ارلك كدى ، ديشى كوپك كې .

بعض اسملك اصلنده مذكرلك ويا مؤنثلك اولديغندن بو كې اسملك
اولنه ارلك ويا ديشى كلهلرى كتيرلر : اينك ، طاووق — اوكوز ،
خروس كې كه ديشى اينك ، ديشى طاووق وكذا ارلك اوكوز ،
ارلك خروس دنيلمز .

اسم جنسار کنديلرينه بعض اداات علاوه سيمله مختلف معنار بيان ايدرلر. بوحالده بروجه آتی اسملری تشکیل ايدرلر.

اسم مظهره — مکان بیلدیرن یعنی بر شينك يرينی کوسترن اسملره « اسم مکان ، دینور . بوده یا (اصلی) و یا (قیاسی) اولور .

اسم مکان اصلی ، کندينه بر اداات علاوه اولونمقسنزين طوغريدن مکان معناسی بیلدیرن اسملردر :
او ، اوطة ، تارالا ، آخور کبی .

اسم مکان قیاسی ، قاعده ایله یایی-لانلردر . شویله که :
هجاسی خفیف اولان اسملره « لك » و ثقیل اولانلره « لق »
الحاق اولونورسه قیاسا اسم مکان اولور . چيچكلك ، ليمونلق کبی .

« لك » ، « لق » لفظلرينك الحاقيله اسم بر محل ارائه ایدرسه اولوقت اسم مکان اولور یوقسه اسم مکان اولمایوب سائر معنایه دلالت ايدر . بو خصوصه زیاده دقت لازمدر . نته کیم مذکور ادااتلر اسم عددلره لاحق اولورسه بر نوع صفت اولور : يکيرميك آلتون کبی .
اسم مکان اصلیلره زمان بیان ایدن اسملره لاحق اولورسه نسبت معناسنی مشعر بر نوع صفت اولور . جنتلك آدم ، اوطةلق جاریه ، قیشلق قاپوط کبی .

اگر صفتلره لاحق اولورسه معنای مصدری افاده ايدر : بيوكلك ، کوچكلك کبی .

مصدر اصليلرك ادااتی « آق » لفظنه تبدیل ایله دخی اسم مکان

پایله بیلیرسه ده بو صورت مطرد اولارق هر مصدردن پایلامایوب بعض مصدرلره مخصوصدر .

یاتمی — یاتاق
 باتمی — باتاق
 اوطورمی — اوطوراق
 قونمی — قوناق
 طورمی — طوراق .. کبی .

اسم مکان ، کړك اصلی اولسون وکړك قیاسی اولسون
 « لر » ایله جمعنیر .

اسم مکان		ادات مکان	اسم
جمع	دیکندکړ	لک	دیکن
	کومورلکړ	لک	کومور
	چالیکلر	لق	چالی
	اودونلقلر	لق	اودون
مفرد			
		دیکندک	
		کومورلک	
		چالیک	
		اودونلق	

قوش اسملری اولان (ککلك ، چوللق) کبی کلهلرک آخرنده کی
 « لك ، لق » نفس کلهدن اولدینی ایچون بونلر اسم مکان اولاماز .
 اشبو اسم مکان اداتی اولان (لك ، لق) کلهلری اکثریتله کثرت
 افاده ایدرلر: چاللیق، طاشلق کبی که چالسی وطاشی چوق بر دیمکدر.
 بعضاً کثرت معناسنی متضمن اولماز: قاووللق کبی .

نمبرین

آشاییده کی کلهلردن اسم جنس اولانلری « اسم مکان » واسم مکان
 اولانلری اسم جنس یاپیکز .

طاش . اغاج . لیونلق . قیا . میشلک . اورمانلق .
چن . باغلق . خرما . طوزلق . بیبر . اودوناق . پرنار .
پورتقالاق . چیچک . دفه . قوم . پاوج .

سؤال — مفرد نیه دیرلر ؟ جمع نیه دیرلر ؟ ترکیه اسملر
نصل جمع یاپیلیر ؟ اسم مکان نیه دیرلر ؟ قاچ قسمدر ؟ براسمی ،
اسم مکان یاغی ایچون قاعده ندر ؟



اسم تصغیر — تصغیر، کوچلتمک دیمکدر . بو اسمده
مدلولنک کوچکلکنی بیلدردیکی ایچون «اسم تصغیر» دینور .
ترکیهده اسم تصغیر، اسمک آخرینه [جک، جکز - جق،
جغز] اداتلرینک علاوه سیله یاپیلیر . شو قدرکه (جک، جکز)
صوک هجاسی خفیف و (جق، جغز) ثقیل اولان اسملره
لاحق اولور .

اسم — دره . کوی . اوطه . قوش
اسم تصغیر — دره جک . کویجکز . اوطه جق قوشجغز
کی .

بر هجالی اولان اسملره اکثریا «جکز، جغز، الحاق
ایدیلیر : اوجکز، یرجکز، قوشجغز، اوتجغز کی .
ایکی وایکیدن زیاده هجایی حاوی اولان اسملره [جک،
جکز - جق، جغز] دن هر بری الحاق ایدیله بیلیر . «قلمجک
- کتابجق، دینلیدیکی کی «قلمجکز - کتابجغز» دخی دینیلیر .

لسانه هانکیمی خوش کلیرسه او ترجیح اولونور . مثلا :
 یمکجک - بارداجق دیمکدن یمکجکز - بارداجقز - دیمک لسانه
 ده خوش و طاتلی کلدیکندن البته ترجیح اولونور .

ایکی ساکن ایله نهایت بولان کله لره «جک» و «جق» الحاق پک
 زیاده ثقیل اولسی جهتیله بوکبی کلماته یالکز «جکز»، «جقز» الحاق
 لازمدر . مثلا «فرنک»، «کنج» کله لرینک تصغیرنده «فرنکجک»،
 «کنججک» دیمکدن زیاده (فرنکجکز، کنججکز) دیمک سلیقه ده
 زیاده مساعددر .

[قاعده] «جک»، «جق» الحاق اولونان کله نک آخرنده
 قاف و یا کاف بولونورسه اشبو قاف و کاف حذف واسقاط
 ایدیلیر : (دوشهک - دوشه جک)، (اشک - اشه جک)، (قولاق
 - قولاجق)، (دوداق - دوداجق) کبی .

ادات تصغیر اولان «جک» ایله «جق» بعض صفتلرک آخرینه علاوه
 اولونارق اادات مبالغه اولور . «کورپه جک» - قیسه جق ، کبی که پک
 کورپه، پک قیسه دیمک اولور .

بعض صفتلرک آخرلرینه الحاقلرنده صفتلرک آخری تحریک ایدیلیر :
 «آزاجق - آزیجق - طاراجق» کبی .

بیوک، کوچک صفتلرینه الحاقنده جیملرک کسره سی فتحه یه تبدیل
 اولونور : بیوجک - کوچیجک کبی . فقط یوکسه جک، بیوجک کبی
 صفتلرده مذکور ادا تالر مبالغه دکل، اادات تقلیلدر . زیرا «یوکسه جک»
 یوکسکجه «بیوجک» بیوکجه دیمکدر . والحاصل بونلر هر صفته صورت
 مطرده ده الحاق ایدیله مدیکی جهته سماعیدرلر .

[اخطار] — (کرك مبالغه و کرسه تقلیل مقامنده اصلا
 «جکز - جقز» استعمال اولونماز .)

لسان عثمانیده مستعمل عربی و فارسی اسملری قاعدۀ ترکیه اوزره تصغیر و عبارۀ ترکیه آراسنده استعمال ایتک جاؤزدر : دکانجق - خانه جک کبی .

قاعدۀ ترکیه اوزره یاییلان اسم تصغیرلر عمومیتله «لر» ایله جمعه نیر : دره جکلر، اوطه جقلر، کویج-کزلر، قوش-جغزلر، خانه جکلر، دکانجقلر کبی .

تصغیر

آشاغیده کی کله لردن اسم اولانلری، اسم تصغیر و اسم تصغیر اولانلری دخی اسم یاییکز :

دستی تپسیجک . یر . اوواجق . آدم . قوزی . اوغلانجق . باش . دیز . دوداجق . طولاب . قیاجق . قولاق . بارداق . یتاق . الما . بیک . قاز ، بل .

سؤال — اسم تصغیر نیه دیرلر ؟ بر هجالی اسملر نصل اسم تصغیر یاییلیر ؟ بردن زیاده هجالی اسملر نصل تصغیر یاییلیر ؟ اسم تصغیرلر نه وجهله جمع قیلنور ؟ آخرنده قاف و یا کاف اولان اسملرک تصغیری نصل اولور ؟



اسم آلت — بر ایشک اجراسنه واسطه اولان شیئی بیلدیرن اسمدر . اسم آلت، اصلی و قیاسی اولق اوزره ایکی قسمدر .

اصلی : طوغریدن طوغرییه بر آلتیه دلالت ایدن
اسمدر : بالطه، بیچاق ... کبی .

قیاسی : ادوات اعانه سیله فعللردن باییلانلردر . شویله که :
ماده فعللره [ک .. ق - کبی - گو - قی - غی - غو - کبیج -
آج] الحاق ایدیلیرسه ده بوصورت هر ماده ده جاری اولدیغندن
بونک تشکیلی ده سماعیدر .

ماده فعل	اسم آلت
اله	الهک
کوره	کورهک
طرا	طراق
کس	کسکی
سوز	سوزکو
سور	سورکو
باص	باصقی
صار	صارغی
بور	بورغو
قیص	قیصاج
سوز	سوزکبیج ... کبی .

بونلر دخی دیگر اسملر کبی « لر » ایله جمعله نیر : سوزکیلر ،
بورغولر کبی .

تعمیر

آشاغیده کی کلمه لردن اسم آلت اولانلری کوستریکز . اسم آلت اولانلری دخی اسم آلت یاییکز .

آناختار . چاپه . باصق . الهمک . قاصق .
صارخی . سوزمک . چووالدیز . کسکی . چالمق . اسقره .
بورمق .

سؤال — اسم آلت نیه دیرلر؟ اسم آلت قاج قسمدر؟
قیاساً اسم آلت نصل یاییلر؟

§

اسم مسوب — آشاغیده صفت قیاسیه بختنده ذکر
وبیان اولونا جقدر .



[احوال اسماء]

اسملر باشلیجه دزت حال اوزره بولونور . او ، دزت
حال دخی [مجرد ، مفعول به ، مفعول الیه ، مضاف الیه]
حالدیر . [*]

[*] احوال مذکوره بحث مخصوصنده انواع سائره سیله برلکده
مفصلاً بیان ایدیلر جک ایسه ده صرفک بعض بختلرینی اکلایه مدار
اولق اوزره بالکز بو دزت حالک بوراده ذکر و بیاننه لزوم کورولمشدر .

مجرد — کندیسنه بر شی علاوه اولونما یارق هیئت اصلیه سیه
قوللانیلان اسمدر : او ، اکمک ، بارداق کبی .

مفعول به — مجردك آخری حرکه حرفیه ایله مکسور
قیلنان اسمدر که بو حالده مجردك آخرینه بر « ی »
اقتضا ایدر : اوی ، اکمگی ، بارداغی کبی .

مفعول الیه — مجردك آخری حرکه حرفیه ایله مفتوح
قیلنان اسمدر که بو صورتده مجردك آخرینه بر « ۰ ، ۰ ، ۰ »
علاوه سی ایجاب ایدر : اوه ، اکمکه ، بارداغه کبی .

مضاف الیه — مجردك آخری حرکه رسمیه ایله مکسور
قیلندقدن صوکره ساکن بر « ک » کاف نونی [*] الحاق
اولونان اسمدر : اوک ، اکمکک ، بارداغک کبی .

نمونه

آشاغیده کی عبارده (مجرد ، مفعول به ، مفعول الیه ، مضاف الیه)
خالنده بولونان کلمه لری آیریکنز .

انسان کوچک ایکن مکتبه کیدر ، درسه چالیشیر ، اوقور
بازار ایسه عالم اولور . انسان عالم اولورسه آنی هرکس سور .
هرکسک سودیکی آدم عزیز اولور .

اوقومایانی ، یازمایانی جاهل دیو کیمسه سومن ، اعتبار

[*] مذکور کاف اسکیدنبری « صاغر کاف » دینلمکه مشهوردره .

ایتمز . چو جقلمر ! سزده مکتبکزه کوزله کیدیکز . درسکزی
اوقوییکز ، یازیکزی یازیکز که بیودیککز وقت سزده عالمدر
دیو هر کس اعتبار ایتسون .

تعمیر دیگر

آشاغیده کی اسملرک درت حالی یازیکز .

باش . ال . طاش . باقر . اودون . دمیر . کمور .
قورشون . آتش . یاغمور . دکز . دومان . سپت .
آرمود . راف . فس . کوملک . چوراپ . دیز .

سؤال — اسملر قاج حال اوزره بولونور ؟ بولوندینی حاللرک

اسملری ندر ؟ بر اسم مجرد ، نصل مفعول به ، مفعول الیه ، مضاف
الیه یاییلیر ؟ بونلره مثال یازیکز .



{ قواعد مهمه }

[قاعده] — آخری حرکلی اولان یعنی حروف املا

اولان (و ، ی ، ا ، ه) حرفلرندن بریله نهایت بولان مجرد
اسملرک مفعول به ، . . . الیه ، حاللرنده آخرلرینه علاوه
اولونا جق (ی ، ه) دن اول بر « ی » و مضاف الیه حاللرنده
(لک) دن اول بر « ن » زیاده ایدیلیر .

مثال:

مجرد	—	قبو	تپسی	الما	دره
مفعول به	—	قبوی	تپسی بی	المایی	دره بی
مفعول الیه	—	قبویه	تپسی به	المایه	دره به
مضاف الیه	—	قبونک	تپسی نک	المانک	دره نک کبی

(صو) لفظنک مضاف الیہندہ «صونک» دینلمہ یوب شاذ اولہرق «صویک» دینور .

اگر اسمک آخرندہ اولان (و، ی، ا، ہ) حروف املادن اولمایوب اصل کلمدن جزء اولورسہ اول زمان مفعول ومضاف الیہ حالرندہ «ی، ن» زیادہ ایدلنز .

مثال:

مفعول به	مفعول الیه	مضاف الیه	مجرد
اوی	اوه	اوك	او
کوی	کویہ	کویک . . . کبی	کوی

(قاعده) — بردن زیادہ ہجائی حاوی اولان کلملرک آخرلرندہ کی ساکن قافلر حرک لندکدہ «غ» تبدیل اولونور .

مثال:

مجرد	—	ایرماق	اولوق	ایاق
مفعول به	—	ایرمانی	اولوغی	ایاغی
مفعول الیه	—	ایرماغه	اولوغه	ایاغہ
مضاف الیه	—	ایرماغک	اولوغک	ایاغک . . . کبی

[اخطار] بوقاعده آنجق ترکی الاصل اولان کلماته مخصوصدور . عربی و فارسی ویا اجنبی اسملرده بو تبدلات وقوعه کلنز .

اگر کلمه برهجالی اولورسه اول وقت قاف «غ» تحویل اولونماز .

مثال :

مجرد — اوق طوق . . .

مفعول به — اوقی طوقی . . .

مفعول الیه — اوقه طوقه . . .

مضاف الیه — اوقک طوقک . . . کبی [*]

(قاعده) — بردن زیاده هجایی حاوی کلمه لری نهایتلرنده بولونان ساکن کاف عربیلر [*] حرکه لندکده (گ) . کاف فارسی یه تبدیل اولونور .

(قاعده) — بردن زیاده هجایی حاوی اولان اسملرک آخرنده کی ساکن (چ) حرفی حرکه لندکده «ج» حرفه تبدیل اولونور .

[*] چوق ، یوق کلمه لری مستثنادر .

[**] کتاب لفظنده کی کاف کبی صدا ویرن کافلر : امک .

مثال :

مجرد	مفعول به	مفعول الیه	مضاف الیه
کوملک	کوملگی	کوملگه	کوملگک
چوملک	چوملگی	چوملگه	چوملگک
طویاج	طویاجی	طویاجه	طویاجک
کیرج	کیرجی	کیرجه	کیرجک

اگر اسم برهجالی اولورسه مذکورکاف وچیم (گ، ج) تبدیل اولونمایوب حالی اوزره قالیر .

مثال :

کوک [*]	کوکى	کوکه	کوکک
ترک	ترکى	ترکه	ترکک
اوج	اوچى	اوجه	اوجک
صوج	صوچى	صوجه	صوجک

نمونه

اشاغیده کی اسملرک درت حالی آیری آیری یازیکن

اووا . طوپراق . قیا . قیی . یلک . کشکک . چوربا .
 قاشیق . تپه . طالغه . قوی . چای . اویقو . قویو . دستی .
 دره . کولکه . درى . بیلک . دیرسک . قولاق . بوی .

[*] اغاچ کوکی .

صوی . خالی . اوتو . اورتو . کدی . کوپک . کمی . قوقو .
کوله .



{ اسماء عربیه }

لسان عثمانیده اکثریتله مستعمل اولان اسماء عربیه «اصلی»
و «ذو زیاده» اولمق اوزره ایکی قسمدن عبارت اولارق هربری
مختلف وزنلرده کلیر .



اسماء اصلیه — اسماء اصلیه جمیع حروفی اصل اولان
اسملردر . بونلرده : اوج، درت ویا بش حرفلی اولورلر که
هر بر لرینک وزنلری بروجہ آتی کوسه ترمشدیر :

ثَلَاثِي	عِنَبْ	ثَلَاثِي	عِنَبْ	ثَلَاثِي	عِنَبْ
حرفلی اولان اسم	حرفلی اولان اسم	حرفلی اولان اسم	حرفلی اولان اسم	حرفلی اولان اسم	حرفلی اولان اسم
اصیلرک اوزانی	اصیلرک اوزانی	اصیلرک اوزانی	اصیلرک اوزانی	اصیلرک اوزانی	اصیلرک اوزانی

دَفْتَرْ	دِرْهَمْ	زُبْرَجْ	زُحْزَفْ	قَطَرْ
دَفْتَرْ	دِرْهَمْ	زُبْرَجْ	زُحْزَفْ	قَطَرْ
دَفْتَرْ	دِرْهَمْ	زُبْرَجْ	زُحْزَفْ	قَطَرْ
دَفْتَرْ	دِرْهَمْ	زُبْرَجْ	زُحْزَفْ	قَطَرْ

سَفَرَجَلْ	حَجْمَرِشْ	خُزْعِيلْ	إِصْطَبَلْ
سَفَرَجَلْ	حَجْمَرِشْ	خُزْعِيلْ	إِصْطَبَلْ
سَفَرَجَلْ	حَجْمَرِشْ	خُزْعِيلْ	إِصْطَبَلْ
سَفَرَجَلْ	حَجْمَرِشْ	خُزْعِيلْ	إِصْطَبَلْ



ذو زیادہ — کندیسنہ شو [س . ع . ل . ت . م .
و . ن . ی . ہ . ا] اون حرفدن بعض حرف زیادہ قیلاندر:
(جوهر، سحاب، اکرام، تکریم، استفهام) ده اولدینی کبی .
زیرا بونلرک اصللری (جهر، سحج، کرم، فهم) مادهلری
اولوب بونلره صرہ سسیله [و، ا، ء، ا، ت، ی، ء، س، ت، ا]
حرفلری زیادہ قیلنمشدر .

ذو زیادہ اسملری قاموسدن بولق ومعانیسنہ واقف اولق مطلقا
انلرک اصللرینی بیلمه یمه متوقفدر . زیرا کتب معتبره لغت قاعده اشتقاقه
رعایتله ترتیب وتنظیم اولوندیغندن الفاظ مفردہ نک جمله سی مواد اصلیه
اعتباریلہ حروف هجا ترتیبی اوزره مرتبدر . شویله که : الفاظک مواد
اصلیه سنک برنجی حرفیلہ نہایتکی حرفنه رعایت اولونوب زائد اولان حرفلر
نظر اعتباره آلتامشدر . بوایکی حرفدن نہایتکی حرف «باب» واولکی
حرف «فصل» اعتبار اولونمش وهر باب حروف هجا عددنجه فصللره
تقسیم ایدلشدر .

مثلا : یوقاروده کی مثاللردن «جوهر» کله سنی قاموسده بولق ایچون
مذکور کله نک اصلی اولان جهر کله سنی تحری یتلی بونی بولق ایچونده
(اصل مذکورک نہایتی «ز» واولی «ج» اولدیغندن) را بابنک جیم
فصلنه وکذا «اکرام» و «تکریم» کله لرینی بولق ایچون میم بابنک
کاف فصلنه مراجعت ایتلیدر .

§

عربی اسم جنسملری ایله علملری ترکیبده مستعملدر .
شو قدر که اسماء عربیه عبارته ترکیه اراسنده استعمال اولوندینی
وقت اصلا اعراب معتبر دکلدر . دائما وقف حالنده تلفظ

اولونور . فقط (نحو قسمندہ کوریلہ جکی اوزرہ) مضاف
 وموصوف اولدقلری زمان کسر ایله اوقونور . فضیلت انسان
 طفل عاقل کی . کذلک تنوین دخی معتبر دکلدرد . لیکن کندیلرینه
 ادوات عربیه داخل اولدقلده ویا بر ترکیب عربیده بولوندقلرنده
 ویاخود حال ، تمیز واقع اولدقلرنده تنوین وحرف تعریف ایله
 استعمال اولونورلر : عن قصد ، لمصلحة ، سألماً کلدرد ، سنأ
 ینوکدر ، دارالتعلیم ، وجهاً من الوجوه کی .

§

{ کمیت اسماء عربیه }

لسان عثمانیده مستعمل اولان اسماء عربیه ترکیه « لر ،
 اداتیلہ جعلنه رک عبارة ترکیه میاننده قوللانیلدیغی اسماء ترکیه
 بخشنده بیان اولونمش ایدی . بعضاً دخی اسماء عربیه قاعده فارسیه
 اوزرہ جعلنه رک استعمال اولونور : ضابط . (ضابطان) - مشیر .
 (مشیران) کی .

ترکجه ده بره مفرد وبردن یوقاروسنه جمع دینورسده ده
 عربیده ایکی بیلیدیرمک ایچون آریجه برده (تنیه) صیغه سی
 وارد .

اسماء عربیه نک قاعده عربیه اوزرہ یاییلان تنیه وجمع
 صیغه لری لسان عثمانیده کثرتله مستعملدر .



{ تنہیہ }

عربیہ اسم مفرد لرك آخریہ ماقبلی مفتوح « ان » یا خود
 « ی ن » کتیریلہ لرك تنہیہ یاییلیر . فقط « ی ن » ایله یاییلان
 تنہیہ لسان عثمانیہ چوق قوللانیلیر : ثلث = ثلثان، ثلثین -
 حرم == حرمین - محترم = محترمین کی .
 آخر لرنده ها صورتندہ ناء تأنث بولونان اسملرك تنہیہ لرنده
 تانك نقطہ لری اعاده قیلنور : سنہ . سنتین - شفہ شفتین کی .

نمبرین

اشاغیدہ کی عربی اسملردن قوس ایچندہ اولانلری برنجی و دیگر لرینی
 ایکنجی قاعدہ یه تطبیقاً تنہیہ یاییکز .

سبط . سطح . (ثلث) . قوس . قطر . خط . عدد .
 رکعة . عید . حرم . فتحہ . کسرہ . شعبہ . (ضد) . جماعة .
 (زاویہ) . مزبورہ . مزبور . مرقومہ . سنہ .

{ جمع }

عربیہ « جمع سالم » ، « جمع مکسر » نامیلہ ایکی درلو
 جمع واردر .

جمع سالم — مفردینك صیغہ سی بوزولمقسزین یاییلان
 جمعدرکہ یا مذکر و یا مؤنث اولور .

جمع مذکر سالم — ذوی العقولدن اولان مذکر اسملرک
صفت نوعیله علملرینه مخصوصدر . فقط علملرک جمع مذکر
سالمی عثمانلیجه ده مستعمل دکلدر .

مفردک آخرینه ماقبلی مضموم « و ن » ویا ماقبلی مکسور
« ی ن » کتیریلیرسه جمع مذکر سالم اولور : مسلم (مسلمون،
مسلمین) معلم (معلمون، معلمین) مأمور (مأمورون،
مأمورین) کی .

ذوی العقولک صفت نوعندن اولمایان اسملر جمع مذکر
سالم صیغه سیله جمع یاییلا مازلر . فقط سنه، عالم، ارض کی بعض اسملر
ذوی العقولک صفت نوعندن اولمادقلری حالده (سنون، سنین—
عالمون، عالمین — آرضون، آرضین) صورتیله جمعلمش ایسه ده
بونلر شاذ قیاندندر .

[اخطار] « ی ن » ایله یاییلان جمع مذکر سالملر « و ن »
ایله یاییلانلردن زیاده لسانمزده مستعمل اولدیفی کی بو صورت
سلیقه مزه پک ملایم بولوندیغندن بونک صورت آخره ترجیحی
الزام اولونمیدر .]

جمع مؤنث سالم — مؤنث اسملرک تأنثی حذف اولوندقدن
صوکره آخرینه « ات » کتیریلهرک یاییلان جمعدر : طالبه
(طالبات) . مخدره (مخدرات) . معجزه (معجزات) کی .
آخرنده تأنثیدن اول الف بولتان اسملرک جمعده الف

واوہ قلب اولونور : ذات (ذوات) . ادات (ادوات) . صلاة (صلوات) کبی .

فَعْلَه ، وزنده اولان اسملرک جمع مؤنث سالملری سکونک فتحیه تبدیلیله «فَعَلَات» صورتندہ کلیر : جِبْهَة (جِبَہَات) . وَحْدَة (وَحَدَات) کبی . اگر وزن مذکورده اولان کلمہ نک اورتہ سی واو یاخود یا اولورسہ جمعندہ سکون فتحیه تبدیل اولونماز : عَوْرَة (عَوْرَات) . صِيْحَة (صِيْحَات) کبی .

فَعْلَه ، وزنده اولان اسملرک جمع مؤنث سالمی «فَعَلَات ، فَعَلَات ، فَعَلَات ، فَعَلَات» صورتندہ اولارق اوچ درلو کلمک جائزدر : خِدْمَت (خِدْمَات ، خِدْمَات ، خِدْمَات) . حَلِيَة (حَلِيَات ، حَلِيَات ، حَلِيَات) کبی .

فَعْلَه ، وزنده اولان اسملرک جمع مؤنث سالمی «فَعَلَات ، فَعَلَات ، فَعَلَات ، فَعَلَات» وزنده اولارق اوچ وجهله کلمک جائزدر . «جُرَّة» ک جمعندہ (جُرَّات ، جُرَّات ، جُرَّات) و«خَطُوَه» [*] نک جمعندہ (خَطَوَات ، خَطَوَات ، خَطَوَات) دینیلہ بیلیر . فقط لسان عثمانیدہ مذکور ایکی وزنک صور ثلاثہ سندن هانکیمی شایع ایسه او قوللانیلیر . نته کیم «خِدْمَة» ک جمعندہ خِدْمَات مستعملدر .

تعمیر

آشاغیدہ کی کلمہ لرک جمع مذکر سالمی یازیکز .

[*] خطوه : خانک ضم وفتحیه معتبر ایسه ده لسان عثمانیدہ خانک فتحیه قبول اولونارق استعمال اولونا کلمکده در .

سیاح . حاضر . معاهد . معاصر . مأمور . مدعو .
مقدم . متبحر . مورخ . متقاعد .

سؤال — عربیده جمع سالم نصل جمعدر ؟ جمع مذکر سالم
کیلره مخصوصدر ؟ جمع مذکر سالم نصل یابیلیر ؟ جمع مؤنث سالم
نصل یابیلیر ؟ آخرنده تاء تأنییدن اول الف بولونان اسملرک جمع مؤنث
سالمنده نه اولور ؟ « فعله » وزننده اولان اسملرک جمعنده نه تبدلات
وقوعه کلیر ؟ « فعله » و « فعله » وزننده کی اسملرک جمع مؤنث سالمنده
قاج صورت واردر ؟



جمع مکر — مفردینک ضیغه سی بوزولاراق حاصل
اولان جمعدر : رجل (رجال) کتب (کتاب) کبی .
هر اسم مفردک بر قاج جمع مکسری بولوناییلوب بونلرکده
بر طاقی اوچدن اونه قدر و بر طاقیده اوندن یوقاریسنه
دلالت ایدر . مثلاً : اون قدر قلیجه « آسیاف » و آندن
یوقاریسنه « سیوف » دینور . بو جهته جمع مکسر ایکی قسمه
آیریلوب اوچدن اونه قدر دلالت ایدنلره « جمع قلت » و آندن
زیاده ده دلالت ایدنلره « جمع کثرت » دینور .
جمع قتمک وزنلری [أَفْعَلْ ، أَفْعَالْ ، أَفْعَلْه ، أَفْعَلَه] در .
جمع مکسرلرک وزنلری بک چوق اولاراق لغت کتابلرینه
مراجعتله بیلنه جکندن بوراده مشهور اولانلری ذکر و بیان
اولونور . شویله که :

۱ - (فَعَلَ) — بو وزن ؛ « فَعَلَهُ » وزننده اولان مفردلرله

اسم تفضيلك مؤنثك جمعنده مطرددر: رتبه (رتب) .

اولی (أول) . کبری (کُبر) . کبی [*]

۲ - (فَعَلَ) — فَعَلَهُ وزننده کی مفردلرک جمعی وزن مذکور

اوزره کلیر: حَکَمَ (حکم) . نَعَمَ (نعم) . کبی .

۳ - (فَعَلَهُ) — فاعل وزننده اولان صفتلرک جمعی وزن

مذکور اوزره کلیر: جَاهِل (جهله) . کاتب (کتبه) .

کبی .

اگر کلمه نك آخرنده واو یا خود یا اولورسه اول وقت جمعی « فُعَاة »

شکلنده اولور: قاضی (قضاة) . کبی .

۴ - (فَعَالِي) — ناقصدن اولان « فَعِيلَهُ » وزننک جمعلرنده

مطرد اولور که بونلرک مفردلری مشدد بولونور:

رعية (رعایا) . قضیه (قضایا) . عطیه (عطایا) . کبی .

۵ - (فَعَلِي) — آفات و مکاره افاده ایدن (فعلیل) وزننده کی

کلماتک جمعی وزن مذکور اوزره کلیر: شتیت [*] (شتی) .

مراضی (مرضی) . کبی .

[*] فَعَلَهُ وزننده اولان بعض کلملر دخی مذکور وزننده جمعلنیر:

دولة - دول کبی .

[**] شتیت: طاغینیق ، آیری آیری .

۶ — (فُعلاء) — بو وزن؛ آخرنده واو، یا بولونمایان

ومشدد اولمایان «فعل» وزننک جمعنده مطرددر:

سفیر (سفراء) . حکیم (حکماء) . ظریف (ظرفاء) .

شریف (شرفاء) . کبی .

«فاعل» وزننده اولان بعض کلمه لرك جمعی دخی وزن مذکور

اوزره کلیر: صالح (صلحاء) . شاعر (شعراء) . کبی .

اکر «فعل» وزننده اولان صفتلرك آخرنده واو و یا خود یا

بولونور و یا مضاعف اولور سه اول وقت جمعی آفلاء وزننده کلیر: غنی

(اغنیاء) . ذکی (اذکیاء) . حبیب (احباء) . طیب (اطباء) .
کی .

۷ — (فَعائل) — آخرنده واو، یا اولمایان فعيله وزننک

و اوچنچی حرفی حرف مد اولان مؤنث اسملرك

جمعنده مطرددر: عمامه (عمائم) . رساله (رسائل)

صحیفه (صحائف) . کبی .

۸ — (أَفْعَله) — [فَعَال ، فَعَال ، فُعَال] صورتنده اولان

مفردلرك جمعی اکثریتله وزن مذکور اوزره کلیر:

زمان (ازمنه) . مثال (امثله) . سؤال (استله) .

کبی .

بعضاً (فُعُل ، فَعْلان) وزنی اوزره جمعینیر: کتاب

(کتب) . غلام (غلمان) . کبی .

۹ — (افاعل) — [أَفْعَلْ، أَفْعَلْهَ] وزننده اولان کلمه لرك جمعی وزن مذکور اوزره کلیر : اصبع (اصابع) ، افضل (افاضل) ، آئمه (انامل) ، ارمله (ارامل) کبی .

۱۰ — (افاعیل) — [أَفْعُول، أَفْعِيل، أَفْعُولَه] وزننده اولان مفرد لرو وزن مذکور اوزره جمعی : اسلوب (اسالیب) ، اقلیم (اقالیم) ، اسطوره (اساطیر) ، أرجوفه (اراجیف) کبی .

[عثمانیجه ده (ارامل، انامل، اساطیر، اراجیف) جمعی نیک مفرد لری مستعمل دکلدر] .

۱۱ — (فواعل) — [فَوَعَلْ، فَوَعَلْهَ، فَاعَلْ، فَاعَلْهَ] وزنیه صفت اولمایان « فاعل » وزنیک جمعده مطرددر : کوکب (کواکب) ، صومعه (صوامع) ، عالم (عوالم) ، فائده (فوائد) ، ناحیه (نواحی) جانب (جوانب) کبی .

[اخطار] (اسماء عربیه اصول عربیه اوزره جمعند کدن صکره بتکرار ترکیه لر، ویاخود فارسی ادات جمعی اولان «آن» علاوه سیله جمع یاییلمق جائز اولاماز . مثلاً : کتاب وشجر کلمه لری کتب واشجار صورتنده عربجه جمعند کدن صوکره بتکرار قاعده ترکیه وفارسیه اوزره جمعنه لرك کتبلر، اشجار لر — کتبان ، اشجاران دینلمک جائز اولاماز .)

فقط بعض اسماء عربیہ نك جمی ، جمع اقصى [°] صیغہ سبیلہ بتکرار
جملہ نیکہ بو کیلرہ «جمع الجمع» دینور .

مفرد	—	ید	قول	اسم
جمع	—	ایدی	اقول	اسماء
جمع الجمع	—	ایادی	اقاویل	اسامی . . . کبی .

عربیہ بعض جمع اقضائک جمع مؤنث سالم صیغہ سبیلہ جملہ نیکہ
واردرد . فخر کائنات علیہ اکمل التحیات افندیغزک (انکن صواحبات
یوسف) قول شریفندہ کی صواحبات کبی .

بناءً علیہ لسانمزدہ غلط اولدینی شایع اولان مصارفات ، لوازمات
کبی لفظلرک غلط اولمادینی تظاہر ایتش اولور .

نمبرین

آشاغیدہ کی کلماتک جمع مکسر لرینی یازیکنز .

رُتَبہ . ظُلُمۃ . قُبۃ . قِیمۃ . ہمۃ . فرقۃ . عـلۃ .
طالب . ساکن . بریۃ . خطیئۃ . سـجیۃ . وکیل .
وزیر . حیدب . ولی . وصی . جواب . مزاج .
اکمل . جوہر . شائبۃ . لازمہ . قافیۃ .

سؤال — جمع مکسر فصل جعدرد ؟ جمع مکسر قاچ قسمدر

[°] اولکی حرفی مفتوح ، اوچنچی حرفی الف اولوب اندن صوکرہ
ایکی ویا اوچ حرف بولونان ہر جمع صیغہ سنہ «جمع اقصى» ویا «صیغۃ
منتہی الجموع» دینور .

بیان ایدیکز؟ «جمع قلت» ك وزنی قاجدر؟ جمع کثرتك مشهور اولان
وزنلری هانکیلریدر؟ جمع اقصى و جمع الجمع هانکی جمعله دینیر .

{ کیفیت اسماء عربیه }

عربجهده اركك ايچون استعمال اولونان اسملر باشقه
دیشی ايچون استعمال اولونان اسملر باشقهدر .

مؤنشلرده علامت تأنيث بولونوب مذکرلر علامت تأنيثدن
خالی اولور .

علامت تأنيث اوچدر . تاء مربوطه، الف ممدوده، الف
مقصورهدر .

مؤنشلرده اشبو اوچ علامتدن بری بولونور : حکمة ،
فتوى ، صحراء کبی .

مؤنث : «حقیقی» و «غیرحقیقی» اولق اوزره ایکی قسمدر .

مؤنث حقیقی — کندی جنس-لرندن ارککلری اولان
مؤنشلردر : زینب، امرأة، ناقة کبی .

مؤنث غیر حقیقی — کندی جنس-لرندن ارککلری
اولمایان مؤنشلردر : رحمة، جنة، خدمة کبی .

«مؤنث غیر حقیقی» لفظی و معنوی اولق اوزره ایکی
قسمدر .

مؤنت لفظی — آخرنده علامات تأنیشدن بری بولونان
اسمدر : آخره، دعوی، صحراء کبی .

مؤنت معنوی — علامت تأنیشدن خالی اولوب مؤنت
اعتبار اولونان اسملردر : نفس . ارض، شمس کبی .

علامات تأنیشدن اولان تاء مربوطه که [*] بوکا « تاء تأنیت » دخی
دیرلر . مؤنشلرده دائماً زائددر . بناءً علیه کلمه نك آخرنده کی تانك
« تا تأنیت » اولوب اولدیغنی آکلامق ایچون مذکور تانك خذفی کفایت
ایدر . اکر بعد الحذف کلمه نك معنای اصلیسى باقی قالیرسه تا تأنیت
اولدیغنی والا تاء تأنیت اولمایوب نفس کلمه دن بولوندیغنی مستبان اولور :
ظلمة، رحمة، خدمة کلمه لرنده اولدیغنی کبی .

تا تأنیت عثمانلیجه ایکی درلو استعمال اولونور . یانقطه لر ی
حذف اولوناراق هاء رسمیه صورتنده ویا تا مبسوطه هیئتنده
یازیلیر : عباره، خاتمه، مصلحت، ملاقات، مکافات کبی .

[قاعده] تاسی مبسوط یازیلان مؤنت کلمه لر قاعده عریبه
اوزره مضاف اولدقلرنده ویا حرف تعریف آلدقلرنده ویاخود
تنوینی قبول ایتدکلرنده « تا » بهممه حال اصلنه رجوع ایدر
یعنی تا کرد صورتنده یازیلیر : خاتمة الکتاب ، لاجل الملاقاة ،
لمصلحة ، مرحمة ، مکافاة کبی .

[اخطار] تا مبسوطه صورتنده یازیلان بعض تالر نفس کلمه دن
معدود اولور . بو صورتده انلر تا تأنیت عد ایدلر . ومضاف

[*] شو « ة » شکله اولان تالر تا مربوطه و تا کرد وشو
« ت » هیئتنده اولان تالر « تا مبسوطه » ویاخود « تا طویل » دینور .

حال لرندہ، تنوین و حرف تعریفی قبول لرندہ تا کرد صورتی اخذ
ایده میوب مبسوطہ ہیئتندہ قالیرلر : ثبت، اثبات، وقت، التفات۔
بالاثبات، وقتاً، موقوتاً، التفاتاً کبی .

علامات تأنیثدن اولان الف ممدوده [*] کلمه نك حروف
اصلیه سنه زیاده قیلنان و کلمه نك آخرنده بولونان الفدرکه کسندن
صوکره دائماً همزه بولونوز : صحراء، بیداء، شعراء، اولیاء کبی .

(سماء، رداء، غداء) کبی بعض کلمه لرك آخرنده کی الف ممدوده لر زائد
و همزه لر اصل اولدیغسندن مؤنث دکلدر . زیرا سماء نك اصلی « سماو »
ورداء نك اصلی « ردای » غداء نك اصلی « غدای » اولوب همزه لر اوون
و یادن منقلبدر .

الف ممدوده ایله مؤنث اولان اسملر عثمانلیجه ده پك آز
قوللانیلیر . و قوللانیلنلر دخی همزه سز اولارق « صحرا »
طرزنده قوللانیلور .

الف مقصوره ، کلمه نك آخرنده زائد اولان و « ی »
شکلنده یازیلوب الف او قونان ، الفدر : دعوی ، قوی ،
کبی .

بعضاً الف مقصوره لر نفس کلمه دن اولمسـیله علامت تأنیث
اولماز : معنی، مرسى کبی .

اگر کلمه نك آخرنده « ی » اولورسه اول زمان علامت

[*] كرك مقصور اولسون و كرك ممدود اولسون تأنیث ایچون اولان
الفه « الف تأنیث » دخی دینور .

تأنيث اولان الف مقصوره «ا» شـکلندە رسم اولونور .
«ادنى» نك مؤنثـده دنيا و «اعلى» نك مؤنثـده عليا
يازلدینی کبی .

الف مقصوره ایله مؤنث اولان عربی اسملردن عثمانلیجه ده
قوللانیلار الـتى یدی کلمەدن [°] عبارت اوله رق همان محدود
کیدر .

[قاعدە] كرك اصلى اولسون و كرك علامت تأنيث اولسون
آخرندە الف مقصوره بولسا ان اسملره ادوات ترکیه دن بری
لاحق اولورسه الف مقصوره (ا) شـکلندە رسم اولونور :
دعوالر، دعوايی، دعوادن، معنالر، معنای، معادن کبی .

مؤنث معنوی — بش نوعدر :

- ۱ — مصر و خـضر کبی بیوک شهر اسمایله قبیله اسملری .
- ۲ — زینب، کلثوم، هند کبی تاسـنر اولان قادیـن اسملری .
- ۳ — جمع مذکر سالمـدن ماعدـا اولان جمـعـالر : رسـائل،
کواکب کبی .

- ۴ — الف، با، تا . . . الخ کبی حروف هـجـا اسملری .
- ۵ — تالری مقدر اولارق کتب لغتـده مؤنث [°°] اعتبار
اولونان اسملردر که بولـره «مؤنث سماعی» دخی اطلاق

[°] فتوی، دعوی، شوری، خنثی، انثی، کبی .

[°°] بولـر مؤنثات غیر حقیقه دندر .

ایدر لر . بونلر بر قاعده تحتیده اولمقلرندن بیلنمسی
ایشیدوب بلله مهیه و کتب لغته مراجعته موقوفدر .

مؤنث سمعی بروجہ آتی التمش قدر اسمندن عبارت اولوب بونلرک
بعضلری لسان عثمانیده قوللانیلور . مؤنثات مذکورہ دن بر قسعی دائماً
مؤنث اعتبار اولنوب بر قسمنکده تذکیر و تأنیثی جائز اولور .



(دائماً مؤنث اعتبار اولونانہ اسملر)

اذن . ارض . اصبع . افعی . بئر . ثعلب . جحیم . جهنم . دار .
درع . دلو . ذراع . ذهب . رجل . ریح . ساق . سراویل .
شعیر . عرب . شمس . شمال . عصا . عنكبوت . عین . غول . فخذ .
فردوس . قدم . کف . نفس . ید . یمین . ارنب . ضبع . عقرب .
عضد . فأس . فرس . قوس . كأس . کبد . کتف . ملح .
نعل . نار .

§

(بعضاً مذکر و بعضاً مؤنث اعتبار اولونانہ اسملر)

سمّا . لسان . قضا . عنق . طریق . سبیل . سکین .
سلاح . مسک . حال . نخل . فلك .

سؤال — عربجهده علامت تأنیث قاچدر ؟ مؤنث حقیقی و غیر
حقیقی بی تعریف ایدیکز ؟ مؤنث لفظی هانکی کلمه لردر ؟ تاء تأنیثلر
لسان عثمانیده قاچ درلو یازیلیر ؟ تاء تأنیث ایله تاء اصلی نصل تفریق
ایدیلیز ؟ آخرنده الف مقصوره اولان عربی اسملره ادوات ترکیه
لاحق اولورسه نه تبدلات وقوعه کلیر ؟ مؤنث معنوی قاچدر ؟ مؤنث
سمعی هانکی اسملردر ؟



(اسم مضافه — اسم زمانه) — عربی اسم مکان و زمانلری
 کثیراً عثمانلیجهده مستعملدر . اسم مکان ایله اسم زمان ، اصلی
 اوج حرفلی اولان مادهدن [مَفْعَل ، مَفْعِل ، مَفْعَلَه ، مَفْعَلَه]
 وزنی اوزره کلیر [*] : مطبخ ، مجلس ، مطبَعَه ، منزَلَه کبی .
 ذکر اولونان وزنلرده اسم مکان ایله اسم زمان مشترکدر .
 اگر مکان معناسی قصد اولونورسه فَعْلَک وقوع بولدینی زمانه
 دلالت ایدر . مثلاً : (مولد نبی « صلی الله علیه وسلم » فلان
 کیجهدر) دنیلدکده « مولد » کلمهسی اسم زمان و (فلانک
 مولدی ادرنهدر) دنیلدکده اسم مکان اولور .
 سالف الذکر درت وزن ، مادهنک حروف اصلیهسنه کوره
 بالقاعده تبدل ایدر . شویله که :

اورتهسندده « ی » اولان مادهلرک اسم مکان وزنی (مَفَال
 — مَفِیل) وزنی اخذ ایدر : زور (زیارت) = مزار . سیر
 = مسیر . بیت = کمیت . بیع = مَبِیع . [*] کبی .

[*] فعل مضارعنک اورتیهسی مفتوح ویا مضوم اولان مادهلردن
 « مَفْعَل ، مَفْعَلَه » و مکسور اولانلردن « مَفْعِل ، مَفْعَلَه » وزنی اوزره
 کلدیکی صرف عربی اوقویانلره خنی دکلدر .

[**] مَبِیع کیلرده یانک حرکهسی ماقبلنه نقل اولونارق مَبِیع دینلمز زیرا
 نقلی حالنده لفظاً اسم مفعوله ملتبس اولاجغندن حرکهسی ابقا ایدیلهرک
 (مَبِیع) دینیلیر .

اورته سنده « و » اولان ماده لردن يالکمز (مفاعل) وزنی
 اوزره کلیر : کون = مکان . قول = مقال کې .
 آخرنده « و - ی » اولان ماده لردن (مفعلي) وزنی
 اوزره کلیر : لهو = ملهى . شتو = مشتی . جرى (جریان)
 = مجرى . کې .

آخرى تشديدلى اولان ماده لردن (مفعلي) وزنی اوزره
 کلیر : قرار = مقرر . فرار = مفر . حل = محل . کې .
 عربی اسم مکان وزمان صیغه لری ترکیه « لر » اداتیه
 جمع لره کوللا نل مق جائز اوله جنى کې اصول عربیه اوزره
 دخی جمع لوب کثیراً لسان عثمانیده استعمال اولونور .
 عربی اسم مکان وزمان صیغه لرینک جمعی (مفاعلي) وزنی
 اوزره کلیر : مجلس = مجالس . مکتب = مکاتب . مدرسه
 مدارس . کې .

مقال ومفیل وزننده اولانلرک جمعی « مفاعل » مفعلي
 وزننده اولانلرک « مفعلي » مفعلي وزننده اولانلرک « مفاعل »
 وزنی اوزره کلیر : مقال (مقائل) . مسیر (مسائر) . مجرى
 (مجاری) . محل (محال) . مفر (مفار) کې .

سؤال — عربی اسم زمان ومکانلری قاچ وزن اوزره کلیر ؟
 کله نکه اورته سنده وآخرنده (و ، ی) اولان ویاخود آخری مشدد

اولان کلمه لرده اوزان مذکوره نه صورت اخذ ایدر ؟ اسم زمان و مکانک
جی نه وزنی اوزره کلیر ؟



(اسم تصغیر) — عربی اسم تصغیر لر دخی بعضاً لسان
عثمانیده قوللانیلیر . صرف ترکیده بیان اولوندینی اوزره بو
اسم ، تصغیر و تقلیده دلالت ایدر .

اسم تصغیرک وزنی (فَعِيلٌ ، فُعِيلٌ ، فُعِيعِلٌ) در .

برنجی وزن اوچ حرفلی وایکنجی وزن درت حرفلی
اسملره و اوچنجی وزن بش حرفلی مزیداتک تصغیرلرینه
مخصوصدر .

اوچ حرفلی بر اسمی تصغیر ایتک ایچون اولی مضموم
وایکنجی حرفی مفتوح قیلندقدن صوکره اوچنجی اولوق اوزره
ساکن بر یا زیاده ایدیلیر: عبد = عُبید (قولچغز) . کبی .

(قاعده) — تاسی مقدر اولان اوچ حرفلی مؤنث سماعیلرک
تصغیرنده تا اعاده قیلنور: شمس = شَمِیسة . عین = عِینة . کبی .
درت حرفلی اولان اسملری تصغیر ایتک ایچون کما فی السابق حرف
اول مضموم ، ایکنجی حرف مفتوح قیلنوب یای تصغیرک آلتنده کی
حرف مکسور قیلنور: دفتر = دُفِتر . درهم = دُرِهم . کبی .

بش حرفلی اولان مزیداتک تصغیرلری دخی سالف الذکر «فُعِيعِل»
وزننده کلیر: تاریخ = تَویرِیخ . مکتوب = مَکِیتِیب . کبی .



اسم آلت — لسان عثمانیده اکثریتله مستعمل اولان
عربی اسم آلتلر اوج وزن اوزره کلیر . انلرده : (مفعَل ،
مفعال ، مفعله) وزنلریدر : مثقب ، محوَر — مصاح — خِزراق —
منقله . مِروحه کبی .

عربی اسم آلتلرک ترکیجه جمعهلنرک استعمالی شایعدر .
مِزراقلر ، مفتاحلر کبی . بعضاً اصول عربیه اوزرهده جمعهلنوب
عثمانلیجهده استعمال اولونور . شویله که : (مفعَل ، مفعله)
وزننک جمعی « مفعال » وزنی اوزره کلیر : منبر = منابر .
مکنسه = مکانس . کبی .

(مفعال) وزننک جمعی « مفاعیل » کبی کلیر : مفتاح =
مفتاحیح . میزان = موازین کبی .

اشماء عربیه اداوات ترکیه الحاق ایدیلهرک عبارده سنده
استعمال اولونابیایر . احوال اربعیه اوغرا دقلرنده یعنی (مجرد ،
مفعول به الخ) اولدقلرنده قواعد ترکیهیه
تابعدرلر .

سؤال — عربجه اسم تصغیر قاچ وزن اوزره کلیر ؟ اوج حرفلی
بر اسمی نصل تصغیر ایتلی ؟ اسم آلت قاچ وزن اوزره کلیر ؟ اسم
آلتک جمعی قاچ وزن اوزره کلیر بیان ایدیکز ؟



{ اسماء فارسیه }

کرك اسم جنس و كرك علم اولسون اسماء فارسیه لسان عثمانیده پك زیاده مستعملدر : خدا، آتش، کشور، درخت، دیوار، شیراز کبی. فارسی اسم جمعلری دخی بعضاً مستعملدر : گروه، لشکر کبی.

§

{ کمیت اسماء فارسیه }

فارسی اسماء ایجاب حالده یا ترکیه و لر، ایله جمعلنه رک قوللانیلیر و یا خود قاعده فارسیه اوزره جمع یاییله رق استعمال اولونور.

[اخطار] اسماء فارسیه نك عربی اصولی اوزره جمعی جائز اولمادیفی کبی سائر ادوات عربیه نك ادخال و علاوه سیله استعماللریده اصلاً جائز دکلدور. مثلاً : جهان، دهان لفظ فارسیلرینی (جهن، اجهنه - دهن، ادهنه) طرزنده اصول عربیه جه جمعله مك جائز اولمادیفی کبی ینه فارسی اولان (پشین، فروخت، کرم) کبی لفظلره ادوات عربیه ادخال و الحاقیله (پشینات، پشیناً، بجایشاً، بالفروخت، کر میت) [۶] دنیلیمک اصلاً جائز اولاماز.

[*] کر میت لفظنك استعمالی پك شایع ایسه ده (کرمی) دیمک وار ایکن خلاف قاعده کر میت استعمالنه جواز یوقدر.

فارسی بر اسمی قاعدهٔ فارسیه اوزره جمع یایمق ایچون
اول اسمک آخرینه « آن » لفظی الحاق اولونور :

مفرد	جمع
مردم	مردمان
پدر	پدران
دادر	دادران . . . کبی .

[اخطار] ترکیه کبی فارسیده دخی آیروجه تثنیه صیغه سی
یوقدر .

فارسیده اصول جمع اوچدر : « ۱ » ذی روحلرک جمی . « ۲ » ذی
روح اولمایانلرک جمی . « ۳ » صاحب نشو و نما و ذی تجدد اولانلرک
جمی در .

ذی روح اولانلرک جمی — مفردک آخرینه (آن) علاوه سیله اولور.
یوقاروده کچن مثاللر کبی . انسان اعضاسندن چفت بولونانلری دخی
« آن » ایله جمعه مک جائز اولور : « لب - لبان » ، « چشم - چشمان »
کبی .

ذی روح اولمایانلرک جمی - اسملرک آخرینه (ها) الحاقیله اولورسه ده
بو نوع جملر عثمانلی لساننده قوللانماز : « کار - کارها » ، « خانه -
خانه ها » ، « شکوفه - شکوفها » کبی .

صاحب نشو و نما و ذی تجدد اولانلرک جمی - بواسطه هرایکی صورتله
جملنیرسه ده « آن » ایله جمی اغلبدر : « درخت - درختان » ، « شب -
شبان » ، « آفتاب - آفتابان » کبی .

آخری هاء رسمیه ایله بیتن کلمه لر (آن) ایله جمعلندکلری

زمان مذکور (•) کاف فارسی به تبدیل اولونور : « بنده -
 بندگان » ، « تشنه - تشنگان » ، « خسته - خستگان » ، کبی .
 اگر کلمه نك آخرنده (ا) ویا (و) ممدوده بولونورسه
 علامت جمع اولان (آن) دن اول بر یا زیاده ایدیلیر : « گدا
 - گدایان » ، « خوشگو - خوشگویان » ، کبی .

[اخطار] — فارسی اسملر قواعد فارسیه اوزره بر کره
 جمعندکدن صوکره بر کره دها ترکیه «لر» اداتيله جمعلمک
 جائز اولاماز . مثلاً زنان؛ مردان جمعلیرنی (زنانلر، مردانلر)
 صورتنده بر کره دها جمعلمک پک بیوک معیباتدن معدوددر .

سؤال — لسان عثمانیده مستعمل فارسی اسملرک هانکی اصول
 اوزره جمعی جائزدر ؟ بر اسم فارسی ، اصول فارسیه اوزره فصل جمع
 یابیلیر ؟ اخرنده (ا، و) اولان اسملرک جمعنده نه زیاده ایدیلیر ؟ اخرنده
 هاء رسمیه بولونان اسملرک جمعنده هاء رسمیه نه اولور ؟



{ کیفیت اسماء فارسیه }

ذی روح یعنی جانلی اولمایان وذوی العقولدن بولونمایان
 فارسی اسملرده تذکیر وتأنیث اصلاً معتبر دکلدز . آنجق
 ذی روح اولان اسملرک تذکیر وتأنیثی اسملرک دکشمه سیله
 تفریق اولونور . یعنی مذکرایله «ؤنثک آیری آیری اسملری
 واردر .

مرد	پدر	پسر	برادر
ارکک	بابا	اوغلان چوجق	ارکک قرنداش
زن	مادر	دختر	خواهر
قادین	انا	قیز چوجق	قیز قرنداش

ذی روح اولان اسمک مذکر ومؤنثی ایچون باشقه باشقه اسم اولمادیفی صورتده تفریق جنس ایچون نوع انساندن اولانلرک مذکری ایچون « مرد » ومؤنثی ایچون « زن » لفظلری ونوع حیواندن اولانلرک مذکر ومؤنثی ایچون دخی « نر، ماده » لفظلری علاوه ایدیلیرسه ده بو صورت لسان عثمانیده مستعمل دکلدر :

نوع انسان ایچون	نوع حیوان ایچون
پیر مرد	شیر نر [*]
اختیار آدم	ارکک ارسلان
پیر زن - پیره زن	شیر ماده
اختیار قادین	دیشی ارسلان

اسم زمانه — اسم مطافه — فارسی اسم زمانلری بر قاعده مطرده تحتده اولمایوب سماعیدرلر. بهاران (ایلك بهار)، تابستان (یاز)، زمستان (قیش)، سحرگاه (سحر وقتی)، روز (کوندز)، شب (کیجه)، ماه، هفته، سال کبی .

[*] « نر » لفظی موصوفته تقدم ایدر سیه آخربنه بر هاء رسمیه علاوه اولونارق را دخی مشدد اولور : نره کاه (بوطا)، نره شیه (ارکک ارسلان) کبی :

لسان عثمانیده اکثریتله مستعمل اولان فارسی اسم مکان
صیغهلری اسماء بسیطة فارسیه و عربیه نك اواخرینه بر طاقم
ادات علاوه سیله یاییلیر که لسان عثمانیده مشهور و متعارف
اولانلری بوجه آتیدر :

- ۱ — گاه : ارامگاه . قلبگاه . پیشگاه . . . کبی .
- ۲ — کده : آتشکده . محنتکده . میکده . . . کبی .
- ۳ — ستان : کاستان . سنکستان . افغانستان ، ترکستان کبی
- ۴ — زار : کلزار . لاله زار . چنزار . . . کبی .
- — دان : قلمدان . بخوردان . شمعدان . . . کبی .

بونلردن باشقه اسماء مذکوره نك آخرینه (لاخ ، سار) لفظلرینک
علاوه سیله ده اسم مکان یاییلیر : سنکلاخ . چشمه سار . . . کبی .

«سرای» ، «خانه» لفظلرینک الحاقیله ده بر چوق اسم
مکان خاص صیغهلری واردر که لسان عثمانیده پك چوق استعمال
اولونور : مهمانسرای ، ساحلسرای ، کلشنسرای — مسافر خانه ،
ساحلخانه ، مهندسخانه ، طوبخانه . . . کبی .

اسم تصغیر — اسماء فارسیه و عربیه نك آخرینه (ك ،
چه) علاوه سیله یاییلیر سه ده لسان عثمانیده «چه» ایله یاییلانلر
مستعملدر : دیوانچه . لغتچه . بازیچه . . . کبی .

اسم آلت — فارسی اسم آلتیری اکثریتله کلمات مرکبه دن اولدقلری جهته لسان عثمانیده پک مستعمل دکلدر . آنجق نابه، دستره کبی پک شایع اولان کلمات معدوده استعمال اولونمقده در .

{ اسماء اجنبیه }

عربی فارسیدن باشقه سائر لسانلردن دخی لسانمزه برطاقم اسملر آلمشدر : باراقه ، پروغرام ، استاسیون ، واپور ، تلغراف . . . کبی .

اسماء اجنبیه نك بوکونکی کونده لسانمزه قوللانلمسی [*] وکوندن کونه ترایدایله مسی جهتیه بروجه آتی موادک محافظه سی لزومنی اختاره مجبوریت حاصل اولمشدر :

۱ — عبارة ترکیه اراسنده مستعمل اسماء اجنبیه، جمعی اقتضا ایلدکده بهمه حال قواعد ترکیه اصولیه جعلنملی . بونلرک منسوب اولدقلری لسانلرک (ویاعربی، فارسی) قواعدی اوزره جعلری جائز دکلدر . مثلاً : واپورلر دینیلوب واپورات، واپوران دینلمک اصلاً جائز اولاماؤ .

[*] لسان عثمانیده اک چوق قوللانیلان اسماء اجنبیه ایلروده بفضل مخصوصده بیان اولوناچقدر .

۲ — اسماء اجنبیه احوال اربعه یه اوغرا دقلرنده قواعد ترکیه یه تابعدرلر . انجق بونلرک آخرنده بولونان ساکن قافلر وکافلر (غ ، گ) ه تبدیل اولونماز . [*] ایستاتیسیتیکی ، ایستاتیسیتیکی کی .

۳ — اسماء اجنبیه ادات عربیه وفارسیه یی اخذ ایدمه مدکلری کی الفضاظ عربیه وفارسیه ایله عربی وفارسی اصولی اوزره ترکیب دخی ایدیله منزلر .

سوال — لسان عثمانیده قوللانیلان فارسی اسم مکان اداتلری هانکیلریدر؟ فارسی اسملر نصل تصغیر ایدیلر ؟ اسماء اجنبیه نك عبارتہ ترکیه اراسنده حین اهتمه المنده دقت اولونا جق مواد ندر؟



﴿ باب - ۲ ﴾

{ صفت }

براسمک حال وشانی یعنی نه حالده ونه شکلده بولوندیغنی بیلدیزن کلمه یه « صفت » و حال وشانی بیلدیردیکی اسمه دخی « موصوف » دینور : بیوک او — سیاه آت کی که (بیوک ، سیاه) کلمه لری صفت ؛ (او ، آت) اسملری دخی موصوفدر .

[*] فرائق ، لاسٹیک کی بعض اسملر مستثنا صایلیر .

ترجحه صفتلر « سماعی » و « قیاسی » ناملریله ایکی
نوعه آریلیر .

صفت سماعیه — برقاعده ایله یاییلمایوب یالکیز آغزیدن
ایشتمکله بلله نیان صفتلر اولوب بونلرده : « الفاظ وصفیه »
ایله « اسماء اعداد » دن عبارتدیر .

الفاظ وصفیه — حد ذاتنده معنای وصفیت اولان
لفظلردرکه بونلره « صفت اعلی » دخی دینور : آق، قاره،
صاری، بیوک، اوفاق، کوزل، چرکین، ایو، کوتو، اوزون،
قیصه، طار، گنیش کبی .

اسماء اعداد — صاییلری بیلدیرن اسملردر صفت بر
اسمک حال و شسانی بیلدیردیکی کبی عدلدرده بر اسمک کمیتی
(صایدینی) کو ستردیکندن صفت نوعندن معدوددر .

{ اسماء اعداد }

اسم عددلر (اصلیه، کسریه، رتبییه، توزیعیه) نامیه درت
نوع اولوب بونلردن اعداد اصلیه ایله کسریه نك ماعداسی قیاسی
اولدقلرندن صفت قیاسیه بختنده « اعداد وصفیه » نامیه ذکر
وبیان اولونا جقدر .

اعداد اصلیه — بسیط ، مرکب اولمق اوزره ایکی قسمدر .
 بسیط اولانلر بردن طقوزده قدر اولان بروجه آتی عددلردر :
 بر ایکی اوج درت بش آلتی یدی سکز طقوز
 ۱ ۲ ۳ ۴ ۵ ۶ ۷ ۸ ۹

مرکب ، طقوزدن یوقاری اولان بالجهله عددلردر که اعداد
 اصلیه بسیطه علاوه سیله حاصل اولور : اون ، اون بر ، اون ایکی ،
 اون اوج الخ . . . یکر می ، یکر می بر ، یکر می ایکی الخ . . . اوتوز ،
 قرق ، الی ، التمش ، یتمش ، سکسان ، طقسان ، یوز ، ایکی یوز الخ . . .
 بیک ، ایکی بیک الخ . . . اون بیک الخ . . . یوز بیک کی که اشبو
 صاییلرک بهرینه « اسم عدد » وصاییلان شینه دخی « معدود »
 دینور . مثلا : الی الماء ، یدی پورتقال دیدیکمزده الی لفظی
 المانی ویدی لفظی دخی پورتقالی وصف ایدرک صفت اولدینی
 کی الی ایله یدی به « اسم عدد » والمایله پورتقاله « معدود »
 دینور .

اسم عددلر معدودلریله برلکده کلوب اصلا اادات جمع آمازلر .
 نتکم معدودلری دخی آلمادینی یوقاروده بیان اولوندی .

اعداد کسریه — اعداد اصلیه نک جزؤلرینی یعنی پارچه لرینی
 بیلدیرن اسملردر : یارم (بحق) اوجده بر ، ایکیده بر ، درتده
 اوج ، سکزده ایکی الخ . . . کی که بونلرده صفت سماعیه مقامنده
 قوللانیلیر . یارم عصر ، اوج بحق آی کی .

تخریب

اشیاغیدہ کی کلمہ لڑک اسم اولانلرینہ بر صفت وصف اولانلرینہ دہ بر موصوف علاوہ ایدیکز .

خانہ . سیاه . صساری . چار . کوچک . قیرمزی .
چیزمہ . کاغذ . بول . آجی . منارہ . آج . کنیش . طاغ .

تخریب دیگر

اسم عددلری آیدیکز هانکیسی اصلی وهانکیسی کسریدر بیان ایدیکز .

بش آغاچ . اون پورتقال . درت بچق آی . یارم
اکمک . سکزده اوچ . درتده بر . یدی اقلیم . درت
کوشه . الی ایکی کون . هفته دہ بر .

صفت قیاسیہ — قاعدہ ایله یاییلان صفتلر در کہ — فعللردن
مشتق اولدقلریچون « فرع فعل ، نامی ویریلن و افعال بچشندہ
آیروجه بیان ایدیلہ چک اولان — (اسم فاعل ، اسم مفعول ،
صفت مشبہہ ، صفت مبالغہ) صیغہ لر یله اسملرہ و سماعی صفتلرہ
بعض ادوات علاوہ ایدیلہ رک یاییلانلردن وبالخاصہ اعداد و صفیہ دن
عبارتدر .



(اسملرده یاپیلرله قیاسی صفتلر)

ترکجه اسملرک آخرینه (لی ، لو [*] جه ، جی) علاوه اولونورسه قیاساً صفت اولور . بونلردن (لی ، لو ، جه) نسبت و صاحبیت معناسی افاده ایدر : برونه لی ، استانبوللو ، هیبتلی ، عربجه ، فرانسزجه کبی .

« جه » لفظی بعضاً لیاقت اداتی اولور : مردجه ، انسانجه کبی که مرده ، انسانه لایق صورته دیمک اولور .

« جی » دخی بر اسمه الحاق اولوندقده بر کار ایله اشتغال معناسی افاده ایدن بر نوع صفت اولور . سودجی ، اکمکچی کبی .

بر اسمک آخرینه خفیفلرده « دش » و ثقیللرده « داش » کتیریلرسه ینه صفت اولوب برلک معناسی افاده ایدر . پیردش ، یولدش کبی که پیرلری و یوللری بر دیمکدر .

بعض اسملرک آخرینه « مسی » لفظی کتیریلرک معنای تشبیهی مفید بر نوع صفت یاپیلر . اورمانمسی ، ابدالمسی کبی که اورمان و ابدال کبی دیمک اولور .

اسم عددلرله اسم زمان واسم مکان اصلیلر « لك - لق » الحاق اولونارق ینه بر نوع صفت یاپیلر و لیاقت و مقدار معنارینی مفید اولور : یکرملک ، برکونلک ، طقوز آلیق ، اوطه لق کبی .

[*] منفی صورتلرده (لی ، لو) یرینه « مز » اداتی کلیر . تنکیم « طاتلی - طوزلو » صفتلرینک مفهمنده « طاتسز - طوزسز » دینیلر .

تخصیص

آشاغیده کی اسمله سماعی صفتله ایجاب ایدن اداتلری علاوه ایدمک
صفت یایکزر .

بیر . درد . عرب . امک . مرکب . روم . ماوی .
ادرنه . زور . عجم . کدر . یوغورت . قیش . افطار .
اوس . پرده .

سؤال — صفت قیاسی نیه دیرلر ؟ اسمله هانکی اداتلر علاوه
اولنورسه صفت اولور ؟ بو اداتلر اسملرک نوله نینه داخل اولور ؟

(صفت اصلیه ده یایلمه قیاسی صفتلر)

صفت اصلیه لردن قیاساً یایلان صفتلر معنای وصفینک
(تصغیر ، تأکید ، تفریط ، تفضیل) نی کوسترن صفتلر درکه
بروجه آتی بیان اولونور :
صفتلری تصغیر ایتک :

معنای وصفینک تقلیلی ایچون اکثریا صفتک آخرینه « جه ،
لفظی الحاق اولونور : قاره جه ، قوریجه ، آغیرجه کبی که
براز قاره ، قوری و براز آغیر دیمک اولور . [']
بعضاً صفتلرک آخرلرینه خفیفلرده « مترک » و ثقیللرده
« مترق » لفظی کلیر : اکشیمترک ، صاریمترق کبی که آراکشی ،

[*] « جه » نک معانی کثیره سی واردرکه ادوات بمحنده بیان اولونا جقدر .

آز صاری دیمک اولور . و بعضاً دخی و می ، لفظی کتیریلهرک تشبیه معناسنی متضمن بر نوع صفت قیاسیه اولور : اکشیمسی ، طاتلیمسی کی .

ادات تصغیر اولان (جک - جق) لفظلری دخی بعضاً صفتلره لاحق اولور . نته کیم اسم تصغیر مجتهده بالمناصبه تفصیلاً بیان اولوندی .

صفتلرک تأکیدى :

معنای وصفینک تمامیتنی افاده ایتک ایچون بعض کره صفتک برنجی حرفی آلتوب آکا اکثریتله « پ ، ویا » س ، ویاخود « م ، الحاق اولونارک صفتک اولنه کتیریلیر که بو نوع صفتلره « صفات مؤکده ، اطلاق اولونور : صاب صاری ، سیم سیاه ، موس مور کی . [*] لکن چیریل چبلاق ، صر صیقلام کلهلری (ر) ایله کلدیکندن شاذدر .

صفتلرک مبالغهسى :

صفتلرده مبالغه معناسی افاده اولونمق لازم کایرسه اوللرینه (پک ، چوق ، زیاده) کلهلرندن بری کتیریلیر : چوق کوزل ، پک بیاض ، زیاده آجی کی .

مبالغهده بر درجه ده شدت قصد اولونورسه اول وقت

[*] لسان عثمانیده زیاده مستعمل اولان صفات تأکیدیه آخر کتایده فصل مخصوصنده بیان اولوناقدردر .

(غایت ، پک چوق) لفظلری کتیریلیر : غایت اوجوز ، پک تکلفلی کبی .

تفضیل :

صفتلرده تفضیل یعنی برینک دیکره فضل ورجحانی قصد اولونورسه بونی افاده ایچون ایکی طریق واردر :

برنجیسی : صفت مضاف اولارق اولنه « آگ » اداتی کتیریلیر : شو اولرک اک بیوکی ، کبی .

ایکنجیسی : مفضل علیه « دن » اداتی الحاق اولوندقدن صوکره صفت « دها » لفظیله برلکده کتیریلیر : احمد افندی حسین افندی دن دها چالشقاندیر کبی که بوراده احمد افندی (مفضل) و حسین افندی (مفضل علیه) در .

صفت تفضیلیه دن بعضاً (دها) اداتی حذف اولونور : بو ، آندن کوزل دینیلیر که دها کوزل دیمک اولور .

اعداد وصفیه — « اعداد توزیعیه ، ایله « اعداد رتبیّه ، دن عبارتدر .

[اعداد توزیعیه] ، برشیمک مساوات اوزره بولونمش اولان پارچه لرینی بیلدیرن صاییلردر که اعداد اصلیه نک آخری ساکن ایسه حرکه رسمیه ایله مفتوح قیلندقدن صوکره بر ساکن «ره الحاق اولونارق یاپیلیر : برر ، اوجر ، بشر کبی .

آخرنده «ی» اولان اسم عددلرده رادن اول برده شین «فتوحه زیاده ایدیلیر : ایکیشر ، آلتیشر ، یدیشر کبی .

[اعداد رتبه] ، بر شئیك درجه و مرتبه سنی بیلدیرن
صاییلردرکه كذلك اعداد اصلیه نك آخینه بر ونجی ، الحاقیه
یایلیر : برنجی ، اوچنجی ، بشنجی کبی .

اسم عددك آخرنده حرف املا اولورسه حرف املا
حذف اولونور : ایکنجی ، یدنجی ، التنجی کبی .

[قاعده] دوت کلمه سنك تاسی حرکه لندکده دال اولور :
دردی ، درده ، دردك ، دردنجی ، درددر . کبی .

[تنبيه] ذکر اولونان «ر» ، نجی ، اعداد مرکبه نك ایکنجی
جزئنه لاحق اولور . الی ایکیشر ، الی ایکنجی - یوز اوزر ،
یوز اونجی کبی .

[فائده] بر کلمه نك عمومیتله صفت اولوب اولمادیغنی آ کلامق
ایچون آخینه (کیمه ، شی) لفظلرندن برنی کتیر ملی . اکر
معنی صحیح اولورسه صفتدر ، اولمازسه دکلددر . مثلا (کوزل ،
کوتو) کلمه لری صفتدر . زیرا : کوزل کیمه ، کوتو شی دینلمک
صحیح اولور . لکن (قابو ، آت) کلمه لری صفت دکلددر . زیرا :
قابو کیمه ، آت شی دینلمک صحیح اولماز یعنی بر معنی حاصل
اولماز .

نمونه

آشاغیده کی اسملرک هانکیسی اعداد توزیمیه وهانکیسی اعداد رتبه
قسمنددر اوزرلرینه اشارت ایدیکز .

بشنجی . اوچر . قرق سکزر . یوز ایکنجی . سکسان .
 بیگنجی . یتشر . بیگر . یکر می دردر . اوتنجی . طقسانجی
 اوتوزر .

نمبرین دیکر

آشاغیده کی عدد اصلیلرک تک نومروده اولانلرینی اعداد توزیعیه
 وچفت نومروده اولانلرینی دخی اعداد رتبییه یاپیکز .

ایکی .	بر .	التی .	اون	ایکی .	دوت .	یدی .	اللی .
۱	۲	۳	۴	۵	۶	۷	
طقوز .	یکرمی .	یوز	یکرمی .	اللی	التی .	سکسان	دوت .
۸	۹	۱۰	۱۱	۱۲			
اوتوز طقوز . یوز . اون .							
۱۳	۱۴	۱۵					

سؤال — اعداد توزیعیه یی تعریف ایدیکز . بر عدد اصلی
 نصل عدد توزیعی یاپیلیر ؟ آخرنده « ی » اولان اسم عددلرک توزیعی
 صورتلرنده نه زیاده ایدیلیر ؟ اعداد رتبییه نصل یاپیلیر ؟ آخرنده
 حرف املا اولان عدد اصلیلرک رتبی صورتنی نصل اولور ؟ بر اسمک
 صفت اولوب اولادیغنی نصل آکلاملیدر ؟

{ صفات عربیه }

لسمزده مستعمل اولان صفات عربیه نك بر قسمی قیاسیدرکه
بونلر اسم منسوب و تفضیل ایله فعل بحثده فرع فعل نامیه
بیان اولونا جق اولان بر طاقم اسملردر .

قسم دیگر ی اسم فاعل نوعندن بر طاقم سماعی صفتلردر که
بونلره « صفت مشبهه » تسمیه اولونور . صفت مشبهه لرك بر طاقی
الوان و عیوبه دائر در . بونلر مطرداً (افعال) وزنی اوزره کلیر

مثال :

احمر	احضر	اسود	اصفر	ازرق
قیرمنی	یشیل	سیاه	صاری	مائی
ابیض	اسمر	اصرج	اعمی	اعور کبی .
بیاض	بغدای رنگلی	طوپال	کور	تک کوز

صفت مشبهه لرك بر قسمی ده الوان و اشکال و عیوبه دائر
دکلدر . بونلرک وزنلری غیر مطرددر .

مثال :

صلب	حسن	صعب	جبان	عریان .
سرت	کوزل	کوچ	قورقاق	چیپلاق
وقور .	فرح	کبی .		
تمکینلی	فرحلی			

اسماء اعداد — اسماء اعداد عربیہ نك لسان عثمانیہ استعمالی
يك نادر در . اعداد اصلیه نك بسیطی اشبو :

احد	[*]	اثنین	ثله	اربعة	خمسه	سته
۱	۲	۳	۴	۵	۶	

سبعه	ثمانیه	تسعه
۷	۸	۹

لفظ لرندن و مرکبه نك عشراتی دخی :

عشره	عشرین	ثلاثین	اربعین	خمسين
۱۰	۲۰	۳۰	۴۰	۵۰

ستین	سبعین	ثمانین	تسعين
۶۰	۷۰	۸۰	۹۰

کلمه لرندن عبارتدر . یوز معناسنه اولان « مائه » کلمه سیله بیک
معناسنه اولان « الف » کلمه سی دخی لسان عثمانیہ مستعمل
اولوب جمعاری (مآت ، الوف) در .

عربی اعداد کسریه سندن لسانمزدہ مستعمل اولانلری
بروجه آتیدر :

نصف	ثلث	ربع	خمس	سدس
یارم	اوچده بر	دورده بر	بشده بر	التیده بر
سبع	ثمان	تسع	عشر	
یدیده بر	سکزده بر	طقوزده بر	اونده بر	

[*] احد یرینه چوق کره واحد لفظی قوللانیلیر .

اعداد رتبه عربیه دن بوجه آتی اسماء اعداد اکثرا
لسان عثمانیده مستعملدر :

اول .	ثانی .	ثالث .	رابع .	خامس .
برنجی	ایکنجی	اوچنجی	دردنجی	بشنجی
سادس .	سابع .	ثامن .	تاسع .	عاشر .
التنجی	یدنجی	سکزنجی	طقوزنجی	اونجی

بونلرک مؤنثلری دخی کثیراً مستعمل اولوب تا تأنیث ایله
یاییلیر : ثانیه، ثالثه، رابعه، خامسه . . . الخ کبی . فقط اولک
مؤنثی الف مقصوره ایله کلیر : اولی کبی . بونک جمی
« اول » در .

اسم منسوب — عربجه اسم منسوبلر لسان عثمانیده پک
زیاده مستعملدر . عربیده ادات نسبت مشدد (ی) اولوب
اسملرک آخرینه کلیر . آخرنده یای نسبت بولونان کلمه
« اسم منسوب » ویادن صرف نظرله « منسوب الیه » اطلاق
اولونور . مثلاً (بغدادی) اسم منسوبدر . (بغداد)
منسوب الیهدر . (بغدادی) بغداده نسبتی اولان بر کیمسه‌نی،
(بغداد) او کیمسه‌نک نسبت اولوندینی یری کوسترر .
(ترکیه ده بونک یرینه (لی - لو) قوللانلندیغی اسماء ترکیه بمحشده
یکدی) .

یای نسبت عربیه پالکز عربجه اسملرله اسماء خاصه‌نک

کافه سنه لاحق اولور . عربی اسم منسوبلر ده بر چوق قواعد جاری ايسه ده بز لسان عثمانیده الكز ياده لازم اولانلری بروجہ آتی بیان ایدہ جکز :

۱ — (مکة - اضافة) کبی آخرنده زائد تا بولونان کلماتہ یای نسبت لاحق اولدقده مذکور تالر حذف اولونارق (مکی - اضافی) دینلدیکی کبی آخرنده (انقره - ادرنه) کبی ها بولونان کلمه لرده بوقاعده یه تابع اولارق (انقرى - ادرنى) دینیلیر . فقط لسان عثمانیده بو صورت اصلا مستعمل اولمایوب آخرنده ها بولونان اسملرک نسبتنده یای نسبتدن اول بر « و » زیاده ایدیلیر . ویای نسبت مخفف اوقونور . مثلاً (لوفچه - اسقوفچه) نك نسبتنده « لوفچه وی - اسقوفچه وی » دینیلوب « لوفچی - اسقوفچی » دینیلہ من .

۲ — (فعيلة) وزننده اولان سالم اسملرک نسبتی یانک وتانک حذفیلہ « فعلى » شـکلنده کلیر : (مدینه ، مدنی) ، (حنیفه ، حنفی) کبی . [*]

۳ — (فُعيل) وزنـنـک نسبتـنده کاه یا حذف اولونور کاه اولونماز : (قریش ، قرشی) - (حسین ، حسینی) کبی .

[*] « طيبة » ک نسبتـنده (طیبی) دینیلیر .

۴ — الف ممدوده ايله نهايت بولان کله لرك منسوبلرنده همزه
 واوه قلب اولونور : بيضاء، بيضاوی — صحراء، صحراوي
 کي . فقط (سماء، شتاء) کي همزه سي حرف اصلیدن
 مقلوب اولانلرده يا همزه ابقا اولونور و يا واوه قلب
 اولونور : (سمائي، سماوی — شتائي، شتاي) کي . [*]
 جمع لر عندالنسبه مفردينه رد اولونور : مسلمون ،
 مسلمي کي . [**]

بو قاعده ايجابندن اوله رق (فضائل اخلاقيه) — (جل حکميه) —
 (مسائل دوليه) بزنده فضائل خلقه، جل حکميه، مسائل دوليه
 استعمال ايتک لازم کاورسه ده صورت اولی صورت ثانيه دن زياده
 سليقه منزه موافق اولديغندن لسان عثمانیده استعمالی شایع اولمش بناءً
 عليه سليقه منزه ملايم کلان يرلرده جمعه نسبت تجویز ايدلمشدر .
 یای نسبت عربيه سا کن اولديغی زمان تحفیف ايله اوقونور :
 شو ذات مکيدر کي . لکن متحرك اولورسه همه حال مشدد
 اوقونور : کتب عربيه، قواعد ترکیه، شریعت محمدیه کي .

اسم تفضیل — صفت قیاسیه دن اولوب الوان واشکال
 و عیوبه دائر اولمایان بر صفتدر . بونک وزنی « افعّل » در .
 اکبر، اشرف، اصغر کي .
 ترکیه ده مستعمل اولان اسم تفضیل لرك جمعی « افاعل »

[*] شتوی دیمکده جاؤدر .

[**] اسم منسوبلرده تأنیت و جمع اداتلری یاء نسبتدن سوکره کلیر :
 مکاتب عسکریه ، لغت عربیه ، علماً کوفیون .

ومؤنثی «فعلی» وزنی اوزره در. اکبر، اعظم — کبری، عظمی
کبی .

اخری واو، یا اولان کلماتک تفضیلی ومؤنثیه جمعی مثال
آتی به تطبیق اولونا : (علو) اعلى — علیا — اعلی .

{ صفات فارسیه }

فارسی صفت سماعیه لری لسان عثمانیده کثیراً مستعمل اولوب
بونلره ادوات ترکیه الحاقی جائز اولدینی کبی ادوات فارسیه
الحاقیه استعمالده شایعدر . بونلر «صفات عادیه» نامی تحتنده
اهل لساندن ایشیدیلوب بلله نیلن صفتلردر [*] . نتمک بروجه
آتی صفتلر دخی صفت سماعیه نوعندندر :

سیاه	سفید	سرخ	دراز	بلند	کوچک	بزرک
قاره	بیاض	قرمزى	اوزون	یوجه	اوافق	بیوک

کبی .

فارسی صفت قیاسیه لری صفات مرکبه دن عبارت اولوب
بونلر کثیراً لسان عثمانیده مستعملدر . شویله که :

صفت تفضیلیه — صفت عادیه نك آخرینه «تر» لفظنك

[*] کرک عربی وکرک فارسی کلماتده بزم ایچون تصرفه اصلا جواز
یوقدر. کلماتی اهل لسان بیننده موضوع اولان معناده استعمال ایله
برابر املا لریخی محافظه به مجبوریّت وارددر .

الحاقیه یابیلیر . لفظ مذکور یالکز فارسی و عربی صفتلرک
آخرینه علاوه اولونوب مبالغه معناسنی دخی افاده ایدر .

(بالاخر — واسعتر) کبی که اک بالا، دها بالا — اک وسعتلی،
دها وسعتلی و یاخود پک بالا، پک وسعتلی دیمک اولور . «تر»
لفظنک آخرینه بعضاً (ین) کلهرک «ترین» صورتنده دخی استعمال
اولونور . بو صورتده مضایف اولارق قوللانیلیر : فاضلترین
علماء بزرگترین رؤسا کبی .

فنا معناسنه اولان «بد» صفتنه تر اداتی لاحق اولدقده بدتر دینیلرک
یرده تخفیفاً (بتر) دینیلیر و یازیلیر .

(ین) اداتی بعضاً طوغریدن طوغری به صفت حادیه نک آخرینه
علاوه اولونابیلیر و بعضاً آخرینه (ه) دخی آلا بیلیر .

کم کمین ، کمینه - به بهین ، بهینه .. کبی
آز اک آز ایو اک ایو

فارسی اسم منسوبلری عثمانلی لساننده پک چوق قوللانیلیر .
فارسی ادات نسبتلری یای ممدوده ایله (مند ، ور ، ناک)
لفظلریدر : شامی ، بغدادی - بهر مند ، هنور ، غمناک کبی
که شاملی ، بغدادلی - بهر ملی ، هنرلی ، غملی دیمک اولور .

آخرنده هاء رسمیه بولونان اسملرده یای نسبتدن اول
بر و او یازیلارق ها حذف اولونور : «پهلوی ، دهلوی کبی که
پهللی و دهللی دیمک اولور . فقط لسان عثمانیده اسمک آخرنده کی
هانک ابقاسیله مستعملدر : فرانسه وی ، بوسنه وی کبی .

فارسیده بونلردن باشقه بر چوق ادا ت نسبت دها موجودر که آنلردن بر طاقم صفت قیاسیه تشکیل اولونوب بر خلیسی لسان عثمانیده مستعملدر. انلرده بروجہ آتیدر :

(۱) صفات نسبیہ : یوقاروده مذکور اوچ ادا ت ایله برابر (آنه ، وار ، یار) [*] مره دانه ، فاضلانہ ، سزاوار ، امیدوار ، بختیار ، هوشیار کبی .

(۲) — صفات لونیه : (قام ، کون) عنبر قام ، کف قام — کلکون ، لاله کون کبی .

(۳) — صفات محافظت : (بان ، وان ، سالار) باغبان ، باغچوان ، سپه سالار کبی .

(۴) — صفات فاعلیت : (کار ، کر) کیمیا کر ، زر کر — پرهیز کار کبی .

اسماء اعداد — فارسی اسما ، اعدادی لسان عثمانیده نادر آ استعمال اولونور . آنلرده : یوز و بیک مغنالرینه اولان صد ، و د هزار ، کله لریله بروجہ آتی اعداد اصلیه بسیطه دن عبارتدر .

یک	دو	سه	چهار (چار)	پنج	شش
بر	ایکی	اوچ	درت	بش	آلتی
		هفت	هشت	نه	
	یدی	سکز	طقوز		

اعداد کسریه فارسیه دن لسانمزدہ مستعمل اولان یارم

[*] (آنه ، وار) لیاقت . و (یار) نسبت و صاحبیت معناسی افاده ایدر .

معناسی افاده ایدن « نیم » کلمه سیله درتده بر دیمک اولان
و (جهاریک) مخفی بولانان « چاریک » لفظی درکه بونی عوام
ناس غلط اولارق (چیرک) دیه تلفظ ایدرلر .

اعداد رتبه فارسیه لسانمزده اصلاً قوللانمادینی کبی
اعداد توزیعہ دخی استعمال اولونماز . یالکیز برر برر معناسنه
اولان « یکان یکان » مستعملدر .



﴿ باب — ۳ ﴾

{ کنایات }

کنایات باشلیجه اوچدر : (ضمیر ، اسم اشارت ،
مبهمات) در .

{ ضمیر }

ضمیر ، بر اسمک یرینی طوتان کلمه در که یرینی طوتدینی
اسمه ده « مرجع » دینور . مثلاً (احمد اوقیورمی) دیو
صوران کیمسه یه جواباً (او ، پک خیلازدر هر کون تکدیر
آلیور) دینلدکه فقره مذکوره ده « او پک خیلازدر » جمله سی
احمد پک خیلازدر تقدیرنده اولدینی و « او » لفظی احمد اسمنک

یرینی طوتدینی جهتله ضمیر و « احمد » اسمیده آنک مرجعی اولور .

ضمیر بش قسمه آریلیر :

{ ۱ - ضمیر شخصی }

ضمیر شخصی ، شخص معین اشعار ایدن ضمیرلردر .
آنلرده اوچدر . [*] متکلم ، مخاطب ، غائب در که متکلم ایچون « بن » ، مخاطب ایچون « سن » ، غائب ایچون « او » قوللانیلوب جمعلرنده (بز ، سز ، آنلر) دینور . مذکور ضمیرلر احوال اربعه یه اوغرا دقلرنده بوجه آتی برر صورتله دکیشیرلر .

مجرد	مفعول به	مفعول الیه	مضاف الیه
بن	بنی	بکا	بنم
سن	سنی	سکا	سنک
او	آنی	آکا	آنک
بز	بزی	بزه	بزم
سز	سزی	سزه	سزک
آنلر	آنلری	آنلره	آنلرک

مفرد

جمع

[اضافت — خصوصی بر معنی افاده ایتک ایچون ایکی اسمک برلشمه سیدر که بو اسملردن برینه « مضاف الیه »

[*] متکلم ، سوز سویله بن - مخاطب ، سوز سویله نن - غائب ، حاضر اولما یوبده کندنن بحث ایدیلندر .

دیگرینه «مضاف» دینور. مضاف الیه اولاجق اسمک آخرنده حرف املا یوق ایسه مکسور قیلندقدن واکر وار ایسه بر «ن» زیاده ایدلدکدن صوکره بر کاف نونی (ک) علاوه اولونان اسمدرکه دائما مضافدن اول کلیر. ومضاف اولاجق اسمک آخری ساکن ایسه مکسور قیلنه رق کسره یه علامت «ی» یازیلیر. اوک طامی، افندینک فسی کبی که (او، افندی) مضاف الیه، (طام، فس) دخی مضاف اولور. اکر مضاف الیه ضمیر شخصیلردن عبارت ایسه اول وقت مضافک آخرینه آشاغیده بیان اولوناجق ضمیر اضافیلردن بری کتیریلیر.

سؤال — کنایات قاچدر؟ ضمیر نیه دیرلر؟ مرجع نه دیمکدر؟
ضمیر قاچ قسمدر؟ ضمیر شخصی نیه دیرلر وقاچدر؟ متکلم، مخاطب، غائب کیملره دینور.

﴿ ۲ — ضمیر اضافی ﴾

ضمیر اضافی، مضافلره لاحق اولان ضمیرلر اولوب بروجه آتیدر:

مثال

مفرد متکلم، م	= بنم اوم
مخاطب، ک	= سنک اوک
غائب، ی — سی	= آنک اوی، وظیفه سی

جمع متکلم ، من	= بزم اومن
مخاطب ، کز	= سزک اوگز
غائب ، . .	= آنلرک اوی

آخرنده حروف املا دن بر حرف بولونان اسملر مضاف اولدقلری وقت غائب صورتلرنده «ی» یرینه «سی» کتیریلیر :
اوک قابوسی ، افندیگ یالسی کبی .

[تنیه] آخرنده حرف املا بولونان اسملر ضعیف اضافی لاحق اولدقده حرف املا نلک حذفی قطعاً جائز دکلدر .

قبوم	افندیم [*]	بابام	اوطم
قبوک	افندیگ	باباگ	اوطهک
قبوسی	افندیسی	باباسی	اوطهسی
قبومن	افندیمن	بابامن	اوطهمن
قبوکز	افدیگیز	باباگز	اوطهگز
قبوسی	افندیسی	باباسی	اوطهسی [**]

[قاعده] مضافک مفرد غائبی (ده ، دن ، ک ، جه ، ، ی)

[*] افندی — کلمه سی کبی آخرنده حروف املا دن « ی » اولان کلماتک مفرد مخاطب و متکلم صورتلرینی یانک حذفیله افندیم ، افندک طرزنده یازمقده لرسده یا کلددر .

[**] کلمات مذکورده نلک هر شخص نلک آیری آیری احوال اربعه سنی شاگردانه تعریف ایتدیرمکده املاجه فوائد عظیمه استحصالی محقق اولدیغندن معلمین حضرات نلک بوخصوصه انضمام همترلی بالخاصه توصیه اولونور .

اداتلرندن بریخی آلیرسه بونلردن اول بر « ن » یازیلوب ضمیر
اضافی اولان (ی) حذف اولونور . احمدك کتابی... کتابنده...
کتابندن... کتابنك... کتابنجه... کتابنه... کتابنی کبی .
اگر مضافك آخری حروف منفصله دن ایسه (ك، ه، ی)
اداتلرینك الحاقده غائب ضمیری اولان « ی » ابقا اولنوب
دیگر ادا تارك الحوقده، ینه حذف اولونور . احمدك سوزی...
سوزینه... سوزینك... سوزینی... سوزنده... سوزندن...
سوزنجه کبی .

{ ۳ — ضمیر وصفی }

ضمیر وصفی، ظرفلره یعنی زمان و مکان بیلدیرن اسملره
مضاف الیهلره لاحق اولارق صفت مقامنه قائم اولور . ضمیر
وصفی، « کی » لفظندن عبارت اولوب ظرفلره [*] لاحق
اولدوقده کئندنن اوجکه بر « ده » لفظی زیاده ایدیلیر و دائماً
مفرد حالنده کتیریلیر . کویده کی ترلا، تارلاده کی اکین کبی که
کویده اولان تارلا، تارلاده اولان اکین دیمك اولور . مضاف الیهلره
لاحق اولورسه جمع حالنده دخی کله بیلیر . بنمکی، سنککی،
پدرککی، بنمکیلر، سزککیلر کبی .

[قاعده] ضمیر وصفینك لاحق اولدینی اسمك مفعول به،
مفعول الیه، مضاف الیه حالنده مفعول و مضاف الیه ادا تارلندن

[*] زمان و مکان کوسقون اسملر .

اول بر نون کلیر وکی لفظنک یاسی حذف اولونور . بنمکنی ،
بنمکنه ، بنمکنک کبی .

[قاعده] كذلك آخرنده ضمیر وصفی اولان اسمہ « ده ،
دن ، اداتی لاحق اولورسه « کی ، لفظنک یاسی نونه تبدیل
اولونور . سزککنده ، سزککندن کبی .

ضمیر

اشاغیده کی کله لدن مضاف الیه وظرف اولانلره ضمیر وصفی وماعدا سنه
ضمیر اضافی الحاق ایدک . صکره احوال اربعه سنی تصریف ایله بیکرز .

ایکنه . ایپلک . دره . بابا . لالا . کوله . او . پاشانک .
اووا . افندینک . قوناق . کتاب . آنا . تیزه . خواجهنک . آرابه .

سؤال — ضمیر اضافی هانکیلریدر؟ وکیملره لاحق اولور؟
« سی » ضمیر اضافیسی کیمه لاحق اولور؟ ضمیر وصفی ندر؟ کیملره
لاحق اولور .

{ ۴ — ضمیر نسبی }

ضمیر نسبی ، بعض فعللارله خبرلره لاحق اولاراق نسبت
معنایی اشعار ایدر . انلرده :

مفرد متکلم : م — یم = بن کاتیم — یازارم — یازایم
« مخاطب : سک = سن کاتبسک — یازارسک [۱]

[۱] مفرد مخاطب ضمیری اولان « سک » لفظی « سین » طرزنده
یازلاملیدر . زیرا مخاطبیلر دائماً کاف نونی (ک) الیر . (سین ، سون) فعل
امرک غائب ضمیریدر . کلسین ، او قوسون کبی .

مفرد غائب : در = او کاتبدر — یازار [۱]

جمع متکلم : ز - لم = بز کاتبز — یازارز، یازالم [۲]

• مخاطب : سکز = سز کاتبسکز — یازارسکز

• غائب : درلر = اذلر کاتبدرلر — یازارلر

خبرلرک آخرلری ساکن ایسه متکلم صورتلرنده حرکه رسمیه ایله مکسور قیلنور کچن مثاللر کی .

اگر حرکهلی ایسه یعنی حرف املا ایسه متکلم صورتلرنده ضمیر نسبی دن اول بره ی زیاده ایدیلیر . بن کوله بم ، بز کوله یز کی .

{ ۵ - ضمیر فعلی }

ضمیر فعلی ، ماضی شهودیلرله فعل حکایه و شرطیلرک آخرینه کله رک فاعللرینی کوسترر . بونلرده : متکلم ، مخاطب ضمیرلرندن عبارت اولوب غائبلری یوقدر .

مفرد متکلم م = کلیم [۳] یازدیم کله سم یازسه م

• مخاطب ک = کلدیک یازدیک کله سکه یازسه ک

.. = کلدی یازدی کله سه یازسه

جمع متکلم ک - ق = کلدیک یازدیک کله سکه یازسه ق

[۱] «در» هرفله الحاق ایدلز . یالکز خبرلره ، بعضاً نقلی ، استقبال وجوبی کی فاعلاره الحاق ایدیلیر .

[۲] (یم - لم) ضمیرلری فعل التزامیلرک متکلملرینه لاحق اولور .

[۳] بو بونک امثالی قاعده یا ایله یازاق لازم کلیرکن مخالف قاعده

اوله رق اکثریتله کلدیم ، کلدک ... الخ صورتلرنده یازمقده درلر .

• مخاطب کیز = کادیکنز یازدیکنز کاسه کیز یازسه کیز
 • • = کادیلر یازدیلر کاسه لر یازسه لر

سؤال — ضمیر نسبی هانکیلریدر وکیملره لاحق اولور؟ آخرنده
 حرف املا اولان خبرلرک متکلم صورتلرنده نه زیاده ایدیلیر؟ ضمیر فعلی
 هانکیلریدر کیملره لاحق اولور؟



{ اسم اشارت }

اسم اشارت — کندیلرله معین بر شخصه ویا بر شیئه
 اشارت اولونان (بو، شو) لفظلرندن عبارتدر که «شو» یاقین
 و «بو» دها یقین اولان شیئه اشارت ایچون قولالانیلوب کند-
 یلرله اشارت اولونان شیئه ده «مشار الیه» دینور : بو او، شو
 کمی دینلدکده شو، بو لفظلری اسم اشارت و (او، کمی)
 اسملری دخی مشار الیه اولور . جمعنده شونلر بونلر دینیلیر .
 اسم اشارت مشار الیهله برلکده کلیرسه جمعی جائز دکلدرد .
 شو اولر، بوکیلر دینیلوب شونلر اولر، بونلر کیملر دینیله مز-
 فقط مشار الیهی حذف اولونورسه اول وقت مشار الیهک ادات
 جمعی اسم اشارته کچهرک جمعلیر .

اسم اشارتله ادواتدن برشیئه متصل اولورلرسه برنون زیاده
 ایدیلیر . شونده، بونده — شوندن، بوندن — شونک، بونک

شونجغز، بونجغز — شونک ایچون، بونک ایچون — شونک ایله، بونک ایله [*] کبی . مفعول الیه حالنده شوکا، بوکا دینور . اسم اشارتلی مشارالیهلرینه نظراً بش قسمدر . انلرده : ذات، تمثیل، مکان، تنبیه، مقدار اشارتلیدر .

ذات اسم اشارتلی ذکر اولونان (بو، شو) لفظلرندن عبارتدر : بوکتاب، شو اوکبی .

تمثیل اسم اشارتلی (بوبله، شوبله) کلهلریدر : بوبله کتاب، شوبله کمی کبی .

مکان اسم اشارتلی (بورا، شورا) لفظلی اولوب اصلی « بوبر، شو بر » در : بوراسی لطیفدر . شوراسی تنهادر کبی .

تنبیه اسم اشارتی (ایشته) کلهسی اولوب بمضاً « بو » لفظیله برلشهرک ایشته بو، یرنده (اشبو) قوللانلیر .

مقدار اسم اشارتلی (بو قدر، شو قدر) لفظلریدر : بو قدر پاره، شو قدر مصرف کبی . بمضاً بومقامده (بونجه، شونجه) قوللانیلور .

تعمیر

آشاییده کی جلهلرده کی اسم اشارتلی آیدیکز . صفر اولان محالره مناسب اسم اشارت وضع ایدیکز .

شواومی بیوک بو اومی بیوک، شوکلان آدمی طانیور میسکز .
 بویول نزهیه کیدر . سزه ایکی نصیحتی ایدرم . یالان
 سوبلمه یک : — ارقه سندن کوتوسویله میسکز .

[*] اکثراً « ایچون » اداتیله « ایله » اداننک الفی ویاسی حذف اولونارق (شونکچون، بونکچون — شونکله، بونکله) یازیلیر .

شو کلن کیمدر . . . اوک صاحیبدر . . . کیم کچدی . . .
آدمک قرداشی کچدی . . . کل . . . اوطور . بوکتابی اوقو .

سؤال — اسم اشارت نه به دیرلر وقاچدر؟ مشارالیه نه به دیرلر؟
اسم اشارتک جمعی فصل کلیر؟ اسم اشارته ادواتدن برشی متصل اولورسه
نه اولور . مفعول الیهی فصل اولور .

{ مبهمات }

مبهمات — بللی ایتمه به رک بر شخصی ویا بر شیئی
بیلدیرن سوزلردر . ترکیبده مبهمات (اسم تجرید ، کلمات
استفهامیه ، اسم موصول) دن عبارتدر .

اسم تجرید — کندی لفظیدر که بشقه سی قارش محسوزین
بر ذات دیمکدر . مثلاً بو یازی یی کندی یازدی دینور که
بشقه سی یازمادی دیمک اولور .

بوکا ضمیر اضافی دخی لاحق اولارق : کنسیم ، کندیک ،
(کندی - کنیدیسی) ، کنسیمز کنیدیکز ، کنیدیلری ، دینور [*]

کلمه استفهامیه — (کیم ، نه ، قاج ، هانکی ، قننی ،
کی لفظلردن عبارت اولوب « کیم » ، اشخاصدن « نه » ، اشیادن

[*] کندی ، لفظنه ضمیر اضافی لاحق اولدقده آخرنده کی یانک
خدی قطعاً جائز اولمادیفی حالده بمضلرک کندم ، کندک صورتنده
یازدقلمری مع التأسف کورلمکده در .

سؤال ایچوندر . کیم کلدی ، نه سویله دی کبی . «که» و «نه»
لفظلرینه ضمیر اضافی ونسی لاحق اوله رق :

کیم	کیمسک	کیمدر	کیمز	کیمسکز	کیملردر
کیم	کیمک	کیمی	کیممز	کیمکز	کیملری
نیم	نمسک	نمدر (ندر)	نمیز	نمسکز	نمدرلر
نم	نمک	نمسی	نمیز	نمکز	نملری (نلری)

دینور

کیم ، لفظی «لر» ایله جمعه لره «کیملر» دینلدیکی کبی اسم
کبی احوال اربعه سی دخی تصریف اولنور . بوکا (ایله ،
ایچون) اداتی داخل اولورسه ادوات مذکوره دن اول بر
(ک) کلهرک (کیمک ایله ، کیمک ایچون) دینیلیر .

قاچ ، عددن سؤال ایچوندر . قاچ پاره ک وار کبی .

هانکی [*] ، اشخاص واشیادن برینی تعیین ایچون موقع
سؤالده قوللانیلیر . هانکی آدم ، هانکی کتاب کبی . جمعه
هانکیلر ومضافده هانکیسی دینور .

نصل ، قچن ، نیجه ، دنکلو ، قنقی ، ققی ، نره ، قنده ،

هانی لفظلری دخی کلیات استفهامیه دندر . بونلردن :

[*] قنقی مخففیدر . فقط ها قحیه ثقیله وکی کسره خفیه ایله

حرکه لندیکی وبو ایسه لسان ترکیشک آهنگنه مخالف اولدینی جهته
«هانکی» کلمه سی شاذ اولارق قبول ایده ییلیرز . والا قنقی کلمه سی آهنگ

لسانه دها موافقدر .

نصل ، نیجه : ایکسیده کیفیتدن سؤال ایچوندور . فقط
 نیجه ، کلهسی استعمالدن ساقطدر . یالکیز تکثیر معناسنده
 قوللانیلیر : نیجه دفعه لر ، نیجه امکر کبی . نصل کلهسی « نه »
 ایله « اصل » لفظندن مرکبدر . نه کلهسنک اکثریتله هاسی
 حذف اولونور سهده « اصل » لفظنک همزه سنی حذفده بر سبب
 ومناسبت اولمادیغندن بو کلهیی (نصل) طرزنده یازمق موافق
 اولامایوب شو (ناصل) صورتله یازمیلیدر .

چقن : زماندن سؤال ایچون ایسهده بوده زمانمزدده مهجور
 اولوب بونک یرینه (نه زمان) (نه وقت) قوللانلمقددر .
 نه دنسکلو : مقداردن سؤال ایچون ایسهده بوده زمانمزد
 آثار ادبیه سنده کلیاً مهجور اولوب بونک یرینه (نه قدر)
 (نه مقدار) سوزلری قوللانلمقددر .

قنغی : بر قاج شیمیدن برینی تعیین ایچون موقع سؤالده
 مستعمل ایسهده بوده کلیاً استعمالدن ساقط اولوب بونک یرینه
 « هانکی » کلهسی استعمال اولوندیغی ذکر ایدلدی .
 قنی : مکان قریبدن سؤال ایچوندور . فقط بوده زمانمزدده
 مهجور اولوب بونک یرینه (هانی) قوللانلمقددر .

قنده : مطلقاً مکاندن سؤال ایچون ایسهده شمدیکی حالده
 استعمالدن محروم اولوب بونک یرینه (نره) قوللانلمقددر .

نمونه

آشاغیده کی عبارده بولونان مبهمانی آیریکنز .

کندی اکدیکنی ییچدی . کشی نه ایدرسه کندینه ایدر .
 بو سوزی کیم سویلهدی . بورایه کیم ایله کلدک . خواجه سکا
 نه سویلهدی . مکتوبده نه یازیور . هانکی کتابی اوقیورسک .
 هانکی مکتبه دوام ایدیورسک . مکتبهده نه اوکرنک . قاچ
 کتاب اوقودک . قاچ یاشندهسک .

اسم موصول — مشارالیهلری مبهم اولان [او ، اول -
 شو ، شول] کله لرندن عبارت اولوب بونلرک مشارالیهلرینک
 ابهامنی ازاله ایچون کندیلرندن صوکره کتیریلان جمله خبریهلره
 « صله » تعبیر اولونور .

بونلرک مشارالیهلرینی صله لرینه ربط ایچون (که) لفظی
 کتیریلیر : شول نصیحتی که سکا ویریورم قبول ایت ، او
 کتابی که سکا ویردم ای صاقلای . عبارهلرنده (شول ، او)
 کله لری اسم موصول ، (نصیحت ، کتاب) کله لری مشارالیه ،
 (سکا ویریورم ، سکا ویردم) جمله خبریهلری صله اولوب
 « که » لفظلری صله لری ربط ایچون کتیریلمشدر که بونلرک
 تفصیلاتی صیغه صله بمحذره کله جکدر .



﴿ کنایات عربیہ ﴾

{ ضمیر }

ضمائر عربیہ لسان عثمانیہ یالکز باشنه استعمال اولوناماز.
کلمات عربیہ الیه التحاق ایدرک استعمال اولونور. آنلرده :
ضمیر متصل مفرد وتثنیه لرینک مذکر ومؤنثلریله جمع مذکر
غائبدر .

مفرد مذکر غائب ضمیری (هو) در که بر کله یه متصل
اولورسه واوی حذف اولونارق (ه ، ه) شکلنده یازیلیر .
بونک مؤنثی (ها) تثنیه لری (هما) وجمع مذکر لری (هم) در .
جمع مؤنثلری اولان (هن) لسان عثمانیہ مستعمل اولمایوب
بونک یرینه « ها » ضمیری قوللانیلیر .

هو ، ضمیری لسان عثمانیہ مستعمل دکادر . فقط اولنه
یا لفظی کتیریلهرک بعضاً ندا موقعنده ، یا هو ، دینلدیکی کبی
بعضاً دخی مکرر کتیریلهرک (هو ، هو سنه) دینیر که عینی
عینته ، دیمک اولور .

ضمائر مذکورهدن (ه ، ها ، هم) ضمیرلرینک اوست
طرفی مفتوح ویا مضموم اولورسه هالر مضموم واکر مکسور
ویاخود « ی » حرفی اولورسه اول وقت مکسور او قونور . بعده -
قدس سره - بعینه - بتمامه ، قدس سرها ، مشارالیه ارحمهم
الله ، مشارالیه کبی .

ضمائر مذکوره عربی اولان «الی» کلمه سنه لاحق اولدقدن صوکره
ایما و اشارت اولونمش معناسنه اولان موماً و مشار کلمه لرینه التحاق
ایدملرک لسان عثمانیده کنایات مقامنده قوللانیلیر که بر عبارتده اولجه
ذکری کچن بر اسمی تکرار ایتک لازم کلیرسه او اسمک یرینه قائم اولقی
اوزره مرکبات مذکوره کتیریلیر. بونلرده : (مشارالیه ، موماًالیه)
کلمه لرندن عبارتدر .

مشارالیه

وزارت و مشیریت ایله بالا واولی رتبه لرخی احراز ایدن ذواتک
اسملری ذکر ایدیلیرسه مفرد مذکرند « مشارالیه » تثنیه سنده
« مشارالیهما » جمعنده « مشارالیهم » دینور . اشخاص مغنویه دن اولان
(دولت ، هیئت ، امانت ، نظارت ، ولایت ، مدیریت کبی کلمه لر دن
دولت ایچون هر حالده « مشارالیها » قوللانیلوب دولت مشارالیها دینیر .
لکن دیکرلری ایچون او مقامده بولونان ذاتک احراز ایتمش اولدیغی
رتبه نظر دقت و اعتنایه آلییر .

موماًالیه [*]

میرلوان واولی نایسنندن آشاغی اولان اصحاب رتبه یه ورتبه سز اولان
ارباب حیثیت و اعتباره دینیر .

[*] موماً : بر ماده یی بر کیمسه یه تفهیم ایچون قولاً ویا فعلاً اشارت
ایلمک معناسنه اولان « وماً » ماده سنک افعال بابنه نقلندن حاصل
و معنای مذکورده مستعمل اولان (ابناء) مصدرینک اسم مفعولیدر که
اشارت اولونان دیمکدر . ایماً کبی مثال و مهموز اللام اولان « افعال »
مصدرینک اسم فاعلی (مومی) و اسم مفعولی (موماً) صورتنده کلک
قواعد صرفیه عربیه ایجاباتندن اولمغله کلمه مذکوره یی « مومی » شکبنده
یازمق محض خطادر .

مخدرات اسلامیہ پہ دخی درجہ حیثیت واعتبار لریشہ کورہ مفرد وجمندہ (مومألیہا ، مشارالہا) دینیر .

بولردن باشقہ (سرقوم ، مزبورہ ، مذکور) لفظ لری دخی کنایاتدن اولوب سرقوم رتبہ سز وعوام ناسدن اولانلرہ ، مزبورہ جنس نسادن آشاخی درجہ ده بولونانلرہ ، ومذکور دخی انسانک ماعداسی اولان حیوانات ایله اشیایہ مخصوصدر .

بولرک مذکر ومؤنث لریله مفرد، نثنیہ وجمع لری بروجہ آتیدر :

مفرد	تننیہ	جمع
سرقوم	سرقومان	سرقومون
سرقومه	سرقومتان	سرقومات [']
...
مذبورہ	مذبورتان	مذبورات ["]
مذکور	مذکورین	مذکورین
مذکورہ	مذکورتین	...

آنف الذکر، سالف الذکر، آنف الییان، سالف الییان، مار الذکر، مار الییان کبی . تعبیرات دخی معنویاتده مستعمل کنایاتدندر .



['] سرقومات، جمع مؤنثی زمانزده استعمالدن ساقط اولمشدر . بونک یوبنه «سرقومه لر» استعمالی ترجیح اولونیور .
 ["] مذبورات، بوده استعمالدن ساقطدر . «مذبوره لر» استعمالی شایعدر .

{ اسم اشارات }

عربی اسم اشارت‌تری لسان عثمانیده مستعمل دکلدرد .
 آنجق ایکی اوج دانه‌سی نادرآ عباره آره‌سنده مرکب اولارق
 استعمال اولونور . آنلرده :
 كذلك = بونک کبی
 بعد ذا = بوندن صوکره
 بعد ذلك = بوندنک
 هکذا = ایشته بویله . . . کبی کلماتدن عبارتدر .

§

{ اسم تجرید }

عربی اسم تجریدلرندن (ذات، نفس) کله‌لری لسان
 عثمانیده مستعملدر . بونلر یا اوللرینه ادات عربیه آلارق
 اصول عربیه اوزره قوللانیلیر و یا آخرلرینه ادات ترکیه
 آلارق ترکی اصولیه استعمال اولونور : بو البسه فلانک ذاته
 مخصوصدر . شو طعامی نفسی ایچون پیشیردی . بالذات یاپدی
 و بذاته و بنفسه . . . الخ دینیر .
 عربی اسم موصوللریله کلمات استفهامیه‌سی لسان عثمانیده
 اصلاً مستعمل دکلدرد .



{ کنایات فارسیه }

(ضمیر - اسم اشارات)

فارسی ضمیر لر لسان عثمانی ده اصلاً قولاً لئلا مادیفی کبی
اسماء اشاراتی استعمال اولونماز . فقط بعد ازیں ، بنا برین
مرکب اولارق قولاً لئلا یلیر که بوندن صوکره و بوکا بناءً دیمکدر .
« از جمله » دخی بو قیلدن اولوب اصلی (ازیں جمله - ازان جمله)
در . کثرت استعمالندن طولای اسم اشاره حذف اولونمشدر .

{ اسم تجرید }

فارسی نیک (خود) اسم تجریدی عثمانیجه ده قولاً لئلا یلیر .
مثلاً رأی خودیله دینور که کندی رأیله و (خود بخود) کندی
کندی نه دیمک اولور .

{ کلمات استفهامیه }

فارسیدن « نه » معناسنه اولان « چه » کلمه سیله نیجه وقایع
مقامنده (چند) کلمه سی قولاً لئلا یلیر و بونک بعضاً اولنه « هر »
اداتی کلدیکی کبی آخرینه دخی « آن » اسم اشارتی علاوه
اولونور : چه فائده — چند دفعه دینیر نه فائده و نیجه دفعه

دیمک اولور . وهرچند - چندان دینیلیر که هر نقدر، اولقدر
دیمکدر .

فارسی اسم موصولاری لسان عثمانیده قوللانماز .



باب - ۴

{ مصدر }

مصدر، کندیسینده ذات وزمان ملاحظه اولونمایارق بر
ایشه دلالت ایدن کلمه لردرکه آخرلرنده اکثریتله (مک . مق)
ویا بونلره بدل ایشاغیده کوریلرجهك اولان دیگر حروف
وادوات بولونور : بیلیمک، یازمق کی .

[فائده] مصدردن ادات مصدر طی اولندقدن صوکره قالان قسمده
زیاده بر حرف یوق ایسه آکا « مصدر مجرد » واکر بر معنی افاده سی
ایچون حرف زیاده ایدلش ایسه اکاده « مصدر مزید فیه » دینور.
کولمک، کولدرمک کی که کولمک مصدرندن ادات مصدر قالدیراسمه
« کول » قالوب حرف زائد اولمادیفی آکلاشینلاچقندن مصدر مذکوره
« مجرد » دینور. زیرا مذکور کلمه هیئت مجموعه سیله حدثه دلالت ایدوب
بر حرف طی ممکن اولاماز. مثلاً لامی زائد فرضیه ترک ایتسهك قالان
« کو » لفظی حدث مذکوره دلالت ایتمز. فقط تعدیه معنایی یعنی ایشک
(حدث)ك آخرده اترینی کوسترمک ایچون « کول » کلمه سنه (در) زیاده
ایدهرک کولدر، دیمش اولسهق اول وقت کولدرمک مصدرینه « مزید »

فیہ « دینور. زیرا بورادہ « در » لفظی زیادہ در؛ ترك اولند قدہ حدث
معناسی ینہ موجود قالیر .

مصدر مزید فیہدن ادات مصدر طی اولند قدہ قالان قسمہ «مادہ»
فعل « و حرف زائد آتد قدن صوکرہ قالان قسمہ ده «مادہ» اصلیه « دینور.
مصدر مجر دلردہ ایسہ حرف زائد اولمادیفندن مادہ فعل ایله مادہ
اصلیه عن کلمہ اولور. ننکم اشاغیده کی مثال تشریح مقصدہ کافیدر .

مصدر	ادات مصدر	مادہ فعل	مادہ اصلیه
کز مک	مک	کز	کز
کز در مک	مک	کز در	کز
آغلامق	مق	آغلا	آغلا
آغلاتمق	مق	آغلات	آغلا

مصدر دلردہ (حدثه) ایسہ دلالت ایدن اساساً «مادہ فعل»
اولدینی و بوکا ایسہ (مک، مق) علاوه یله مصدر لر حصوله
کلدیکی جهتله مادہ فعلک اصل اعتبار یله اولجه بیان وتفصیلی
مناسب کورولدی .

مادہ فعل — برایشی مخاطبہ امر ایچون قولالاندینی
جهتله بوکا «امر حاضر» دخی دینور . [*]
مادہ فعللرک آخرلری یا ساکن و یا حرکت حریفه ایله
متحرک یعنی حرف املا اولور :
کل ، قیر ، اوقو ، آجی ، آغلا ، اوده کبی .

[*] بوندن صوکرہ زده «مادہ فعل» تعبیری پکر سه مقصود امر
حاضر اولدینی خاطر دن خیمه مایلدیر .

بونلر (ماده فعلک) امر حاضرک مفرد مخاطب صیغه لری
اولوب بونلرک آخری حرکت رسمیه ایله مکسور قلندقدن
صوکره بر «ک»، کاف نونی الحاق اولونارق جمع مخاطب صیغه لری
یایلیر. بعضاً مذکور کاف یرینسه «یگن» کتیریلرک جمع
یایلیر.

آخری متحرک اولان یعنی حرف املا اولان مفردلرک
جمنده (ک، یگن) دن اول بر مکسور «ی» دخی زیاده
ایدیلیر:

جمع		مفرد
کلیگن	کلک	کل
اوقویگن	اوقویک	اوقو
آجییگن	آجییک	آجی
آغلایگن	آغلایک	آغلا
اوده یگن	اوده یک	اوده

نمونه

آشاغیده کی ماده فعللرک جملرینی یازیکن. مصدرلردن دخی ادات
مصدرله «ماده فعل» و ماده اصلیه یی آیریکن.

آت . آتلا . آدا . بارش . طانی . قاشی . بزه .
بگزه . طوقو . قو . بیلمک . بیلمدرمک . قاینامق .
قایناتمرق . قایناتدرمق .

سؤال — مصدر نیه در لر ؟ مصدر مجرد ، مصدر مزید فیهی
تعریف ایدیکز ؟ ماده فعل ایله ماده اصلیه هانکیلریدر ؟ ماده فعلک
بشقه اسمیده واری ؟ امر حاضرلرک جعلری ناصل یاییلیر ؟

مثبت ، منفی — بر ایشک وقوعنی کوسترنه « مثبت »
وعدم وقوعنی کوسترنه « منفی » دینور . کچن مثاللر امر حاضرک
مثبت صورتلری اولوب بونلره ادات نفی الحاق اولونارک منفی
یاییلیر و (نهی حاضر) نامی ویریلهرک طبق امر حاضر کبی
جعلنیر .

ادات نفی (مه ، ما) لفظلری اولوب « مه » خفیف و « ما »
ثقیل اولان ماده فعللره لاحق اولنور :

امر حاضر = کل اوکو آجی آغلا اوده
نک (مفرد = کله اوکوما آجیما آغلاما اوده مه
نک (جمع = کله ییکز اوکوماییکز آجیما ییکز آغلاماییکز اوده مه ییکز



امر غائب ، نهی غائب — بورایه قدر ذکر و بیان
اولونانلر « ماده فعلک » مخاطب صیغه لری اولوب بونلره « سین »
سون « لفظلرینک الحاقیله غائب صیغه لری تشکیل ایدرکه مثبتلردن
یاییلانه (امر غائب) منفیلردن یاییلانه دخی (نهی غائب)
دینوب هر ایکسی ده « لر » علاوه سیله جعلنیر .

امر غائب

جمع	مفرد	ماده فعل
کلسینلر	کلسین	کل
اوقوسونلر	اوقوسون	اوقو
آجیسینلر	آجیسین	آجی
آغلا سینلر	آغلا سین	آغلا
اوده سینلر	اوده سین	اوده

نهی غائب

کلمه سینلر	کلمه سین	کلمه
اوقوماسونلر	اوقوماسون	اوقوما
آجیما سینلر	آجیما سین	آجیما
آغلاما سینلر	آغلاما سین	آغلا
اوده مه سینلر	اوده مه سین	اوده مه

فعل ماضی ، فعل عام — ماده فعل ، بر مخصوص
ایش و یا کیفیت بیان ایدرسه « فعل خاص ، دینور :
کز ، یورو ، کس ، قیر کبی .

وا کر عموم ایشلر و یا احواله شامل اولورسه « فعل
عام ، دینور که : (ارل ، ایت ، قیل ، ایله) ماده فعللرندن
عبارتدر .

تحریر

آشاغیده کی کله لردن هانکیسی مثبت وهانکیسی منفیدر بیان ایدیگز .
مفرد اولانلری جمع یاپیکز . امر غائب ونهی غائبلری اشارت ایدیگز .
مفرد اولانلرینک جمعنی یازیگز .

اوطوریگز . قالدق . اونوتما . بلله سین . سویله مه سین
اوکسورمه . یالوار . طاوورانسین . کوندرمه ییکز .
طیقاسینلار . قیاماسین . کز مه . اوطور .

سؤال — مثبت ومنفی تعریف ایدیگز ؟ ترکیه ده ادات نفی
ندر ؟ ماده فعلک منفیسنه نه دینور ؟ امر غائب ، نهی غائب کیلردن
یایلیر و ناصل یایلیر ؟ فعل عام ایله فعل خاصی تعریف ایدیگز .

لازم ، متعدی — لازم ، معناسی فاعلک [*] حال وشانندن
عبارت قالان یعنی فاعلن غیری بر شخصده ویا شنیده اثر کو سترمه یین
فعلدر : آغلا - چیق کبی که اشبو فعلک بیان ایتدیکی معنی مخاطبک
حال وشانندن عبارت اولوب خارجه ده اثر کو سترمه دیکندن
فعلک معناسی تمام اولور .

متعدی ، معناسی فاعلک حال وشانندن عبارت قالما یوب
باشقه بر شخص ویا شنیده اثری کوریلن فعلدر : اغاجی کس ،
قلمی قیر ، قرداشکی سو کبی که بوراده کس ، قیر ، سو فعللرینک
معناسی ، فاعل اولان مخاطبک نفسنده قالما یوب اغاج قلم ووقرداش ده
اثر کو سترره اغاج قلم ووقرداش اسملرینه ده «مفعول» دینور .

[*] فاعل : فعلک بیان ایتدیکی ایشی یا پانه دینور .

[فائده] بچن مشالده ، يالکز (کس ، قير) ديوبده لقردي يي کسيويرسه ک سوز تمام اولمايا جغندن قارشومزده کي آدم ، نه يي کسه يم ، نه يي قيراييم ، کيمي سوه يم سؤالي ايراد ايدر . بزده اغاجي ، قلمي ، قرداشکي ديمکه مجبور اولورزکه بوحالده سوز تمام اوله رق مخاطب سکوت ايدر . ديمک اوليورکه فعلک لازم و متعدي اولديغني آکلامق ايچون اوللرينه کيمي ونه يي لفظلرينک جوابلري اولان (بريسنی ، برشيئي) کله لوندن بري کتيريلير . اگر معني صحيح اولمزه فعلک لازم والا متعدي اولديغني آکلاشيلير .

لازم — اوتور : بريسنی اوتور ، برشيئي اوتور .
متعدي — ايصير : بريسنی ايصير ، برشيئي ايصير .

لازمی متعدي ياپمق ايچون قاعده بودرکه ماده فعلک جوهری [*] بر حرفلی اولورسه ويا بر قاچ حرفلی اولوبده آخري ساکن بولونورسه بر « در » واکر جوهری بر قاچ حرفلی اولان ماده نك آخري متحرك يعنی حرف املا وياساکن (رل) اولورسه بر « ت » الحاق اولونور :

ماده فعل	جوهر فعل	ادات تعديه	فعل متعدي
دی	د	در	دیدر
کز	ک ز	در	کزددر
اوتان	ا ت ن	در	اوتاندر

[*] ماده فعلک جوهری ، تلفظده ظاهر اولان يعنی حرف املا آتله قدن صوکره قالان حرفلدر : نتمک اوتور ، قازی ، دی ماده لرینک جوهری (ا ت ر ، ق ز ، د) حرفلريد .

ایمرندر	در	ام ر ن	ایمرن
اوشوت	ت	اش	اوشو
آجیت	ت	اج	آجی
آغلان	ت	اغل	آغلا
تورهت	ت	ت ر	توره
اوتورت	ت	ات ر	اوتور
اوکسورت	ت	اک س ر	اوکسور
طارلت کبی	ت	ط س ر ل	طارل

لکن بونک برچوق مستثنای و اردر که بروجه آتی ذکر

اولوندی .

متعدی	لازم
قالدر	قالق
امزر	ام
ایچیر	ایچ
اوچور	اوج
دوشور	دوش
آرتیر	آرت
چیقار	چیق
آشیر	آش
یلشیر	یش

اوش	—	اوشور
بیت	—	بیتیر
بات	—	باتیر
کچ	—	کچیر
طاش	—	طاشیر
قاچ	—	قاجیر
دوغ	—	دوغور
قوب	—	قوبار
دوی	—	دویور
دوی	—	دویور
صیز	—	صیزیر

کور ماده‌سی بر ایش تسویه ایت معناسنه کلیرسه متعدیسی
 «کوردر» و کوز ایله کور معناسنه اولورسه متعدیسی «کوستر»
 کلیر.

بر فعل «در» ایله متعدی یاییلمش ایسه تا و «ت» ایله
 متعدی یاییلمش ایسه در ایله بر کره دهها متعدی قلینباییلیر :
 (کزدر، کزدرت)، (اوتورت، اوتورتدر) کبی .

بر اسم، خفیف حرکه‌لی ایسه «له» ثقیل حرکه‌لی ایسه
 «لا» الحاق ایدیله رک بر فعل متعدی حاصل اولورکه بوکا (فعل)
 اسمی دینور . (کوز، کوزله) ، (باغ، باغلا) کبی .

اشبو (له-لا) اسم زمانلره لاحق اولورسه وصول ودخول

معناسی مبین بر فعل لازم اولور: کیجه له دی؛ صباحلادی کبی که
کیجه یه؛ صباحه داخل اولدی دیمک اولور.

اصواته داخل اولورسه ینه بر فعل لازم حاصل اولور:
ایکله؛ اوفله؛ چاغلا؛ فیصلا کبی.

مذکور لام اصواتک ثنائیلرینه لاحق اولابیلوب ثنائیلرک یوقارینه
دال لاحق اولور: طاقیر - طاقیردا، شاقیر - شاقیردا، چاییر - چاییردا
کبی.

صفتلرک خفیف حرکه لیلرینه (له؛ لاش؛ ان) وثقیل
حرکه لیلرینه دخی (لا؛ لاش؛ لان) الحاقیله بر فعل لازم حاصل
اولورکه بوکاده (فعل وصفی) دینور: (کوزل - کوزلاش؛
کوزلان) (طاتلی - طاتلیلاش؛ طاتلیلان)؛ (سمیز - سمیزله)
(اوجوز - اوجوزلا) کبی.

صفتلره (لت؛ لات) الحاقیله ده فعل وصفی یاییلیر. فقط
بونلر متعدی اولور: دارلات، کنیشلت کبی.
بعض صفتلره ده اسملر کبی (له؛ لا) الحاقیله متعدی
یاییلیر: تمیزله؛ قارالا کبی.

تعمین

آشاغیده کی مادهلرک هانکیسی لازم هانکیسی متعدیدر. لازم
اولانلرینی متعدی یاییکیز، او متعدیلری بر قات دها متعدی یاییکیز.
اسم وصفتلری فعل یاییکیز.

آت. آرا. اری. اوزا. این. بودا. بین. صولو.

تپا . قوش . چپوی . دیش . یورو . یوز . طاش . اپی .
قیصه . اوزون .

سؤال — لازم نیه دیرلر؟ متعدی بی تعریف ایدیکیز . لازمی
متعدی قلیق ایچون قاعده ندر؟ اسملردن، صفتلردن ناصل فعل یاییلیر؟

معلوم، مجهول — فعل متعدی [*] یا معلوم ویا مجهول
اولور .

(معلوم) فاعلی ذکر اولونان فعلدر . (احمد حسنی
دوکدی) جمله سنده کی «دوکدی» فعلی کبی که فاعل یعنی حسنی
دوکن احمد عبارتده ذکر اولونمشدر .

(مجهول) فاعلی ذکر اولونمایوب مفعولی فاعلی یرینه کچن
فعلدر . (حسن دوکولدی) جمله سنده کی «دوکولدی» فعلی کبی که
فاعل یعنی حسنی دوکن احمد ذکر اولونمایارق مفعول اولان
حسن ترکیبده فاعل یرینه کچمش و بو مناسبتله کندیسنه (نائب
فاعل) اسمی ویرلشدر . نتمک نحو قسمنده بحثی کله جکدر .

معلوم اولان بر ماده فعلی مجهول یا بمق ایچون ماده فعلک
آخیرینه باقمالی . اگر آخری لامدن غیری بر حرف ایسه یا
ساکندر ویا متحرکدر . اگر ساکن اولوبده اوست طرفی
مفتوح ویا مکسور ایسه ماده فعلک آخری حرکه رسمیه ایله

[*] فعل لازملردن مجهول کلن .

مکسور قیلندقدن صوکره بر دل، کتیریلیر : (کس؛ کسل)
 (یاز؛ یازل) (ویر؛ ویرل) کبی . واکر ساکن اولان حرف
 اخیرک اوست طرفی «ضمه ثقیله» مقبوضه، (قالین قبالی اوتره)
 ایسه ماده فعلک آخری حرکه حریفه ایله «مضموم قیلندقدن
 صوکره بر (ل) کتیریلیر : (قور؛ قورول) (بور؛ بورول) کبی.
 آخری متحرک ویا لام (ساکن اولسون متحرک اولسون)
 اولان ماده فعللر «ن» الحاقیله مجهول قیلنیر : (اوقو؛ اوقون)
 (آرا، آران)، (کیزله، کیزلن)، (بیل، بیلین) [۱] (بسله،
 بسلن) کبی . (دی، دینیل) — (ایسته، ایسته نل) کیلر
 شاذدر . [۲]

[قاعده] — تعدیه اداتی اولان تالر ادواتدن بر شئیته
 متصل اولوبده حرکه لیرلرسه داله قلب اولونورلر . (اریت،
 اریدل)، (آرات، آرادل) کبی . اکر ادات تعدیه دکلسه
 داله قلب اولونماز . فقط کیت ایشیت کبی بر چوق کله لک
 تالری شاذ اولارق داله قلب اولونوب «کیدل»، «ایشیدل»
 دینور .

[قاعده] — ادات مجهول اولان ساکن لام حرکه لیرسه

[۱] اسم فاعلندن فرق ایچون لامدن صوکره بر «ی» یازمق
 لزومی آشکاردر .

[۲] شاذ : استعماله موافق، قاعدهیه مغایر اولان .

کنندن اول بر «ی» یازیلیر. (اریدل، اریدیلن)، (ارادل
 ارادیلان)، (کیدل، کیدیلان) کبی. اگر ساکن اولان
 مذکور لامک اوست طرفی ضمه ثقیله مقبوضه ایله مضموم
 ایسه حرکه لندکده کنندن اول برشی یازماز. (قورول،
 قورولان)، (یورول، یورولان) کبی.

تخصیص

آشاعیده کی ماده لری مجهول قیلیکز.

قیر. اوقو. آرا. آص. دل. سوز. طوغرا.
 بیرت. اوینات. اوقوت. آقیت. قورقوت. اوزات.
 اوردت. اوشوت. صوغوت.

سؤال — معلوم نیه دیرلر؟ مجهول نیه دیرلر؟ معلومی مجهول
 یایمقی ایچون قاعده ندر؟ تعدیه اداتی اولان ساکن تالر حرکه لنیرسه نه
 اولور؟ مجهول اداتی اولان لاملر حرکه لنیرسه نه اولور؟

ماده فعللر، یا «بسیط» ویا «مربک» اولور.

«بسیط» کندیسنه باشقه بر سوز علاوه ایدله یه رک اصلاً

فعل اولانلر درکه بونلره «فعل اصلی» دینور.

کچن مثاللر کبی.

«مربک» باشقه بر سوزله برلشن بسیط ماده لر درکه

«اقتداری، تعجیلی، تعلیمی» نامیله اوج قسمدر.

اقتداری — آخری ساکن اولان ماده فعللره (ا ، ا ،)
 ومتحرك یعنی حرف املا اولانلره دخی (یه ، یا) کتیرلدکدن
 صوکره « ییل » ماده سیله برلشن فعللردر .

صیغه اقتداری

ماده فعل	مثبت	منفی
کل	کله ییل	کله مه
قیر	قیراییل	قیراما
اوقو	اوقویاییل	اوقویاما
طاشی	طاشیاییل	طاشیاما
باغلا	باغلایاییل	باغلایاما
ایسته	ایسته یه ییل [۱]	ایسته یه مه

تعجیلی — ماده فعلک آخری ساکن ایسه کسره علامتی
 بر « ی » واکر متحرك ایسه بر « یی » کتیرلدکدن صوکره
 (ویر) ماده سیله برلشن فعللردر .

صیغه تعجیلی

ماده فعل	مثبت	منفی
کل	کلیویر	کلیویر مه
اوقو	اوقویویر	اوقویویر مه
	اوقومایویر	اوقومایویر مه

[۱] بونلرک معنای : کله یه مقتدر اول ، صورمامه یه مقتدر
 اول الخ دیمکدر .

قاشی	قاشییویر	قاشیایویر	قاشییویرمه
باغلا	باغلائیویر	باغلامائیویر	باغلائیویرمه
ایسته	ایسته یویر [۱]	ایسته مه یویر [۲]	ایسته یویرمه

تعلیمی — ماده فعللرک اوللرینه اسم ویا صفت علاوه سیه
 یاییلان فعللر در : صو ایچ، اوصولو اطور کبی . [۳]

[اخطار] ماده فعلک کرک مثبت و کرک منفی اولسون اقتداری
 تعجیلی، تعلیمی صیغه لرینه (سین، سون) الحاقیه مذکور صیغه لرک
 امر غائب ونهی غائب لری حاصل اوله جنی کبی مجهول اولان
 ماده لرک دخی مرکب صیغه لری عین وجهله تشکیل اولونور .

نمونه

آشاغیده بولونان ماده لرک اقتداری، تعجیلی، صیغه لرینی یازیکز .
 اسم، صفت اولانلره دخی مناسب ماده لر علاوه ایدرک صیغه تعلیمی
 یاییکز .

آج . قیر . اویو . درس . طاش . چیق . قاج .
 آتش . صیقی . اوقشا . اینان . آج . صیچرا . بکله .
 شاش . یازی .

[۱] بونلرک معناری : چابوق ایسته، چابوق کل، چابوق اوقو،
 چابوق باغلا الخ دیمکدر .

[۲] منفینک اشبو صورتلری دها زیاده مستعملدر .

[۳] چیقہ یازدی، دوشه یازدی، کبی برده «فعل مقاربه» موجود
 ایسه ده زمانمزد متروک حکمنی آلدیغندن کتایمزد ترک ایدلمشدر .

سؤال — ماده فعلی نه وقت بسیط دینور؟ مرکب
 قاجدر؟ صیغه اقتداری ناصل یاپیلیر؟ صیغه تعجیلی ناصل تشکیل ایدیلیر؟
 صیغه تعلیمی کیمدن ترکیب ایدر؟

{ صیغه مطاوعت }

مطاوعت فاعلك بر ایشی قبول ایتمه سی کیفیتندن عبارتدر. [*]
 بر ماده فاعلك آخری سا کن ایسه علی القاعده حرکه
 لندکدن صوکره بر نون ویاخود برشین و بعضاً نون یرینه لام
 ساکنه الحاقیله صیغه مطاوعت تشکیل اولونور :

سو	—	سون
کور	—	کورون
آرا	—	آران
قاشی	—	قاشین
دیک	—	دیگل
صاو	—	صاوش . . . کبی

قورتل ، طاغل ، یوتقون کلهلری شاذدر . زیرا بونلرک
 مادهلری قورتار ، طاغت ، یوت کلهلریدر .

بعض اسملرک آخرینه «ان، لان، علاوه سیله : خویلان،

[*] « ایشله نن ایشک ینه ایشله ینه طائد وراجع اولدیفنی کوسترن
 صیغه در » دپو تعریف اولونا ییلیر .

کدران، اولن کی مطاوعت صیغه لری تشکیل اولوندی کی فعل وصفیلرده مطاوعت بیان ایدر لر . ایولش، خوشلاش، کوزلاش کی .

یوقاروده کی مثالره دقت ایدیلنجه دیکل، آران کی کلمه لرک مجهول ایله مطاوعت بیننده مشترک اولدینی کورولیور . بو کیلرک فعل مطاوعت ویا مجهول اولدینی قرینه ایله فرق وتمیز اولونور . شویله که: اگر فعلک معناسی فاعلک حال وشانندن عبارت ایسه «مطاوعت» واکر فاعلک حال وشانندن عبارت ایسه مجهولدر . مثلاً: (احمد یقاندی - البسه یقاندی) دیدیکمزده برنجی مثاله یقانمق فاعل اولان احمدک حال وشانندن عبارت اولدینی ایچون مطاوعت وایکنجی مثاله ایسه مفعول اولان البسه نک حال وشانندن عبارت بولوندینی ایچون مجهول اولور .



{ صیغه مشارکت }

بردن زیاده کیمسه لر آراسنده بربرینه قارشی اجرا ایدیلن ایشی بیان ایدن صیغه یه [°] صیغه مشارکت دینیر که اول ایشی مشترکاً اجرا ایدن کیمسه لر دن هر بری آخرینه نسبتله فاعل و مفعول اولور . مثلاً: کامل افندی صالح افندی ایله دوکوشدی

[°] « یاپیلان ایشک ایکی ویا زیاده کیمسه لر آراسنده یاپیلدینی کوسترن صیغه در » تعریف بسیطیله ده تعریف اولونایلیر .

دینلده کده «دوکوشدی» صیغه شرکتک ماضیسی اولوب کامل
افندی ایله صالح افندی بیننده بربرینه قارشو اجرا ایدیلن
دوکمک فعلنی بیان ایتشدیرکه بوندن کامل افندی صالح افندی یی
دوکدی صالح افندی دخی کامل افندی یی دوکدی معناسی
چیقوب کامل افندی ایله صالح افندیدن هر برینک آخره
نسبتله فاعل ومفعول اولدینی آشکار اولور .

صیغه مشارکت تشکیل ایتک ایچون ماده فعللرک آخرنده
حرف املا وار ایسه طوغریدن طوغرییه واکر یوق ایسه
یعنی ساکن ایسه حرکه حرفیه ایله تحریک ایدلدهکن صوکره
برشین ساکنه الحاق اولونور :

مثال :

چک — چکیش

سو — سویش

اور — اوروش

چارپ — چارپیش

بعضاً اسملره (لش، لاش) الحاقیلهده صیغه مشارکت

یاییلیر :

مثال :

سوز — سوزلش

اوز — اوزلاش

یان — یاناش [*] . . . کبی .

[*] بونک اصلی یانلاش یعنی یان یانه کل اولوب تخفیفاً لام حذف
اولونارک یاناش قالمشدر .

طوقوش و صارماش کلمه‌ری شاذدر. زیرا بونلرک ماده‌سی
(طوقون - صار) در. یوقاروده‌کی ذکر اولونان مطاوعت
صیغه‌ری دائماً لازم ایسه‌ده متعیدیلردن تشکیل اولونان اشبو
مشارکت صیغه‌ری بعضاً قیاساً متعدی یاپیلایلیر: یاناشدر،
بارشدر، چکیشدر کی.

سؤال — صیغه مطاوعت نه‌یه دیرلر؟ صیغه مطاوعت ناصل
یایلیر؟ مطاوعته مجهول بیننده فرق ندر؟ فعل مشارکت ناصل تشکیل
ایدیلیر؟



یوقاروده بحثی کچن مصدر ادات ومعنی حیثیتیه اوج
قسمدر. آنلرده: مصدر اصلی، حاصل مصدر، مصدر نوعی در.

مصدر اصلی — ماده فعللره خفیلرده «مک» ثقیللرده
«مق» الحاقیه یاپیلانلردرکه بونلر صرف حدته دلالت ایدر:
کلمک، کلمه مک؛ یازمق، یازمامق کبی که مک ایله اولانلره «مصدر
خفیف» مق ایله اولانلره «مصدر ثقیل» دینور.

حاصل مصدر — فعلک حدوشندن متولد حال و کیفیتی
آگدیرر. بوده ایکی درلودر:

برنجیسی ماده فعلک منفی صیغه سیله (نه‌ی حاضرله) مشترک
اولور و آخری (مه، ما) حرفلریله نه‌ایت بولورکه بوکا صرف
ترکیده «مصدر تخفیفی» نامی ویرمش ایدک: احمدک صورماسی.

حسنک کولمہ سی ، کالک یمک یمہ سی ترکیب لرنده کی صورما ، کولمہ ، یمہ کلمہ لری کبی کہ بونلر قیاسیدر .

بونلرک معالینہ عطف نظر دقت ایدیلیرسه صورما ، صورمقدن - کولمہ ، کولمکدن - یمہ ، یمکدن متولد برحال و کیفیت اولدینی پک آشکار اولاجقندن بونلرہ حاصل مصدر اسمی ویرمکده اصلا ترددہ محل یوقدرہ .

حاصل مصدرک ایکنجیسی سماعی و قیاسی اولمق اوزرہ ایکی نوعہ آریلیر . سماعی اولانلر صرف ترکیده اسم مصدر نامنی ویردیکمز سوکی ، یاردیم ، ویرکی ، قورقو کبی کلمہ لرلہ آقندی ، صیزندی ، اوزوندی کبی ماده فعلہ «ندی» علاوہ سیلہ یاییالانلردر . بو کبی صیغہ لرک بعض کرہ حال و کیفیتلہ تکیف ایدن شیلرہ مجازاً اطلاق اولوندیغیدہ واردر : طولمہ ، یازمہ ، سوزمہ ، قرنندی کبی .

آقندی وامثالی کبی مصدرلرده کی «دی» لفظی استانبول لسانندہ «ت» کبی تلفظ اولوندیقندن چوق کیمسه لر املاسندہ تردد ایتکده ایسه ده کلمہ نک آهنگنه وتانک حروف خفیفه دن اولدیفنه اماله دقت ایدیلیرسه بونک دال ایله یازلسی طبیعی اولدینی تظاهر ایدر .

ذکر اولوندینی اوزرہ اشبو نوع سماعی اولوب اهل لساندن ایشیتمه یه متوققدر . بناء علیہ یازندی ، صاتندی ، کولوندی کبی مصدرلر ایشیدلمه دیکی جهتله استعماللری اصلا جائز دکلدیر .

[قاعده] آخری ساکن ماقبلی مضموم اولان برکلمہ یه دیگر بر حرف ساکن الحاق اولوندقده آخر کلمہ ضمه ایله تحریک

ایدیلوب بر «و» یازیلیر : کور، کورول - کورولور، اول،
اولون - اولونور کبی .

اصواتدن تشکل ایدن افعالك آخرینك حرکه سی حرکه
حرفیه ایله کسرمیه تبدیل اولونارق قیاساً برنوع حاصل مصدر
یاییلیر : چاتیردامق - چاتیردی، . . . طیقیردی کبی .

مصدر نوعی - ماده فعلك آخری ساکن اولدینی
تقدیرده اوست طرفی مفتوح ویا مکسور ایسه مذکور ساکن
حرکه حرفیه ایله مکسور واکر اوست طرفی مضموم ایسه
حرف اخیر ساکن مضموم قیلندقدن صوکره برشین ساکنه
الحاق اولونور: آلیش، ویریش. اوروش، طوروش کبی .

اکر ماده فعلك آخرنده حرف املا اولورسه اول زمان
شیندن اول بر یای مکسوره زیاده ایدیلیر : اوقویش، قازیش،
آرایش، اسنهیش کبی .

معلوملرده بعضاً شین یرینه «م» کلهرک مجھول مقامنه
قائم اولور: آلیم، صاتیم کبی که آلینش، صاتلیش دیمک اولور.
مصدر اصلیدن ماعدا مصادر مذکورہ نك جمله سی «لر،
ایله جهلندیکی کبی مفعول ومضاف ایله دخی اولورلر .

{ مثبت }

مصدر اصلی مصدر نوعی حاصل مصدر

مجه	: کلک	کلہ	کلیش	چاتیردی	یاردیم
مفعوبه . . .		کلہ یی	کلیشی	چاتیردی یی	یاردیمی

مفعوالیه : ..	کلمه یه	کلیشه	چاتیردی یه	یاردیمه
مضایه : ..	کلمه نك	کلیشك	چاتیردینك	یاردیمك
جمع :	کلمه لر	کلیشلر	چاتیردی لر	یاردیم لر

منفی

مصدر اصلی	حاصل مصدر	مصدر نوعی
محو : كلك	کلمه مك	کلمه یش
مفعول به : »	کلمه یی	کلمه یشی
» الیه : »	کلمه مه یه	کلمه یشه
مضایه : »	کلمه مه نك	کلمه یشك
جمع :	کلمه مه لر	کلمه یشلر

[تنبیه] — مصدر اصلی یه (لك - اق) الحاقیه مثلاً كولمك
 یرنده كولمكلك و صور مق مقامنده صور مقلق استعمالی شیوه
 افاده یی كولنج برحاله کثیره چکنه دن بوندن بغایت اجتناب
 لازمدر .

تعمیه

اشاغیده کی کلمه لر دن مصدر اولانلرک هانکی قسم دن اولدیغی بیان
 ایدیکز؟ و مصدر اولمایان ماده لر ی دخی اوج درلو مصدر یاپوب احوال
 اربعه سنی تصریف ایدیکز . جمعلرینیده یازیکنز .

اوطور مق . یات . قالق . کیتمه . کلمه . اوشومك .
 کیدیش . اوچق . چیقیش . قورقو . جاردی . قیردی .

آج . آغری . باغری . قاقیق . یالوار . شاقیردی . بلله .
چکمک . آکلایش . بیلکی . چتیردی . طوپارلا .

سوال — اذات ومعنی اعتباریله مصدر قاچ قسمدر؟ اسملری ندر؟
مصدر اصلی کیمدن یاپیلیر و ناصل یاپیلیر؟ حاصل مصدر ناصل یاپیلیر؟
مصدر نوعی ناصل تشکیل اولونور؟ بونلردن سماعی اولانلر وارمیدر؟
مصدرلر، اصللری اعتباریله «فعلی»، «اسمی»، «وصفی»
اولور.

اگر مصدرلرک آلتدینی ماده فعل، فعل اصلی ایسه یعنی
ذاتنده حدث بیان ایدرسه اکا «مصدر فعلی» و اگر ماده فعل،
فعل اسمی یعنی بر اسمندن یاپیلیمش ایسه اکا مصدر «اسمی»
و اگر ماده فعلی وصفی ایسه آکاده «مصدر وصفی» دینور:
قیرمق، طوزلامق، یشیلنمک کبی.

صفتلره (لک — اق) الحاقیله یاپیلان مصدرلردخی مصدر وصفیده
داخلدر: ایبلک، کوتولک، فنالق کبی.

مصدرلر معنی جهتیه دنخی عام، خاص، مثبت، منفی نامی
آلارق درده تقسیم اولونورلر .

اگر مصدر، عام اولان ماده فعلدن یاپیلیمش ایسه «مصدر
عام، دینور اولمق، قیلیمق، ایتکم، ایله مک کبی.

اگر خاص اولان ماده فعلدن یاپیلیمش ایسه «مصدر خاص»
دینور. کزیمک، یاتمق، اویومق کبی.

اگر مثبت اولان ماده فعلدن یاییلمش ایسه «مصدر مثبت»
 واکر منفیدن یاییلمش ایسه «مصدر منفی» دینور.
 کلمک، یازمق — کلمه مک، یازماق کبی.

ترجیه مصدرلر نسبت اعتباریه دخی درت قسمه آریلورلر.
 شویله که اکر مصدرک مشتق اولدینی ماده لازم ایسه «مصدر
 لازم» متعدی ایسه «مصدر متعدی» معلوم ایسه «مصدر معلوم»
 واکر مجهول ایسه «مصدر مجهول» دینور: چیقماق، دوکماق —
 کسمک، کسماق کبی.

بوندن باشقه مصدرلر «بسیط» و «مرکب» قسملرینه
 آریلیر. مصدر بسیط، بسیط اولان ماده لردن یاییلان مصدر.
 نردر: کلمک، قیرماق کبی.

مصدر مرکب، ماده فعلک اقتداری، تعجیلی، تعلیمی
 صیغه لرندن یاییلانلر درکه بونلرده «مصدر اقتداری»، «تعجیلی»،
 «تعلیمی» تامی ویریلیر: کله ییلمک، کلیویرمک، ایلری کلمک کبی.

تعمیه

اشاغیده کی مصدرلردن فعلی، وصفی، اسمی اولانلری تفریق
 ایدیکز، صوکره بونلردن هانکیلری مثبت هانکیلری منفیدر کوستریکز؟
 متعدی، لازم و معلوم ایله مجهول اولانلری اشارت ایدیکز؟ بونلر
 میاننده مصدر مرکب وارسه آنیده بیان ایدیکز؟ والحاصل بر مصدرک،
 اقسامندن قاچ دانه سنی حاوی اولدینی حداسنه یازیکز؟ مثلا: کوزله مک؛
 اسمیدر، خاصدر، مثبتدر، متعدیدر، معلومدر، بسیطدر، دیپیکز؟

ایشیتمک . دکلهمک . اگرله مک . بیلیمک . چیویله مک
میخلامق . بیاضلاشمق . کوزله مک . کله بیلیمک . کوسترمک
باغلامق . قاجیویرمک . فنالاشمق . آکلامق . درس
او قومق . قیلیمق . سویله مه مک . کوتورمک . یاقمامق . کلک
کله یویرمک . صیچرامق . سیلیمک . بیومک . اکلایا بیلیمک
صوقولمق . قورتارمق . ایشیده مه مک . طاورانمق . چوزولمک
ایسته نمک .

سوال — مصدرلر اصللری اعتباریله قاج قسمدر؟ اسملری ندر؟
مصدره نه زمان فعلی، اسمی، وصفی دینور؟ مصدرلره نه وقت عام،
خاص، مثبت، منفی نامی ویریلیر؟ نسبت اعتباریله مصدرلر قاج قسمدر
وانلر ندر وکیلردن یاییلیر؟ مصدر مرکب قاج قسمدر واسملمی ندر؟



ایکنجی مقاله

{ فعل }

ذات وزمانه [*] دلالت ایتمک شرطیله بر ایشک وقوع ویا
عدم وقوعنی بیلدیرن کلمیه «فعل» دینور.

یازدی، یازیور، یازاجق کبی که برنجیسی یازمه ایشنک

[*] فعللرک دلالت ایتدیکی زمان اوچدر: ۱ = ماضی یعنی

بکشم. ۲ = حال یعنی شمدی. ۳ = استقبال یعنی کله چک.

کچم شده ، ایکنجیسی کله جکده ، اوچنجیسی دخی شمدیده
وقوعی بیلدیریور.

فعللردن یاییلیر بر طاقم صفتلرده وارددرکه بونلر زمانه
دلالت ایتمه یوب یالکنز بر ایشله متصف ذاتی بیلدیردکلی
ایچون بونلره « فرع فعل » تسمیه ایدرلر. نتکیم اشاغیده ذکر
ویان اولونا جقدر .

ترکجه فعللر (بسیط ، مرکب ، ربط ، خصوصی) ناملریله
درت نومه آیرلمشدر .



﴿ افعال بسیطه ﴾

افعال بسیطه (امر ، نهی ، ماضی ، مضارع ، حال ، التزامی ،
استقبال ، وجوبی ، نامیله سکزددر .

{ امر حاضر - نهی حاضر }

امر حاضر ونهی حاضر ایله بونلرک غائبلری تشکیل ایدن
امر غائب ونهی غائب صیغه لری « ماده فعل » بختنده مفصلاً
بیان ایدلدیکی جهته بوراده تکرارندن صرف نظر ایدلمشدر .



{ فعل ماضی }

ماضی ایکی درلودر. بری «ماضی» شهودی، دیکری «ماضی» نقلی، در.

ماضی «شهودی» — اولجه وقوع بولان بر ایشی متکلمک کوردیکنی ویا کورمش کبی بیلدیکنی خبر ویرن صیغه درکه ماده فعلک آخرینه «دی» لفظی علاوه سیله مفرد غائبی و «لر» ایله بونک جمعی حاصل اولور و ضمیر فعلی اعانه سیله مخاطب و متکلم صیغه لری تشکیل قننور.

{ ماضی «شهودی» معلومک مثبت و منفی صورتی }

غائب

مخاطب

متکلم

چکدی — مفرد	چکدیک	{ چکدیم [*]	چک —	چک
چکدیلر — جمع	چکدیکیز			

[*] متکلم شخصلریله مفرد مخاطب شخصلری «دی» لفظنک یاسنی حذف ایله اکثریت اوزره چکدم، چکدک، چکدک صورتنده یازلمقده و بونده ایسه اول قدر بآس کورلمه مکده ایسه ده منفی صیغه لرندن ادات نغیک الف و هاسنی حذف ایده رک: چکمه دم، چکمه دک، چکمه دی، چکمه دک، چکمه دیکیز، چکمه دیلر. یازمادم، یازمادک، یازمادی، یازمادق، یازمادیکیز، یازمادیلر، یرنه (چکمه دم، چکمه دک) الخ و یازمدم، یازمدک الخ) یازمامیلدر.

چکمه دی	چکمه دیک	چکمه دیم	} چکمه —
چکمه دیلر	چکمه دیکز	چکمه دیک	
یازدی	یازدیک	یازدیم	} یاز —
یازدیلر	یازدیکز	یازدیک	
یازمادی	یازمادیک	یازمادیم	} یازما —
یازمادیلر	یازمادیکز	یازمادیک	

{ ماضی شهودی مجهولک مثبت و منفی صورتی }

چکلدی	چکلدیک	چکلدیم	} چکل —
چکلدیلر	چکلدیکز	چکلدیک	
چکلمه دی	چکلمه دیک	چکلمه دیم	} چکلمه —
چکلمه دیلر	چکلمه دیکز	چکلمه دیک	
یازلدی	یازلدیک	یازلیم	} یازل —
یازلدیلر	یازلدیکز	یازلدیک	
یازلما دی	یازلما دیک	یازلما دیم	} یازلما —
یازلما دیلر	یازلما دیکز	یازلما دیک	

ماضی نفی — کچم شده اولان بر ایشی متکلمک ایشیتمکله
 بیلدیکنی خبر ویرن صیغه درکه ماده فعلک آخرینه « مش »
 علاوه سیله مفرد غائبی و بوکا « لر » الحاقیه غائبک جمعی حاصل
 اولور . ضمیر نسبی اعانه سیله سائر صیغه لری تشکیل اولونور .

{ ماضی نقلیٰ معلومك مثبت و منفیسی }

چك	-	{	چكشم	چكشمسك	چكشمش - چكشمدر
			چكشز	چكشمسكز	چكشمشار
چكمه	-	{	چكمهشم	چكمهشمسك	چكمهشمش - چكمهشمدر
			چكمهشز	چكمهشمسكز	چكمهشمشار
ياز	-	{	يازشم	يازشمسك	يازشمش - يازشمدر
			يازشز	يازشمسكز	يازشمشار
يازما	-	{	يازماشم	يازماشمسك	يازماشمش - يازماشمدر
			يازماشز	يازماشمسكز	يازماشمشار

{ ماضی نقلیٰ مجهولك مثبت و منفی صورتی }

چكل	-	{	چكلشم	چكلشمسك	چكلشمش - چكلشمدر
			چكلشز	چكلشمسكز	چكلشمشار - چكلشمشاردر
چكلمه	-	{	چكلمهشم	چكلمهشمسك	چكلمهشمش - چكلمهشمدر
			چكلمهشز	چكلمهشمسكز	چكلمهشمشار - چكلمهشمشاردر
يازل	-	{	يازلشم	يازلشمسك	يازلشمش - يازلشمدر
			يازلشز	يازلشمسكز	يازلشمشار - يازلشمشاردر
يازما	-	{	يازلامشم	يازلامشمسك	يازلامشمش - يازلامشمدر
			يازلامشز	يازلامشمسكز	يازلامشمشار - يازلامشمشاردر

نمونه

آشاییده کی ماده لرك ماضی شهودی و نقلیسنی بولوگز . صـ و کره
معلوم و مجهولارینك مثبت و منفی صورتلرینی تصریف ایدیگز .

آرا . ایچ . اك . بیچ . صات . صور . طوت . ایسته .
بـله . چویر . قاز . اشله . طاغت . کیزله . طوبلا . اورسه له .

سؤال — فعل نیه دیرلر ؟ زمان قاجدر ؟ ترکیبه فعللر قاج
نوعدر ؟ افعال بسیطه هانکیلریدر ؟ فعل ماضی قاج درلودر ؟ ماضی
شهودی نیه دیرلر و ناصل یاییلر ؟ ماضی نقلی نیه دیرلر و ناصل تشکیل
اولونور .

{ فعل مضارع }

مضارع، هم حاله وهم استقباله دلالت ایدن فعلدره . ماده
فعلك آخرینه مثبتلرده [ر ، (َ) ر ، یر ، آر ، ور] منفیلرده
بر « ز » کتیریلرک مضارعك . فرد غائبی و « لر » علاوه سیله
جمع غائبی، و مفرد غائبه ضمیر نسبی الحاقیله دیگر صیغه لری حاصل
اولورکه مثبت ماده لره مذکور ادا تارك صورت الحاقی بر وجه
زیر بیان اولونور :

آخری حرف املا اولان ماده فعللره عمومیتله بر ساکن
« سر » حرفی الحاق اولونور :

مثال :

ماده فعل — اوقو قازی آغلا دنه
مضارع — اوقور قازیر آغلار دنه

آخری ساکن اولان ماده فعللرده ماده مذ کوره نك جوهرینه
نظر اولونور . اکر جوهری ثنائی (ایکی حرفلی) ایسه ثقیلرده
« آر » خفیلرده « (َ) سر » الحاق اولونور :

مثال :

ماده فعل — بوز یاز سو از
مضارع — بوزار یازار سور از

فقط : کلیر، قالیر، آلیر، بیلیر، صائیر مضارع لرنده شاذ
اولارق « یر » الحاق اولونمشدر .

آخری ساکن اولان ماده فعلک جوهری ثلاثی (اوج حرفلی)
اولوبده بر هجادن عبارت بولونورسه طبق ساکن اولان ثنائیلر
کبی مضارع تشکیل ایدیلیر :

مثال :

ماده فعل — اورک اولچ یرت قورق
مضارع — اورکر اولچر یرتار قورقار

آخری ساکن اولان ماده فعل ثلاثی اولوبده بر هجادن
عبارت اولمازسه ویاخود رباعی (درت حرفلی) ویا خماسی

(بش حرفلی) اولورسه اول وقت آخرك اوست طرفنه نظر اولونور . اكر آخرك اوست طرفی فتحه ویا کسره ایسه « یر » واکر ضمه ایسه « ویر » الحاقیله مضارع تشکیل ایدیلیر :

مثال :

کیدر [*]	یر	کیدریر
بگزت	یر	بگزمه دیر
آغار	یر	آغاریر
اوصان	یر	اوصانیر
ایشیت	یر	ایشیدیر [**]
اوتور	ور	اوتورور
اونوت	ور	اونودور
قورتار	یر	قورتاریر
قیصقان	یر	قیصقانیر
هایقیر	یر	هایقیریر
اوکسور	ور	اوکسورور
قیصیرغان	یر	قیصیرغانیر

[*] کیت ماده سنك مضارعی دکلدر ماده مذکورہ نك متعدی سیدر .

[**] رادن اول « ی ، و » یازمایارق برچوقلر ایشیدر - اوتورور - اونودر طرزنده یازمقده ایسه ده یانك حذفده بروجه مشروح قواعد مخالفندن باشقه بر فائده تصور اولوناماز .

{ مضارع معلومك مثبت و منفی صورتی }

(مثبت)

ماده فعل	متكلم	مخاطب	غائب
چك -	چكرم چكروز	چكرسك چكرسكز	چكر = مفرد چكرلر = جمع
كل -	كليرم كليرز	كليرسك كليرسكز	كليرلر كليرلر
ياز -	يازارم يازارز	يازارسك يازارسكز	يازار يازارلر
بول -	بولورم بولورز	بولورسك بولورسكز	بولور بولورلر

(منفی)

چكمه -	چكمم چكميز	چكمزسك چكمزسكز	چكمز [۱] چكمزلر
كله -	كلم كلميز	كلزسك كلزسكز	كلز كلزلر

[۱] خفیف اولان ماده لرك منفیسندن مضارع تشکیلنده ادات نفیک هاسی حذف اولوناراق « چکمه ز » یرینه « چکمز » یازلدینی کبی کذلک مفرد متکلمده (ز) حذف و جمعنده یایه قلب اولوناراق : چکمز، چکمز ز یرینه (چکمز، چکمز) یازیلیر .

یازما	—	{ یازمام یازمایز }	یازمازسک	یازماز
			یازمازسکز	یازمازلر
بولما	—	{ بولمام بولمایز }	بولمازسک	بولماز
			بولمازسکز	بولمازلر

{ مضارع مجهولك مثبت و منفی صورتی }

(مثبت)

چكل	—	{ چكیلیرم [۱] چكیلیرز }	چكیلیرسك	چكیلیر
			چكیلیرسکز	چكیلیرلر
یازل	—	{ یازیلیرم یازیلیرز }	یازیلیرسك	یازیلیر
			یازیلیرسکز	یازیلیرلر
بولون	—	{ بولونورم بولونورز }	بولونورسك	بولونور
			بولونورسکز	بولونورلر

{ منفی }

چكلمه	—	{ چكلمم چكلمیز }	چكلمزسك	چكلمز
			چكلمزسکز	چكلمزلر
یازلما	—	{ یازلمام یازلمایز }	یازلمازسك	یازلماز
			یازلمازسکز	یازلمازلر
بولونما	—	{ بولونمام بولونمایز }	بولونمازسك	بولونماز
			بولونمازسکز	بولونمازلر

{ فعل حال }

شمیدیکی زمانده بر ایشک وقوع ویا عدم وقوعنی بیلدیرن
فعلدرکه ماده فعلک منفیلری ایله آخری متحرک اولان مثبتلرینه
«یور» لفظی الحاق اولونارق منفی و مثبت صورتنک مفرد غائبی
وبوکا «لر» علاوه سیه جمع غائبی حاصل اولوب مفرد غائبه
ضمیر نسبی الحاقیه دیگر صیغه لری تشکیل اولونور .

اگر ماده فعلک آخری ساکن ایسه مکسور قیلنوب کسره یی
اظهار ایچون بره ی، یازلدقن صوکره «یور» لفظی الحاق اولونور.

{ فعل حال معلومک مثبت و منفی صورتی }

(مثبت)

چکیور	چکیورسک	چکیورم	} — چک
چکیورلر	چکیورسکیز	چکیوروز	
اوقویور	اوقویورسک	اوقویورم	} — اوقو
اوقویورلر	اوقویورسکیز	اوقویوروز	

(منفی)

چکمه یور	چکمه یورسک	چکمه یورم [*]	} — چکمه
چکمه یورلر	چکمه یورسکیز	چکمه یوروز	

[*] ادات نفیه اداوتدن بری متصل اولدقده قاعده به مخالف اولارق
«مه» نك هاسنی خذف ایله «چکمیور» ، «چکمیور» طرز تحریری همان
تعم اتمشی کبیدر .

اوقوما	اوقومايورم	اوقومايورسك	اوقومايور
اوقومايورز	اوقومايورسكز	اوقومايورلر	

{ فعل حال مجهولك مثبت و منفی صورتی }

(مثبت)

چكل	چكيلييورم	چكيلييورسك	چكيلييور
چكيلييورز	چكيلييورسكز	چكيلييورلر	
اوقو	اوقونييورم	اوقونييورسك	اوقونييور
اوقونييورز	اوقونييورسكز	اوقونييورلر	

(منفی)

چكلمه	چكلمهييورم	چكلمهييورسك	چكلمهييور
چكلمهييورز	چكلمهييورسكز	چكلمهييورلر	
اوقونما	اوقونمايورم	اوقونمايورسك	اوقونمايور
اوقونمايورز	اوقونمايورسكز	اوقونمايورلر	

تمهييه

آشاغیده کی ماده لرك معلوم ، مجهول و مثبت ، منفی صورتلرینه نظراً مضارع و حال صیغه لرینی تصرف ایدیکز .

کی . قوشان . آل . حاضرلا . طولدر . بوشالت . طوت . کور . طوقون . طارت . اسنه . قاوور . قورقوت . اوچور . بور . قوبار . سوپور . اشله . کوله . چیکنه . دیشله .

سؤال — فعل مضارع نیه دیرلر؟ کیمدن یاییلر ، ناصل یاییلر؟
فعل حال نیه دیرلر؟ کیمدن یاییلر ، ناصل یاییلر؟

{ فعل التزامی }

فعل التزامی ، برایشک یاییلمه سی متکلمک مطلوبی اولدیغنه
دلالت ایدن فعلدرکه ماده فعلک آخری ساکن ایسه مفتوح
قیلنوب فتحیه علامت خفیفلرده بر ده ، وثقیللرده بر ده ا ،
اگر متحرک ایسه ماده فعلک آخرینه خفیفلرده بر ده یه ،
وثقیللرده بر ده یاه یازیلهرق مفرد غائبی حاصل اولوب بوکا دلر
الحاقیله جمع غائبی و مفرد غائبه ضمیر نسبی لاحق اولارق
سائر صیغهلری تشکیل اولونور .

چک	{ چکه یم چکه لم }	چکه سک چکه سکز	چکه چکه لر
یاز	{ یازایم یازالم }	یازاسک یازاسکز	یازا یازالر
سویله	{ سویله یم سویله لم }	سویله سک سویله سکز	سویله یه [°] سویله لر
اوقو	{ اوقویایم اوقویالم }	اوقویاسک اوقویاسکز	اوقویا اوقویالر

مجهول و منفی صورتلری دخی عین قاعده ایله تشکیل اولونور .

[°] بو و بونک کییلر (سویله ، ایستییه ، بکلیه) طرزنده دخی
مستهلکدر .

{ استقبال }

استقبال ، بر ایشك كله جكدہ وقوع ویا عدم وقوعی
بیلدیرن فعلدر.

استقبال صیغه سی تشکیل ایتك ایچون فعل التزامینك
خفیفلرینه «جك» و ثقیللرینه «جق» الحاق اولنور. مذکور
صیغه لرك مجهول و منفیلری فعل التزامینك مجهول و منفیلرینه
ینه اشبو ایکی اداتك علاوه سیله حاصل اولور. مخاطب و متکلم
شخصلرینك تشکیلی استقبالدہ دخی ضمیر نسبی اعانه سیله تشکیل
قیلنور.

چكه چك	چكه چكسك	چكه چكم	} — چكه
چكه چكلر	چكه چكسكئز	چكه چكئز	

يازاجق	يازاجقسك	يازاجغم	} — يازا
يازہ جقلر	يازہ جقسكئز	يازاجغز	

سويله يه چك	سويله يه چكسك	سويله يه چكم	} — سويله يه
سويله يه چكلر	سويله يه چكسكئز	سويله يه چكئز	

اوقويا جق	اوقويا جقسك	اوقويا جغم	} — اوقويا
اوقويا جقلر	اوقويا جقسكئز	اوقويا جغز	

[قاعده] استقبال اداتی اولان «جق» لفظنك قافی حرکه.

لنیرسه غینہ تبدیل اولونور: يازاجغم، يازاجغز، يازاجنی کبی.

{ فعل وجوبی }

فعل وجوبی، بر ایشی ایشله مک لزومنی فاعله کوسترین
 فعلدرکه حاصل مصدرک آخرینه بر «لی» لفظی علاوه سیله مفرد
 غائی و «لر» ایله بونک جمعی و ضمیر نسبی اعانه سیله سائر
 سائر صیغه لری تشکیل اولونور:

{ فعل وجوبی معلومک مثبت و منفی صورتی }

(مثبت)

چکمه	چکمیلیم	چکمیلیسک	چکمیلی - در [*]
	چکمیلیز	چکمیلیسکز	چکمیلیدرلر
یازما	یازمالیم	یازمالیسک	یازمالی (لیدر)
	یازمالیز	یازمالیسکز	یازمالیدرلر

(منفی)

چکمه مه	چکمه ملیم	چکمه ملیسک	چکمه ملی (لیدر)
	چکمه ملیز	چکمه ملیسکز	چکمه ملیدرلر

[*] خفیف اولان ماده لرك فعل وجوبیسنده «مه» لفظنك هاسی
 حذف اولونوب اکثریله (چکمیلی، چکمه ملی) طرزنده یازیلیرکه مستعمل
 اولانیبددودر. فقط ثقیل اولان ماده لردد «ما» لفظنك الفی حذف
 ایله مابعدینه بیتشدیرمک جائز اوله ماز.

یازمامه — { یازمامالیم یازمامالیسک یازمامالی (لیدر)
 یازمامالیز یازمامالیسکز یازمامالیدرلر

مجهولك مثبت ومنفی سی دخی عین صورتله یاپیلیر.

نمونه

اشاغیده کی ماده لرك التزامی استقبال ووجوبی صیغه لرینی بولوب تصریف ایدیکنز .

چیق . این . سوسله . تلله . پوللا . یوللا . اوقو . اسکی .
 اوغرا . کور . کوزت . قاپ . قاج . چبالا . کول . اوینا .
 بی . دی .

سؤال — فعل التزامی نیه دیرلر ؟ فصل تشکیل اولونور . فعل
 استقبال نیه دیرلر ؟ فصل یاپیلیر ؟ فعل وجوبی بی تعریف ایدیکنز ؟ فعل
 وجوبی کیمدن یاپیلیر ؟

{ افعال مرکبه }

مرکب فعللر ایکی نوعدر . برینه « مرکب عام » دیکرینه
 « مرکب خاص » دینور .

فعل مرکب عام — اقتداری ، تعجیلی ، تعلیمی ماده لردن
 قواعد مشروحه ایله یاپیلان ماضی ، مضارع ، حال ، التزامی
 استقبال ، وجوبی صیغه لرندن عبارتدرکه نمونه اولوق اوزره
 بوجه آتی تصریف اولوندی .

{ افعال اقتداریه }

ماضی شهودی

غائب

مخاطب

متکلم

چکه بیلدی

چکه بیلدک

مفرد — چکه بیلدم

چکه بیلدیلر

چکه بیلدیکز

جمع — چکه بیلدک

ماضی نفی

چکه بیلمش

چکه بیلمشسک

مفرد — چکه بیلشم

چکه بیلمشلر

چکه بیلمشسکز

جمع — چکه بیلمشز

مضارع

چکه بیلیر

چکه بیلیرسک

مفرد — چکه بیلیرم

چکه بیلیرلر

چکه بیلیرسکز

جمع — چکه بیلیرز

مال

چکه بیلیرور

چکه بیلیرورسک

مفرد — چکه بیلیرورم

چکه بیلیرورلر

چکه بیلیرورسکز

جمع — چکه بیلیرورز

الغراضی

چکه بیلله

چکه بیللهسک

مفرد — چکه بیللیم

چکه بیللر

چکه بیللرسکز

جمع — چکه بیللیم

استقبال

مفرد —	چکه بیله جکم	چکه بیله جکسک	چکه بیله جک
جمع —	چکه بیله جکیز	چکه بیله جکسکیز	چکه بیله جککر

چکه

وہوبی

مفرد —	چکه بیلمایم	چکه بیلمایسک	چکه بیلملی
جمع —	چکه بیلماییز	چکه بیلمایسکیز	چکه بیلمایلر

چکه

{ افعال تعجیلیہ }

ماضی شرودی

مفرد —	چکیویردم	چکیویردک	چکیویردی
جمع —	چکیویردک	چکیویردیکیز	چکیویردیلر

چکیویر

ماضی نقلی

مفرد —	چکیویرمشم	چکیویرمشسک	چکیویرمش
جمع —	چکیویرمشز	چکیویرمشسکیز	چکیویرمشلر

چکیویر

مضارع

مفرد —	چکیویریرم	چکیویریرسک	چکیویریر
جمع —	چکیویریرز	چکیویریرسکیز	چکیویریرلر

مال

مفرد — چکیویریورم چکیویریورسک چکیویریور
 جمع — چکیویریورز چکیویریورسکنز چکیویریورلر

چکیویر

الترامی

مفرد — چکیویریم چکیویرهسک چکیویره
 جمع — چکیویرلم چکیویرهسکنز چکیویرهلر

استقبال

مفرد — چکیویرهجکم چکیویرهجسک چکیویرهجک
 جمع — چکیویرهجکنز چکیویرهجسکنز چکیویرهجکلر

چکیویره

وهوبی

مفرد — سویورملیم سویورملیسک سویورملی
 جمع — سویورملینز سویورملیسکنز سویورملیلر

سویور

« افعال تعلیمیه »

ماضی شرودی

مفرد — صو ایچدم صو ایچدک صو ایچدی
 جمع — صو ایچدک صو ایچدیکنز صو ایچدیلر

صو ایچ

ماضی نقلی

مفرد — صوت ایچمشم صوت ایچمشسک صوت ایچمش
 جمع — صوت ایچمشنز صوت ایچمشسکنز صوت ایچمشلر

صوت ایچ

مضارع

مفرد — صوت ایچرم صوت ایچرسک صوت ایچر
 جمع — صوت ایچرز صوت ایچرسکنز صوت ایچرلر

صوت ایچ

مال

مفرد — صوت ایچیورم صوت ایچیورسک صوت ایچیور
 جمع — صوت ایچیورنز صوت ایچیورسکنز صوت ایچیورلر

صوت ایچ

الترامی

مفرد — صوت ایچهیم صوت ایچهسک صوت ایچه
 جمع — صوت ایچلم صوت ایچهسکنز صوت ایچلر

صوت ایچ

استقبال

مفرد — صوت ایچهجکم صوت ایچهجکسک صوت ایچهجک
 جمع — صوت ایچهجکنز صوت ایچهجکسکنز صوت ایچهجکلر

وجوبی

مفرد — صوت ایچملیم صوت ایچملیسک صوت ایچملی
 جمع — صوت ایچملینز صوت ایچملیسکز صوت ایچملیلر [*]

تفسیر

اشاغیده کی مرکب ماده لرك ماضی، مضارع، حال، التزامی استقبال وجوبی صیغه لرینی تصریف ایدیکز.

کله بیل کیدیور درس اوکو بلله یه بیل چالیشیور
طوغری سویله

سؤال — افعال مرکبه قاچدر؟ فعل مرکب عام کیلردن یاییلیر؟

— فعل مرکب خاص — فعل اعانه ایله یاییلان فعللر دره بونلرده (حکایه، روایت، شرط) فعللرندن عبارتدر.

(فعل اعانه) — «ایدی» کله سی اولوب ماضی نقلیمی «ایمش» و صیغه شرطیه سی دخی «ایسه» دره صورت تصریفاری بوجه آتیدر:

غائب	مخاطب	متکلم	
ایدی	ایدک	ایدم	مفرد —
ایدیلر	ایدیکز	ایدک	جمع —

ماضی شهودی

[*] فعل مرکب عامک منفی و مجهوللری دخی ماده فعللرک منفی و مجهول صورتلرندن بو وجهله تشکیل اولوندیغی جهته آریجه تصریفه لزوم کورولمادی.

ایمیش	ایمیشک	ایمیشم	مفرد —	}	ماضی نقلی
ایمیشلر	ایمیشسکز	ایمیشمز	جمع —		
ایسه	ایسهک	ایسه‌م	مفرد —	}	صیغه شرطیه
ایسه‌لر	ایسه‌کز	ایسه‌ک	جمع —		

« فعل حکایه »

افعال حکایه ، فعلک مضمونی مشاهده طریقہ حکایہ
 دلالت ایدن فعللردرکه فعللرک آخرینه فعل اعانه‌ک ماضی
 شهودیسى علاوه اولونارق تشکیل ایدیلیر .

چکدی ایدم	چکدی ایدک	چکدی ایدی	}	حکایه
چکدی ایدک	چکدی ایدیکز	چکدی ایدیلر		
چکدم ایدی	چکدک ایدی	چکدی ایدی	}	ماضی شهودی
چکدک ایدی	چکدیکز ایدی	چکدیلر ایدی		
چکمش ایدم	چکمش ایدک	چکمش ایدی	}	حکایه
چکمش ایدک	چکمش ایدیکز	چکمش ایدیلر		
چکر ایدم	چکر ایدک	چکر ایدی	}	حکایه مضارع
چکر ایدک	چکر ایدیکز	چکر ایدیلر		
چکیور ایدم	چکیور ایدک	چکیور ایدی	}	حکایه حال
چکیور ایدک	چکیور ایدیکز	چکیور ایدیلر		
چکه ایدم	چکه ایدک	چکه ایدی	}	حکایه التزامی
چکه ایدک	چکه ایدیکز	چکه ایدیلر		

حکایه استقبال } — چکه جک ایدم چکه جک ایدک چکه جک ایدی
 — چکه جک ایدک چکه جک ایدیکز چکه جک ایدیلر

حکایه وجوبی } — چکملی ایدم چکملی ایدک چکملی ایدی
 — چکملی ایدک چکملی ایدیکز چکملی ایدیلر

[اخطار] ایدی کله سنک الف و یاسنی حذف ایله
 چکیدیدی، چکمشدی، چکردی، چکیوردی، چکه جکدی،
 چکملیدی و التزامیده ها ایله «ایدی» کله سنک یالکز الفی
 حذف ایدوب چکیددی طرزنده دخی یازمقدمه درلر.



«افعال روایت»

روایت فعللری، فعلک مضمونی ایشتمک طریقیه-له نقل
 وروایتیه دلالت ایدرکه فعللرک آخرینه فعل اعانهک ماضی
 نقلیمی لاحق اولارق بروجہ آتی تشکیل اولونورلر :

روایت } — [۱]
 ماضی شهودی } —

روایت } — چکمش ایمشم چکمش ایمشمک چکمش ایمش
 ماضی نقلی } — چکمش ایمشر چکمش ایمشکبز چکمش ایمشر

[۱] روایت ماضی شهودی صیغه سی یوقدر .

	روایت	— چکر ایشم	چکر ایشسك	چکر ایش
	مضارع	— چکر ایشز	چکر ایشسكز	چکر ایشلر
	روایت	— چکیور ایشم	چکیور ایشسك	چکیور ایش
	حال	— چکیور ایشز	چکیور ایشسكز	چکیور ایشلر
[۱]	روایت	— چكه ایشم	چكه ایشسك	چكه ایش
	التزامی	— چكه ایشز	چكه ایشسكز	چكه ایشلر
	روایت	— چكه جك ایشم	چكه جك ایشسك	چكه جك ایش
	استقبال	— چكه جك ایشز	چكه جك ایشسكز	چكه جك ایشلر
	روایت	— چكملى ایشم	چكملى ایشسك	چكملى ایش
	وجوبی	— چكملى ایشز	چكملى ایشسكز	چكملى ایشلر

تعمیر

آشاغیده کی ماده لردن یاپیلان افعال بسیطه نك حکایه وروایت فعللرینی تصریف ایدیگز .

صیق . از . او یو . قیر . دوک . اینجت . او کسور .

سؤال — فعل مرکب هام ، نه ایله یاپیلیر ، قاچدر واسملری ندر؟
فعل اعانه هانکی کله لردر؟ فعل حکایه نیه دیرلر وناصل تشکیل اولونور؟
فعل روایت نیه دیرلر وناصل حاصل اولور؟

[۱] اشبو فعللری تخفیف ایله چکر مش ، چکیور مش ، چکیمش ،
چكه جكمش ، چكملمش طرزنده تصریف ایتك دخی جائزدر .

• افعال شرطیه •

افعال شرطیه ، لاحق اولدینی بر جمله‌ی دیگر بر جمله‌یه ربط ایدن فعللر درکه بسیط اولان فعللرک نهایتنه فعل اعانه‌نک شرط صیغه‌سی کتیریلهرک بروجہ آتی تشکل ایدر .

چکدم ایسه	چکدک ایسه	چکدی ایسه [*]	شرط ماضی شهودی
چکدک ایسه	چکدیکز ایسه	چکدیلر ایسه	
چکدی ایسه م	چکدی ایسه ک	چکدی ایسه	شرط نقلی
چکدی ایسه ک	چکدی ایسه کز	چکدی ایسه لر	
چکمش ایسه م	چکمش ایسه ک	چکمش ایسه	شرط مضارع
چکمش ایسه ک	چکمش ایسه کز	چکمش ایسه لر	
چکیر ایسه م	چکیر ایسه ک	چکیر ایسه	شرط حال
چکیر ایسه ک	چکیر ایسه کز	چکیر ایسه لر	
چکیور ایسه م	چکیور ایسه ک	چکیور ایسه	شرط التزامی
چکیور ایسه ک	چکیور ایسه کز	چکیور ایسه لر	
چکسه م	چکسه ک	چکسه	شرط استقبال
چکسه ک	چکسه کز	چکسه لر	
چکه جاک ایسه م	چکه جاک ایسه ک	چکه جاک ایسه	
چکه جاک ایسه ک	چکه جاک ایسه کز	چکه جاک ایسه لر	

[*] تخفیفاً چکد ایسه ، چکمشه ، چکرسه ، چکیورسه ، چکه جکسه ، چکملیسه صورتنده یارلق جائ اولدینی کبی جمع غائبلرده ادات جمع فعله التحاق ایدهرک چکدیلرسه ، چکمشلرسه ، چکیرلرسه ، چکیورلرسه ، چکه چکیرسه طرزنده دخی یازیله بیلیر .

شرط وجوبی } — چکملی ایسه م چکملی ایسه ک چکملی ایسه
 — چکملی ایسه ک چکملی ایسه کز چکملی ایسه لر

[اخطار] افعال مذکورہ معلومک مثبتلرندن بو وجهله تشکیل و تصریف اولوندینی کبی منفیلرله مجهولک مثبت و منفیلرندن عین صورته تشکیل و تصریف ایدلایکندن کرک بونلرک و کرک افعال مرکبه عامه نک حکایه ، روایت ، شرط صیغه لرینک آریجه شا کردانه تصریف ایتدیرلمه سی لزومی بالخاصه توصیه اولونور .

« صیغه استفهامیه »

افعالک بونلردن باشقه برده استفهام صورتلری واردرکه بر ایشک وقوع و یا عدم وقوعندن سؤال ایچون قولالانیلیر . مفرد غائبله استفهام اداتی اولان « می » لفظی الحاقیله افعالک استفهام صورتلرینک غائبلری تشکل ایدوب ضمیر فعلی ونسبی اعانه سیله دیکر صیغه لرلی حاصل اولور . شوقدرکه جمع غائب شخصلرندن ماعداده ادات استفهام ضمیر نسبییدن اول کلمک ویا لکز ماضی شهودیلرک بالجمله اشخاصنده ضمیر فعلییدن صوکره بولونمق شیوه لسان ترکی اقتضاسندندر .

چکدیمی	چکدکمی	چکدیمی	استفهام ماضی شهودی
چکدیلمی	چکدیلمی	چکدکمی	

استفهام	- چکشمیم	چکشمیسک	چکشمی
ماضی نقلی	- چکشمینز	چکشمیسکنز	چکشملمی
استفهام	- چکریمیم	چکریمیسک	چکریمی
مضارع	- چکریمینز	چکریمیسکنز	چکرلمی
استفهام	- چکییوریمیم	چکییوریمیسک	چکییوریمی
حال	- چکییوریمینز	چکییوریمیسکنز	چکییورلمی
استفهام	- چکه یمیم
الزامی	- چکه لمیم
استفهام	- چکه جکمیمیم	چکه جکمیسک	چکه جکمی
استقبال	- چکه جکمینز	چکه جکمیسکنز	چکه جکلرمی
استفهام	- چکملیمیمیم	چکملیمیسک	چکملیمیمی
وجوبی	- چکملیمینز	چکملیمیسکنز	چکملیلرمی

منفیلرله مجهولار و افعال مرکبه عامه نك استفهاملری عین وجهله تشکیل اولوندیغندن شاگردانه آریجه تصریف ایتدیر-
له سی فواندینک معلمین کرامه عرض و بیانی معلومی اعلام
قیلندندر .

سؤال — افعال شرطیه نك خدمتی ندر؟ افعال شرطیه ناصل
یابیلیر؟ افعالک استفهام صورتلری نه ایچون قوللانیلیر؟ استفهام صیغه لری
ناصل یابیلیر؟

{ افعال ربطیه }

کلامی بریرینه باغلامق ایچون قوللانیلان صیغه لره « صیغه ربطیه » دینور . بونلرده آلتی درلودر . تصریفلری یوقدر . یالکیز برر صیغه دن عبارتدر .

۱ — نحیسی « صیغه عطفیه » درکه ماده فعلک آخری ساکن ایسه بر (وب) واکر متحرک ایسه یعنی حرف املا ایسه بر (یوب) کتیریلرک تشکیل اولونور .

ماده فعل — کل اوکو آجی آغلا ایکله
صیغه عطفیه — کلوب اوکویوب آجیوب آغلا یوب ایکله یوب
کبی .

اشبو «وب، یوب» کله لرینک لاحق اولدیفی کلمه یه «معطوف علیه» وکنسندن صوکره کن فعله دخی «معطوف» دینیلوب معطوف علیه زمانه دلالتده دایما معطوفه تابعدر یعنی معطوف ماضی ایسه معطوف علیهده ماضی مضارع ایسه مضارع اولور : مثلا کلوب کیتدی، باغیروب چاغرر جمله لرنده کی کل، باغیر معطوف علیهلری معطوف اولان کیتدی وچاغرر فعللرینه تابع اولدیفندن (کلدی، باغیرر) تقدیرنده اولارق ماضی و مضارع حکمنده در .

۲ — نحیسی «صیغه ابتدائیه» درکه فعل التزامینک مفرد غائبه «لی، الحاق اولونارق یاییلیر : کله لی، کیده لی کبی . بونده غائب، مخاطب، متکلم ایله مفرد، جمع مساویدر . بن کله لی — سن کله لی — او کله لی — بز کله لی — سز کله لی — انلر کله لی کبی .

بوکا بعض-لر (دن بری) علاوه ایدرهك (کله‌لیدن بری)
 یازیلورلر ایسه ده معنی لزومی اولمادیغندن علاوه ایدله مک
 اولی اولدینی کبی یالکزی (بری) الحاقیله (کله‌لی بری، کیده‌لی
 بری) دخی دینیه من .

هله «کلدن، کیدلدن» کبی فرسوده تعبیرات زمانزده استعمالدن
 بسبتون ساقط اولشدر .

۳ — نجیسی «صیغه اتمائیه» درکه ماده فعلک آخری
 ساکن ایسه حرکه رسمیه ایله مکسور قیلندقدن صوکره (نجه)
 واکر حرف املا ایسه (نجه) الحاقیله یاییلیر: کلنجه، کیدنجه،
 سویله نجه کبی. استانبول شیوه سنجه بو صیغه نك آخرینه (یه
 قدر، یه دکن) کتیر یله رك کلنجه یه قدر، کلنجه یه دکن [*] طرزنده
 استعمال اولونور .

۴ — نجیسی «صیغه تعقیبیه» درکه ماده فعلک آخری
 ساکن ایسه (یجک، یجق) واکر متحرک یعنی حرف املا ایسه
 (یجک، یجق) کتیر یله رك یاییلیر: کلیجک، اولیجق کبی. بو صیغه
 زمانزده متروک حکمنه کچمشدر فقط بعض کره صیغه اتمائیه
 بومعناده قوللانیلیر: قباحتنی اکلانجه سکوت ایتدی. اوکلنجه
 بن کیتدم کبی .

۵ — نجیسی «صیغه توقیته» درکه ماضی شهودینک جمع
 متکلمی آخرینه (جه) کتیر یله رك تشکیل اولونور: کدکجه،
 اوقودجه کبی .

[*] دکن لفظندن شیوه من چوقدن ال چکمشدر .

۶ — نجیسی « حال ترکیبی » صیغه سیدرکه بر ایشی یاپارکن
 فاعلک نه حالده بولوندیغنی بیلدیرر . بو صیغه فعل التزامینک
 مفرد غائبه خفیفلرده « رک » و ثقیللرده « رق » الحاق ایدیلرک
 تشکیل ایدیلیر : کوله رک کلدی ، اغلایارق کیتدی جمله لرنده کی
 (کوله رک ، آغلایارق) صیغه لر ی کبی .

نمونه

آشاغیده کی ماده لرک صیغه ربطیه لرینی تشکیل ایدیکنز :
 یاشا . قاپا . کیر . طوت . داوران . هایقیر .

سؤال — صیغه ربطیه نه ایچون قوللانیلیر ؟ صیغه عطفیه نصل
 یاپیلیر ؟ صیغه ابتدائی نصل تشکیل ایدیلیر ؟ صیغه انتهائی کیمدن یاپیلیر ؟
 صیغه تعقیبیه و توقیته ایله حال ترکیبی صیغه سنک اصول تشکیلی نصلدر ؟

{ خصوصی صیغه لر }

خصوصی صیغه لر (استمراری ، صله) نامه یله ایکیدر .

صیغه استمراریه — فعل التزامینک مفرد غائبی اکثریتله
 (کور ، کل ، طور ، قال) ماده لرینک ماضی و امر لر یله برلشهرک
 تشکیل ایدر : ایدر کوردی ، ایدر کور ، اولاکلش ، کیده طور ،
 بکلیه طورسون ، باقا قالدی کبی .

صیغه صله — ماضی شهودیلرک جمع متکلمنه یاخود

مستقبلک مفرد غائبه بر هی، الحاقیه حاصل اولور . چکدیک، یازدینی، چکه جکی، یازاجنی کبی .

جمع‌رنده یالر ادات جمع‌دن صوکره کلوب ماقبللری ساکن قلندینی کبی غینلری دخی اصللرینه رجعتله قاف اولور : چکدکاری، یازدقلری، چکه جکاری، یازاجقلری کبی .

صله صیغه‌لرینه ضمیر اضافیلردخی لاحق اولارق تصریف اولونور :

صله ماضی

ثقیل	خفیف
قیردیغم	چکدیکم
قیردیغک	چکدیکک
قیردینی	چکدیکبی
قیردیغمز	چکدیکمز
قیردیغکز	چکدیککز
قیردقلری	چکدکاری

صله مضارع

قیراجغم	چکه جکم [*]
قیراجغک	چکه جکک
قیراجنی	چکه جکی

[*] استقبالك مفرد متکلمندن فرق ایتلیدر .

چکه جکمز	قیراجغمز
چکه جکگمز	قیراجگگز
چکه جکلری	قیراجکلری

اقتداری و تعجیلی فعللرندن صله یاییلار ق یازاییلدیکی، یازیوردیکی دینلیدیکی کبی مصدر اصلیلرک آخرینه «ده» الحاق اولوندقدن صوکره (اولدینی، بولوندینی، اولاجنی، بولوناجنی) کبی بسیط صلهلر علاوه سیله مرکب صلهلر تشکیل اولونار ق (یازمقده اولدینی، آلمقده بولوندینی) دینورکه نحو قسمنده مفصلاً بیان اولوناجقدر .

نمونه

آشاغیده کی مادهلرک هر ایکی صورتله صلهلرینی تشکیل ایدیکنز .
صلهله ضمیر اضافی الحاق ایله ییکنز .

اوتور، طور، صور، ویر، آرا، چال، اوینا، بیل
چالش، اوکرن، یاز، چیز، یات، قالدق .

سؤال — صیغه استمراریه فعل تشکیل ایدر؟ صیغه استمراریه
مثال بولوکز . صیغه صله قاج درلو یاییلور؟ بونلر جعلرنده نه کبی
تبدلاته اوغرار .

«مصادر عربیه»

عربی مصدر اصلیلری اساساً ثلاثی مجرد و رباعی مجرد اولوق اوزره ایکی قسمه آریلیر . وبونلره بر ویا بر قاج حرف

علاوه و زیاده سیله بر طاقم مصدر لر ده یایلیلر که بونلر ده یایلدقلری مجردلر اضاقله مزید فیه و ما حق تسمیه اولونور .

تلائی مجرد

تلائی مجرد ماده اصلیه سی اوج حرفلی اولان مصدر لر در .
بونلرک سماعی اولمق اوزره بر چوق وزنلری اولوب اوزان مذکور دن
لسان عثمانیده ال زیاده مستعمل اولانلری بروجه آتیدر :

قَتَلَ . فَسَقَ . شَغَلَ . رَحِمَهُ . رَفَعَهُ . سَرَعَهُ . سَعَادَهُ .
دِرَايَةُ . سَلَامٌ . قِيَامٌ . سُؤَالٌ . قَبُولٌ . خُرُوجٌ . دَوْرَانٌ .
کِثْمَانٌ . صُعُوبَةٌ . غَلْبَةٌ . [*]

مصادر ثلاثیه نك اولنه بر میم مفتوحه علاوه سیله
« مَفْعَلٌ ، مَفْعَلٌ ، مَفْعَلَةٌ ، مَفْعَلَةٌ » [*] وزنلرنده بر نوع مصدر
یایلار ق عربیده مصدر میمی تسمیه ایدر لر که بو نوع مصدرده
لسان عثمانیده کثیراً قوللانیلیر :

[*] مصادر مذکور دن بعضلرنده اوج حرفدن زیاده حرف
بولونماسی ثلاثیلکنه مانع دکلدر . زیرا اکثرنده واو ، الف و نونلر
زائد اندر .

[**] اوزان مذکور اسم زمان و مکان ییئننده دخی مشترک اولوب
انجق قرینه ابله بر لرلندن فرق و تمیز اولونور . نته کیم یوقاروده
بیانی کجدی .

۱ -	قصد	=	مقصد
۲ -	ولادة	=	مولد
۳ -	نفع	=	منفعة
	سرور	=	مسرة
	لوم	=	ملامة
۴ -	غفران	=	مغفرة
	عیش	=	معيشة
	وعظ	=	موعظة

صربیده وحدت و حالت بیان ایدن بر نوع مصدر دها
واردر که بونلردن کميته دلالت ايلهينه « مرّة » و کیفیت افاده
ايدنه دخی « نوعی » تعبير اولونوب نادراً بونلرده لسان عثمانیده
مستعملدر . ثلاثيلرك مره سی « فعله » ونوعیسی « فعله » وزننده
کلیر :

ضرب	=	ضربة	:	بر کره وورمق .
سجود [۱]	=	سجدة	:	بر کره یره قبانمق .
قعود	=	قعدة	:	بر کره اوتورمق .
رکوع	=	رکعت	:	بر کره اکیلیمک .
رجوع	=	رجعة	:	بر نوع دونوش .

[۱] حروف زائده طرح ایدیلیر .

رحل = رحلة : برنوع کوچک . [۱]
 خدمه [۲] = خدمه : ایش کورمه .

بودرلو مصدر لر لسان عثمانیده استعمال اولوندقلری زمان
 اکثریا کمیت و کیفیتی مشعر بر صفتله برابر کتیریلیر . دفعه اولی،
 قعدۀ اولی، رحمت واسعه، خدمت سریعه، ضربه ثانیه کبی .
 اشبو صیغه لر مفرد اولوب اصول عربیه اوزره اولان
 تنبیه و جمع صیغه لر دخی بعضاً استعمال اولونور : رکعتین،
 رکعات کبی .
 بونلری ترجمه جمعه مک دخی جائز اولارق : رکعتلر،
 رجعتلر، خدمتلر دینیله بیلیر .

{رباعی مجرد}

مصدر رباعی مجرد بر نوعدر که اوده «فَعْلَلَة» وزنیدر .
 فقط بو وزنده اولان مصدرلرک استعمالی لسان عثمانیده پک آز
 اولوب قوللانیلاندلری همان محدود کیدر : ترجمه، عربده، بسمله
 فذلکه، ولوله، وسوسه، قهقهه، دغدغه، زلزله، دبدبه، بیطره
 کبی .

[۱] لسان عثمانیده خصوصی اولارق : دنیادن آخرته کوچک،
 معناسنه قوللانیلیر .
 [۲] اساساً فعله و فعله وزنده اولانلر تغیر ایتمز .

{ ثلاثی مزید فیہ }

ثلاثیلرہ حرف زیادہ سیلہ تشکل ایدن مصدرلر اولوب
اوج نوعدر :

۱ — افعال ، تفعیل ، مفاعله وزنلیدر .

افعال — بووزنده اولان مصدرلر برچوق مغنار احداث
ایدرسده لسان عثمانیده اغلبی واکثری تعدیه در . یعنی بو بابہ
نقل اولونان ثلاثی ، لازم ایسه متعدی و متعدی ایسه بر درجه
دها متعدی اولور . مثلاً چیقماق مغناسنه اولان «خروج» لازم
ایکن بو بابده نقلنده متعدی اولوب «اخراج» دینیرکه چیقارماق
دیمکدر . و بیلماق مغناسنه اولان «علم» متعدی اولوب بو بابہ
نقلنده بر درجه دها متعدی اولارق «اعلام» دینیرکه بیلدرماق
دیمک اولور .

بو وزنه نقل اولونان ثلاثیلرک اوللرنده «همزه» ویا «واو»
وار ایسه یایه قلب واکر «یا» وار ایسه مد اولونارق «ایفال»
وزنی اخذ ایدر .

امن — ایمان

اثر — ایثار

وجود — ایجاد [*]

[*] وصول، وجود . . . الخ کییلرده واو ثانیلرک زائد اولدینی
خاطر دن چیقما ملیدر .

وصول — ایصال

یقظه — ایقاظ . . . کبی .

اگر اور تہ سندھ «واو» یا خود «یا» وار ایسہ اشبو (و، ی)
حذف اولونارق آخرینہ بر تا تائیت کتیریلوب (افالہ) وزنی
اخذ ایدر : میل — امالہ ، عودت — اعادہ ، جواب — اجابہ ،
قیام — اقامہ کبی .

تفعیل — بووزندہ اکثریا تمذیہ ایچون اولور : تکمیل ،
تعلیم کبی . کلمہ نک آخرینہ «همزه» و یا خود «و، ی» اولورسہ
وزن مذکور (تفعیلہ) شکنی اخذ ایدر : برؤ — تبرئہ ، توصیہ ،
تربیہ ، تسویہ . . . الخ کبی .

مفاعیلہ — بووزن مشارکت ایچون کلیر : مضاربہ ، مجادلہ ،
محاورہ ، منازعہ کبی . بعضاً مشارکت ایچون اولمایوب اصلنک
معاضئہ کلیر : مسافرة کبی .

مفاعیلہ یرندہ فعال وزنی دخی قوللانیلیرسہدہ وزن اولک
استعمالی کثیردر . نتکم بعضاً مجادلہ یرندہ «جیدال»
قوللانیدی کبی .

[املا] (اولندہ همزه اولان کلمات بووزنہ نقل اولوندقدہ
رسم خطندہ بر دواو، یازیلیر : اخذ — مؤاخذہ کبی .)

آخرنده واو یا خود یا اولان ماده لرك بو وزننه نقلنده واو ايله یا الف اولور : مجازاة ، مكافاة ، مدارات كبی .

۲ — انفعال ، افتعال ، افعال ، تفعل ، تفاعل و زلزلیدر

انفعال — بو وزن مطاوعت ایچون کلیر . بونك مطاوعت ایچون اولماسنده کوزه کورینن فعللردن اولماسی لازمدر . قطعدن « انقطاع » فصلدن « انفصال » شرحدن « انشراح » کبی .

افتعال — بو وزن اکثریا مطاوعت ایچون اولور . جمعدن « اجتماع » کبی .

بو وزننه نقل اولومان افعال ثلاثیه مجردنك اولنده [ص ، ض ، ط ، ظ ،] اولورسه (افتعال) ك تاسی طا اولور :

صبر — اصتبار = اصطبار

ضرب — اضتراب = اضطراب

طرد — اطتراد = اططراد = اطراد ... کبی

اولنده [د ، ذ ، ز] حرفی اولان ثلاثی ماده لرك وزن

مذکوره نقلنده (افتعال) ك تاسی داله قلب اولونور :

دفن — ادتفان = اددفان = ادقان

ذخر — اذتخار = اذدخار = ادخار

زحمة — ازتحام = ازدخام = کبی .

اففعال — بو وزن اکثریتله الوان و عیوب ظاهره ایچوندر و دائماً لازمدر :

اغبرار = توزلائمق [*]

احرار = قیزارمق

اصفرار = صارارمق

اعوجاج = اکرمک

کبی که بووزنده کلن مصـدرلر عثمانلیجهده پک مستعمل اولمایوب استعمال اولونانلر دخی امثله مذکورہ کبی اوچ بش دانه دن عبارتدر .

تفعل — بووزن اکثریا «تفعیل» وزننک مطاوعی اولور:
تعلیم ، تعلم — توقیف ، توقف کبی . بعضاً تکلف ایچون کلیر: تشجع کبی که شجاعتده تکلف ایتک یعنی کسندده شجاعت اولمادیفی حالده ساخته شجاعت کوسترمک دیمکدر . تعظم دخی بوقیلندرکه ترکجهده بیوکلک صاتمق ایله ترجمه اولونور .
آخرنده «ی» اولان مادهلرک بوبابه نقلندہ یا حرف مد اولوب ماقبلی کسر ایله اوقونور : توقی ، تعدی کبی .
آخرنده همزه اولان مادهلرک دخی بعضاً بوشکلده کلدیکی واردر :

جزء — «تجزؤ» = تجزی کبی

تفاعل — بووزن بعضاً مشارکت ایچون اولور: تظاهر، تطابق کبی . بعضا دخی مطاوعات ایچون اولور : تباعد کبی .
[*] لسان عثمانیده دائماً (کوجمه ، فیرغینلق) مناسنه قوللانیلیر.

وچوق كرم فاعلك نفسنده اولمايان شينئى اظهار ايچون اولور؛
تغافل ، تجـاهل كې كه غافل اولـمـاديني حـالـده عـفـلت و جاـهـل
اولماديني حـالـده جـهـل اظهـار ايلهـمـك يعنى غافل و جاـهـل كې
كورونمك ديمكدر .

۳ — ماده ثلاثيه يه اوج حرف زياده قيلنان (استفعال ،
افعيال ، افعوّال ، افعلال) وزنلى ايسوده « استفعال » دن
ماعداسى لسان عثمانیده مستعمل دكلدر .

استفعال وزننى اكثريا طلب ايچون اولور :

استشفاء = شفا طلب ايتمك .

استعلام = معلومات طلب ايتمك .

استغفار = اللهم اغفر لي مغفرت ايستمك . . كې .

بعضاً عد و اعتقاد ايلهـمـك معناسنى تضمن ايدر :

استكثار = چوق كورمك ، چوق عد و اعتقاد ايتمك .

استعظام = بيوك كورمك ، عظيم اعتقاد ايلهـمـك .

استبعاد = بعيد عد ايتمك . . . كې .

بويابه نقل اولونان ماده ثلاثيه نك اولنده همزه اولورسه

وياخود (و) اولورسه يايه قلب اولونور :

اذن — استئذان (استيدان)

اجرت — استئجار (استيجار)

وجوب — استيجاب كې

اگر ایکنجی حرفی (و، ی) اولورسه و او ایله یا حذف
اولونارق آخینه تاء تانیث کلوب [استفالة] شکلی آیر:

دوام = استدامة

قوم = استقامة

فائده دن = استفادة ... کبی .

« رباعی مزید فیه »

رباعی مزید فیه (تَفَعَّلَ ، اِفْعَلَّ ، اِفْعَلَّ ، و زلرندن
عبارت ایسه ده بووزلرده کلان مصادر عربیه لسان عثمانیده
مستعمل دکلدر انجق « تبصيص ، تذبذب ، اطمئنان ، کبی برقاج
کله مستعملدر .

[اخطار] (ذکر اولونان مزید فیه لک و زلری قیاسی ایسه ده
فقط استعماللری سماعیدر یعنی هر ماده ایسته نیلن وزندن کتیرلز .
مثلا « سَرَف » ماده سی افعال وزنه نقل ایله اسراف دینیلیرسه ده
« صرف » ماده سی وزن مذکوره نقل ایله اسراف دینلک جائز اولمایوب
تفعیل وزنه نقل ایله تصریف دینیلیر . بونلرک هانکی وجوه اوزره
استعمالی جائز اولاجغنی کتب لغت تعیین ایدر .

مصادر عربیه لسان عثمانیده اسم مقامنده استعمال اولونور
واکثریا ایتمک ، ایله مک مصدریله ترکیب ایدرک قوللانیلیر :
خروج ایتمک ، سؤال ایله مک ، افاده ایتمک ، ایله مک . تبلیغ
ایتمک . استفاده ایله مک کبی .

مصادر مذکورہ یہ ادوات ترکیہ لاحق اولارق استعمال جائز اولور : افادہ سی ، افادہ ده ، سؤالی ، افادہ ایچون کبی . مصادر عربیہ اکثریتله «لر» ایله جمعلندیکی کبی آخرلرینه «ات» الارق اصول عربیہ اوزره [*] دخی جمعلنوب لسان عثمانیدہ استعمال اولونور: رخصتئر، اماتئر، بحئر، اخطارلر، تبشیرلر، مبالغه لر، احتیاجلر، تصورلر، استکشافلر - اعمالات، تبلیغات، معاملات، انفعالات، احتیاجات، استخراجات، تصورات، تدارکات کبی .

بونلره ضماؤ اضافیه دخی لاحق اولارق : اخطارم، اخطارک، اخطارمز، اخطارکز — اخطارلرم، اخطارلرک، اخطارلرمز، اخطارلرکز . . . الخ دینیر.

عربی ذات فعلری یعنی (امر ، نہی ، ماضی ، مضارع ، حال ، استقبال) کبی ذات وزمانه دلالت ایدن فعللر لسان عثمانیدہ مستعمل دکلدر . انجق عبارتہ ترکیہ اراسنده کلن مرکبات عربیہ ده استعمال اولونابیلیرلر . لایعبد ، لایحصى ، لایتناهی ، لاینجزی کبی نادراً استعمال اولونانلر وارسده انلرده محدود بش التی کلمدن عبارتدر .



مصادر فارسیه

فارسی مصدر اصلیلری لسان عثمانیدہ قطعاً مستعمل دکلدر .

[*] مزیداتک عربی جمعلری مستعمل اولوب ثلاثی مجردلرک عربی جمعلری قوللانماز .

فارسی مصدر اصلیلری «فرمودن، رفتن» کبی آخرنده [دن - تن]
بولونان مصدرلردرکه بونلرک اسمایسیله انواعی قواعد فارسی کتابلرنده
مصرح اولدیغندن بوراده ذکر و بیانندن صرفنظر اولوندی.

فارسی مصدر نوعیلریله اسم مصدرلری لسان عثمانیده
قوللانیلیر: دانش، روش، پرستش، نمایش - نادانی،
شاعری، بدخوبی کبی.

فارسی امر حاضرلرک آخرلری مکسور قیلندقدن مکرره برشین ساکنه
الحاق اولونورسه مصدر نوعی و اسماء اجناس ایله صفتلره مخفف بر
«ی» الحاق اولونارق اسم مصدر تشکیل اولونور: خواهش، پرورش،
ارایش، کشایش، نیکی، نزدیکی، زندگی، بندی کبی.

مصدر اصلیلرک آخرلرندن ادات مصدرک طیبیه «مصدر
مرتخم» اطلاق اولونان برنوع اسم مصدر حاصل اولورکه بوده
بعضاً لسان عثمانیده قوللانیلیر:

فروختن = فروخت

پیوستن = پیوست

جستن = جست

دادن = داد

ستادن = ستد

انداختن = انداخت کبی.

فارسی حاصل مصدرلریده لسان عثمانیده مستعملدر:
رفتار، پروردکار - لرزه، اندیشه، گریه، خنده کبی.

مصدر مرخک آخرینه «ار» و بعضاً بر «ها» الحاقیه ذکر اولونان
حاصل مصدرلر تشکیل ایدیلیرسهده بونلر سماعی اولدقلرندن هر مادهدن
پایلاماز.

بعضاً امر حاضرک مفردی حاصل مصدر مقامنده قولالانیلیر:
 جوش ، خروش ، ناز ، نیاز ، خرام ، آرام کبی .
 مصادر مذکوره عبارت ترکیه اراسنده استعمال اولوندقلری
 وقت طبق مصادر عربیه کبی ایتک وایله مک کبی افعال عامه
 ایله برلکده کله رک اسم حکمنده طوتیلیر .
 بونلره ترکیه ادات جمع لاحق اولدینی کبی ادوات وضما
 ترکیه اضافیه دخی الحاق ایدیلیر . فارسی ذات فعللر لسان عثمانیده
 اسلا استعمال اولونماز فقط نحو قسمنده مفصلاً بیان ایدیله جکی
 اوزره امر صیغه لری کثیراً استعمال اولونور .



﴿ فصل - ۲ ﴾

« فروع افعال »

صفات قیاسیه انواعندن معدود اولدینی صفت بخشنده بیان
 اولونان فروع افعال : اسم فاعل ، اسم مفعول ، مبالغه فاعل ،
 صفت مشبهه صیغه لرندن عبارتدرکه بونلر فعللردن یایه لیدینی
 ایچون هر برز لرینه « فرع فعل » نامی ویرلمشدر .



• اسم فاعل •

اسم فاعل ، بر ایشی ایشله نی بیلدیرن کلمه در ، اسم فاعل معلوم اولان فعللردن یاپیلیر . شویله که ماده فعلک آخری ساکن ایسه خفیفلرده [(ن)] و ثقیللرده [آن] کتیریلیر : کل ، یاز ماده لرندن « کلن ، یازان » کبی .

اگر ماده فعلک آخری حرف املا ایسه خفیفلرده « ین » و ثقیللرده « یان » الحاق اولونور : بکله ، آغلا ماده لرندن « بکله ین ، آغلایان » کبی . اسم فاعل سائر اسملر کبی « لر » ایله جمعه نیر .

(مثبت)

اسم فاعل		ماده فعل
مفرد	جمع	
کلن	کلنلر	کل
قیران	قیرانلر	قیر
اوده ین	اوده ینلر	اوده
اوقویان	اوقویانلر	اوقو

(منفی)

کلمه ین	کلمه ینلر	کلمه
قیرمایان	قیرمایانلر	قیرما

اودمه	اودمهین	اودمهینلر
اوقوما	اوقومایان	اوقومایانلر [*]

کیت ، ایت ، ایشیت ماده لرینک اسم فاعلنده تالر داله قلب اولونار ق کیدن ، ایدن ، ایشیدن دینیر . فقط دورت ، سورت ، ایت [*] ، بیت کبی ماده لرده داله قلب اولونمایوب دورتن ، سورتن ، ایتن ، بیتن دینیر .

اکر فاعلک بر کار وکسب ایله اشتغال ویا بر سمنه اختصاصی بیان مقصود اولورسه اول زمان آخری ساکن اولان ماده لره « یجی » و حرف املا اولانلره دخی « یجی » الحاقیله اسم فاعل یاییلیر : یاریجی ، سیلیجی ، یازیجی . بیله یجی ، اوقویجی کبی .

« اسم مفعول »

اسم مفعول ، ایش کندیکسی اوزرینه واقع اولان ذاتی بیلدیرن اسمدر . اسم مفعول مجهول اولان فعللردن طبق اسم فاعل کبی یاییلوب بودخی « لر » ایله جمعه نیر . سویلن ، قیریلان ، کورولن کبی .

[*] ادات نفیلرک ها والفی خذف ایله کلین ، قیرمیان ، اوقومیان ، سولین ، قیرلیان ، کورولین طرزنده یازانلر وارسه ده قاعده صرفیه مخالف اولدیغندن شایان قبول دکلدیر .

[**] ایله معناسته اولمایوب قاتق معناسته اولان .

(مثبت)

اسم مفعول		ماء فعل
مفرد	جمع	
چکیلن	چکیلنلر	چکل
قیریلان	قیریلانلر	قیرل
کورولان	کورولانلر	کورول

منفی

چکلمه	چکلمه یین	چکلمه یینلر
قیرلما	قیرلما یان	قیرلما یانلر
کورولمه	کورولمه یین	کورولمه یینلر

بعضاً مجهول اولان ماده لرك ماضی نقلی صیغه سی اسم مفعول مقادیر منده قوللانیلوب سیلنمش، قیرلش، اکیلش دینلدیکی کبی حاصل مصدرلرده بعضاً یو معناده استعمال اولونور : باصمه کتاب، یازمه کتاب، طولما دیوار، کسمه طاش کبی. انجق حاصل مصدرلرك بومعناده استعمالی سماعی اولوب هر حاصل مصدر اسم مفعول مقامنده استعمال اولوناماز.

بعض کرمه دخی ماده فعللرك آخیرینه « لی » کله رك اسم مفعول معناسی قصد اولونور : قاپا - قاپالی (قاپانمش) کبی.

ماده فلك آخری ساکن ایسه مکسور قیلینیر : آص - آصیلی (اصلش) کبی.

آخری (له، لا) ایله نہایت بولان ماده لرده لاملر طی ایدیلیر :
صاقلا - صاقلی (صاقلاشمش)، کیزله - کیزلی (کیزلشمش) کبی .

بو صیغه دخی یوقاروده ذکر اولونانلر کبی سماعی اولوب
هر ماده دن یاییلاماز .



{ مبالغه فاعل }

مبالغه فاعل، بر ایشك فاعلدن چوق ظهور ایتدیکنی
بیلدیرن صیغه لردرکه ماده فعلك آخرینه خفیفلرده « کن »
وتقیللرده « غان » لفظلرینك علاوه سیله یاییلیرسده بونلر سماعی
اولدقلرندن هر ماده دن یاییلاماز: (چکش، چکشکن)، (صولوز،
صولوزغان) کبی .

اگر ماده فعلك آخری (ت - ش) اولورسه « غان » یرینه
« قان » کلیر: صریت، اونوت - آتش، چالش، یایش ماده لرندن
(صریتقان، اونوتقان، آالشقان، چالشقان، یایشقان) کبی .

بعض ماده لرك آخرینه (گج، گیج، غاج، غیج) علاوه
سیله مبالغه فاعل کلدیکی واردر: یوزگج، اوشنگج، بیلگج،
اوتانغاج، طالغیج کبی .



صفت مشبهه

صفت مشبهه، بر حال وصفتك بر شیده ویا بر شخصده
ثابت و مستمر اولدیغنی بیلدیرن صیغه لردر که بونلرده مبالغه
فاعل کبی هر ماده دن یاپیلامایوب بعض ماده لردن بوجه آتی
ایکی صورتله اصاغه اولونورلر :

صورت اولی — ماده فعللرک آخرینه خفیفلرده بر «ک»
و ثقیللرده «ق» علاوه سیله یاپیلیر. آنجق آخری ساکن
اولان ماده لر بر یا و یاخود و او [*] الحاقیله تحریک ایدلدکن
صوکره (ک - ق) علاوه اولونور :

تتره — تترک

چورو — چوروک

یورو — یوروک

آقضا — آقصاق

ایصلا — ایصلاق

بوگا — بوگاق

اوینا — اویناق

[*] ساکن اولان حرف اخیرک اوست طرفی مفتوح ویا مکسور
اولورسه «ی» واکر مضموم اولورسه «و» الحاق اولونور .

دل	—	دلیک
دش	—	دشیک
کس	—	کسیک
بیتیش	—	بیتیشیک
یار	—	یاریق
آج	—	آجیق
یان	—	یانیق
قیر	—	قیریق
بیق	—	بیقیق
اوی	—	اویوق
طوڭ	—	طوڭوق
قوپ	—	قوپوق

آخری ساکن
ماده لردن یاییلانلر

صورت ثانیہ - ماده فعلک آخرینہ خفیفلرده «کین»
و ثقیللرده «غین» علاوه سیلہ یاییلیر:

پیش	—	پیشکین
از	—	ازکین
شیش	—	شیشکین
گر	—	گرکین
طال	—	طالغین

قیز — قیزغین

ییل — ییلاغین کی .

اگر ماده فعلک آخری شین و یا خود تا اولورسه غین
 قافه تبدیل اولونارک «قین» کتیریلیر: طاشقین ، چاتقین کی .
 ماده فعلک صولک هجاسی ضمه ایله نهایت بولورسه (کین ،
 غین ، قین) یرینه [کون ، غون ، قون] کتیریلیر:

دوز — دوزکون

سور — سورکون

یور — یورغون

بوز — بوزغون

جوش — جوشقون

طوت — طوتقون کی .

[فائده] — سالف الیمان صفت مشبهلر اسم فاعل ،
 اسم مفعول معنالرینه کلوب معنی "بونلره مشابتهتی" [*] واردر .
 شو قدرکه اسم فاعل ایله اسم مفعول قیاسی اولوب
 هر ماده دن اصاغه اولونورلر . صفت مشبهلر ایسه سماعی اولدیغندن
 هر ماده دن یاییلامازلر .

بوندن ماعدا اسم فاعل ، حدث کنندن ظهور ایدن واسم

[*] صفت مشبهلر لازم اولان ماده دن یاییلیرلرسه فاعلک وصفی
 اولارق اسم فاعله ، متعدیدن یاییلیرلرسه مفعولک وصفی اولارق اسم
 مفعوله بکزرر .

مفعول، حدث کنندى اوزرینه واقع اولان شخصی بیان ایدرک
بونلر حدوده دلالت ایدرلر یعنی بونلرده فعل بعضاً حادث
اولور وبعضاً اولماز.

صفت مشبهلر ایسه ثبوته دلالت ایدرلر. یعنی بونلرده
فعل، فاعل ومفعوللرده ثابته درکه فعل بونلردن اصلاً انفکاک
ایتمز. مثلاً «دون حیواندن قورقان آدم» دینلده قورقان
اسم فاعل اولوب وقت مذکورده قورقق فعلنک آدمدن حدوث
ووقوعنی بیان ایدر یعنی قورقق فعلی اولجه یوق ایکن حیوانه
تصادفده آدمدن صدور ایتمش و صـ وکرده طبیعی انفکاک
ایتمشدر. فقط «قورقاق بازرکان نه کار ایدر نه ضرر» عبارده.
سنده قورقاقلق بازرکانده برصفت ثابته اولوب بازرکاندن اصلاً
مفارقت ایتمز. صفت مشبهلر، طبق صفتلر کی «لر» اداتیله
جملعنملر مکر موصوفلری محذوف اولار.

کرك مبالغه فاعللره وکرك صفت مشبهلره اکثریا [لک،
لق] الحاق اولونارق معنای مصدری قصد اولونور: چالشقانلق،
طالغیللق - طالغیللق، یورغونلق کی.

بونلره ضمائر اضافیه دخی لاحق اولارق: چالشقانلغ،
چالشقانلغک. . . الخ ویورغونلغ، یورغونلغکز. . . الخ دینیر.



«فروع افعال عربیه»

اسم فاعل

عربی اسم فاعلار لسان عثمانیده همان ترکیه اسم فاعلاردن
زیاده مستعملدیر. بونلرک وزنلری مختلفدیر.

ثلاثی مجردلرک اسم فاعلاری «فاعل» وزنی اوزره کلیر:
کاتب، شاعر، شاگرد، کبی. اورته سنده (و، ی) بولنان ماده لرده
بونلر همزه یه قلب اولوندینی کبی آخرده کلن واولر یایه قلب
ویالر دخی مد اولونور:

قول — قائل

کون — کائن

بیع — بائع [*]

غیب — غائب

سهو — ساهی

سعی — سعی

رمی — رمی . . . کبی.

ایکینچی و اوچنچی حرفلری بر جنسیدن اولان ماده لرک
اسم فاعلی ادغام ایله «فال» وزننده کلیر: دالتیدن «دال»
قراردن «قار» فراردن «فار» کبی.

[*] یا ایله (بایع) تلفظی شایع اولمشدر.

رباعی مجرد اولان « فعللۃ » نك اسم فاعلی « مفعِل » وزنی
اوزره کلیر: مترجم - موسوس کبی .

نہونی مزید فیرلرک اسم فاعلری

(افعال) — مصدرینک اسم فاعلی « مفعِل » وزنی اوزره
کلیر . آنجق بحث مخصوصندہ بیان اولوندینی اوزره مصدر
مذکورک شکلی تبدل ایتدیکی وقت اسم فاعلی دخی قسماً
دکیشهرک امثلہ آتیہده کی وزن اوزره کلیر:

اکرام — مکرم

ایمان — مُومن

اقرار — مُقر

ایجاد — موجد

اداره — مُدیر کبی

(تفعیل) — مصدرینک اسم فاعلی « مفعِل » وزنی اوزره

کلیر :

تحریر — مُحرِر

تجدید — مُجدِد

تربیه — مُربی کبی

(مفاعله) — مصدرینک اسم فاعلی «مفاعِل» وزنندہ
کلوب بعضاً امثلہ آتیہدہ اولدینی کی قسم تبدیل وزن ایدر:

مقابلہ — مقابل
مساعده — مُسَاعِد
مجازاة — مجازی
مضادّة — مُضَادّ

(انفعال) — مصدرینک اسم فاعلی «منفعل» وزنی اوزرہ
کلوب امثلہ آتیہدہ اولدینی کی بعضاً تبدل ایدر:

انقطاع — منقطع
انفصال — منفصل
انطفاء — منطفئ [*]
انحناء — منحنی
انقیاد — مُنْقَاد
انشقاق — منشق
انفکاک — منفک [*] کی .

(افتعال) — مصدرینک اسم فاعلی «مفتعل» وزنندہ

[*] بوکیلرک نہایتندہ کی همزه لسان عثمانیدہ رسم خطدہ وتلفظدہ
اکثریا اسقاط ایدیلیر .

[**] منفک ومنشق کیلر لسان عثمانیدہ مخفف اولارق تلفظ
اولونور .

کلیر. طبق منفعل وزنی مثللو تبدلاته اوغزار: محترق، متصف،
مشتري، معتاد، مشتد کبی.

۳۰۰ — مصدرینک اسم فاعلی « مفعول » وزنده
کلیر سده بونک لسان عثمانیده استعمالی اندردر: مغبر کبی.

۳۰۱ — مصدرینک اسم فاعلی امثله آتییه تطبیق
اولونا:

متبسم	—	تبسم
متکبر	—	تکبر
متجزی	—	تجزؤ (تجزی)
متمنی	—	تمنی

(تفاعل) — مصدرینک اسم فاعلی وجوه آتییه اوزره
کلیر:

متقاعد	—	تقاعد
متضاد	—	تضاد
متعاطی	—	تعاطی

(استفعال) مصدرینک اسم فاعلی وجوه آتییه کلیر:

مستخرج	—	استخراج
مستبد	—	استبداد

استفاده — مستفید

استغناء — مستغنی



{ اسم مفعول }

ثلاثی مجرد لردن اسم مفعولك صیغه سی «مفعول» وزننده
 کلیر سده ماده ثلاثیه نك اولنده، اورته سنده، نهایتنده (و، ی،
 ع) بولوندیغنه ونهایتنك مشدد اولدیغنه کوره وجوه آتیه
 اوزره کلیر :

عبد — معبود

امر — مأمور

سؤال — مسؤل

قرائت — مَقْرُؤ [°]

خوف — مخوف

زیادة — مزید

عفو — معفو

[°] بو کییلرده همزه واوه ابدال وبعده ایکی واو ادغام اولوناراق
 (مَقْرُؤ) دیمکده چا زدر :

نہی — مَنہی
رمی — مَرَمی [۱]

ثلاثینک مافوقی اولان مصدر لرك اسم مفعولی برحرکه ایله
اسم فاعلندن فرق اولونور. شویله که اسم فاعلده صوك حرفک
اوست طرفی مکسور ایدی. اسم مفعولده مفتوح اولارق کلیر.
انجق اورتیه سنده ونهایتینده (و، ی) بولونان ماده لرك اسم
فاعلری یا ممدوده ایله اوقونور واسم مفعوللر ایسه الف
ایله اوقونور:

افعال مصدرندن — مَکرم، مَقَر، مُصاب، مُهدی .

تفعیل » — مُبشر، مُسمی .

مفاعله » — مُخاطَب، مضاد [۲]، مُنادی .

انفعال » — [۳]

افتعال » — مُنتخب، مُضطر، مختار

تفاعل » — مُتجاذب، متعاطی .

استفعال » — مُستحسن، مُستحب، مُستجاب .

صفت مشبهه یوقاروده صفت بحشده ذکر و بیان اولوندی.



[۱] بو کیلر لسان عثمانیده مخفف اولارق اوقونور .

[۲] بو وزن اسم فاعله شکلاً مشابه اولدیفندن قرینه ایله تفریق
اولونور .

[۳] انفعالن متعدی کلمدیکی ایچون اسم مفعول بنا اولوناماز .

{ مبالغه فاعل }

عربی صیغه مبالغه لرینک لسان عثمانیده مشهور الاستعمال
اولان وزنلری بروجہ آتیدر :

فَعَال — تَوَّاب، کَذَّاب

فَعَّالَه — عَلَّامَه، فُهَامَه

فَعُول — صَبُور، شَكُور [*]
فَعِيل — عَلِيم، کَرِيم

اوزان مذکورہ دن «فعال» وزنی لسان عثمانیده دیگر لرندن
زیادہ استعمال اولونور: خطاب، عطار، حمال ... الخ کبی .
عربینک اسم فاعل لرینک (مذکر اولسون مؤنث اولسون)
مفردلری لسان عثمانیده مستعمل اولدینی کبی تثنیه وجمع صیغہ لرلی
دخی مستعملدر. اسم فاعلک مؤنثی تا ایلہ در : کاتبہ، شاعرہ
کبی . تثنیہ سی اسمانک تثنیہ سی کیدر. کاتبین کبی .
جمعہ لرلی سالم و مکسر اولارق قوللانیلنر :

کاتب — کاتبون، کاتبین

کاتبہ — کاتبات ... کبی .

[*] اشبو ایکی وزن مبالغه فاعل ایلہ صفت مشبہہ بیننده مشترکدر.
تثنیہ کیم : شریف و وقور صفت مشبہہ وعلیم ، شکور مبالغه فاعل
اولوب زیاده عالم، زیاده جاهل دیمکدر .

جمع مکسر لری [فُعَال، فُعَل، فَعَلَه] وزنده کلیر: جهال، کمل، کتبه کی .

بعضاً [فواعل] وزنی اوزره کلیر : (فائده - فوائد) ،
(حادثه - حوادث) کی .

[تنبيه] — (اشنو جمع مکسر لر یالکیز ثلاثی مجرد لک اسم فاعله مخصوصدر .)

اسم مفعولک دخی مؤنثیه تنبيه و جمعی اسم فاعل کی
ایسه ده جمع مکسری بر وزندن عبارت اولوب اوده ثلاثی
مجرد لره مخصوص اولان [مفاعیل] وزنیدر :

اسم فاعل ایله اسم مفعول سالف الیابان اصول عربیه
اوزره جملاندیکی کی ترکیه لر ، علاوه سیله دخی جملنیر
و آخرینه ادوات ترکیه الحاق ایدیلرک استعمال اولونور :
کاتبلر ، مکتوبلر - کاتبی ، کاتبدن - مکتوبلری ، مکتوبدن
... الخ کی .

[اخطار] (کلمات عربیه اسلوب عثمانی اوزره تصریف ایدلدیکی
وقت یا مصدریله و یا خود صفتیه تصریف اولونور . مصدریله تصریف
اولونورسه [ایتک ، ایله مک] ماده سیله ترکیب ایدر . نته کیم مصادر
عربیه یحشده بیان اولوندی . صفتیه تصریف اولونورسه [اولاق]
ماده سیله ترکیب ایدر . بناء علیه کاتب اولدی ، ضارب اولدی ، منصور
اولدی ، علیم اولدی ، حکیم اولدی ، مکلف اولدی دینیلوب کاتب
ایتدی ، ضارب ایتدی ، منصور ایتدی ، علیم ایتدی ، حکیم ایتدی ،
مکلف ایتدی دینیله ضرر .)

«فروع افعال فارسیه»

فارسی اسم فاعلری لسان عثمانیده مستعملدر . بونلر امر حاضر دن قواعد آتیه ایله آلتیر . شویله که :

فارسی مصدرلرک (دن - تن) کلمه سیله نهایتندیکی مصدر بچشده بیان ایدلمش ایدی . «دن» ایله منتهی اولان مصدرلرده «دن» ک اوست طرفنده شو بش [ی، ا، ر، ن، و] حرفدن و «تن» ایله اولانلرده «تن» ک اوست طرفنده شودرت [خ، س، ش، ف] حرفدن بری بولونور . اشبو مصدرلردن (دن، تن) طی ایدلدکدن صوکره اوست طرفنده کی حرفلر یا ابقا ویا حذف ایله ماقبلی اسکان ویاخود حروف آتیه به تبدیل ایدیلیرسه امر حاضر حاصل اولور . شویله که :

ادات مصدرک ماقبلی (ی، ا) ایسه حذف اولونارق بونلرک ماقبلی اسکان ایدیلیر : شتایدن ، ایستادن مصدرلرندن شتاب ، ایست امر حاضرلی کبی .

اگر (ر، ن) اولورسه ابقا ایدیلیر : آوردن ، راندن مصدرلرندن آور، ران، امر حاضرلی کبی .

اگر (و) اولورسه «آی» لفظنه تبدیل اولونور؛ فرمودن مصدرندن فرمای [*] امر حاضری کبی .

اگر (خ) اولورسه «ز» به تبدیل اولونور: انداختن مصدرندن انداز امر حاضری کبی .

اگر (س) اولورسه «ی - وی» به قلب اولونور: اراستن، جستن مصدرلرندن آرای، جوی امر حاضرلی کبی .

اگر (ش) اولورسه «ر» به قلب اولونور: داشتن مصدرلرندن دار امر حاضری کبی .

[*] یانک عدم علاوه سیله «فرما» دیمکده جاژدور .

اگر (ف) اولورسه «ب» به قلب اولونور: یافتن مصدرندن یاب امر حاضری کی .
سالف الذکر امر حاضرلرک بر چوق مستثنای اولوب کتب لغته مراجعتله بیلینیر .

امر حاضرلرک آخرینه «نده» لفظی الحاق اولونورسه اسم فاعل اولور: خواننده، سازنده کی که اوقویان (اوقویچی)، یابان (یابیچی - اینجه چالخی چالان) کی .

اسم مفعول - مصدرلردن (دن، تن) حذف اولوندقدن صوکره آخره بر هاء رسمیه علاوه سیله بابیلیر: ایستاده، فرموده، انداخته، راسته کی .

فارسی اسم فاعللری ترکیه لرله ایله جمعلنه رک قوللانلدیغی کی فارسی ادات جمعی اولان «ان» ایله ده جمعلنه رک استعمال اولونور. بوضورتده هر ایکینک آخرنده بولونان ها رسمیه لر جمع بحثنده کچن قاعده به تطبیقاً کاف فارسی به (گک) به قلب اولونور:

مصدر	مفرد	جمع
زادن	— زاده ،	زادگان
اقتادن	— اقتاده ،	اقتادگان
گذشتن	— گذشته ،	گذشتگان
نوشتن	— نوشته ،	نوشتگان . . . کی

صفت مشبهه - امر حاضره الف الحاقیه به صفت مشبهه اولور: دانا، پناه، گویا کی .

بعضاً «ان» الحاقيله ياپيلير : نمايان، شايان، گذران کبی.
 بو ادا ت بعضاً صيغه حالیه ایچون کلیر : خندان، گریان کبی که
 کوله رک، آغلايه رق ديمک اولور.

مصدر مرخلره دخی بعضاً «ار» الحاقيله صفت مشبهه ياپيلير سده
 بوصورت سماعيدر: نمودار، پديدار کبی.

صيغه مبالغه - امر حاضر لره «گار» الحاقيله صيغه مبالغه
 حاصل اولور: آموزگار، آمرزگار کبی.

ادات مذکورہ بعضاً مصدر مرخمه علاوه ايديله رک صيغه
 مبالغه تشکيل ايديلير: کردگار، پروردگار، آفريدگار کبی.

[اخطار] (کلمات عربيه ده اولديني کبی کلمات فارسيه دخی اسلوب
 عثمانی اوزره صفتيله تصريف اولونديني وقت (اولق) ماده سيله ترکب
 ايدر. مثلاً وزان اولدی، گذران اولدی دینلوب وزان ایتدی، گذران
 ایتدی دینله من).

ادوات نحو قسمنده ذکر و بیان اولونا جقدر.



قسم ثانی

— نحو عثمانی —

(علم نحو): کلامک ترکیب و تألیفیله کله لرك موقع استعماللرینی بیان ایدن بر قندر .

(کلام) : مقصدی بیان ایچون ایراد اولونان نطق و عبا- رده دینور .

(ترکیب) : ایکی ویا ده چوق کله لرك بر ارایه کلمه سمندن حاصل اولان «هیئت» . دینور .

ترکیب ایکسدر . بری « ترکیب ناقص » دیکری « ترکیب تام » در .

ترکیب ناقص ، دگلهینه بر خبر تام افاده ایده مهین ، ترکیب تام ایسه ، دگلهینه بر خبر تام افاده ایدن ترکیبلردر . مثلاً : (افندینک اوی) - (هوا کوزلدر) ترکیبلرندن برنجی ترکیب ناقص ایکنجیسی ترکیب تامدر . زیرا (افندینک اوی) دیدیکمزده [بیوکمی . کوچکمی ، یوکسکمی ، نه اولمش] کبی برطاقم سؤاللره مجبوریتم حاصل اولارق معنی تمام اولماز . فقط (هوا کوزلدر) دیدیکمزده مخاطب سؤاله مجبور اولمایارق سکوتی اختیار ایدرکه بو حالدده معنی تمام دیمک اولور .

سؤال — علم نحو نیه دیرلر؟ کلام نیه دیرلر؟ ترکیب نه دن
خاصل اولور؟ ترکیب تام ناصل ترکیبدر؟ ترکیب ناقص ناصل ترکیبدر
بونلرک هر ایکیشنی مثال ایله ایضاح ایدیکز.

{ ترکیب ناقصلر }

۱ — ترکیب مزجی : بینلرنده عطف، اسناد، اضافت،
وصفیت اولمایارق یان یانه کلان برطاقم اسملردر که بونلرک اکثری
علم اولدقلرندن سماعی اولوب بر قاعده یه تابع دکلدرلر . تحتیه
قلعه، یدی قله، بعلبک، بگقوز، تحتیه مناره، حضر موت،
اورته کوی، قوری چشمه و . . . الخ اسملر کی .

۲ — ترکیب انباعی : ایکی جزؤدن مرکب بر ترکیب
اولوب بو جزؤلردن برینک یالکز باشنه معناسی اولمایوب دائماً
دیگرینه تبعاً ذکر اولونور : سیم سیاه، بزم بیاض، قوپ قوری،
فیرطولای کی .

بونلر تأکید معنایی مشعر اولدیغندن معناده مبالغه مقصود
اولمادجه قوللانماز .

اشبو ترکیبک ایکی جزئی بردن بعضاً شاذ اوله رق باشلی
باشنه معنایه دلالت ایتمز : جاس جاولاق کی .

۳ — ترکیب تفسی : حروف معناییدن ویا الفاظدن بر

قاچنی متضمن اولان ترکیبدر : افشام صباح، کورور کورمز،
بنک بنک، دال بوداق، الیش ویریش، آلت اوست کبی .

بونلردن بنک بنک، کورور کورمز کبی لفظ مکرردن ویا متحد
الاصل کلمه دن ترکب ایدنلره « ترکیب تجناسی » و دال بوداق کبی ایکی
لفظ متناسبدن ترکب ایدنلره « ترکیب تناسبی » و آلت اوست، صبیاق
صوئوق کبی ایکی لفظ متضاددن ترکب ایدنلره « ترکیب تضاد » نامی
دخی ویریلیر . فارسی ترکیب تضمینلری لسان عثمانیه بمضاً استعمال
اولونور : کفتیکو، جستجو - کرم و سرد، زیر و زیر - شاخ و برگ،
های و هوای کبی .

۴ — ترکیب اضافی : اضافت، خصوصی بر معنی افاده
ایتمک ایچون بر اسمی دیگر بر اسمه ربط ایتمکدرکه بواسطه
برینه « مضاف الیه » دیگرینه « مضاف » دینیلوب هر ایکسینه
بردن « ترکیب اضافی » نامی ویریلیر .

بر اسمی بشقه بر اسمه اضافه ایتمک ایچون مضاف الیه
اوله سی لازم کلان اسمک آخرینه بر (ک) کاف نوئی و مضاف
اوله حق اسمک آخرینه دخی بر (ی) کتیریلیر : اوک طامی کبی .
عربی و فارسی اسملر دخی نهایترینه بر طاقم ضمیر
اضافیلر کتیریلرک بو وجهله اضافه قیلنورلر :

مسجدک محرابی

باغچه نک کلی

مکتبک باغچه سی

جامعك قیوسی
 قیونك مفتاحی
 بكك خانه سی . کبی

[قاعدہ] — كرك تركی و كرك عربی و فارسی اسملردن
 قاعدۀ تركیه اوزره یاییلان ترکیب اضافیلرده مضاف الیه دائماً
 اوکجه کتیریلیر . کچن مثاللرده اولدینی کبی .

[قاعدہ] — مضاف الیهك آخرنده حروف املادن بری
 بولونورسه علاوه اولونهجق كاف نونیدن اول بر « ن » زیاده
 ایدیلیر . المانك قبوغی، درهك کنساری کبی . لکن (صو)
 لفظی مستثنا در . بونك مضاف الیه حالنده صونك دینلمه یوب
 (صویك) دینور .

واکر مضافك آخرنده حروف املادن برحرف اولورسه
 علاوه اولونا جق یادن اول بر (س) زیاده ایدیلیر . چیچكك
 قوقوسی ، اوطهك حالسی کبی . كذلك « صو » لفظی بونده
 دخی مستثنا اولوب مضاف حالنده صوسی دینلمه یوب (صوی)
 دینور .

قاعدہ — مضاف الیهلری ضمیر شخصی اولان مضافلره،
 مضاف الیهك شخصنه کوره ضمیر اضافیلردن بری الحاق
 ایدیلیر : بنم اوم، سنك اوک، آنك اوی، بزم اومز، سنك
 اوکز، آنلرك اوی کبی .

تمهید

آشاییده معترضه ایچنده بولونان اسملری بربرینه اضافه ایدیکز .

(اكمك - قابوق) . (ات - یاغ) . (كستانه -
چوروك) . (خانه - تنجره) . (استانبول - هوا) .
(بز - آت) . (سز - دوه) . (او - كدی) . (كول -
بطاقلق) . (تنجره - قباق) .

سؤال - ترکیب مزجی ناصل ترکیبدر ومثالی ندر؟ ترکیب اتباعی
وتضمنی نیه دیرلر؟ ترکیب تضمنی جزؤلرینه نظراً نه اسم الیر؟ ترکیب
اضافی نیه دیرلر؟ ترکیب اضافی قاج اسمدن یاییلیر؟ وانلرك اسملری
ندر؟ براسم دیکراسمه ناصل ترکیبده اضافه ایدیلیر؟ مضاف ومضاف الیهدن
هانکیسی اول کتیریلیر؟ مضاف الیه ایله مضافك آخرنده حروف املادن
برحرف بولنورسه اضافه لری حالنده نه یاییلیر؟ مضاف الیهلری ضمیر
شخصی اولان مضافلر آخرینه نه آلیر؟

اضافت اوج درلودر : اضافت لامیه، بیانیه، تشبیهیه در .
(اضافت لامیه) تملك واختصاص معنایینی بیلدیرر .
اقتدینك فسی، اوزك پنجره سی کی که برنجیسی تملك وایکنجیسی
اختصاص معناسی بیان ایتشددر . اضافت لامیهده مضاف الیه
معین اولورسه یعنی بللی اولورسه کاف نونی یازیلیر ، معین
اولمازسه یازلماز :

(اڭاج - کستانه) . (قوش - قناریا) . (بیله زیک - آلتون) .
 (تکینه - طاش) . (بالق - قلنج) . (کچی - طاغ) . (قاصه
 - دیمیر) . (چوراب - یوک) . قپوسی . چیچکی . اریکی .
 آوی . یر . شکری .

سؤال — اضافت بیانییه نیه دیرلر ؟ اضافت بیانییه بر شیئک
 نوعی ویا اصلی بیان ایتدیکنه نظراً مضاف الیه نه حال کسب ایدر ؟
 مضافله ادواتدن بر شی متصل اولورسه نه حال کسب ایدر ؟ بو حال
 نهایتی حروف منفصله دن اولان مضافلرده دخی وارمیدر ؟

(اضافت تشبیه) مضاف الیهی مضافه بکزه دیلن [*]
 اضافتدر که بو دخی اضافت بیانییه انواعندن اولدینی جهتله
 مضاف الیهک آخرینه اصلاً [ک - نک] کتیرلمز ، کوکل قوشی ،
 اجل قلیچی کبی که بوراده مضاف الیه اولان (کوکل ، اجل)
 مضاف اولان (قوش ، قلیچ) . بکزه دلش اولدیغندن قوش
 کبی کوکل ، قلیچ کبی اجل دیمک اولور .

نمونه

آشاغیده «م» ایله اشارت اولونان مشبه اسملرله «مب» ایله اشارت
 اولونان مشبه به اسملری اضافه ایدیکز .

[*] کندیسنه بر شی بکزه دیلنه «مشبه به» ، کندیسینی بر شیئه
 بکزه یته «مشبه» دینور . بو صورتده تعریف مذکور مشبه به اولان
 اسمک مشبه اولان اسمیه اضافه سپدر دیمک اولور .

م } کوکل . معرفت . اجل . کوز . عاطفت .
 مب } کعبه . کونش . پنجه . بولود . دریا .

سؤال — اضافت تشبیهیه نیه دیرلر ؟ مشبهه ، مشبهه کیمه
 دینور .

لسان عثمانیده استعمال اولونان اضافت درت اسلوب
 اوزره در: بری اسلوب ترکی، بری اسلوب عربی، بری اسلوب
 فارسی، آخری دخی اسلوب مختلطدر.

اسلوب ترکی:

اسلوب ترکی بوندن اول ذکر اولوندی.

اسلوب عربی:

لسان عثمانیده مستعمل اسلوب عربی دخی ایکی درلودر.
 بری مضاف اولان اسم عربی آخری مضموم اوقونارق
 تقدیم ومضاف الیهك اولنه حرف تعریف علاوه ایدیلهرک تأخیر
 ایدیلیرکه بونوع اضافت لامیه قسمندندر: شعاع الشمس، خاتمة
 الكتاب، برد الشتاء کبی که ترا کیب مذکورہ نی ترکیه یه ترجمه
 ایله دیکمزدہ (کونشک شعاعی ، کتابک خاتمه سی ، قیشک
 صوٹوغی) دیرزہ دار الفنون، دار التعلیم، شمس المعارف دخی
 بوقیلدندر .

اشبو اسلوبده اولان ترکیبیلر حرف جردن عاری اولورسه
 دائماً مضاف مرفوع ومضاف الیهك صوک حرفی ساکن تلفظ

اولونور . اکر حرف جر آلیرلر سه اول وقت مضاف مجرور
 اوقونور : بقدر الطاقه ، علی قدر الاستطاعه ، من قبل الحق ،
 بحسب المعنی کبی .

فقط « حیث » کلمه سی ضم اوزره مبنی اولدیغندن حرف جر
 ایله ده مضموم اوقونور : من حیث المجموع کبی .

« حسب » کلمه سی دخی حرف جردن عاری اولدیفنی زمان
 دائماً مفتوح اوقونور : حسب الحمیه ، حسب الاخوه کبی .

بونوع اضافتله ، اضافت لامیه دینلسی بونلرک اصلی [شعاع الشمس،
 خاتمه للكتاب ، برد للشتا] اولدیفنی ایچوندرکه بونلرک ترکیه سی (کونش
 ایچون شعاع ، کتاب ایچون خاتمه ، قیش ایچون بزودت) در .

دیگری صفتک فاعلنه ویا مفعولنه اضافتیدرکه بوکا اضافت
 لفظیه دخی تسمیه اولونور . بونوع اضافت ، لامیه وبیانیه نك
 غیرى اولوب لسان عثمانیده اک زیاده استعمال اولونان اسلوب
 عربی بودر : عظیم الامل ، سریع الانتقال ، شاكر النعم
 کبی که امثله مذ کورده ده عظیم ، سریع کلمه لری صفت اولوب
 فاعللی اولان امل ، انتقال کلمه لرینه مضاف اولمش وکذا صفت
 اولان شاكر اسمی دخی مفعولی اولان نعم لفظیه اضافه
 قیلنمشدرکه معناری املی بیوک ، انتقالی سریع ، نعمتلره شکر
 ایدیجی دیمکدر .

فاعلنه ویا مفعولنه مضاف اولاجق صفت ، اسم فاعل ، اسم مفعول
 ویا صفت مشبهه اولمالیدر . نشه کیم امثله مذ کورده ده خادم ، شاكر

صفتلری اسم فاعل ، مجروح اسم مفعول وعظیم ، سریع کلملری دخی صفت مشبه اولارق کلشدور .

اسلوب فارسی :

اسلوب فارسی اوزره اولان اضافتده (كرك لامیه و كرك بیانیه وتشبیه اولسون) عربیده اولدینی کبی مضاف اول ومضاف الیه صوکره کلیر ومضافك آخری دائماً مکسور اوقونور : آب دریا ، پرتو خورشید کبی .

اگر مضافك آخرنده هارسمیه ویاها صورتنده تا ویاخود یاء ممدوده وار ایسه برهمزه زیاده ایدیلیر : بنده خدا ، نغمه بلبل ، ساحه زمین ، صوفی جهان کبی .

واگر مضافك آخرنده الف ویاخود واومدوده بولونورسه بریا زیاده قیلینیر : صفای دل ، [*] بوی کل کبی .

اسلوب فارسیده مضاف الیه مضاف الیهدن هرایکیسی فارسی اولمق شرط دکلدر . بونلردن هرایکیسنك عربی ویا فارسی ویاخود برینك فارسی آخرینك عربی اولماسی جائزدر :

ایکیسیده فارسی } پرتو خورشید
باغ جهان

[*] صفا ، جفا کبی فی الاصل آخری همزه لی اولان کلمات عربیه مضاف اولدقلری وقت بریا زیاده سیله صفای قلب ، جفا قلب دنیلدیکی کبی همزه لرینك اعاده سیله صفاء قلب ، جفاء قلب دنیلکیده جائزدر . فقط صورت اولی ده شایعدر :

شعاع شمس
ایکسیدہ عربی } محراب مسجد

آب حیات
بری فارسی } آخری عربی
ضیای خورشید . . . کبی

اسلوب فارسی اوزرہ اضافتہ مضاف ایلہ مضاف الیہدن ہر برینک
لفظ عربی ویا فارسی اولماسی جائز ایسہدہ هیچ برینک الفاظ
ترکیہ دن اولماسی قطعاً جائز دکلدر . مثلاً کرمی صیف،
دروازہ بیت، صعوبت مصلحت دینیلوب (کرمی یاز، دروازہ
او، صعوبت ایش) دنیلیمک اصلاً جائز دکلدر .

[فائدہ] — (معنی کبی آخرنده الف مقصورہ اولان کلمات
عربیہ نک قاعدہ فارسیہ اوزرہ اضافتہ لرنده همزه ایلہ معنی بیت
صورتندہ استعمال شیوہ لسان فارسی یہ موافق ایسہدہ لسان
عثمانیدہ الف ایلہ معنای بیت طرزندہ استعمال اولونور .)

اسلوب فارسی اوزرہ اضافت دخی لامیہ، بیانیہ، تشبیہیہ،
لفظیہ، اولمقدن خالی بولونماز . نتہ کیم آتیدہ کی ترکیب بونلرہ
مثال اولابیلیر :

خانہ پدر
لامیہ } مدیر مکتب

درخت سرو
بیانیہ } شمشیر زر

تشبیهه } کعبه دل
نور معرفت
لفظیه } خادم دولت
مقبول جهان . . . کبی .

اسلوب مختلط :

اسلوب مختلط ، اسلوب عربی ایله اسلوب ترکی نک -
اسلوب عربی ایله اسلوب فارسی نک - اسلوب ترکی ایله اسلوب
فارسی نک - اسلوب عربی ، ترکی و فارسی نک اختلاطندن عبارت
اولق اوزره درت احتمال واردرکه آتیده کی عبارتله بونلره
مثال اولاییلیر :

دار المعلمینک تاسیسی .
تأسیس دارالمعلمین .
تعمیم معارفک چاره سی .
مدیر دارالشفقه نک اقدامی .

اسلوب فارسی اوزره اولان اضافتده مضافک بر صفتله وصف اولونماسی
لازم کلیرسه اوصفت مضاف ایله مضاف الیه اراسنه حیلوت ایدر :
اشعار فصیحه بلغا ، عقول مختلفه بشر ، ابنیه جسمیه بلده کبی . بو
ترکیبلرده فصیحه ، مختلفه و جسمیه لفظلری اوست طرفلرنده کی اشعار ،
عقول و ابنیه لفظلرینک صفتلری اولوب اولفظلر دخی اولجه بلغا ، بشر ،
کله لرینک مضافلری ایدی .

۵ — ترکیب توصیفی بر صفتله بر موصوفدن تشکل ایدن
هیئته « ترکیب توصیفی » دینور .

صفت برشیثک خلفاً وخلقاً علایمی بیان ایله مک دیمکدر . بوکا وصف
دخی دینیلیر . صفت ویا وصف فی الاصل مصدر در . صوکره دن بونلر
اسم اولارق استعمال اولونمشلر در . شویله که : برشیثک خلق وخلقنی
بیان ایدن اسم « صفت » و « وصف » و صفتک بیان ایتدیکی اسم
« موصوف » اطلاق اولونوب صفتله موصوفدن عبارت اولان هیثته
دخی سالف البیان « ترکیب توصیفی » و یا « ترکیب وصفی » تعبیر
اندلشدر .

ترکیب توصیفی لسان عثمانیده اوج اسلوب اوزره در .
بری اسلوب ترکی ، بری اسلوب عربی وبری دخی اسلوب
فارسیدر .

اسلوب ترکی :

ترجیه ترکیب توصیفیلرده صفت اول موصوف صوکره
کلیر . مثلاً : [بیوک او] ترکیبده اولدیغی کبی که بیوک صفت
او کلمه سی موصوفدر .

ترکیب توصیفیده موصوف جمع اولسه بیله صفت دائماً
مفرد کتیریلیر : (بیوک اولر) دینلوب (بیوکلر اولر) دینلمز .
فقط جمع اولان موصوف محذوف اولورسه اول وقت صفت
موصوف مقامنه قائم اولارق جعلنه بیلیر . طوغریلر سویلیر ،
چرکینلر طالعی اولور ، بیوکلری تعظیم ایتلی کبی که طوغری
آدملر سویلیر ، چرکین کیمسه لر طالعی اولور ، بیوک ذاتلری
تعظیم ایتلی تقدیرنده در .

ترجیه ترکیب توصیفیلرده صفتله موصوفک هر ایکسی

لفظ عربی ویا فارسی ویا بری عربی بری فارسی یاخود هر
بررلری ترکی، عربی، فارسی اولق جائز اولور :

ایکیسیده ترکی	—	بیوک آو	اوزون ال
ایکیسیده عربی	—	واسع مکتب	مجلد کتاب
ایکیسیده فارسی	—	تهی خانه	خوش کاشانه
بری عربی بری فارسی	—	صادق بنده	سیاه اثواب
بری عربی بری ترکی	—	اعلی قوناق	بیوک مدرسه
بری فارسی بری ترکی	—	سیاه آت	پارلاق جام

نماین

آشاغیده کی کلمه لردن هانکیسی صفت هانکیسی اسمدر آیریکنز .
صوکره صفتلره بر موصوف واسملره بر صفت بولارق ترکیب توصیفی
پایکنز .

طوغرو	•	سوقاق	•	جامع	•	طار	•
فس	•	مناره	•	عالم	•	دستی	•
مکمل	•	قورو	•	یوکسک	•	طاغ	•
کاغد	•	اغاچ	•	سیاه	•	خانه	•
لاله	•	کوچک	•	قلم	•	حقه	•
یول	•	پنجره	•	صاری	•	قالدیرم	•
چیچک	•	طاش	•				

سؤال — ترکیب توصیفی نیه دیرلر ؟ صفتله موصوفدن

هائیکسی اول کلیر؟ صفتله موصوفك هر ایکسیده جمع اولاق چاژمیدر؟
صفت نه وقت جمع اولاییلیر؟ ترکیب توصیفیلرده صفتله موصوفك
هر ایکسیده لفظ ترکی اولق شرطمیدر؟

صفت ایکی درلودر. بری «وصف ذاتی» درکه موصوفك
طوغریدن طوغری یه کندی صفتیدر. چکن مثاللرده اولدینی
کبی که بو وجهله ترکیب اولونان صفت و موصوف هیئت مجمو-
عه سینه یوقاروده بیان اولوندینی اوزره «ترکیب توصیفی» ویا
«وصفی نامی» ویریلیر. دیکری (وصف سببی) درکه موصوفك
مضافك صفتیدر یعنی موصوفك مضافی کندینه بر صفت آلهرق
هیئت مجموعه سیله موصوفه صفت اولور که بوکا دخی «وصف
ترکیبی» نامی ویریلیر. مثلا بوی اوزون آدم دینلده اوزون،
آدمك مضافی اولان بویك صفقی اولوب بوسیله بونك صاحبی
اولان آدم توصیف اولونور. دیمك اولیورکه :

وصف ترکیبی — بر صفتله بر اسمدن ترکیب ایدوب
ایکسی برلکده بر صفت بسیطه کبی دیکر اسم صفت اولان
ترکیبدرکه اکثریتله کندیسنده اسم منسوب، اسم فاعل، اسم
مفعول، صفت منتهیه معناسی بولونور.

ترکیبده وصف ترکیبی ایکی درلو یاییلیر :

۱ — نحیسی، اسم مضافلك اوکنسه بر صفت کتیریلهرك

یاییلیر :

باشی بیوک
 بجاغی قیصه
 بارداغی قیران
 قاصینی یاریق

آدم

اشبو وصف ترکیبیلر مفرد حکمنده برر صفت اولوب
 موصوفی اولان آدم لفظیله برلشهرکینه ترکیب توصیفی
 اولورلر .

۲ — نجیسی، ترکیب توصیفیلرک آخرینه (لی، لو) کتیر-
 یلهرک یاییلوب یینه دیگر بر اسم موصوف ایله برلشهرک بر
 ترکیب توصیفی اولور :

ترکیب توصیفی		وصف ترکیبی
آدم	—	بیوک باشلی
	—	قیصه بجاقلی
	—	اوزون بویلو
	—	اوچوق بگزللی
	—	بیوک باش
	—	قیصه بجاق
	—	اوزون بوی
	—	اوچوق بگز

تعمیم

آشاعیده کی ترکیب توصیفیلری ایلهنجی قاعدهیه توفیقاً وصف ترکیبی
 یاییکیز. بعده مذکور ترکیب توصیفیلرک موصوفنک مضاف حالندن
 برنجی قاعدهیه تطبیقاً وصف ترکیبی یاییکیز. اشبو ایکی صورتله
 پایلان وصف ترکیبیلره برده موصوف بولوکیز .

- اورتہ بوی • یوکسک طاوان • آلقاق باجا •
 • ایری پرون • بیاض شمسیه • قرمزی فس •
 • اوفاق قابو • قیصہ شالوار •

سؤال — وصف ذاتی نیه دیرلر؟ وصف سببی یا خود وصف
 ترکیبی نیه دیرلر؟ ترکیبده وصف ترکیبی قاج درلو وناصل یاپیلیر؟

اسلوب عربی :

عربیده وصف سببی صفات اصلیه نك یعنی اسم فاعل ،
 اسم مفعول، صفت مشبهه نك فاعل ویا مفعولارینه اضافه سندن
 عبارتدرکه اضافت عربیه بختنده بوکا « اضافت لفظیه » تسمیه
 اولونمش ایدی : سابق البیان ، ممدوح الخصال ، کریم النسب کبی که
 بونلر صفت اولوب آیروجه بر موصوفه احتیاجلری واردر .
 نته کیم آشاغیده بیان اولوناچقدر .

اسلوب عربی اوزره جاری اولان ترکیب توصیفیده
 موصوف اول وصف صوکره کلهرک هر ایکسیده معرفه اولمق
 اوزره الفاظ عربیه دن اولور : واه العظیم ، شعبان المعظم ،
 رمضان المبارک کبی .

اسلوب فارسی :

اسانمزجه جاری اولان اسلوب فارسیده طبق عربیده
 اولدینی کبی موصوف اول وصف صوکره کلیر . فقط موصوفک
 آخری مکسور اوقونور : خورشید رخشان ، ماه تابان کبی .

اسلوب فارسیده صفت ایله موصوفك هرايكیسی لفظ فارسی
ویا عربی ویاخود بری فارسی آخری عربی اولاییلیر :

ایکیسیده فارسی :
 { آب روان
 { مهر تابان

ایکیسیده عربی :
 { کلام فصیح
 { شعر بلیغ

بری فارسی آخری عربی :
 { درگاه معلا
 { شعاع آفتاب

اگر موصوفك آخری ها رسمیه ویاها صورتنده تاء
تأثیت ویاخود یای ممدوده اولورسه برهمزه واکر الف ویاواو
ممدوده اولورسه بر یا زیاده قیلنور : بنده قدیم، طبقه بالا،
صوفی متوکل، بنای محکم، سبوی تهی کی .
آخرنده الف یا صورتنده مقصوره اولان اسماعرییه موصوف
اولدقه مذکور یا الفه قلب اولونور : دعوای کاذبه کی .

اسلوب فارسیده صفت ایله موصوفك هر ایکسیده لفظ
عربی اولورسه عربیده اولدینی کی بونلر بیننده افراده،
تثییه ده، جمعه، تذکیر و تأنیده مطابقت لازمدر :

رجل کامل

شیخین مکرمین

علماً عاملین . . . کی که

امثله مذکورہ دن برنجی ترکیبہ افراداً و تذکیراً، ایکسجی ترکیبہ تثنیۃ، اوچنجی ترکیبہ دخی تذکیراً و جمعاً مطابقت بولونمشد.

اسلوب فارسی اوزرہ الفاظ عربیہ نك و صفاً ترکیبندہ جمع اولارق استعمال اولونان صفتلر اکثریا جمع مکسر اولور : علمای عظام، اولیای کرام، وزرای فخام کی .

اسلوب فارسی اوزرہ ایکی لفظ عربیدن یاپیلان ترکیب و صغیرلرہ قاعدہ مطابقتہ رعایت یالکیز لسان عثمانیدہ جاری اولوب اهل فرس بو مطابقتہ رعایت ایتزلر. بناءً علیہ صحبت قدیم، دعوای کاذب، صحرای واسع دیوب صحبت قدیمہ، دعوای کاذبہ، صحرای واسعہ دیمزلر .

اسملرك آخرینہ یای نسبت کلیرسه صفت معنایی کسب ابتدیکی بحث مخصوصندہ ذکر اولونمیش ایدی . بو صورتده بونلر دیگر اسملره صفت واقع اولاییلرلر : رجل شامی، امراء شامیه کی .

[اخطار] (بعضاً یاء نسبت ایله تأ تأیث برلکده اسماء اجناس ایله صفتلرہ لاحق اولارق ادات مصدر اولور : انسانیت، آدمیت، حیوانیت کی . بو وجهله معنای مصدری کسب ایله مک ایچون آخرلینه یای نسبت و تأ تأیث کتیریلاان اسملرك وصفیتلری مختل اولور . مثلاً (دأب آدمیت، طور انسانیت) دینلسه بونلرك معناری (آدملک دأبی، انسانلق طوری) دیمک اولدینی ایچون بونلر ترکیب اضافی اولوب وصفی اولمازلر .)

عربیده جمعلر جماعت تأویلله مؤنث عد و اعتبار اولونارق صفتلری تأیث قیلندیگی کی ایکی لفظ عربیدن مرکب اولان اسلوب فارسیدہ دخی بو قاعدہ جاری اولارق جمع اولان

موصوفلرک صفتی مؤنث کلیر : اما کن رفیعہ ، احوال عجیبہ ، اشکال غریبہ ، ابنیۂ عالیہ کی .

ادات نسبت ایلہ وصفیت کسب ایدن اسملرک بنہ اسمیتہ نقلی حالندہ آخرلرینہ بر « ة » الحاقی قواعد عربیہ ایجاباتندن اولوب رشدیہ ، حریبہ ، اعدادیہ ، مجیدیہ ، محمودیہ کی اوصاف منقولہ لہ لاحق اولان تائی نقلیہ چوق کیمسہ لر تائی تأنیث ظن ایدہ رک میداندہ وصفیت ، موصوفیت اولمادیفی حالده صفتله موصوف بیننده مطابقت آرایورلر . مثلاً مکتب رشدیہ ، مکتب طیبہ ، کی تراکب اضافیہ قییلندن اولدیغی کون کی آشکار اولان ترکیب لری ترکیب توصیفی ظن ایدہ رک صفت ایلہ موصوف بیننده جهت مطابقت آرامق زحمتنه دوچار اولیورلرده بعضلری بو مثلاًو ترکیبلره برر مؤنث موصوف تقدیریلہ « مکتب حریبہ » مکتب فنون حریبہ « ناظر مالیہ » ناظر امور مالیہ تقدیرنده در دیورلر . پک غریب . . . ! !

هایدی بویله اولسون ! لکن جمعه نمازینی نور عثمانیہ ده ادا ایدہ جکم ، یارین سلیمانیه کیده جکم ، بوچوخه نك متروسی اوچ مجیدیہ در جملہ لریده تأویل ایسته نرمی ؟ عجباً بونلری ناصل تأویل ایتملی ؟ یوقسه بونلر یا کشمیدر ؟ خیر ! پک طوغریدر . کرچه اسمیتہ نقلدن اول وصفلرده موصوفه مطابقت آرانیرسه ده اسمیتہ نقلدن صوکره کندیلرنده وصفیت قالمایاجفندن طبیعی موصوفلریده بولونماز . بوصورتده مطابقتده آرانامااز .

« ة » شکده یازیلان تا لسان عربده هر زمان تأنیث ایچون اولمایوب بعضاً وحدت ایچون اولور : تمر ، تمره کی که تمر خرما تمره بر خرما دیمکدر .

بعضاً دخی وصفیتدن اسمیتہ نقل ایچون اولور : لائحہ ، سانحه ، علامه ، فهامه ، کافیہ ، هدیه کی که بونلردن معنای وصفیت کیده رک اسم جامد عدادینه داخل اولدقلرندن کندیلرینه اصلاً موصوف آرانماز . بناء علیه هدیه کنر واصل اولدی . صالح علامه زماندر ، بکر فهامه

جهاندر . شاقیه اوقودم دینورکه اشبو عبارلرده بولونان اوصاف منقوله اسم جامد کبی قولانیلار ق موصوفه احتیاجدن ازاده بولونمشلردر . والحاصل ایراد اولونان ترکیملرک امثالی وصفی اولمایوب اضافی قیلندندر . و اضافه سی ده « رمضان آبی » ، « قربان بیرامی » کبی مسمانک اسم اضافه سی قسمنندندر .

عربیده بردن اونه قدر اولان اعداد بسیطه نك مذکر لری تا ایله و مؤنث لری تاسر کلمدیکنندن بونلرده دخی مطابقته رعایتله (خواس خمس ظاهره ، جهات ست) دینیلوب حواس خمس ظاهره ، جهات سته دینلمك صحیح اولماز . فقط بونك ، رسوم سته ، جزائر سبعة ، بلاد ثلاثه کبی برچوق غلطات مشهوره سی واردر .

کلمات عربیه ادوات فارسیه دن برینی اخذ ایتدکری وقت فارسی حکمنی الاجفندن تأنیث قیلنمازلر . بناءً علیه (معذرت نامشروع ، اطوار نامقبول ، حرکات نالایق) یرنده معذرت نامشروعه ، اطوار نامقبوله ، حرکات نالایقه دینیله من . فقط ادات فارسیه یرینه ادات عربیه کتیریلیرسه اول زمان تأنیث جائز اولوب « معذرت غیر مشروعه ، اطوار غیر مقبوله ، حرکات غیر لایقه » دینلمك ضروری اولور .

{ وصف ترکیبی }

فارسی صفتلر بعضاً مرکب اولورلر . یعنی : ایکی کلمه دن ترکیب

ایدیلهرک اسم فاعل . اسم مفعول ، اسم مذسوب ، صفت مشبهه
معنای افاده ایدرلرکه بونلره (وصف ترکیبی) اطلاق اولونارک
صفات مفرده مثللو برر موصوفه محتاج اولورلر .

فارسی وصف ترکیبیلری الی درلو تشکیل اولونور :

۱ — فارسی امر حاضرلرک مفعولنی کنندیلرینه تقدیم ایله

حاصل اولور :

جانبخش ادب آموز حیرت افزا سخندان
جان باغشلیان ادب اوکره دن حیرت زیاده لشدیرن سوز بیان کبی .

۲ — فارسی اسم مفعولک معمولنی کنندیسنه تقدیم ایله

حاصل اولور :

جهاننایدیه ساحخورده فلکزده دلپسته
جهان کورمش چوق یاشامش بدبخت کوکل ویرمش کبی .

۳ — ترکیب وصفیدن کسره وصفینک حذفیه حاصل

اولور :

سینه صاف دلتک سرگران دل آگاه
بورکی تمیز صیقندیلی متکبر قلبی اویانق . . کبی که
بونلرک اصلی (سینه صاف ، دل تنک ، سرگران ، دل آگاه)
ایدی .

۴ — اضافت لامیه لرده مضاف الیهک مضافه تقدیمیه

حاصل اولور :

ماه پرتو ملك خصلت صوفی مشرب
 آی ضیالی ملك خصلتل صوفی مشربلی کچی که
 بونلرك اصلى (پرتو ماه، خصلت ملك، مشرب صوفی) ایدی.

۵ — صفتك موصوفته تقدیميله حاصل اولور:

خوبرو نيك سيرت عالیقدر عالیجاه
 کوزل بوزلو ابی سیرتلی قدری یوجه منصبی عالی اولان. کچی که
 بونلرك اصلى (روی خوب، سیرت نیک، قدر عالی، جاه عالی)
 ایدی.

۶ — اضافت تشبیهده کمرهٔ اضافینک حذفيله اولور:

ماه رو مه سیما سرو قد کلبدن
 آی یوزلو آی بکرلی سرو بویلی کل بدنلی ... کچی که
 بونلرك اصلى (ماه رو، مه سیما، سرو قدر، کل بدن) ایدی.
 اسلوب فارسی اوزره تشکل ایدن ترکیب وصفیلرده صفت
 بعضیاً ذکر و بیان اولونان وصف ترکیبیلردن عبارت اولور:
 باغ دلکشا، پیر سالخورده، مرشد دل آگاه، صوفی زند مشرب،
 شعاغ عالم افروز ... الخ کچی که اشبو ترکیبیلرده «باغ، پیر،
 مرشد، صوفی، لفظلری موصوف و (دلکشا، سالخورده،
 دل آگاه، رند مشرب) وصف ترکیبیلری دخی مذکور
 موصوفلرك صفتیدر. بعضیاً عربی وصف سبیلری دخی دیگر
 برلفظ ایله برلشهرك اصول فارسیه اوزره ترکیب وصفی تشکیل
 ایدرلر: خصوص سابق البیان، شخص عجیب الاحوال کچی.

بوکی ترکیب وصفی سبیلرده صفتلرک فاعللرینک احوال تذکیریه وتأنیثیه وافرادیه وجمعیه لرینه اعتبار اولونما یوب موصوفلرک حاللرینه اعتبار اولونارق صفتلر تذکیر وتأنیث وسائر احوالده موصوفلره تطبیق وتوفیق ایدیلیر : خصوص سابق الذکر ، امور سالفة بیان ، طیور مختلفه الالوان کبی که بونلر ترجمه اولندقدہ (ذکر ی کچن خصوص ، بیانی کچن امور ، مختلف رنگلی قوشلر) دینیلیر .

بعض کره وصف ترکیبیلر دیگر لفظلره مضاف اولورلر : مسرتبخشای درون ، نصارت افزای حدیقہ کبی که (درونه مسرت باغشایان ، باغچہ نصارت زیاده ایدن) دیمک اولور .

بو مثللو ترکیب اضافیلرده بعضاً مضاف الیه اولان اسم وصف ترکیبینک جزء اولنک مضاف الیهی اولور : (اناملیرای تکریم ، رونقبخش اجلال) کبی که بونلر « پیرایندہ انامل تکریم ، بخشندہ رونق اجلال » تقدیرندہ اولوب مضاف الیه اولان تکریم واجلال اسملری وصف ترکیبیلرک جزء اوللری اولان انامل ، رونق کلمه لرینک مضاف الیهی اولدینی نمایان اولورکه (تکریم پارمقلرینی تزین ایدن ، اجلال رونقنی بخش ایلین) معنالرینی افاده ایدر .

بو مثللو ترکیبیلرده مضاف الیهلر چوق کره لفظ مستعار اولور . « اناملیرای تکریم » ترکیب سابقندہ اولدینی کبی . زیرا

«تکریم» ک پارمقلری اولمادیغندن لفظ مذکور بوراده استعاره اولارق استعمال قیلنمیشدر. استعاره قسم نالنده بیان ایدیله جکدر.

۵ — ترکیب تعدادی : صاییلرک برلشمه سندن حاصل اولان هیئت «ترکیب تعدادی» دینیر : اون درت، اون طقوز کبی. صاییلرک بهرینه «عدد» و صاییلان شیلره دخی «معدوده» دینلدیکی صرف ترکیده بیان ایدلمش ایدی.

ترجهمده دائماً عدد، اول معدود صوکره کلیر : اوج آدم، بش غروش، اون جویر کبی. معدودلر دائماً مفرد اوله رق قوللانیلوب جمع اولمازلر : بش قلم، اوج کتاب دینیلوب بش قلملر، اوج کتابلر دینیله مز.

عددلر صفت اعتبار اولوندیغندن معدودلریله برلکده کلدکاری وقت ترکیب توصیفی و بناء علیه وصف ترکیبی حصوله کثیرلر :

بش کوز
بش کوزلی
بش کوزلی
بش کوزلی

بش کوز
بش کوزلی
بش کوزلی
بش کوزلی

اوج آیاق — اوج آیاقلی ، حیوان
بش کوز — بش کوزلی ، طولاب
ایکی اناختار — اناختاری ایکی ، چکمهجه کبی.

تعمیر

آشاییده کی اسمله عددلردن برنی علاوه ایدرهك ترکیب توصیفی
یایکیز. صوکره اشبو ترکیب توصیفیلردن وصف ترکیبی تشکیل ایدیکیز.

• پنجره • قابو • کوز • قناد •
• آفاق • باجا • دیرك • تکرلک •
• خلقه • مناره • محراب • نردبان •
• طاش •

• سوال — ترکیب تعدادی نیه دیرلر؟ عددلر معدودلریله برلکده
کلیمه آنلره نه تسمیه اولونور؟ بونلردن وصف ترکیبی نه وجهه تشکیل
اولونور؟



{ ترکیب تاملر }

ترکیب تام، اسنادی حاوی ترکیبلردرکه ایشیدن کیمسه
استفاده ایچون باشقه کلمه انتظار ایله مز •
اسناد، برشیئی دیگر برشیئه نسبت ایتمکدرکه بونستبدیه یا
« تام » یا « ناقص » در •

نسبت ناقصه، مضافک مضاف الیه، صفیک موصوفه اولان
نسبتلریدرکه بونلری حاوی اولان ترکیبلره (ترکیب ناقص)
دینلدیکی و بو ترکیبلرک مخاطبه فائده تامه ویره مدیکی یوقاریده ذکر
وبیان اولوندی •

نسبت تامه ، خبرك مبتدایه و فعلك فاعل و یا نائب فاعله
نسبتلریدرکه بوجبی نسبتلری حاوی اولان ترکیملره (ترکیب تام)
دینلدیکی کبی «کلام» و یا «جمله» دخی دینیلور .
مبتدا ایله خبرك و فاعل ایله فعلك بیننده کی نسبت «اسناد»
و مبتدا ایله فاعله «مسندالیه» و خبر ایله فعله «مسند» دینیلیر .
جمله ایکی درلودر . برینه (جمله اسمیه) دیکرینه
(جمله فعلیه) دینور .

جمله اسمیه — مبتدا ایله خبردن ترکیب ایدن جمله درکه
خبرلرک آخرینه ضمیر نسبیلردن بری کتیریلرک یاییلیر . اشیو
ضمیر نسبیلره «ادات خبر» دینیر . کونش پارلاقدر ، سن
کاتبسك ، بن عالم کبی . بوراده کونش ، سن ، بن لفظلری
«مبتدا» پارلاق ، کاتب ، عالم کله لری «خبر» و (در، سك، م)
ضمیر نسبیسی دخی ادات خبردر .

مبتدا — جمله یه کندیسیمیه باشلانیلان کله در . بر سبب
اولمادجه ترکیبده مبتدا اول خبر ص و کره کلیر . کچن مثالدرده
اولدینی کبی .

مبتدا ، معرفه یعنی متکلم الله مخاطب بیننده یلنان برشی اولمایدیر .
اگر اولمازسه مخاطبه فائده تامه و بره میه جکندن ترکیب تام اولق صلاحیتی
حائز اولماز . فقط نکره [۱] اولوبده مخاطبه فائده بی مفید اولورایسه
مبتدا اولاییلیر . بر عالم بیک جاهلدن خیرلیدر کبی . و اگر فائده بی مفید
اولماز ایسه مبتدا اولمز . بر آدم عالمدر کبی .

[۱] نکره غیر معین برشیته وضع اولونان کله یه دینور .

مبتدا ، اسم ؛ صفت و یا اسم حکمنده اولان مصدر و کنایه لردن
بری اولور : الله بردر . سویلان بختیاردر . بن عالم ، او قومق
ایودر ، شو طاشدر کی .

مبتدا بعض کره برفاچ دانه اولور . او حالده برنجیدن صوکره کی
مبتدا لرك اولنه برر « و » یازیلیر بر وکوک و آی وکوک اللهم برلکنه
شاهددر کی . چوق کره بوواو حذف اولونارق یرینه (،) اشارت
قونور . آی . کونش ، ییلدیزلر هبسی سمانک زینتیدر کی .

نمونه

آشاغیده کی جمله لرده بولونان مبتدالری آیریگز . صوکره بونلرک
اسم ، صفت ، مصدر و یا کنایه لردن هر هانکیسی اولدیغی خذالربنه یازیگز .
پورتقال صاریدر . او قومق صنعتلرک اک کوزیلیدر . شواغاجدر .
بن انسانم . کونش یارلاقدر . کیچه قرانلقدر . یاراقلر یشیلدر .
احمد چالشقانددر . او قویان عزیزدر . کتاب بندهدر . انسان ،
قوش ایکی آیاقلیدر . آت . اشک ، دوه ، قیون درت آیاقلیدر .

سوال — ترکیب تاملر ناصل ترکیبلردر ؟ اسناد نه دیمکدر ؟
نسبت ناقصه و نسبت تامه کیلرک بیننده کی نسبتدر ؟ کلام و یا جمله نیه
دیرلر ؟ جمله لرده مسند و مستدالیه کیلردر ؟ جمله اسمیه ناصل جملهدر ؟
مبتدا هانکی کلهدر ؟ مبتدا نه ایچون معرفه اولالییدر ؟ مبتداتک
نه وقت نکره اولسی جائز اولور ؟ مبتدا ناصل کله لردن اولور ؟ جمله
مبتدا بردن زیاده اولورسه نه یاپیلیر ؟

مبتدا ، لفظ ترکی اولدینی کبی عربی ، فارسی ویا لفظ اجنبی دخی
اولاییلیر : شمس پارلاقدر ، جهان فائیدر ، پولیچه معتبردر . جله لرنده کی
(شمس ، جهان ، پولیچه) کله لری کبی .

مبتدا مفرد اولدینی کبی اکثریا مرکبده اولور : افندیك اوی
یوکسکدر ، بیاض آت مقبولدر ، باران نیسان لطیفدر ، میوه باغ لذتدر کبی

ضمیر — خبر ، ترکیبده مبتدا دن صوکره کلیر واکثریا صفت
وبعضاً اسم ویا اسم حکمنده اولان کله اولور : کوك یوکسکدر ،
اوقومق هنردر ، هنرك ایوسی اوقومقدر ، بوکا سبب اودر کبی .

خبرلر مبتدا کبی بعضاً برقاچ دانه اولور . اول وقت ارا -
لرینه «هم» اداتی کلور : حسن افندی هم اوصولدر هم
چالشقاندیر کبی .

نمونه

اشاغیده کی جله لرده بولونان خبرلری کوستریکز . صفت ، اسم ویا
اسم حکمنده بولونان کله لردن هانکیسی اولدینی بیان ایدیکر . ادات
خبرلرک ضمیر نسبیلرک هانکی شخصنه منسوب اولدینی سویله بیکز .

حسنک پدری زنکیندر . بن فقیرم . شو کلن بابامدر .
بز انسانز . انلر عالمدرلر . سز چالشقان دیکسکیز .
احمد کاتب دکلدر . حسین شاعردر . سن اوصولسک .
کمال هم اوصولدر هم چالشقاندیر . چوجقلرک وظیفه سی هم
اوقومق هم یازمقدر .

سؤال — خبر ناصل کله لدن یاپیلیر؟ خبر بردن زیاده اولورسه نه یاپیلیر؟

مبتدا کی خبر لر دخی مفرد اولدینی کی بعضاً مرکبده اولور. بو، افندینک خانه سیدر. شوراسی ساحل بچردر. سن حافظ قرآنسک. احمد بنده صادقدر کی. کلامده ضمناً ویا صراحة کله تأکید بولو. نوره ادا ت خبر اولان ضمیر نسبیلردن صوکره بر «در» زیاده ایدایلیر: سز البت حساب او قومش سکزدر، بیلیرم سز بوفنی تحصیل ایتمش سکزدر کی.

جمله فعلیه — فعل ایله فاعل ویا نائب فاعلدن ترکیب ایدن جمله در: قیش کلدی، پیراقلر دوکلدی کی که «کلدی، دوکلدی» فعل «قیش» فاعل و «پیراقلر» نائب فاعل اولمش اولور. اشبو مثاللردن آ کلاشلدینی اوزره جمله فعلیه نك ارکان اصلیه می فعل، فاعل ویا نائب فاعل اولدیغندن هر برلری بروجه زیر آری آری بیان اولونور:

فعل — جمله نك اجزای اصلیه سندن اولان فعللر یالکیز زمانه دلالت ایدن فعللر در که صرف ترکیده اوزون اوزادی به بیان اولوندی:

مصدر لرله افعال ربطیه و فرع فعللرک فاعله نسبتی معتبر اولمایوب نسبتلری ناقص اولدیغندن جمله تشکیل ایده مز - لرسده بعضاً مفعوللردن برینی آلهرق فعل کی قوللانیلیر: (مکتبه کیتمک، درسه چالش مق، خواجهدن آفرین آلق عقللی چو جقلرک کاریدر). جمله سنده اولدینی کی که کیتمک،

چاشمق آلمق مصدرلری مکتبه ، درسه ، خواجه دن مفعوللرینی
آلارق فعل کبی ایراد اولونمشدر . وکذا مثاللری آتیده اولان
افعال ربطیه دخی فاعل ونائب فاعله نسبتلری مقصود اولمادیغندن
یالکیز مفعول آلارق ایراد اولونمشلردر .

صیغه عطفیه به مثال	}	بیوکلری طانیوب اطاعت ایتک واجبدر .
صیغه توقتییه به «		اویون اوینادججه جاهل قالیرسک .
صیغه ابتدائییه به «		بروسیه کیده لی وجودم ایولشدی .
صیغه تعقیبیه به «		قلمه کیدنجه ایشه باشلادم .
صیغه انتهاییه به «		بوکون یورولنجیه قدر قوشدم .

فعللر ترکیده واقع اولورسه ارکان جمله نك هپسندن صوکره
کلیر : احمد افندی بروسیه کیتدی جمله سنده اولدینی کبی که
کیتدی فعلی اک صوکره کلشدر .

سوال — جمله فعلیه نه دن ترکیب ایدر ؟ جمله فعلیه نك ارکانندن
اولان فعل هانکی فعللردر ؟ فعللر ترکییده زرده بولونور ؟

فاعل — هر فعلک بر فاعلی اولمق لازمدر .
فاعل ، حقيقة و یا حکماً بر فعلی ایشله یینه دیرلر . کون طوغدی .
احمد کلدی کبی که کون ، احمد فاعلدر .
فاعل ، اسم و یا خود اسم حکمنده اولان کله لردن یاییلوب
دائماً فعلدن اول کلیر :

سن ، بزه کله یورسک
او ، بزه کلیر

برادرم سو قاغه کیتدی
احمدك كوله سی کلدی کبی .

فاعل و نائب فاعلاری اکثریتله ضمیر فعلی و ضمیر نسبیله
تشکیل ایدر لرکه بوصورتده بونلر فعلدن سو کره کلیر لر . او قودم .
یازدك ، کلدك . کیدیورسك ، او قیورز جمله لرندە اولدینی کبی .
بعض کره فاعل و نائب فاعلر ضمیر اولدینی حالده ترکیبده
ا ذکر اولونمایه رق مقدر اولور . فعللرک غائب صورتلرندە اولدینی
کبی نته کیم : او قو ، یاز ، کلدی ، کیدیور ، سویله مش دینور که
سن او قو ، سن یاز ، او کلدی ، او کیدیور ، او سویله مش
دیمکدر .

موصوفلری محذوف اولان صفتلر دخی بعضاً فاعل اولور لر :
چالیشان عالم اولور ، چالشیان جاهل قالیر کبی که چالیشان آدم ،
چالشیان آدم تقدیرنده در .

نائب فاعل — جمله ده فاعل ذکر اولونمایارق فاعل
مقامنه قائم اولان مفعول بهدر . بو حالده ادات مفعول حذف
اولونور . اغاج کسلدی کبی بوراده اغاج کله سی نائب فاعلدر .
زیرا جمله نك اصلی (احمد اغاجی کسلدی) ایدی . اغاجی کسن
احمد مطلوب اولمادیغندن حذف اولونارق مفعول اولان اغاجی
لفظندن ادات مفعول طی ایدیلوب فاعل مقامنه کچمش و فعل

دخی مجهول بناسنی آلهرق جمله (اڄ کسلی) صورتندہ ایراد
اولومشدر.

تفسیر

اشاغیدہ کی جملہ لڑک ارکاتی آیریکز . فاعل ونائب فاعلری اشارت
ایدیکز . فاعل لڑک اسم ویا اسم حکمندہ اولان کنایہ لردن هانکیسی
اولدینی دخی بیان ایدیکز .

قیش کتدی . یاز کلدی . هوا اسه یور . سن اوقیورسک .
بن یازاجغم . کتابی بکا ویر . اسکملہ دورلدی . قابو آچلدی .
سس کسلی . یاغ اریدی . قوش اوچاقق . صو آقدی .
اوقویان قازانیر . اوقومایان غائب ایدر .

سؤال — فاعل نیہ دیرلر ؟ فاعل هانکی کلمہ دن یاییلیر وجملہ نک
ترہ سندہ کلیر ؟ صفتلردہ فاعل اولہ بیایورمی ؟ نائب فاعل نیہ درلر ؟

فاعل ونائب فاعلر دخی اکثریتلہ مرکب اولارق کلیر : افندسک
اوشاغی کلدی ، سیاہ آت قوشیور ، نائب محکمہ کلیور ، باغ دلکشا
کورونیور کبی .

متممات جمعہ — متممات جملہ (مفعولار ، حال ، تمیز) دن
عبارتدر .

ترجہ ذہ (مفعول بہ ، مفعول الیہ ، مفعول فیہ ، مفعول لہ ،
مفعول معہ ، مفعول منہ) نامیلہ الی درلو مفعول اولوب بونلردن
« مفعول بہ » صریح ودیکر لرینہ غیر صریح نامی ویریلیز .

مفعول به — فاعلین صادر اولان ایش، کندیشی اوزرینه واقع اولان شیدرکه صرفده بیان اولوندینی اوزره اسم مجردلرک آخرلرینه (ی، بی) علاوه سیه یاییلیر و ترکیده اکثری فاعلین صوکره کلیر. احمد کتابی اوقودی کبی که احمد «فاعل» کتابی «مفعول به» در.

اگر مفعول به معین اولمازسه اول وقت ادات مفعول حذف اولونور. نتم کچن مثالده کتاب لفظی متکلم ایله مخاطب بیننده معلوم اولدیغندن ادات مفعول کتیرلش ایدی. اگر کتاب معلوم دکسه ادات مفعولک ترکیله (احمد کتاب اوقودی) دینور.

مفعولار دخی بعضاً مرکب اولور: بکک قوناغنی کوردیم. کوچک اوی صاتم، رئیس محکمه بی کوردیم، باغچه فرحفرایی سورم کبی. بعضاً جمله دخی اولورکه صله جمله لری بچشده بیان اولوناچقدز.

برکله نك مفعول به اولدیغنی اکلامق ایچون (کیمی، نهی) سؤال لرندن برینی کتیرملی. اگر کله بونلردن برینه جواب اولورسه مفعول به در. والا دکلدر.

تعمین

اشاغیده کی جمله لده بولونان مفعول به لری آیریکنز.

جاهلی کیمسه سومز. کتابی ویر. اغاجی کیم کسیدی.

درسکی اوقو . بویازی بی سنی یازدک . خیلازلانی ترک ایت .
 احمد کتاب اوقودی . حسن قلمی قیردی . کاغدی اوجوردم .
 قلمی حقیه باتیردم . صالح درسنی یتیردی . قرداشم درسنی
 بلله مه یور . کامل یازی یازدی . صو ایچدم .

سؤال — متمامات جمله کیملردر؟ ترکیبده قاج درلو مفعول واردر؟
 بولردن هانکیسی صریح وهانکیلری غیر صریح تسمیه اولونور . مفعول
 به نیه دیرلر؟ ناصل یاییلر؟ مفعول بهلر هر زمان ادات الیرلری؟
 برکله نك مفعول به اولدیغنی ناصل اکلاملی؟

مفعول الیه — ایشك صوکنی اشعار ایدن لفظدرکه
 صرفده بیان اولوندیغنی اوزره اسم مجردلرک آخرینه (ه، یه)
 علاوه سیله یاییلر واکثریا ترکیبده مفعول بهدن صوکره کلیر.
 احمد کتابی خواجهیه ویردی جمله سنده اولدیغنی کبی .
 برکله نك مفعول الیه اولدیغنی اکلامق ایچون و کیمه ،
 نه یه ، سؤاللرندن برینی ایراد ایتلی . اکر بو سؤاللرن برینه
 جواب اولورسه مفعول الیهدر . والا دکلدر .

نمونه

اشاغیده کی جمله لرده بولونان فاعلار الیه مفعول به ومفعول الیهری
 آیریکنز . جمله لرده کی فاعلرک نوع وشخصنیده آروجه بیان ایدیکنز .

کتابی کیمه ویردک؟ خواجه سکا نه سویله دی؟ درسه

نیچون چالماڊك ؟ بو یازی یی کیمه یازدردك ؟ بو کون مکتبه
 کیم ایله کیتدك ؟ قاچ سنه در درسه دوام ایدیورسك ؟ اوده نه
 زمان کیده جکسك ؟ اوقومايه نه وقت باشلاياجقسك ؟ بوسوزی
 سکا کیم سویله دی ؟

تعمیری

اشاغیده کی جمله لرده صفر محلا رینه مناسب مفعول به والیه لر بولوکیز .

... اوقو ، ... چالش ، ... بیوده کچیرمه ، بو ...
 آل ، ... ویر ، ... کوتولک ایتمه ، تربیه لی ... هر کس
 سور ، بو آدم ... نه سویله یور ، یارین کیده جکسك ، ...
 کیده جکم .

سؤال — مفعول الیه نیه دیرلر ؟ مفعول الیه اداتی هانکیلیدر ؟
 مفعول الیه عبارده کیمدن صوکره کلیر ؟ برکلمه نك مفعول الیه اولدیغنی
 ناصل آ کلاملی ؟

مفعول فیہ — فعلک محلی و زمانی یعنی نروده ونه زمان
 وقوع بولدیغنی بیلدیرن لفظدرکه آخرینه برده، ضم وعلاوه .
 سیله یاییلیر : هفته ده قاچ دفعه قلمه کیدیورسك ، اوده کیم
 ایله اوطوردك جمله لرنده اولان هفته ده ، اوده لفظلری کی .

زمان بیان ایدن مفعول فیهلرده اشبو «ده» اداتی دائما

مقدر اولور : بوکون چوق یورولدم ، یارین بروسه یه کیده جکم کبی .

اگر استیعاب واستغراق زمان قصد اولونورسه اول زمان «ده» کتیریلیر : (بو کتابی برکیجه ده یازدم ، اذمیده برکونده کیتدم) دنیلدکده یازمق وکیتتمک فعلی کیجه یی وکوندوزی استیعاب ایتدیکی اکلاشیلیر .

«ده» ظرفیت اداتیدر . ظرف : دروننه برشی وضع اولونان قابه دینیرکه او قاب ، وضع اولونان شیئی [*] استیعاب ایدر . بناءً علیه هر زمان ویا مکانه ظرف تسمیه سی صحیح اولور . بو تقدیرجه ظرف ، بری «ظرف زمان» دیکری «ظرف مکان» اولمق اوزره ایکی قسم اولور .

بر اسمک ظرف اولارق استعمالی ادات ظرفه محتاجدر . ترکیجه ده ادات طرف سالف الذکر «ده» لفظیدرکه دائماً اسمک آخرینه کلوب او اسمک حقیقه ویا حکماً ظرف اولدینی کوسترر . بو صورتده ظرف «حقیقی» و «حکمی» یاخود «مجازی» قسملرینه آیرلش اولور : مکتبده او قودم ، سحر وقتنده اویانیرم کبی که بونلر برر مکان وزمان اولدینی ایچون حقیقه ظرفدر . لکن «علمده باشقه بر شرف واردر» دینیلیرسه علم نه زمان ونه ده مکان اولمادینی ایچون حقیقه ظرف اولمایوب فقط ادات ظرفه مقرون اولدینی منابته حکماً ظرفدر .

[*] وضع اولونان شیئه «مظروف» واستیعاب ایدن قابه «ظرف» وده لفظنه ده «ادات ظرف» دینور .

بعض ظرف زمانك آخرى حركه حرفيه ايله مكسور قیلندقدن
 صوكره (ن) ساكنه كتيريلير : يازين ، قيشين كي . آخرنده حرف
 املا اولان اسملر نوندن اول بر ياي مكسوره آليرلر : اوكله ين كي .
 بعض ظرف زمانلره دخي (اين) لفظي الحاق اولونور : كيجه اين ،
 آقشاملين ، صباحلین كي .

ظرف مكانلر ايله ظرف حكميلرده «ده» لفظنك حذفی
 قطعياً جائز دكلدر . مثلاً : (مكتبده احمد اقلديدن غيری فن
 حسابده ملكه پيدا ایدن يوق) عبارده سنده «ده» لردن هيچ
 برينك حذفی ممكن اولاماز .

ظرف زمانلرده «ده» بعضاً حذف اولونور وبعضاً اثبات اولونور .
 يو حذف واثباتی شيوه لسان تعيين ايدر . مثلاً : «بو كون كدرم وار»
 دينيله جك يرده «بو كونده كدرم وار» دينيله منر . بوراده بهمه حال
 حذف لازمدر . فقط «بويله بر كونده فرصتي الدن قاچيرمايه كلز»
 عبارده سنده «ده» نك حذفی جائز اولمايوب اثباتی شيوه لسانه دها
 موافق دوشر .

«ده» لفظي تركجه مصدرلره لاحق اولديني زمان ظرفيت
 بيان ايتديكي كي استمرار دخي افاده ايدر . او قومقده ، يازمقده
 فضيلت چوقدر ، سيل وش كچمكددر ، عمر عزيزم واه! واه
 كي .

ادات مذكور صله ماضيلرله ماضی شهودينك جمع
 متكلملرينه لاحق اولورسه منحصرأ ظرفيت افاده ايدر :
 «اولدقده - اولديغنده» ، «كلدكده - كلديكنده» كي كه اولديني
 وقتده ، كلديكي وقتده ديمك اولور .

عربیـده «ده» مقامنده (فی) قوللانیلیر . فی ایله اولان
عربی ظرفلر لسان عثمانیده مستعمل ایسهده انلرده بر درجه به
قدر معدود در : فی الحقیقه، فی الواقع، فی الحال، فی الجملة،
فی الاصل، فی الاول، فیما بعد کبی .

فارسیده بو مقامده «اندر» ایله بونک مخفی اولان «در»
لفظی قوللانیلیر .

«فی» لفظی یالکیز الفاظ عربیـه نک اولنه کله بیلیر فقط
«در» ایله «اندر» هم فارسی وهم عربی الفاظک اولنه داخل
اولارق لسان عثمانیده استعمال اولونور : در عقب، در کنار،
دردست، در خاطر، در عهده، در پیش، در میان، خیال اندر
خیال کبی .

اشبو ادات ترکیه الفاظه داخل اولامایاجقندن (قات اندر قات) کبی
تعبیراتک محض خطا اولدیغی بیان و اشعاره لزوم کوريله من .

نمونه

آشاغی جمله لرده کی مفعول فہلری کوستریکیز .

دون نرہده ایدک . مکتبده ایدم . سنی مکتبده کورہدم .
درسمی او قویوب کیتمش ایدم . کونده قاچ درس آلیورسک .
صبح و اخشام ایکی درس آلیورم . مکتبده کیم ایله چالیشیور .
سک . قرداشم ایله چالیشیورم . بو یازی نی نرہده یازدک . اوده
یازدم .

تعمیریں دیکھو

آشاغیدہ کی جملہ لڑدہ صفر محلہ رینہ مناسب مفعول فہلر بولو کر .

خواجہ سکا . . . نہ سویلہ دی ، . . . اوصلو کز مہ می
سویلہ دی ، . . . اوطوریورسک ، . . . اوطوریورم ، . . .
مکتبہ کیدہ جکمیسک ، اوت ! کیدہ جکم لکن . . . اذن آلا جغم ؛
نہ ایشک وار ، . . . کتابم وار آنی آلا جغم ، . . . نیچون
آلما دک ، دہا یا پاماش ایدی .

سؤال — مفعول فیہ نیہ دہرلر ؟ مفعول فیہک آخرینہ نہ
علاوہ ایدی لیر ؟ اشبو علاوہ اولونان اداتک حذف اولوندینی یر وار میدر ؟

مفعول نہ — فعلک سبب و علتی بیسلیدرن لفظدر کہ
آخرینہ «ایچون» علاوہ سیلہ یاییلیر : بو کتابی چوجقلر ایچون
یازدم جملہ سندہ کی «چوجقلر ایچون» کی .

اشبو «ایچون» ادات تعلیلدر دائماً علتہ لاحق اولور . فقط بمضاً
نسبت و تخصیص دخی بیان ایتدیکندن بونلر بیننی فرق ایتلیدر . مثلاً
«باغبان برکل ایچون بیک خارہ خدمتکار اولور» مصراعندہ تعلیل اداتی
اولدینی کی «بو البسہ سزک ایچوندرد» و «دون سزک ایچون چوق سوز
اولدی» عبارہ لرنده دخی نسبت و تخصیص ایچون اولور .

اگر «ایچون» یرینہ «طولانی» لفظی تقدیر اولوناییلیرسہ تعلیل اداتی
واگر «کورہ» لفظی تقدیر ایدیله یاییلیرسہ نسبت و تخصیص اداتی اولدینی
آشکار اولور .

ایچون لفظنک الف ویاسی بمضاً حذف اولونوب «چون»

صورتندہ تخفیف اولونابیلیر . بوده یا آخرندہ حروف املا دن
«ی» اولان کلماته لحوقندہ ویا آخرندہ حروف مد و حروف
املا دن ماعدا حرف بولونان الفاظه لحوقندہ اولابیلیر که اشبو
ایکذبی صورت نظمه و اضافت حاله مخصوصدر :

« احمد قباحتی اولدیغیچون سکوت ایدیور ، عباره سیله
« بربر یله چکیشیر کرد رهکیچون مزملر ، مصراعنده اولدینی کی .
آخرندہ «ی» دن ماعدا حروف مد و املا ایله هاء رسمیه
بولونان کلماته «ایچون» لاحق اولورسه تخفیفی اصلا جائز دکلدرد .
مثلا «کدا ، صدا ، صویا ، صو ، دره» لفظرینه لاحق اولاجق
ایچونک تخفیفی جائز دکلدرد .

«نه» لفظنه ایچون لاحق اولورسه (نیچون) شکلنده
تخفیف اولونور .

«نیچون» مقامنده بعضاً (نیه) لفظی قوللانیلیر : (بورایه
نیه کلدک) دینیلیر که نه ایچون کلدک دیمک اولور .

عربی الفاظک اولنه دخی ایچون معناسنه اولان لام
مکسوره داخل اولارق لسان عثمانیده قوللانیلیر :
لحکمة ، لغرض ، لسبب ، لمصلحة کی .

بو لام مکسوره نادرأ عربی اولان (اجل) لفظیله برلکده
قوللانیلیر :

لاجل المصلحه کی که مصلحت ایچون دیمک اولور .

مصادر عربیه نیک آخری منسوب اوقونارن شیوه لسان عرب اوزره

مفعول به یا ییلوب لسان عثمانیده استعمال اولونور : احمده رغماً کیتدم ،
 حسنی تأدیبا آزارلادم . تهدیداً صالحی دوکدم کبی که بوجهلرده «رغم»
 کیمیه ، «تأدیبه» آزارلامایه ، «تهدید» دوکمه سبب و علتدر .
 شیوه لسان فارسی اوزره اولان مفعول لده لسان عثمانیده
 قوللانلمقده ایسه ده بونک استعمالی کوندن کونه ازالماقده در .
 فارسی ادات تعلیلی اولان «برای» لفظی عربی و فارسی الفاظک
 اوللرینه داخل اولارق مفعولله یایلیر : بورایه برای مصلحت
 کلدیم ، بو کتابی برای خاطر سزه ورییورم ، کبی .

مفعول معه — فعلک کیم ایله ویا نه ایله اجرا اولوندیغی
 بیلدیرن لفظدرکه آخرینه «ایله» علاوه سیله یایلیر : قلم ایله
 یازدم ، احمد اقدی ایله کزدم جمله لرنده کی «قلم ایله» «احمد
 اقدی ایله» مفعوللری کبی .

اشبو «ایله» مقارنت یا خود مصاحبت ، استعانه معنارینی
 افاده ایدر .

اگر ایکی شیئی بربرینه مقارن کوستررسه مقارنت ایچون
 اولور .

آلیت و وساطت معناسی مشعر اولورسه یعنی بر شیئی
 دیگر شیئی واسطه کوستررسه استعانه اداتی اولور کچن مثاللرده
 اولدینی کبی .

ایله اداتی بعضاً تخفیفاً «له» صورتنده قوللانیلیر : پدرله ، قلمله کبی .
 اشبو تخفیفک موقعی تعیین ایچون «ایله» نک لاحق اولاجنی کلمه نک
 آخرینه دقت ایتمک لازم کلیر . شویله که : کلمه نک آخرنده حروف مد

و (ی) دن باشقه حروف املا بولونورسه «ایله» مخفیف اولوناماز: صوبا ایله. قویو ایله، پنجره ایله، صفا ایله، آرزو ایله، اشنا ایله کبی . اکر کلمه نك آخرنده حروف مد ویا حروف املا دن (ی) بولو. نورسه اشبو ادات ایکی صورتله لاحق اولورسه ده لکن «ایله» الحاق. ترجیح اولونور: (قاضیله - قاضی ایله)، (مفتیله - مفتی ایله)، (شادیله شادی ایله)، (افندیله - افندی ایله) کبی .

«و» ویا «سی» الحاقیله یاییلان ترکیجه مضافلره «له» الحاقی. ترجیح اولونور. مثلاً: (قلمی ایله - حقه سی ایله) دینلمک ممکن ایسه ده قلمیله، حقه سیله دینلمک اولادر. كذلك «پدری» ایله «دینلمک» ممکن ایسه ده پدریله دیمک اولی اولور . ایکی ساکن ایله نهایت بولان کلماته «ایله» لاحق اولور: قهر ایله، درد ایله کبی .

برساکن ایله بیتن کلملره (ایله. له) دن هرایکیسیده لاحق اولاییلر: (غیرت ایله - غیرتله)، (ستایش ایله - ستایشله)، (پدر ایله - پدرله) کبی .

اشبو ادات. مقارنت معناسنه کلدیکی وقت بعضاً تا کید. ایچون فارسی اولان (برابر) لفظی علاوه ایدیلیر: ذکی افندی. ایله برابر اوقیورز کبی .

(ایله)، «ایله» صورتنده ده تخفیف اولوناییلیرسه ده بوسورت. صوك حرکه سی فتحه اولان کلمه یه لحوقنده اولور و استعمالیده. نظمه مخصوصدر .

عربیده «ایله» مقامنده باء مکسوره ایله «مع» لفظی قوللا-

نیلیر . بونلر یالکنز لفظ عربیہ لاحق اولارق لسان عثمانیدہ استعمال اولونور : بالفرض ، بالجمله ، بالذات ، بالخاصہ ، بالصحة ، بالسلامہ ، بالطبع ، بعینہ ، بالعکس ، بالمقابلہ ، بالمناصبہ ، بالوجوه ، بالوکالہ - مع هذا ، مع ذلك ، مع مافیہ ، مع الممنونیه ، مع الحجاب ، مع زیادہ . . . الخ کبی .

فارسیدہ «ایله» مقامندہ «باء» لفظی قوللانیلیر . بو «باء» هم فارسی وهم عربی الفاظہ داخل اولوب ترکیبہ داخل اولاماز : یاسند ، بامقاولہ ، باتقریر ، باخصوص ، بامضبطہ ، بامذکرہ . . . الخ کبی .

مفعول منہ - فعلک باشلانغجنی ییلدیرن لفظدرکه آخرینہ «دن» الحاقیلہ یاسیلیر : ادرنہ دن کلدن جمله سنده کی « ادرنہ دن » مفعولی کبی .

الفاظ عربیہ نک اوللرینه (من ، عن) علاوہ سیلہ یاییلان عربی مفعوللری دخی لسان عثمانیدہ بومقامدہ استعمال اولونور : من القديم ، من الازل ، من بعد ، من عندہ ، من غیر حد ، من طرفہ - عن قریب ، عن صمیم ، عن جهل . . . الخ کبی .

فارسیدہ بومقامدہ « از » لفظی قوللانیلیر . بولفظ ، عربی وفارسی کلماتک اوللرینه علاوہ اولونارق نادراً لسان عثمانیدہ استعمال اولونور : ازل و جان ، ازهر جهت ، از جمله . . . کبی .

[اخطار] - (ادات فارسیہ ترکیبہ الفاظہ داخل اولامایاجنی

جهتله (غیر از یوزده بش) کبی تعبیرات استعمالندن اجتناب اولونمالیدر .

مذکور ادااتلر معانی کثیره افاده ایدرلر . معانی مذکورہ ادوات بمحسوسہ آیروجه بیان اولوناچغندن بوراده ذکرندن صرف نظر ایدلدی .

مفاعیل مذکورہ دن باشقه برده « مفعول مطلق » واردرکه تأکید فعل ایچون کندی معناسنده اولان مصدر نوعیدن بری اوفعله مفعول اولور . وداثما فعلدن اول کلوب ارالر ی باشقه برکله ایله فصل اولونماز : یاغمور بریاغش یاغدی که طالمه حیات ویردی ، سالم بر یازش یازدی که هرکس بکندی عبارہ لرنده کی یاغش ، یازش مفعوللری کبی .

نمونه

آشاغیده کی جله لرده بولونان مفعوللرک مفعولله و معه ایله مفعول منه اولانلرینی اشارت ایدیکز .

نه ایچون مکتبه کلیورسک؟ اوقومق ایچون مکتبه کلیورم .
نه ایچون درسکی اوقومايورسک؟ کتابمی اوده اونوتدیغم ایچون اوقومايورم . یازیکی نه ایچون یازمايورسک؟ قلمم اولمادیغیچون یازمايورم . انسان یاشامق ایچون یر ، علم و عبادت ایچون یاشار .
نه ایچون بروسه یه کیتدک؟ تبدیل آب و هوا ایچون بروسه یه کیندم . بوکتانی کیمسه یه ویرمه دم . سنزه خاطر ایچون ویریورم . هر ایش سعی و غیرتله بیتر . لقردی ایله ایش بیتمز .
طالمه عبرتله باق . ایولر ایله کوروشن عزیز ، کوتولر ایله کوروشن

رذیل اولور . انی ارقداش ایله یوله چیقانه بغداد یاقین اولور .
 قورد ایله قویون قلیج ایله اویون بریرده اولماز . بو صباح
 اودن اوچده چیقدم . استانبولدن ادرنهیه برکونده کیتدم .

سؤال — مفعول له نیه دیرلر؟ مفعول لملرک آخربنه نه کتیریلیر؟
 مفعول معه نیه دیرلر؟ مفعول معهک آخربنه نه کتیریلیر؟ مفعول منه نیه دیرلر؟
 مفعول منهک آخربنه نه کتیریلیر؟



{ حال }

مال — فعلک اجراسی ائنده فاعلک ویا مفعولک نه حال
 وهیئتده بولوندیغنی بیلدیردن لفظدرکه حال وهیئتی بیلدیردیکی
 فاعله ویا مفعوله « ذی الحال » دینور .
 ترکجهده حال خدمتی صرفده ذکر کیچن « حال ترکیبی »
 صیغه لری و فعل تمیندن ماعدا بعض فعللرک غائب صیغه لریله
 اسملره الحاق ایدیلن (ایکن) لفظی کورور : احمد کوله رک
 کلدی ، اوینایه رق کیتدی — احمدی قاچار ایکن کوردم .
 جمله لرنده کی کوله رک ، اوینایارق ، قاچار ایکن کله لری کی .
 بعض کره حالده تجدد واستمرار قصد اولوندیغنی تقدیرده
 فعل التزامیلرک مفرد غائبلرینک تکرر و برلشمه سیله حال یاییلر .
 کوله کوله بایلدی . آغلایا آغلایا سویله دی . قوشه قوشه
 کیتدی کی .

ترجہ حال واقع اولاجق کلمہ اگر عربی و یا ترجمہ صفت
 اولورسہ اندن صوکرہ (اولارق، اولمایارق) لفظی کتیریلیر :
 بن راکب اولارق کلام، بورتبہ یہ طالب اولمایارق نائل اولدم،
 زنکین اولارق کلدی، زکورت اولارق کیتدی کبی . بعضاً
 «اولارق» لفظی حذف اولونور : خالد محزون کلدی، ممنون
 کیتدی کبی .

بورایہ قدر بیان اولونان اسلوب ترکیدر .

اسلوب عربی حال دخی لسان عثمانیدہ مستعملدر . شویله که
 حال اولاجق صفتک آخری منصوب و ممنون اولور : بن ماشیا
 کلام، راکباً کیتدم کبی .

بعضاً حال اسم صریح اولور . فقط صفتله مؤول اولور : بن انکله
 شفاهاً سویلشدم کبی که مشافهاً دیمکدر . بن انکله الاله کیتدم کبی که
 الله انک الی طوتارق کیتدم تاویلندہ در .

صله صیغہ لر ندن صوکرہ (حالدہ - تقدیرده) کلمہ لرینک علاوه سیله
 حال یابیلیر : بن اکا نصیحت ابتدیکم خالدہ اودرسنی بلله میور ، قله دوام
 ابتدیکک خالدہ فیضیاب اولورسک کبی .

نمونه

آشاغیدہ کی جملہ لردہ بولونان حالری آیریکز . صورت تشکیلی
 بیان ایدیکز، ذی الحالرخ یعنی فاعل و یا مفعولدن هانکیسنک حال و هیئت
 بیلدر دیکنی سویلے ییکز .

کمال افندی کوله رک کلدی، آغلایارق کیتدی . قوشی اوچار

ایکن اوردم . احمد افندی یوریه رک مکتبه کلدی . حسین
 افندی قوشه رق کیتدیکنی کوردم . قوشار ایکن دوشدی دوشر
 ایکن طوتم . بن درسه چالیشیر ایکن او ، اویناوردی . آغاج
 یاش ایکن اکیلیر . انسان کوچک ایکن علم و ادب او کره نیر .
 فواد افندی کوله کوله بوکتابی بکا ویردی . دوشه قالقا کلدی .
 کوله اوینا یا کتدی . مکتبه کیدرایکن خواجه یه راست کلدم .
 چو جقلقده بن مکتبه کوله رک کیدر و دردمی سوینه رک ازبر
 ایدر ایدرم .

سوال — حال نیه دیرلر ؟ ذی الحال کیمه دینور ؟ حال کیلردن
 یاییلیر ؟ فملردن قاج صورته حال یاییلیر ؟

{ تمیز }

ترکیده مهم اولان بر شیک ابهامنی کیده ره رک بر حکمک
 جهتی بیان ایله بن اسمه تمیز دینور .

لسان عثمانیده تمیز دخی عربی و ترکی اسلوبلری اوزه در .
 اسلوب ترکی اوزره تمیز تشکیل اتمک ایچون مصدر لرله
 اسملرک آخرینه جه ، اداتی کتیریلیر . احمد افندی محمد افندی
 یاشجه کوچک ، اما قلعجه بیوکدر . سایه شاهانه ده ملکمز
 علوم و فنونجه خیلی ایلروله دی . احمد افندی ذکاوتجه ارقداش لرینه

فائقدر . جمله لرنده کی یاشـجه ، عقلجه ، علوجه ، فنونجه ،
ذکاوتجه کله لری کبی .

«جه» اداتک اسمله لاحق اوله رق ادات نسبتده اولدینی
صرفده بیان ایدلمش ایدی . بونی ادات تمیز اولان (جه) دن
فرق ایتک ایچون (جهتیه) لفظنه تبدیل ایتلی معنی صحیح
اولورسه ادات تمیزدر .

مثلاً : احمد افندی درایتجه اقرانته فائقدر ، جمله سنده کی
(جه) اداتی «جهتیه» لفظنه تبدیل اولونارق (احمد افندی
درایت جهتیه اقرانته فائقدر) دینلسه معنایه خال کله یه جکندن
ادات تمیز اولدینی آکلاشیلور .

فقط «احمد افندی ای عربجه بیلیر ، جمله سنده کی (جه)
اداتی جهتیه لفظنه اولوندقده (احمد افندی ای عرب جهتیه بیلیر)
حالنه کیره رک بر معنی افاده ایتهدیکندن ادات نسبت اولدینی
آکلاشیلیر .

عربی اسملر و مصدرلر منصوب و منون اولارق تمیز واقع
اولورلر : احمد ، صاحب دن سنأ بیوکدر ، سن بدن رتبه
کوچکسک ، کمال تحریر آ پک کوزل افاده مرام ایدیور کبی .

[فائده] (منصوب و منون اولان کلمات عربیه ترکیبده حال
اولدینی کبی بعضاً مفعول لاجله و بعضاً تمیز بعضاً دخی ظرف واقع اولدینی
بورایه قدر ویریلان ایضا حاتدن آکلاشلمش ایسه ده اسماً عربیه تک ترکیبده
نه واقع اولدینی اصول آتیه ایله تعیین ایتلی . شویله که : اولا اسمیه باقمالی
اواسم صفتیمدر دکلیدر . اگر صفت ایسه حال واقع اولور . صفت دکلسه

یا مصدر در یا خود مصدرک غیریدر اگر مصدر ایسه نهایتنده « ایچون »
تقدیر اولونورسه (مفعول لاجله) ، « ده » تقدیر اولونورسه (ظرف) ،
« جه » تقدیر اولونا بیلیرسه (تمیز) اولدیغنه حکم ایدیلیر .

نمونه

آشاغیده کی جمله لرده تمیزلری آیریکنز ، تمیزلرک مصدر و یا اسمدن
یابیلدیغنی سویله ییکنز .

حسن افندی اخلاقچه اقراننه ترجیح اولونور . صالح افندی
ای صربجه بیلیر . قرنداشم یاشـجه بندن بیوکدر اما عقلجه
کوچکدر . سن فرانسیزجه یه چالیشماپورسک . آصف رقعہ
یازیسنی کوزجه یازیور اما قرائت درسنی ایوجه او قومایور .

سؤال — تمیز نیه دیرلر ؟ ادات تمیز ندر ؟ ادات تمیز کیملر
لاحق اولور ؟ ادات تمیزی ادات نسبتدن ناصل فرق ایتملی .

{ جملهٔ اصلیه — فرعیه }

ترکیب تام بحثنده ذکر اولونان جمله لر کیفیت جهتیه دخی
ایکی قسمه آریلوب برینه (جملهٔ اصلیه) و دیگرینه (جملهٔ فرعیه)
دینور .



{ جملهٔ اصلیه }

مرام و مقصودی شامل اولان جمله در که (ابتدائی، جزائی)
نامیده ایکی قسمه آیریلیر.

(جملهٔ ابتدائی) — نه لفظجه ونده معناه اوست طرفه
ارتباطی اولمایان جمله در که بونلر دائماً کلامک اولنده بولونور:
علم بر جوهر در که بونی حقیقه تقدیر ایده جک بر مقیاس صحیح
یوقدر دینسه سزادر. فقره سنده کی «علم جوهر در» جمله سی کی.

(جملهٔ جزائی) — مضموننک وقوعی دیگر بر جمله نک
مضموننک وقوعه مشروط اولان جمله در که مشروط اولدینی
جمله یه ده «جملهٔ شرطیه» دینور: سعی ایدر ایسه ک مرامک نائل
اولورسک کی که بوراده (سعی ایدر ایسه ک) جمله سی شرطیه
و (مرامک نائل اولورسک) جمله سیده جزائییه اولوب مرامه
نائلیت ایچون سعی، شرط قیلنمشدر.

جملهٔ جزائییه لر، شرطیه لرك آردی صره ایراد اولونور
و جملهٔ شرطیه نک شرطی ایسه کندیسنده ادات شرط بولونمقدور.
ادات شرط صرفده بیان اولوندی.

{ جملهٔ فرعیہ }

جملهٔ اصلیہ نك ویا ارکان و اجزاسندن برینك معناسنی
تقسید و ايقاع ایدن جمله لر اولوب بوده ذكر اولونان جملهٔ
شرطیه ایله برابر [وصفیہ، استینافیہ، تفصیلیہ، تمثیلیہ، معترضه]
نامیلہ الی قسمہ آریلیر و دائماً ادوات رابطہ ایله جملهٔ اصلیہ یه
مربوط بولونور .

سؤال — جملهٔ اصلیہ یی تعریف ایدیکنز . جملهٔ فرعیہ نیه دیرلر؟
جملهٔ اصلیہ قاجدر؟ جملهٔ ابتدائیہ و جزائیہ نیه دیرلر؟ جملهٔ فرعیہ
قاجدر واسملری ندر؟

جملهٔ وصفیه — جملهٔ اصلیہ نك ارکان و اجزاسندن برینك
معناسنی توصیف ایدن جمله دركه صفت مقامنده قوللانیلور: بر
کیمسه که ظاهر و باطنی لباس شریعتله ترین ایدر ایکی جهانده
عزیز اولور کبی که اشبو کلام (ظاهر و باطنی لباس شریعتله
ترین ایدن آدم ایکی جهانده عزیز اولور) تقدیرنده اولدیغندن
جملهٔ اولی صفت مقامنده کله رك جملهٔ وصفیه اولوب فاعلی
توصیف ایتیش اولور. جملهٔ ثانیده «اصلیه» در.

(جملهٔ استینافیہ) — کچن جمله دن تولد ایدن سؤال مقدره یه
جواب اولان جمله در . (حضرت پیغمبر بیوررکه : بشیکن
مزاره قدر علم اراییکز)، (علم و هنری و ادب و حیاسی اولمایان

آدم هرکس غندنده ذلیل اولور زیرا انسانک شرفی علم و هنر و ادب و حیا ایله در. برنجی فقره ده (پیغمبر بیوررکه) جمله سینه نه بیورر، سوآلی وارد اولدیغندن جمله تانیه اولان (بشیکدن الخ) جمله سی و ایکنجی فقره دخی «ندن ذلیل اولور، سوآله (زیرا انسانک الخ) جمله سی استدلال مقامنده جواباً کتیرلشدر.

(جمله تفصیل) — جمله اصلیه نک ارکان و اجزاسندن برینک معناسنی تفصیل ایدن جمله در. ارضک درجه حرارتی هریرده بر دکدر. نتکم خط استوایه طوغری کیدلجکه حرارتک زیاده لشدیکی و اوزاقلاشدقچه آزالدیغی کوریلور کبی.

(جمله تمثیل) — جمله اصلیه نک ارکان و اجزاسندن برینک معناسنی تمثیل و تشبیه طریقله ایضاح ایدن جمله در: انسانلر عقل و تدبیر، مالک اولدقلرندن پک بیوک ایشلرک عهدده سندن کله بیلیر. مثلاً بر آیلق مسافه یی ایجاد ایتدکلری شمندوفرله بش کونده قطع ایدرلر. و اوج آیلق یردن تلغرافله یکرمی دقیقه ده خبر آلیرلر.

(جمله معترضه) — بر جمله نک اجزاسی یننده ویا ایکی جمله اراسنده کلان جمله درکه اگر طی ایدیلیرسه مذکور جزؤلرک و جمله لرک ارتباطنه خلل کلز: ایکنجی سلطان محمد - فاتح

عنوان جلیلی حائز در - یکر می ایکی یا شنده تخت سلطنته جلوس
ایتدی. فقره سنده اولدینی کی.

جمله معترضه لر یا بویله (ایکی قوس و یا شو وجهله
- ایکی خط افقی ارا سنده کو ستریلیر .

{ جمله مطلقه - جمله مقیده }

جمله لر معنی جهتیه دخی ایکی قسمدر. برینه «جمله مطلقه»
دیگرینه «جمله مقیده» دینور.

(جمله مطلقه) — یالکزارکان اصلیه سیله مرام و مقصودی
افاده ایدن جمله در: طاش قاتیدر. سن عالمسک. احمد کلدی کی.
(جمله مقیده) — ارکان اصلیه بر طاقم قیدلر [۱] علاوه -
سیله مقصودی افاده ایدن جمله در. دکزک صوبی طوزایدیر.
کتابی احمددن آلدیم کی.

سؤال — جمله لر کیفیت اعتباریه قاج قسمدر؟ جمله اصلیه دن اولان
ابتدائییه و جزائییه ناصل جمله لر در؟ جمله شرطیه ناصل جمله در؟ جمله
فرعیه نیه دیرلر؟ جمله وصفیه، استینافییه، تفصیلیه، تمثیلیه و معترضه یی
بیان ایدیکز.



[۱] متممات جمله ایله قیود اضافیه، وصفیه، کیه، ظرفیه کی
قیوداندیر.

{صله جمله لری}

قسم اولده ذکرى کچن صله صیغه لرینک زمانه دالالتلری واردر. اکر آلدق لری فعل، ماضی ایسه زمان ماضییه واکر مضارع ایسه زمان استقباله دالات ایدر لر. بونلره صیغه صله دنیللمسی اسم موصول ایله برلکده اولارق صله نك افاده ایتدیکی معنایی تضمن ایتدکاری ایچوندور. بو میاندن صیغه صله، اسم موصول، صله نك دخی براز بیاننه لزوم واردر :

صیغه صله ایله اسم موصول قسم اولده بیان اولوندی . اسم موصوللر برر اسم مبهم اولدقلرندن بونلرک ایهاملرینی دفع وازاله ایچون برر جمله جمله خبریه کتیریلرک «که» رابطه سیله کندیلرینه وصل اولونورکه ایشته بو جمله خبریه (صله) جمله سی تعبیر اولونور. مثلاً (شول مکتوب که احمد بکا کوندردی بوکون کلدی) عباره سنده : شول مکتوب اسم موصولی مخاطبه قارشو مبهم قالارق هانکی مکتوب دیه استیضاحه مجبوریت حاصل اولاجندن اشبو ایهامی دفع ایچون «احمد بکا کوندردی» جمله سی کتیرلش و «که» رابطه سیله اسم موصوله وصل اولونمشدرکه ایشته بو جمله خبریه (صله جمله سی) دیه جکیز . لکن بو سوز براز اوزونجه دوشدیکندن لسان عنانیده بونی منتظم برشکله قویق ایچون براز قیصه الدارق «احمد بکا کوندردیکی مکتوب بوکون کلدی» طرزنده افاده ایدر لر.

مثال مذکورہ دقتله نظر اولوندینی حالده کورولیورکه ،
اسم موصول رابطہ ایله برابکده حذف اولونارق کوندردی
فعلی صیغہ صله یایلوب احمدہ مضاف قیلنمش و مضاف الیه
اولان احمدہ کاف اضافت کتیرلشدرد . اما شول کتابی که احمد
آلدی ، بو کون کتیردی موصول وصله سی « احمد آلدینی
کتابی بو کون کتیردی » طرزنده افاده اولونوب « احمدک
آلدینی کتابی بو کون کتیردی » بولنده افاده اولوناماز .

اشبو ایکی مثالده کوندردیکی ، آلدینی صیغہ وصله در اما
برنجی مثالده « کوندردیکی » صیغہ وصله سی ماقبلنده اولان احمد
اسمه مضاف اولدیغندن اسم مذکورک آخرینه کاف اضافت
لاحق اولمش وایکنجی مثالده « آلدینی » صیغہ وصله سی مضاف
اولمادینی ایچون اولتنده کی اسمه کاف اضافت لاحق اولمامشدر .
امثله مذکورده دن مستبان اولاجنی اوزره هر نه زمان
صیغہ صله ایله ماقبلنده کی اسم ییننده معنی جهتدن اضافت
صحیح و مقصود اولورسه او کی ترکیبه کاف اضافت کتیرمک
جائز اولوب عکسی تقدیرده جائز اولاماز .

صیغہ صله ایله اوست طرفنده کی اسم ییننده اضافتک
هانکی محللرده صحیح اولوب اولمادینی بروجہ آتی بیان اولو-
نور . شویله که :

صله صیغه لری فعلیتده اصیل دکلدرلر : بوکا بنشاء بونلر
اسم کی بعضاً مبتدا و بعضاً مفعول اولورلر . اما بو صورتده

بر شیئه مضاف اولملری اقتضا ایدر . چونکه : صله
 صیغه لرنده ایهام بولوندیغندن بونلر سائر اسما و صفات کی
 مبتدا اولمده مستقل دکلدرلر : حسنک سویله دیکی
 مشکو کدر . صالحک بکندیکی بودر . کی که بو مثاللرده
 (سویله دیکی) ، (بکندیکی) برر مبتدا اولوب (مشکو کدر ،
 بودر) لفظلریده بونلرک مسندلری بولوندیغندن مذکور صله
 صیغه لری اوست طرفلرنده کی حسن و صالح اسملرینه مضاف
 اولملر و او اسملرده آخرلرینه مضاف الیه کافی المشر درر .
 بعضلرک ذهابنه کوره بونلر « سویله مسی » ، بکنمه سی ، لفظلریله
 مؤول دکلدر زیرا : بوراده متکلم حسنک و صالحک کچمشته
 وقوعه کان سویله مسنی و بکنمه سی خبر ویریور . حالبوکه
 (سویله مسی ، بکنمه سی) برر مصدر اولدقلرندن زمانه دلالت
 ایتمزلر .

کذا مفعول اولدقلری زمان ینه مضاف اولارق کلوب
 اوست طرفلرنده کی اسملر مضاف الیه اولورلر : طاهرک
 کیتدیکنی کوردیم . محمدک سویله دیکنه اینانما کی .

صیغه صله براسمه مضاف اولملارق بر فعله مفعول اولورسه
 کاف اضافت ایراد ایدلمز : احمد افندی آلدیغی ویرر کی .
 صیغه صله مفعول اولمایوب فقط مفعوله مقرون اولورسه
 حال ینه بویله درر . بو صورتده او مفعول هم صیغه صله نک و همده باشقه
 بر فعلک مفعولی اولور : ذکی افندی آلدیغی شیئی ویرر کی .

کذلك صیغه صله مضاف اولمقسمین ترکیب حالی به جزء
واقع اولورسه ینه کاف اضافت ایراد ایدلمز : حسین اقدی
زا کب اولدینی حالده کلدی کبی .

صیغه صله لردن صوکره بعض کره (کیجه، کوندوز، زمان،
وقت) کبی ظروف زمانیه دن بری کلیر اول وقت بونلره . صیغه
توقیتیه، دینلمسی انسب اولور : قیش کلدیکی وقت هوا صوئوق
اولور کبی .

بعضاً دخی بو صیغه لره (ایچون-دن) لفظی لاحق اولارق
صیغه تعلیلیه تعبیری مناسب اولور . بو صورتده ادات اضافتک
ترکی لازمدر : بن بورایه صالح اقدی کلدیکی ایچون کلدیم،
صالح اقدی کانب اولدینی ایچون محترمدر، هوا صوئوق اولدیغندن
کورک کییورم کبی .

صیغه صله نك مفعول الیه حاله (بناء - نظراً - مبنی)
لفظلری لاحق اولورسه تعلیل ایچون اولور : میز اقدی
معلول اولدیغنه بناء استعفا ایتدی کبی .

اسم فاعل واسم مفعول صیغه لری دخی اکثریتیه صیغه
صله مقامنده استعمال اولونور . مثلاً : (شول چوجق که بورایه
کلدی تکدیر ایله دم) عبارته سی اسلوب عثمانی اوزره صله جمله سی
حالیه قویاجق اولسه ق (بورایه کلن چوجنی تکدیر ایله دم)
دینیلوب (بورایه کلدیکی چوجنی تکدیر ایله دم) دینیله من .
قیریلان آرابه نی تعمیر ایله دم جمله سیده بو قیلندر .

{ مقاله — فقره }

بر ماده‌ی اطرافیه مخاطبه آکلاتمق ایچون ایراد ایدیلان
عباریه «مقاله» دینور. مقاله بر برینه متعلق بر طاقم فقره لردن
ترکیب ایدیلیر.

فقره — مرام و مقصدی تمامیه افاده ایدن عبارتیه.
دیرلرکه بوده بر ویا بردن زیاده جمله دن مرکب اولدیغنه کوره.
«بسیط، مرکب» نامیه ایکی قسمه آیریلیر.

{ فقره بسیطه }

قیود و متمماتیه برابر بر جمله‌ی شامل اولوب دکله‌ینه.
فائده تامه ویرن سوزدر: علم و معرفت، صاحبی هر یرده.
عزیز و معتبر قیلارکی.

{ فقره مرکبه }

یکدیگر لرینه مربوط اولمق شرطیه ایکی ویا ده‌ها زیاده.
جمله‌ی حاوی اولان عبارتیه درکه مذکور جمله لردن بری «اصلیه»
دیگری «فرعیه» قیلندن اولور. مثال: (انسانک سائر حیوانلردن
فرقی آنجق اوقویوب یازمقله اولدیغندن هر کس اوقویوب.

یازمغه چالیشه رق کندینی سائر حیوانلردن تفریقہ چالشمالیدر)
کبی کہ مذکور مثال ایکی جملہ لی بر فقرہ مرکبہ در . برنجی
جملہ علت مقامندہ اولدیغندن « فرعیہ » وایکنجی جملہ دخی
« اصلیه » قبیلندن اولمش اولور .

بر مقاله ده بولونان فقره لر ایله فقرہ مرکبہ لرده ایراد
ایدیلن جملہ لر اکثریا بربرینه ربط اولونور .

ربط — ایکی ویا زیاده جملہ و فقره لر ی بربرینه باغلایارق
بر لقردی هیئتنه قویمقدر .

کلمات ربطیه — فقره لرک اخرلرینه کلوب انلرک عاطفه [*]
ورابطه ایله بربرینه ربط اولونمسنه واسطه اولان کلمه لر در که
بولنر « مربوط » ویا « فاصله » دینیر .

رابطه — ایکی ودها زیاده [*] فاصله ویا مربوطی بربرینه
باغلایان کلمه در .

مثال: (او قویوب یازمق انسانک سعادتنه سبب اولدینی
و علم و ادب او کرمک هرکسه فرض عین بولوندینی جهتله وقت
غزیزی بویولده کچیرمک لازمدر) کبی . مثال مذکور اوج
جملہ لی بر فقره اولوب اشبو فقره ده « اولدینی » « بولوندینی »
مربوط ویا فاصله و « جهتله » رابطه در .

[*] ترکجه ده عاطفه (واو مفتوحه) ایله ده، دخی کبی لفظلردر .

[**] فاصله لر اوچدن زیاده اوله رق بربرینی تعقیب اتمه ملیدر .

مثال: (احمد افندی دون اخشام بورایه گلش و صباحلین ایرکندن کیتمشدر) کبی. بوراده گلش و کیتمش مربوط و «در» رابطه در.

مثال: (احمد افندی کیجهلری اویقوی ترک و صباحلره قدر درس ایله امراز وقت ایدیور) کبی. بوراده دخی «ترک» و «وقت» مربوط و «ایدیور» «رابطه» در.



﴿ بر فقره نك رابطه لی اولوب اولمادیغنی طایمق ﴾

بر عبارت نك رابطه لی اولوب اولمادیغنی آ کلامق ایچون رابطه لی مربوطلردن هر برینک اوکنه آری آری کتیرملی. اگر جمله نك معناسی صحیح اولورسه رابطه لی والا رابطه سز اولدیغنه حکم ایتلیدر.

مربطی عبارتیه مثال :

احمد افندی مکتبه دوام ایتهدیکی وارقداشلریله ایی کچمه. دیکی ایچون طرد ایدلدی. بو عبارتده (ایتهدیکی) (کچمه دیکی) مربوط و (ایچون) رابطه در. عبارتده رابطه لیدر. چونکه: « ایچون » رابطه سی اشبو ایکی مربوطدن هانکی سنک اوکنه کتیرسه ک جمله نك معناسی صحیح اولور.

دیگر مثال:

(احمد افندیڻڪ دون واپوردن چیقارکن ایانگی قائمش
 ودکزه دوشمسنه آز برشی قالمش ایدی) . بوعبارہ « قائمش »
 و « قالمش » مربوط و « ایدی » رابطہ اولوب مربوطلرک اوکنه
 کتیرلدکده جملهلرک معناسی صحیح اولدیغندن عبارہ ربطمیدر .

ربطسز عبارہ به مثال :

(فقرایه ای معاملہ ایتک لازم وحقارت ایسه لایق دکلدر) .
 بوراده « لازم » « لایق » مربوط « دکلدر » رابطہ اولدیغندن
 مربوطلرک اوکنه کتیرلدکده برنجی جملهنک معناسی (فقرایه
 ای معاملہ ایتک لازم دکلدر) اولورکه مقصود اولان بومعنی
 دکلدر . بونی (فقرایه ای معاملہ ایتک لازم وحقارت ایسه غیر
 لایقدر) یولنده تصحیح ایدر ایسه ک « در » رابطہ اولوب
 مربوط اولان (لازم) (غیر لایق) کلهلرینک اوکنه کتیرلدکده
 معنی صحیح اولدیغندن عبارہ مربوط بولونور .



﴿ اوچنچی مقاله ﴾

{ ادوات }

لسان عثمانیده ادوات ترکیه مستعمل اولدینی کبی عربی و فارسی اداتلر دخی اکثریتله قوللانلادیغندن بونلردن عثمانلی لساننده اک زیاده مستعمل اولانلری بر وجه آتی بیان اولوندی :

(آ - نه - یا)

(آ) اسملرده ویا اسم حکمنده اولان کلماته داخل اولورسه ادات ندا اولور : آ جانم، آ کوکل کبی .

اولنده الف اولان کلماته دخولنده اکثریا بر « ی » زیاده ایدیلیر : آی اقدم، آی اوغل کبی .

(آ) ترکیباته لاحق اولورسه تأکید اداتی اولور : سزک، بزم ایشمز دکل آ! سهو اولونمش ایسه نه بأس وار کبی .

بعضا بومقامده (آ) برنده (یا) کلیر : سن بنم انا بابا برقداشم دکلک یا ا کبی .

آخرنده حرف مد یا خود حرف املا اولان کلماته (آ) یرینه (یا) لاحق اولور : بوسوزلر اولورکن او بوراده دکل ایدی یا ا . . . کبی .
فعلک صوکه حرکه سی خفیف اولورسه « آ » دخی خفیف اولارق (نه) صورتی اخذ ایدر : (سویلهکه)، (دیگسهکه) کبی .

فعللرك صوك حركهسى ثقيل اولسون خفيف اولسون (آ - نه)
 يرينه (يا - به) لاحق اولاماز : (اوقوسهك آ) - (ديكسهكه)
 دينلوب (اوقوسهك يا) ، (ديكسهكه) دينيله من .

(يا) بعضاً استغراب ايچون اولور : يا ! بكا امنيتكنز
 يوقى؟ كى .

(يا) بعضاً دخى تنبيه ايچون اولور . بوصورتده جمله لرك اوللرينه
 داخل اولور : يا بويله اهميتسز بر ايش ايچون نيچون اطرافى بحضور
 ايتدك؟ دينلمسون . . . كى .

(اى - هى - بهى - يا - آيا - آى)

بونلرك هپسى ادا ت ندادرلر .

بونلر (كرك تركى اولسون و كرك عربى و يافارسى اولسون [*])
 كله ويا تركيه داخل اولور : اى قرداش ، اى قومشو ، اى
 پير روشن ضمير ، اى فريدا العصر كى .

« اى » لرك يرينه « هى » دخى استعمال اولونور . (هى) ك
 بعضاً تحسرايچون كلديكى ده واردر : هى كيدى كونلر هى كى .
 هى ايله بهى اكثريا مقام تويخ واستحقارده قوللائيلىر : هى احمق ،
 بهى سرسم كى . بومقامده بعضاً (آ) دخى قوللائيلىر : آ تنبل شمدى به
 قدر نرده ابدك كى .

(يا) يالكلز عربى كلمات و تركيه اته مخصوصدر : يا اه ،
 يارسولاه كى .

[*] كلمات اجنبيه كلمات تركيه حكمنده در .

(ایا) یالکنز عربی، فارسی کلمات و ترکیباته داخل اولور :
ایا شاه رسل کبی که ایا رسوللرک شاهی دینیه من .
(آی) تعجب ادا تیدر . اوله کلیر : آی ! سن بوراده میسک؟
کبی .

الف

فارسیدن مأخوذدر . ندا ایچون کلیر . عربی، فارسی کلماته
لاحق اولور : خدایا، زاهدا کبی .

به

بو ادات اسملره و جملهلره داخل ولاحق اولارق ایقاز
و تویخ معناسی اشعار ایدر : به جانم، به قدر داشم - نه طور بیورسک
به . . . کبی .

تا

فارسیدن مأخوذ اولوب ترکی، عربی، فارسی کلماته داخل
اولارق انتها معناسی اشعار ایدر : تا اوینه کیتدم، تابسه - حر
اوتوردم کبی که اوینه قدر، سحر وقتنه قدر دیمک اولور .

چه - جی - چه

(چه) اداتنک تصغیر، تمیز، تعقیب، نسبت ایچون کلدیکی
یوقاروده ذکر اولونمش ایدی . بونلردن باشقه بعضاً مطابقت

و موافقت ایچون کلیر : مشرب نیجه حرکت ایدیور ، افکار مجه سویله یور کی .

(جی) اداتنك فاعلیت ایچون کادیکی یوقاروده بیان اولوندی .

(چه) اداتی فارسیدن مأخوذدر . تصغیر ایچون اولور .
نته کیم بحث مخصوصنده کچدی .

لی - لو - مند - ناك - یار - ور - ی -

ی - یت

(لی ، لو) ترکی ، (مند ، ناك ، یار - ور - ی) فارسی
و (ی) عربیدر . جمله سی نسبت اداتلریدر . نته کیم اسم منسوب
بمحتده بیانی کچدی .

(یت) عربی اسم مصدر اداتیدر . عربی اسماء اجناس ایله
صفاته لاحق اولور : انسانیت ، جاهلیت کی که انسانلق ، جاهلك
دیمکدر .

بو ادات مصدرلره لاحق اولماز . انسانیت ، امنیت ، علویت ، جدیت
کی کلمات - لسان عثمانینك احتیاجنه بناء - قبول اولونمشدر .

ایله - البته - بیله - نیجه - همان - باری

(ایله) کله سنك وساطت ، مقارنت اداتی اولدینی مفعول
بمحتده بیان اولوندی .

(البتہ) بوا دات، (ال) حرف تعریفیہ (بتہ - بت)
 کلمہ سندن مرکب بر ادات عربیہ در . تا کید ایچون اولور .
 البتہ صورتندہ قوللانلینی کی البت شکندہ دخی استعمال
 اولونور : البتہ کیدر کلن جهانہ کی .

(بیلہ) عطف تنبیہی اداتیدر . معطوفی آروجه نظر دقتہ
 عرض ایلر : دکل کندی، اجدادی بیلہ کورمدی کی .
 (نیجہ) تکثیر اداتیدر : نیجہ دفعہ کلدہ مسدہ بولامادم کی .
 بعضاً مبالغہ ایچون تکرار ایدیلیر : نیجہ نیجہ مظفریاتہ مظهر
 اولدی کی .

(همان) فارسیدن مأخوذدر . استعجال، تقریب، استمرار،
 حصر اداتلیردر : طورہ همان کیت ، همان دوشہ جک ایدی ،
 سن همان سویلہ بن دیکلہ یورم ، هرکس حصہ سنی الوب کیتدی
 همان بن قالدہ ، کی .

(باری) [*] ادات اکتفادر : باری بر قہوہ مزی ایچکندہ
 اولیلہ کیدک ، سن کیتمزسہک باری بن کیدہیم کی .

هر - هپ - بتون

بونلرک جملہ سی ادات تعمیدر :

(هر) فارسیدن آلمشدر . یالکز مفردہ داخل اولور :

[*] بوا دات عربیدہ خالق معناسنہ وصف ایکن فارسیدہ ادات
 اولارق قوللانلش واورادن لسان عثمانیہ یکمشدر کہ (هیچ اولمزسہ)
 معناسندہ مستعملدر .

هر کس ، هر طرف ، هر یوم دینیلیر . فقط هر کسیر ، هر طرفلر ، هر ایام دینیله من .

(هپ) ایله (بتون) مفرده وجمه داخل اولور . « هپ » بعضاً مضاف اولور وشاذ اولارق آخرینه « سی » آگیر . بو صورتده (عموم، جمیع، جمله) معنارینی تضمن ایدر : انسانلرک هپسی کبی .

بو ادا تیر بر جمله ده جمع اولامادینی کبی بونلردن برینک بولوندینی جمله ده تعمیمی مشعر باشقه بر تعبیرده بولوندر مق جائز اولاماز . مثلاً ولایتک سر بر هر جانبی کردم دینیله من .

(بتون) بعض کره تا کید ایچون یا مکرر ویا « بوس بتون » صورتنده قوللانیلیر .

دک - دکین - قدر

بونلرک اوچیده ادات اتهادرلر . نته کیم صیغه اتهائییه بختنده بیان اولوندی .

(دک) حيله معناسنه و (قدر) حکم ازلی معناسنه اولورسه اول وقت ادات اولمازلر .

انجق - اما - فقط - لکن

بونلردن (انجق) ترکی دیکرلری عربیدن مأخوذدر . جمله سی ادات استدر اکدر .

چوق اوغراشدی اما برشی یاپامادی ، احمد بورایه کلدی

فقط چوق طور مایوب کیتدی، صالح کلدی لکن طاهر کلدی،
چوق یاواردی انجق مقصدینه نائل اولامادی کبی .

استدراك ، طلب ادراك معناسنه در . بو اداتلر ، لکن جمله دن تولد
ایدن وهمی دفع وازاله ایچون کتیر یله چك جمله نك اولنه کلیرکه بوجله لر
پیشنده نفی واثبات جهتیله اولدقجه معنی مغایرت بولونور . مثلاً : « چوق
چالشدی اما موفق اولامادی » عباره سنده متکلمک سراخی غائبک موفق
اولامادی نفی آ کلامقدر . لکن اولاً « چوق چالشدی » جمله سنی ایراد
ایدنجه مخاطب (چالیشانلرک علی الا کثر موفق اولسی لازم کله چکنی تصور
اولونا جفتدن) اوشخصک موفق اولدیفنی توهم ایدر . ایشته بوزمان متکلم
افاده سنی ا کمال و مخاطبک ذهنده کی سالف الذکر توهمی دفع وازاله
ایچون « اما موفق اولامادی » کلامنی علاوه ایله افاده ده کی نقصانک
اکالی استدراك ایدر .

(فقط) ایله (انجق) بعضاً ادات حصر وقصر اولورلر .
حصر ، بر حکمک بر شیئه انحصاری دیمکدر . مثلاً « سزک
وظیفه کز آنجق تحصیل معارفدر » دینیلیرکه باشقه برشی دکلدور
دیمک چیقوب وظیفه تحصیل معارفه حصر اولونمش اولور .
ادات قصرک داخل اولدیفنی کله (مقصور علیه) ودیکری مقصوردر .
نته کیم مثال سابقده « تحصیل معارف » مقصور علیه و « وظیفه » مقصوردر .
بعضاً آنجق یرنده « یالکز » لفظی قوللانیلیر : اورایه
یالکز بن کیتدم دینیلیرکه باشقه سی کیتمدی دیمک اولوب کیتمک
متکلمه حصر اولونمش اولور .

(اما) بعضاً « تفصیل » ایچون استعمال اولونور : اما صینک ، محبک
قلبنده حاصل اولان بو محبت ندر ؟ ویا نیچوندر ؟ دینیلیر ایسه بوکا
جواب وبرمکدن عجز منی بنه تکرار ایدرز . کبی .

(اما) نك بعض كرده استغراب واستحسان ایچون کلدیکی واردر . بوتقدیرده اکثریا «ها» یاخود «نه» اداتلریله تأکید ایدیلیر : اما یاپدك ها ! - اما نه کلام - اما نه فصیح کبی .

چونکه - زیرا

فارسیدن مأخوذ ادات تعلیلدرلر . بر حکمك علتی بیان ایچون کتیریلان جملهلره داخل اولور : قرداش کبی سویشیورز، چونکه بر وطن اولادی یز - اوقو ، زیرا اوقومق نافعدر - چالشمدن کری طورماملی ، زیرا ترقی چالشمقله اولور کبی .

استفهام انکاریدن صوکره ادات تعلیل کتیرلر . مثلاً « امیدسر ادمی اولور » کلامی تعلیل ایچون « انسان امید ایله یاشار » دینیلیر . (چونکه - زیرا انسان امید ایله یاشار) دینیلر .

کذلک استفهام انکاریلر بر حکمه علت اولدقلری زمان ادات تعلیل آلاماز . مثلاً « بوراسنی اعترافه مجبور اولاجقدر . حقیقتی کیم انکار ایده بیلیر » دینیلوب (چونکه - زیرا حقیقتی کیم انکار ایده بیلیر) دینیلر .

(چونکه) بعضاً « مادام که » موقعنده استعمال اولونارق ادات توقیت اولور . بوصورتده سوز باشنده بولونور : چونکه ترقی ایتك ایسته یورسکز ، نیچون چالیشمایورسکز ؟ کبی . « چونکه » یرینه « چونکیم » استعمال اولونماز .

« زیرا » تعلیلدن باشقه بزمعنایه کلز وهیج بر وقنده سوز باشنده بولونامادینی کبی هیج بر زمان کندینه (که) لفظی داخل ولاحق اولارق (که زیرا - زیرا که) صورتنده قوللانیلاماز .

کبی - صانکه - کویا - آسا - وار - واری - وش -

ک - کان - کا

بونلرک کافه سی ادات تشبیهدر . بونلره وادات تمثیل ، دخی
دینیلیر . تشبیه ، بر شیتی دیگر شینه بکزتمک دیمک اولدیغندن
بونلرده بر شیتی دیگر شینه بکزتمکده قوللانیلیر .

(صانکه - کبی) ترکیه (ک - کان - کا) عربی اولوب
دیگرلری فارسیدن ماخوذدر .

(صانکه) اساساً صان ماده سیله (که) دن مرکب اوله رق «ظن ایت که
- قیاس ایت که» مألنده برجه ایکن استعمالنک کثرته بناءً ادات تشبیه
صره سنه کچمشدرکه بونک «که» سز استعمالی جائز دکلدر : هر طرفده
چنلر یلتش . صانکه روی ارض زمر دین قالیجه لرله دوشمش ایدی
کبی .

«کویا» نک «کویا» صورتنده استعمالی جائز دکلدر .

صانکه ایله کویا بعض کره مقام تعریضده استعمال اولونارقی
«تشبیه تعریضی» اطلاق اولونور : صانکه بی بیلیمه یور - کویا
شعر سویله یور کبی .

(کبی - وار - واری - آسا - وش) دائماً مشبه به لاحق

اولور : ارسلان کبی ، بهشت آسا ، دیوانه وار ، مجنون واری ،

مehوش کبی .

«وار» بعضاً نسبت اداتیده اولور . نته کیم صفت بختده

بکدی : امید وار کبی .

(کَان) تشبیه تعریفی اداتیدر : کَان بزی کورمه یور کی .

(کَا - کَ) عربی به داخل اولوب لسان عثمانیده نادرآ

قولالانیلیر : کالاول ، کاکان ، کافی السابق کی .

برده بخلین ، آنجلین سوزلرنده اولدینی کی ترکیه (جلین) ادات
تشبیهی وارسده معجور ومتروکدر .

لک - لق - دان - زار - سا - ستان

(لک ، لق) ترکیه اولوب اسم مصدر ، اسم مکان ، تخصیص .

لیاقت ، مقدار اداتی اولورلر . نته کیم مبحث مخصوصنده بیان
اولوندی .

دیگرلری اسم زمان ومکان وکثرت اداتیدرلر . نته کیم
بونلرده بحث مخصوصنده ذکر اولوندی .

دها ، هیج ، هم

(دها) مبحث مخصوصنده ذکر اولوندینی اوزره ادات تفصیل

اولارق صفتلره داخل اولور . فقط عربی وفارسی اسم
تفضیللره داخل اولاماز : دها کوزل ، دها عالم ، دها بالا
دینیلوب (دها اعلم ، دها بالاتر) دینیله من .

بعضاً ادات توقیت اولوب (حالا ، هنوز ، الان) معنالرینه
کلیر : دها سویله یورمی ، دها کلهدی ، دها کلیه جک ... الخ کی .

بعضاً استزاده اداتی اولور . استزاده : برشیٹک زیاده اولماسنی طلب
ایتمکدر : دها کتیرکز ، دها وارمی ؟ دها نه ایسترسکز ؟ کی .

بعضاً ادات تزئید اولور : دما وار . دما یازاجنز . بر ایکی دما
کبی .
(هیچ) فارسیدن مأخوذدر . تأکید نفی ونهی اداتیدر :
هیچ کورمه دم - او ، بورایه هیچ گلز - وظیفه کده هیچ
قصور ایتمه کبی .

جمله استفهامیه داخل اولورسه تقلیل اداتی اولور : احمد افندی بی
هیچ کوردیککز وارمی ؟ کبی .

بعضاً «لاشی» معناسنده قوللانیلوب صایمقی فعلیله تصریف اولونور .
بو صورتده ادات اولمایوب اسم اولور : بوکبی شیلر عندمده هیچ
صایلیبر ، هیچدر هیچ ، بن آتی هیچه صایارم کبی .

(هم) فارسیدن مأخوذدر . ادات عطفدر . ایکی شیئی بر
حکمدده ویاخود ایکی حکمی برشیده جمع ایدر : هم احمد سویله دی
هم محمد - احمد هم او قودی هم یازدی کبی .

بو ادات مکرر کلیرسه بعض کره ایکنجیسنه تأکید ایچون «ده»
لاحق اولور ، فقط بوکا «دخی» الحاقیله «هم دخی» طرزنده استعمالی
مناسبتنر اولور .

بو ادات اکثریتله عربی وفارسی اسملره داخل اولار
ادات اشتراك اولور و او اسملری صفت یاپار : همراه کبی که
یولداش دیمکدر .

بعض کره دخی ادات اقتران اولور : همزانو کبی . بونی ادات اشتراکدن
فرق ایتلیدر . مثلاً «همنام» ده کی هم ادات اشتراکدر . زیرا بولفظی
اطلاق ایتدیکمز کیمسه لک اسملری بردر . فقط همزانو دیدیکمز
کیمسه لک دیزلری بر دکدر بلکه بر برینه یاقینددر . همتانده ، همشهر ایله
همزبان ، هم عنان دخی بو قیلنددر .

دخی، ده - اکر، اکرچه

(دخی) عطف، تشریک اداتیدر. اکر بینلرنده اشتراك اولمایان شیلری جمع ایدرسه «ادات عطف» واکر بینلرنده اشتراك اولان شیلری جمع ایدرسه «ادات تشریک» اولور: (بری عالم اولدینی کبی دیکری دخی پک زیاده جاهل ایدی - بنم بیلدیکمی اودخی بیلیر) عبارملرنده اولدینی کبی .

(ده) دخی نك مخففیدر. بونی ادات ظرف اولان «ده» دن فرق ایتک ایچون حروف متصله دن صوکره کلیرسه آیری یازیلیر: بر کون اولور (سن ده) اوصانیرسک کبی .

حروف انفصالدن صوکره کلیرسه طبیعی متصل یازیلایما- جغندن ادات ظرف اولان «ده» دن قرینه ایله فرق اولونور. مثلا «پدر» کلمه- نك آخرینه هر ایکی صورتله اولان «ده» الحاقی ممکن اولدیغندن عبارده «پدرده» لفظی کورلدیکی زمان بونك نه اداتی اولدینی قرینه ایله اکلایشیلیر. لکن «مکتب» کلمه- نك آخرینه «ده» کتیریلنجه اکر عطف اداتی ایسه (مکتبده) واکر ظرف اداتی ایسه (مکتبده) صورتنده متصل یازیلیر .

بو ادات ایکی فعل ماضی آراسنده کلیرسه علت بیان ایدر: قار یاغدیده اورته لق صوئودی، احمد کلیدیه حسن کیتدی کبی که قارک یاغمایی اورته لغک صوئوماسنه، احمدک کلمه- سی حسنک کیتمسنه علت اولشدیر .

ایکی فعل مستقبل آراسنده کلیرسه استبعاد یاخود استهزا ویا استبطاً معنارینی متضمن اولور: او، آدم اولاجقده بز کوره جکز کی .
ایکی امر پیننده کلیرسه تعقیب، استبصار وبعضاً تهدید معناسنی متضمن اولور: طونده کتیر، اوقوسونده باق، اورده باق نه کوریور- سک ؟ کی .

(اگر) فارسیدن مأخوذدر. ایذان شرط اداتیدر: آدم دکل سن ده اگر آدم اولورسک. مصراعنده اولدینی کی .

بو ادات فارسیده اولدینی کی (کر، ار) صورتنده تخفیف اولوناماز. فقط شمرده بو تخفیفه جواز وارددر: «کر بو صحنده وفا ایلرسه جانان ایشه بن» مصراعنده اولدینی کی.

بو ادات (ایسه - سه) تصریفانندن مقدم کلیر. اساساً معنای شرط بو کلمه لرده اولوب (اگر) ایلروده اولان معنای شرطک مخبری اولمش اولور .

(اگرچه) ایذان استدراک اداتیدر. «هر نه قدر» معناسنه معادل طوتیلیر. کنیدیلرندن صوکره (ایسه ده، ایسه کده، ایسه کده، ایسه کزده) کی تعبیرلردن ویاخود بونلر بدل ادات استدراکدن بری کلیر: اگرچه ایشک بویله اوله جفتی بیلدمسده برای خاطر سس جیقار مادم - اگرچه بو ایشی بکا سویلدیلر فقط اطرافیله اکلانمادیلر کی .

(اگر) ایله (اگرچه) هیچ بروقنده بربرینک یرنده قوللانیله ملازمه

نه - نه

عباره ده بربرینک آردی صره کان (نه) لفظی ادات

نفیدر. بونك ايكنجىسى بعضاً «ده» لفظيه برلكده كليز: نه
دون، نه ده بكون كلدى كې. بويله ايكي «نه» يى حاوى اولان
عبارده رابطه بولونمق لازمدر. اشبو رابطه اشبو ايكي
«نه» دن يا يالكز برنجيدن ويا يالكز ايكنجيدن ويا خود هم
برنجيدن، هم ايكنجيدن صـ وكره اولور. بونرك اك طيبي
اولانى برنجى صورتدر: نه فسي وار، نه قوندوره سى -
قورقاق بازركان نه كار ايدر، نه ضرر كې.

اوجنجى صورتده يعنى رابطه هم برنجى وهم ايكنجى «نه» دن
صوكره كليزه بوحالده رابطه لر يا بربرينك عيني اولور يا خود اولماز.
اكر عيني اولورسه ايكنجى رابطه مكرر اولمق حسييله زائد صايلاجفندن
برنجى صورت كې ترك ايدهلى اولادر: نه كاغدى وار، نه قلمى وار -
نه كاغدى وار، نه قلمى كې. اكر رابطه بربرينك عيني اولورسه هر
حالده رابطه لك اثباتى لازمدر: نه اوقودى، نه يازدى كې.

ايكنجى صورتده يعنى رابطه يالكز ايكنجى «نه» دن صوكره كليزه
اول وقت رابطه يا منى ويا مثبت كتيريلير.

اكر عبارت ايكنجى «نه» دن صوكره كلن رابطه ايله منقطع اولمايوب
الت طرفنه تعلق ايدرسه رابطه منى كتيريلير: نه اوقومغه، نه صنعته
هوس اتمه ديگندن. . . - نه مكتبه، نه قلم دوام اتمه ديكي جهته. . . -
نه كندينه، نه حائله سنه رحم وشفقتى اولمايغندن. . . كې.

اكر عبارت ايكنجى «نه» دن صوكره كلن رابطه ايله منقطع اولورسه
بوحالده عبارتده يا نفى اقتضا ايدر برفاصله بولونور ويا بولوماز. اكر
بولونورسه رابطه يته منى طير: (او ايشه نه امك، نه ده بونك -
ظلمه كوره - عقلى ايرى)، (بوسوزله نه كرچك، نه يالان اولديغنه
- تحقيق اولومادىقه - حكم ايدهلى سى). كې. اكر نفى اقتضا ايدر بر
فاصله بولومازسه رابطه مثبت اولارق كليز: (بوسوزك نه كرچك، نه

(کاشکی) فارسیدن مأخوذ ادات تمیذر. دائماً «اولسه»،
 « بولسه » (اولایدی)، (بولایدی) کبی تمنییه دلالت ایدن
 افعال ایله برابر کلیر: کاشکی زنکین اولیدم، کاشکی هر ساعت
 عید اولسه کبی. محاورانده اکثریا (کشکه) صورتنده تلفظی
 شایع ایسه ده آثار ادبیه ده بوجمله استعمال اولوناماز.

(گاه) فارسیدن مأخوذدر. اساساً « وقت » معناسنه
 ایسه ده لسان عثمانیده (بعضاً) معناسنه ادات تبعیض اولور:
 گاه کلیر گاه کلز کبی. لفظ مذکور اسم زمان اداتیسه اولور.
 نته کیم مبحث مخصوصنده کچدی.

(که) فارسیدن آلمشدر که باشلیجه ایکی معناده قوللانیلیر:
 برنجیسی، ادات تبیین اولور: « بهر جمعیت دلهاست پریشانی »
 ما « مصراعی - که لسان حماسندن صادر اولمشدر - اطوارینه
 تعریف ناطق اولور کبی .

ایکنجیسی، ادات تعلیل اولور: چوق سویله مه که دیل دام
 بلاددر .

کی - می - ها - هیات - اڭ - دن - آه - اوخ -
 واه - وای - هله

(کی) ادات نسبت اولوب اواخر کلماته لاحق اولور .
 بنمکی، اخشامکی کبی .
 (می) ترکیه ادات استفهامدر . دائماً مسئول عنه

(کندیسندن سوال اولونان اسمه) لاحق اولور: از میره می
 کیتدک، از میره واپور ایله می کیتدک کبی .
 (ها) ترجه ادا ت تنیهدر : او قویکنز ها ! یوقسه جزا
 کورورسکنز کبی .

(هیات) هر بی اسم فعلدر . اوزاقلاشدی معناسنه کلیر:
 لسان عثمانیده تانک سکونیه ادا ت استبعاد اولارق قوللانیلوب
 جمله لره مقارنت ایدر: کندینی کاتبی ظن ایدیور؟ هیات! کبی .
 (اک) ترجه مبالغه ادا تیدر . نته کیم صرفده بیانی کچدی .
 (دن) ترجه در . بیان، ابتداء، تبعیض، سببیت ادا تیدر:
 کوموشدن یوزوک، ادرنه دن کلدیم ، شو پیتردن یسیکنز، احمد
 خسته اولدیغندن مکتبه کله مدی کبی .

فارسی اولان « از » وهر بی اولان (من، عن) بومضالرده
 اولارق لسان عثمانیده بعضاً استعمال اولونور: از هر جهت ،
 من القدیم، عن قریب کبی .

(آه) تحسر ادا تیدر: آه! بر کره کوره مدم کبی .

(آه) ادا ت کفایه در: آه! آرتق کبی .

(اوخ) ادا ت تلذذدر: اوخ! نه اعلا پیشمش کبی .

(اوف) تأثر ادا تیدر: اوف! نه مدهش درده اوغرام

کبی .

(ایواه) بوده تحسر ادا تیدر: ایواه! کنجلمک بیهوده

کچدی کبی .

(واه ، وای) ادات تأسـفـدرلر: واه باشمه کلنلر ، وای
انک حالنه وای کبی .

(هله) تهـدـید اداتیدر: هله او قوما باقیم کبی .

(او) تعجب و تهـدـید اداتیدر. دائماً جمله اولنه کلیر و براز
اوزونجه او قونور: او! نه قدرده یوکسک - او! ارتق چوق
اولیورسک . . کبی .

سنز - کوره - اوزره - حتی - هانیا -
هایدی - های های

(سنز) ترکیه ادات نفیدر. اسملره لاحق اولور: عقلسنز،
فکرسنز، طاتسنز، طوزسنز کبی .

(کوره) ترکیه نسبت و مطابقت اداتیدر: بکا کوره هوا
خوش، البسه وجودمه کوره یاییلمشدر کبی .

(اوزره) ترکیه استعلا اداتیدر: استراحت اوزره کبی .

بوکا ضمیر اضافتی ده لاحق اولور: مصدرلره لاحق اولورسه
شرط معناسی متضمن اولور. مثلاً: «کلمک اوزره کیتدی» دینیرکه کلمک
شرطیه کیتدی دیمک اولور. بعضاً استقبالی حاله تقریب ایدر: «کیتمک
وزرهیم» دینیرکه شمعی کیده جکم دیمک اولور .

فارسی و عربیده ادات استعلا اولان «بر» ایله «علی» دخی
بعضاً لسان عثمانیده قوللانیلیر . شو قدرکه «بر» عربی وفار
سییه «علی» یالکیز عربییه داخل اولاییلور: بر دوش، بر

دوام، بر قرار، بر عکس، علی الاصول، علی الاطلاق، علی
التخمین، علی روایة . . . الخ کبی .

(حتی) عربیدن مأخوذدر. عطف تنبیهی اداتیدر. معطوفی
باشقهجه نظر دقتہ عرض ایلر: چوق یاغمرور یاغمش، حتی
اولری صو باصمش کبی .

(هانیا) مکان قریبدن سؤال ایچوندرد. تا کید معنی ایچون
اکثر یا بونی نزه، کلمه سی تعقیب ایدر: هانیا احمد، هانیا
کتابک نزهده کبی .

(هایدی) ترکیجده مباشرت اداتیدر: هایدی کیده لم، هایدی
یا زالم کبی .

(های های) ترکیجہ ادات تصدیقدر: دیدیکمه راضیمیسکنز؟
های های کبی .

حاشا - اوت - خیر

(حاشا) عربیدن مأخوذ اولوب ادات تنزیهدر: حاشا!
حضرت پیغمبر شاعر دکلدر - قرآن کریمه شعر دینلیرمی؟
حاشا! کبی .

(اوت) ادات تصدیقدر: احمد کلدی می؟ اوت کبی .

(خیر) سلب ایجاب یاخود تصدیق نفی اداتیدر: احمد
کیتدی می؟ خیر کبی .



﴿ اشارات ﴾

یاخورد

{ اصول تنقیط }

عباراتی سهولتله اوقویوب آ کلامق ایچون جمله لرك
آخر لریله کله وترکیب لرك آرا لرینه بر طاقم اشارت لر وضع
اولونور . بوکا « اصول تنقیط » نامی ویرلمشدركه عثمانلیجه ده
مستعمل اولانلری بوجه آتی بیان اولونور :

فاصله	،
مفرزه	؛
قاطعہ	.
شارحه	:
رابطه	—
فارقة	—
استفهامیه	؟
تعجیه	!
معترضه	()

نقاط تقدیریه

۱ — فاصله دینیلن شو « ، » اشارت اکثریا و او طاقفه
مقامنده قوللانیلار ق کله لرك آراسنه قونور .

مثال : ادیب ، کامل ، صداقتی اولانلر هر پرده حرمت کورورلر .

بعضاً کلامده بولونان جملهلر آراسنه قونور . بوصورتده یامعنا کلامده اولان ایهامی ازاله ایدر ویا کلامک جملهلرینی تفریق ایلرکه اشیبو جملهلردن بر ویا بر قاجی آتلسه کلامده یینه معنی موجود بولونور .

(۱) — مثال : حسن افندی النده کتاب اولدینی حالده کمال افندی بی کوردی .

(۲) — مثال : ییـلانک باشنی دشمن ایله ازکه ایکی فائدهک برندن خالی اولماسین . بوغالب کلیرسه ییلانی اولدرمش ، اوغالب کلیرسه دشمندن قورتلمش اولورسک .

برنجی مثالده کتاب کیملک النده اولدینی بردنبره ا کلاشیلاماز ، هم احمدک وهم محمدک النده اولمق احتمالی واردر . بو شبهه دن قورتلمق ایچون کتاب اکر احمد افندیـنک النده ایسه انک بولندیـنی جمله ایله دیکر جمله آراسنه فاصله قونور یعنی « احمد افندی النده کتاب اولدینی حالده ، محمد افندی بی کوردی ، طرزنده یازیلیر . اکر کتاب محمد افندیـنک النده ایسه اول وقت « احمد افندی ، النده کتاب اولدینی حالده محمد افندی بی کوردی ، صورتده یازیلیر .

ایکنجی مثالده ایسه فاصله جمله شرطیه و جزائییه دن مرکب اولان ایکی کلام آراسنه وضع اولونمشدر .

[تنبيه] انشای مطالعه ده بو اشارته تصادف اولوند قدده
سسی بر آز کسملی، بر نفس آلاق عبارمک بوراده آریجق
فصل ایدلیکنی کوسترمیلیدر .

۲ — مفرزه دینیلن شو « ؛ » اشارتدر که اکثریا جمله
تعلیلیه واستثنائیه لری [°] اوست طرفنده کی جمله دن تفریق
ایچون قوللانیلیر .

مثال : انسانک بر چوق قصوری معذور طوتیلایلیر؛
نظافت خصوصنده کی تکسلی اصلا معذور اولاماز؛ چونکه
تمیزلک هرشیدن زیاده الزمدر .

مثال : انسان صیق صیق حمامه کیملی؛ فقط چوق طور-
مایوب یارم ویا بر ساعت ظرفنده چیقمالی .

[تنبيه] بو اشارته تصادف اولوند قدده فاصله دن زیاده
طورملی، صوکره الت طرفنی اوقومیلیدر .

(۳) — قاطعه دینیلن شو « . » نقطه کلامک [°°] ختامنه
دلالت ایتمک اوزره صوکنه قونورکه اوکلامک التنده کی کلام
ایله اصلا ارتباط وتعلق بولونماز. اگر ارتباط وتعلق بولونورسه
اول وقت یوقاروده بیان اولونان فاصله ویا مفرزه استعمال
اولونور .

[°] اولنده : زیرا، چونکه، لکن، فقط، اما اداتلری بولونان
جمله لری .

[°°] بحك ختامنه دكل .

مثال: [مشروبانك باشلیجه سی صودر. صویك اك اییسی؛
خفیف، براق، طاتلی و تمیز اولانیدر. اقان صولرده بو خاصه لر
آز، چوق بولونور. کول، صهرنج. الخ]
[تنبیه] بو اشاره تصادف اولوندقده مفرزه دن زیاده جه
طوروب اورایه قدر اولان عبارمك مفهومی ذهنه طوبیلاملی،
صوکره الت طرفی اوقومایه باشلاملیدر.

(۴) — شارحه دینیلن شو «:» بربری اوستنه قونلمش
اولان ایکی نقطه بر شیئی تعریف و تفسیر و ایضاح ایدن جمله
ویا کلمه نك اولنه قونور.

مثال: [ایکی همشیره نك برر چوجنی وار ایدی. ایکسییده
انلری برر درلو، یعنی: بر برندن فرقلی صورتده تعلیم و تربیه
ایدردی.]

مثال: [کره ارضك قره اولان قسمی، بش قطعه یه تقسیم
اولونمشدر. بو قطعه لرك اسملری شونلردر: آوروپا، آسیا،
آفریقا، امریقا و اوسترالیا.]

[تنبیه] بو اشاره تصادف اولوندقده فاصله ده اولدینی قدر
طورمق والت طرفی دها آچیق و متین بر صورتده تلفظ ایتک
لازمدر.

(۵) — رابطه دینیلن شو «-» اشارت، بر کلمه سطر
نهایتیه کلوبده تماماً اوسطره صیغمازسه طبعی بر ویا بر قاج هجاسی
التده کی سطره کچمك اقتضا ایدن هجالت اراسنه [*] قونور.

[*] یعنی اوستده کی سطرده قالان هجالت الته قونور.

مثال: [طاتلی و راحت اویقو اویومق ایسته‌ین آ-
دم، معده‌سی طولو ایکن یاتمالی. یا براز آرام و حر-
کت ایتملی، ویا بر ایشله مشغول اولمی. برده یورکی مس-
یح بولونمالی.]

(۶) — فارقه دینیلن شو « — اشارت سوال و جواب
ابتدالرینه و عباره اراسنه کیرن دیگر جمله و قیود احترازیه‌نک
ایکی طرفه قونیلوب عباره‌نک بونلرله قاریشماسنه و مالک
بوزولماسنه مانع اولور.

اشبو جمله و قیود احترازیه‌نک عباره ایله ارتباطی اولمادیغندن
اورته‌دن قالدیراسه کلامک ربطه خلل کمر.

مثال:

— نه اوقویورسک؟

— حساب اوقویورم.

— هانکی مکتبده اوقویورسک؟

— صفوق چشمه رشديه‌سنده.

مثال: انسان، — نه یاشده بولونورسه بولونسون —
کیجه اوزون مدت اکلنهرک ویا بر شيله مشغول اولارق وقت
کچیروبده کوندزین اویومایی عادت ایتمه‌لی، زیرا بو حال وجوده
ضعف کتیرر.

(۷) — استفهامیه دینیلن شو «؟» اشارت استفهامی

متمضمن اولان جمله، کلام ویا کله‌نک صوکنه قونور.

مثال: هانکی قلمه دوام ای دیورسکز؟ معاش-کمز قاج
غروشدرد؟

(۸) — تعجیه دینیلن شو «! » اشارت تعجیله برابر
تأسف، سوینج، تکدیر، قسم الخ مقاملرنده استعمال
اولونور.

مثال: (احمد افندی وفات ایتمش ها ! دون چارشوده
راست کلمشدم) (ایواه ! فرصتی الدن قاجیردم !) (اوخ ! هله
دیدیکم اولدی !) (سنی کیدی خیلازا ! اوتانماز) (درسنه چالش !
والله ! خواجهیه سویلهرم)

(۹) — معترضه دینیلن شو () اشارت ایضاح وتفسیر
ایچون ایراد اولونان یعنی عبارده دن معدود اولمایوب ترکی حالنده
ربط عبارده خلل کتیرمه یں کلام وکله یی دروننه آلیر.

مثال: « هله تشکر ایدرم که بو حال (تعبیره کوجنمیکز)
سنزک اراذلن اولمادیغکزه دلالت ایدر. »

(۱۰) — نقاط تقدیری دینیلن شو « » سطر
حذاسنجه اولان نقطه ار هرکسجه معلوم اولان بر فقره نك اولی
ویا نهایتی یازیلوب متباقیسی یازلماق ایسته نلدیکی ویا سویلنمسی
چیرکین وعیب اولدیغی وقت استعمال اولونور.

مثال: (نه صارمصاق ییدم . . .) کبی .

تعمیه

آشاییده کی فقرات حکمیه ده یولونان اشارنلری تعین ابدیکز.

حضرت علی ، (رضی الله عنه) بیورمشدرکه : ادب :
زنکینلکده زینت ، حاجت وقتنده توکنمز بر خزینه ، مروت
ایچون معین وشفیق ، مجلسلرده رفیق ، یالکزلقده صداقتلی بر
دوستدر . ادب ایله بوش یورکار معمور اولور ؛ اولمش عقللر
نازه جان بولور .

کباردن بریسی عقلادن بر ذاته : اوغللریکزدن هانکیسنی
چوق سورسکمز؟ دییه صورار . اوده : اک زیاده ادب تحصیلنه
راغب ، عار وناموسه طوقاناچق شیردن بجانب ، عالی موقع
احراز ایتمه طالب اولاتنی سورم . جوابنی ویرمشدر .

حکمدان برینه : عالمده اک کوچ شی ایله اک قولای شی
نهدر؟ دییه سوال ایتشلر : اک کوچ شی بر آدم کندی کندیسنی
طانیق ؛ اک قولای شی ، خلقه نصیحت ایتکدر . جوابنی
ویرمشدر .

دیگر

چوجقلر! بر ساعت زمانک دکرینی هیچ دوشوندیگکمز
وارمیدر؟ ساعتک چالیدیغنی ایشیدیور و « اوخ! ایشته بر ساعت
دها کجدی ، دیورسکمز ؛ فقط ده اوته سنی دوشونمه یورسکمز

بونکله برابر سزك اوینامقله بوش یره کچیردیککز او بر ساعت
ظرفنده دنیا ده نهر اولمش نهر یاپلمشدر .
بر طاقم عالم آدمرك حسابنه کوره هر ساعتده درت
بیك چو جق دنیا به کلیر ، اوچ بیك آدم اولورمش .
کچن بر ساعت ایچنده نه قدر انسانلر تارلارده کونش
التده چالشیور ونه قدری بیوک شهرلرك اوقرانلق فابریقه لرنده
چابالایورلر .



قسم ثالث

{ علم بلاغت }

بلاغت ، لغة وصول وانتهای معناسنه در . هر بلر بر مکانه
واصل و منتهی اولدقلری زمان « بلغت المكان » دیرلر . بو
مناسبتله بلاغتی ، بر کی مسه بلیغ اولمق یعنی کلام فصیح ایله
مقصود و مرانی حقیه موقع بیانه ایصال ایله مک معناسنده
استعمال ایتشلردر .

(بلاغت) ك بر چوق تعریفی وار ایسه ده اك مشهوری
« کلامك مزایاسی بیلیرن بر قندر » یولنده کی تعریفدر .
کلامك مزایاسی ، کلامك فصاحتیه برابر مقتضای حال


و مقامه تطبیقی ، طرق افاده قواعدینه موافقی و صنایع لفظیه و معنویه ایله ترصیع و تزیینی خصوصاً لرندن عبارت اولدیفندن اساطین علماء ، علم بلاغت ایچون اوج فن یامش لردر .

برنجیسی : « علم معانی » درکه کلامک مقتضای حال و مقامه کیفیت تطبیقندن بحث ایدر .

ایکینجیسی : « علم بیان » درکه افاده مراسم طرق مختلفه سنی بیلدیرر .

اوجنجیسی : « علم بدیع » درکه کلام بلیغی تزیین ایچون تحسین کلامک وجوه مختلفه سنی اراة ایدر .

بالعموم علم بلاغت کتابلرنده سالف الذکر اوج فندن بحث اولونمقده ایسه ده بز بوراده بلاغتک ایکی رکن متینی اولان علم معانی ایله علم بیاندن برر نبذه بحث ایدوب علم بدیعی کتابمزه ذیل اولمق اوزره ایلروده آروجه یازه جغزه . التوفیق من الله



{ فصاحت }

کلمه و کلامک تافظی سلیس اولمقله برابر معناسی آشکار و استعمال اولوندیغی معنایه مطابق و موافق اولماسیدر .
سهلاست ، کلامی لسانک کمال سهوات اوزره تلفظ ایده -
میلمسیدر .

فصاحت ، کلام ایله کلامی تشکیل ایدن کلمه ده و کلام
کندیسندن صادر اولان متکلم ده اولور .

کلمه نك فصاحتی — تنافر حروف ، غرابت ، مخالفت
قیاسدن بری اولمسیدیر که بونلر کلمه نك فصاحتی اخلال ایدر .

۱ — تنافر حروف — دکلمه یینه نفرت و سویله یینه تلفظه
نقلت و یرن حروفک کلمه واحده ده اجتماعیدر که بوکی حروفدن
مربک اولان کلمه انسای تلفظه لسانه عسرت و یردیکی کی
سامعه دخی نفرت ایراث ایدر: قرقرتدر مق، ایشسز کلمه لرنده
اولدینی کی.

۲ — غرابت — کلمه نك ، وحشی اولان یعنی بین الادبا
مانوس الاستعمال اولمایان و معناسی هر کیسجه ظاهر بولونمایان
کلماتدن اولماسیدر . طانیق ، اود ، کلمه لری کی که بونلر وقتیه
شاهد و آتش معنارنده مستعمل ایکن صوکره دن استعمالدن
ساقط اولارق الفاظ غریبه صره سنه کچمش و بونلرک یرینه
سالف الذکر شاهد، آتش کلمه لریله نار لفظ عربیسی قوللانلمشدر .
و کذا « اجتناب » ، « آینه ، مرآت ، کلمه لرینه نظراً (تجنب ،
کورکی) کلمه لری غریبدر .

۳ — مخالفت قیاسی — کلمه نك شیوه و قواعد لسان ایله
ادبای قومک استعمالنه مخالف اولماسیدر . مثلاً بالفروخت ،
بجایشاً ، او یغوانسزلک کی که ایکی اولکیلر لفظ فارسی اولدقلری

حالده حرف تعریف وتنوین ایله ایراد ایدلمش لر و او یغونسز کلمه سی
خفیف اولدینی ایچون شیوه لسان ترکی اقتضاسندن اولارق
« لك » اداتيله كلك لازم ایكن « اق » اداتيله اتیان ایدیلهرك
قیاسه مخالف بولونمشلردر .



كلامك فصاحتی — مرکب اولدینی كلماتك فصیح اولمسیله
برابر تنافر كلمات، كثرت تکرار، ضعف تألیف، تعقید، تنابع
اضافندن بری بولونماسیدر .

۱ — تنافر کلمات — کلامی ترکیب ایدن کلمه لرک بربرلینه
اتصالندن لسانه ثقات ونطقه عسرت عارض اولمقدردر : قریه لیلر
قرادن قریه بقریه فراره قرار ویردیلهر کی که مثال مذکورده
کلامی ترکیب ایدن کلماتک هربری حد ذاتنده فصیح ایسه ده
بربرلیله عدم امتزاجندن کلامده تنافر حاصل اولمشدر .

۲ — كثرت تکرار — بر کلمه نك بر عبارتده ایکی دفعه
ایرادینه « تکرار » وایکیدن زیاده ایراد ایدلمسندده « كثرت
تکرار » دینیر . بر عبارتده بر کلمه لزومسز یره ایکیدن زیاده
ایراد ایدیلیرسه مغل فصاحت اولور : « بوکون چارشوده کز رکن
صالح افندی یه وصال افدینك معاونی کمال افندی یه وصال
افدینك پدری جمال افندی یه راست کلام » کی که بو عبارتده نك
« بوکون چارشوده کز رکن صالح افندی ایله معاونی کمال
و پدری جمال افندی لره راست کلام » طرزنده افاده سی ممکن ایکن

صالح و افندی لفظلری لزومسزیره تکرار ایدلمشدر . اگر تکرار بر لزوم ادبی به مستند اولورسه اول وقت مغل فصاحت اولمازه نته کم (عارف اول عارف که یوقدر فرقی اصلا عارفه * کوشه لحدک کنار مادر و کوهوارمدن) بیتنده تکرار ایدن * عارف ، لفظلری فصاحتی اخلال ایتمه مشدر .

۳ — ضعف تألیف — کلامک قاعده نحویه به مغایر اولارق ترکیب و تألیف اولونماسی کیفیتندن عبارتدرکه بوده تقدیمی لازم کلن برکلمنک تأخیری و تأخیری لازم کلنک تقدیمی و ایرادیرنده اهل و اهل ایراد ایله کلملرک ترکیبیرنده برنوع مناسبتسزلک بولونمقدن نشأت ایدر: مثلاً « بوغزویاتک هیچ بر وقتده سزه یاقیشور شی اولدیغنی تصدیق ایدهم » دیه جک یرده « بوغزویاتک سزه تصدیق ایدهم هیچ بر وقتده یاقیشور شی اولدیغنی » دینلمسی و کذا قاج سنه در قلمه دوام ایدیورسکمز؟ سوالنه (بش سنه در) دیه جک یرده « ایدیوروز دوام قلمه بش سنه در » دیه جواب ویرلمسی ضعف تألیفی حاویدر.

۴ — تعقید — کلامک معنای مقصوده دلالتی ظاهر و آشکار اولمامقدر . بوده یا الفاظه عائد اولان ضعف تألیفدن نشأت ایدوب « تعقید لفظی » دینور و یاخود معنای لفظدن متکلمک مقصودی اولان معنایه ذهن سامعک انتقالنده واقع اولان خللدن ایلرو کلوب « تعقید معنوی » تسمیه اولونور.

مثال: ۱

بك زياده سنى كوردكده ممنون اولورم

مثال: ۲

صباحه قاله شمعز يوسف آسا اولما داملكش
بزم انكشتمزدن دستمز اى ماه كوتهدر . . كى كه

برنجى مثالده زياده لفظى ممنون اوليورم فعلنك قيدي ايكن
انكله برلكده كتيرليوبده كوردكده جمله سنك اوست طرفنده
بولونماسى كلامى تعقيد ايتمش ومعناى مقصود « سنى كوردكده
بك زياده ممنون اولورم ، ايكن (بك زياده سنى كورديكم زمان
ممنون اولورم، آز كورورسه ممنوم اولم) معناى منفهم اولمشدر.
ايكنجى مثالده شاعر قيصالان موسى دسته و اوزانان قيتلى
انكشته تشبيه و دستك قيصالغنى دخی عجزدن كنياه ايتمش بناء
عايه كلام بك زياده تعقيد ايدلمشدر .

۵ - تتابع اضافات - اوچدن زياده كلمه لرك متواليا
بربرينه مضاف قيلنمسي يعنى ايكيدن زياده اضافتك تواليسيدر.
تتابع اضافات ، اضافت بمحنده بيان اولونان اساليب ثلاثه نك
هپسنده وقوعبولور . سكان دارالسلطنه ، اكبر جميع الناس -
شكوفه حديقه اصفهان ، حكاية كتاب كلستان - كتابك قابنك
زینتى ، قوناغك قپوسنك كليدى كى .

اسلوب تركى اوزره جريان ايدن اضافتك ايكي درجه
تواليسى جائز ايسده ايكيدن زياده سنك تواليسى مغل فصاحتدر:

۱ — باشانك كوشكنك قېوسى

۲ — اقدینك اوینك قېوسنك حلقه‌سى

كاف ایله اولان اضافت‌لرده (اضافت لامیه‌لرده) ثقلت زیاده اولدینی جهتله بردن زیاده‌سنك توالیسندن (ضرورت اولمادجه) اجتناب ایتملیدر.

بعضاً ایکیدن زیاده اضافتك توالیسی - ضرورته بناء - مغل فصاحت عد اولونماز : التنجی الایك دردنجی طابورینك اوجنجی بلوكنك الخ کبی .

اسلوب فارسی اوزره ایکی اضافتك توالیسی اکثریتله فصاحتی اخلاص ایلدیکی کبی ایکیدن زیاده‌سی دائماً مغل فصاحتدر : استماع ترنمات طیور آشیانساز . . . - استبداع صنایع صانع بی چون و چرا . . . الخ کبی .



یوقاروده « علم معانی » بی (کلامك مقتضای حال و مقامه کیفیت تطبیقندن باحث بر قدر) دیه تعریف ایتمش ایدك .
کلام - بر نسبت تامه یه دلالت ایدن جمله‌در . بوراده تعریفی نسبت تامه ایله تقیید ، نسبت ناقصه‌دن احتراز ایچوندور زیرا کلمه‌لر بیتنده ایکی درلو نسبت واردور . بری «نسبت تامه» دیگرى «نسبت ناقصه» در .

نسبت تامه ، متکلمك سکوتی جائز اولاجق و مخاطبه بر فائده تامه ویره‌رك باشقه بر سوزه انتظاردن مستغنی قیلاجق

صورته اجزای کلامك ایجاباً و سلباً بر برلرینه تعلق و ارتباطند.
 عبارتدرکه بونلردن نسبتی حاوی اولانه (مسند) و کندیسچیون
 نسبتك مفهومی ثابت و یا غیر ثابت اولانه (مسند الیه) دینور.
 نسبت تامه ، خبرك مبتدایه و فعلك فاعله اولان نسبتلریدر.
 مثلاً : احمد افندی کلدی ، حسن افندی کلدی ، یرئووارلاقدر ،
 کیجه آیدینلق دکلدیر کبی که بو کبی نسبت تامه یه دلالت ایدن
 جمله لره «کلام» دینور . مذکور مثالدرده نسبتی حاوی اولان
 [کلدی ، کلدی ، یووارلاق ، آیدینلق] کله لری «مسند» و [احمد
 افندی ، حسن افندی ، یر ، کیجه] کله لری «مسندالیه» اولوب
 بونلر بیننده کی نسبتده دخی (اسناد) تسمیه اولونور . دیمک اولیورکه
 کلام ، «مسند» ، «مسندالیه» ، اسناد» ناملریله اوج امردن عبارتدرکه
 هر برلرینك احوالی اشاعیده آیریجه تفصیل اولونا جقدر .

اشبو نسبت تامه نك خارجده مطابق (کرچک) و یا غیر
 مطابق (یالان) اولاجنی بر نسبت وار ایسه یعنی نسبت
 موجوده نك صدق و کذب احتمالی وار ایسه اکا «نسبت تامه»
 خبریه و آنی محتوی اولان کلامه دخی «خبر» و یا «جمله خبریه»
 دینور . اگر کلامده کی نسبت خارجده متعلق اولمایوب کندی
 تفصیله قائم اولورسه آکا «نسبت انشائی» و آنی احتوا ایدن
 کلامه دخی «انشاء» و یا «جمله انشائی» دینیر که نسبت خارجیه سی
 اولمادیغندن بونده صدق و کذب دلالت احتمالی متصور دکلدیر .
 مثلاً (محمد افندی اوده در) دینلده کده محمد افدینك اوده

بولونماسی یا طوغریدر یا خود یا لاندیر . اکر فی الواقع اوده ایسه نسبت صادق ، دکلسه کاذب اولور . « اوده دکلدیر » دینلدکده حال ینه بویله اولوب جمله لر « جمله خبریه » اولورلر . لکن (مکتبه کیت - درسه چالش - خیلازلق ایتمه) جمله لر نده نسبتلرک صدق و کذب متصور اولمایوب کندی نفسلریله قائم اولدقلرندن بونلرده برر «جمله انشائیة» اولورلر .

نسبت ناقصه ، صفتک موصوفه ، حالک ذوی الحاله ، مضافک مضاف الیه اولان نسبتلریدرکه بونلر بر حکمی مفید اولمادیغندن : اوصولو چوجق ، او قودینی حالده ، کمال افندیسک قرداشی کبی ترکیب وصفی و حالی و اضافیلر نه جمله ونه کلام صاییلیر . بناء علیه متکلمک سکوتی جائز اولمایارق مخاطب س-وزک کیروسی واردر دیه انتظاردن خالی اولاماز .



جمله انشائیة

یوقاروده دخی تفصیلاً بیان اولوندینی اوزره « انشائی » صدق و کذب احتمالی اولمایان جمله درکه (طلبی) و (غیر طلبی) نامیله ایکی قسمدر .

(انشاء طلبی) - وقت طلبده موجود اولمایان بر شیئی طلب ایچون قوللانیلان جمله درکه (امر ، نهی ، تمنی ، استفهام . ندا) قسملرینه آیریلیر .

امر، نهی — برایشك اولماسنى ويا اولماسنى طاب
 ايچون قوللانيلان جملهلردر كه بونلر صيغه امر ونهيك حاضر
 وغائب شخصلرندن ياييلير . مكتبه ايركن كيت ، درسه چالش ،
 وقتك بيهوده كچمه سين كي كه برنجي ، ايكنجى جملهده ايشك
 اولمىسى و اوچنجى جملهده اولماسى امر و طلب اولونديغىدن
 جملهلر انشاء طليينك امر ، نهى قسمندن اولمش اولور .

جمله انشائيده اولان امر و طلب اكر على طريق الاستعلايعنى
 بيوكدن كوچكه اولورسه اكا « امر » و اكر كوچكدن بيوكه
 اولورسه « دعا » و ياخود « رجا » و اقران ييننده اولورسه ا كاده
 « التماس » دينيلور . مثلاً افدينك اوشاغنه خطاباً « ترزى يه
 كيت ، البسه مى آل ، تيزجه كل » كلامى امر ، و بركنساهكار
 قولك جناب حقه خطاباً « الهى كناهمى عفو ايت ، بنى محشرده
 رذيل ايمه » كلامى رجا و نياز ، ورؤسادن برينك ديكرينه
 « مرحمت ايديكز شوققيرى برايشده قوللانيكز » كلامى ايسه
 التماس قيليندن اولمش اولور .

بعضاً امر ونهى تسويه ايچون اولور : (كل كله ، بن
 كيدرم كي كه سنك كلوب كله مهك مساويدر . ديمك اولور .

وبعضاً تحذير وتهديد ايچون اولور : نته كيم چفته لى حيوانك
 ياننه صوقيلان كيمسه يه « صوقولمه چفته آتار ، و « سن درسكه
 چالشا امتحان زمانى كوروشورز » دينلديكى كي .

انشاء تمنی — برایشك اولماسنی ویا اولماسنی آرزو و تمنی
[*] به دلالت ایدر جمله در .

لسانمزد « حکایه فعل التزامی » ، « حکایه التزامی » شرطی ،
« روایت التزامی » ایچون مستعمل فعللرله « کاشکی » ، « باری »
« تئک » اداتلری تمنی موقعنده استعمال اولونور . فقط اشبو
اداتلر فعل تمیندن اول کتیریلیر :

کشکه (کاشکی) درسمی اوقویه ایدم ، باری اوکسه ایدی
بن کیدردم ، بن اورایه کیدردم تئک اوبورایه کله سیدی کی .

انشاء استفهامی — برایشك اولوب اولمادیغنی سوال ایچون
قوللانیلان جمله درکه ارکان و متممات جمله دن برینک آخرینه
ادات استفهام اولان « می » لفظی و یا خود جمله نك اولنه دیکر
ادات استفهام زیاده سیله یایلیر : درسه چالشیورمیسك ؟ یازدیغك
مکتوبمیدر ؟ نرمدن کلیورسك ؟ هانکی اوسز کدر ؟ کی .

ترکجه استفهام اداتلری (نه ، کیم ، ناصل ، قاچ ، هانکی ...)
کله لریدر .

کیم : لفظی ایله ذوی العقول دن ونه : لفظی ایله ذوی العقولک
غیری هر شیدن سوال اولونور : کیم کلدی ؟ کیمی کوردک ،
نه اوکر نه بیلدک ؟ نه سویله یور ؟ کی .

[*] تمنی : لغتده اوزله مک دیمکدر . اصطلاح فنده بر شیشی
منحصرانه ایسته ک ایله مکدن عبارتدر .

ناصل [°]: لفظی ایله کیفیت و افعالدن سوأل اولونور:
ناصل شیدر. فلان ایش ناصل اولدی کبی.

قاچ: کمیت و مقداردن سوأل ایچوندر: قاچ کون اوله یور؟
بو قاچ اوقه در؟ آیک قاچیدر؟ کبی.

هانکی: تردد اولونان بر قاچ شیدن برینی تعیین ایچون سوأل
موقعنده قوللانیلیر: هانکیسی کلدی؟ هانکیسی سورسک؟
هانکیسی الاجقسک؟ کبی.

تنبیه — (می) ضمیر نسبی و فعلیلردن اول کتیریلیر سده
ماضی شهودیلرله فعل شرطیلرده ضمیرلردن صوکره کلمک و افعال
مرکبه نك دخی جزء اولنه لاحق اولمق شیوه لسان ترکی مقتضایه
سندندر. نتکم صرفده کورولدی.

نرا — لغتده چاغیرمق دیمکدر. اصطلاح فنده حرف
ندا ایله مخاطبک توجه و اقبالی یعنی یوزدوندومه سنی ایسته مکدرکه
متکلم یعنی ایسته یینه «منادی» و مخاطبه دخی «منادی» نامی
ویریلیر.

ترکجه ده اکثریتله مستعمل اولان ندا حرفلری (ای،
هی، بهی، آ) حرفلریله عربی اولان (یا) حرفیدرکه بونلرک
هر بریسی «سنی چاغیریورم»، «بکا باق»، دیمک یرینی طوتار.
نته کیم: آجوجق نیچون درسکه چالشمایورسک جمله ندائییه سند.

[°] ناصل: نه اصلدن مخففدر.

« آ » حرف ندا و « چو جق » منادی اولوب آ حرفی « بکابق »
یرینه قائم اولمشدر .

« یا » حرفی اشعاره منحصر کیدر .

نحو ترکیده بیان اولوندینی اوزره ترجمه علمله حرف ندا
کتیرلر . اکر متکلمک مقصدی مطلقا مخاطبی چاغرمق ایسه
« ای صالح افندی » دیمه یوب حرف نداسر « صالح افندی »
دیو چاغرر . فقط سسینه بر آهنگ ویررکه ایشته او آهنگ ،
حرف ندا یرینی طوتار .

نحوک ادوات بحثده بیان اولوندینی اوزره « هی ، بهی ، آ »
حرفلری جوق کره [°] مقام توبیخ و عتاب و استحقارده
قوللایلیر : (هی احمق) یا خود (بهی سرسم سنک مراما کلایه جفک
یوق) و (آتبل شمدی به قدر زرده ایدک) دیو مخاطب
استحقار و توبیخ و (آ اوغلم سن سوز دیکله میورسک) دیو
عتاب اولونور .



(انشاء غیر طلبی) موجود اولمایان بر معنایی ایقاع اتمکدرکه
بوکا « انشاء ایقاعی » [°°] دخی دینور .
انشاء غیر طلبی دخی اوچدر .

[°] توبیخ ، عتاب : ازارلامق . استحقار : خوارلامق ، حقیر کورمک .
[°°] ایقاع : وقوعه ، ظهوره کتیرمک .

(۱) — ترجی در . ترجی اومق دیمکدر که حصولی محقق اولمایان امر مرغوبك وقوعنی کوزتمکدر .
 شو معنایی حاوی اولان جمله لرده : احتمال که ، بلکه ،
 مأمول که ، اومارم که ، اوله که کبی لفظلر قوللانیلیر : مأمول که
 یارین بوخسته اینی اولور . هنوز عودت ایتهدی احتمال که یاقینده
 کلیر ، اوله که جناب حق جمله منری غفلتدن ایقاظ ایلیه کبی .
 بعض کره مقام ترجیده « انشالله » ترکیبی دخی قوللانیلیر :
 انشالله یاقینده کسب افاقت ایدرسکز کبی .

(۲) — تعجب در . تعجب ، غریب برشی کورولمه سندن
 نفسه عارض اولان حالدر که ترکیه ده بوکا « شاشمق » دیرلر .
 ترکیه ده تعجب اداتی « نه » لفظیدر که تعجب اولونان شینک
 اولنه کلیر : نه کوزل یازی ، نه اعلی او قودی کبی .
 حال تعجب بعضاً عربی اولان « عجایب » لفظیله کوستریلیر :
 عجایب ! عمر مده بویله برشی کورمدم کبی . بومقامده بعضاً فارسی
 اولان « زهی ، لفظی کتیریلیر :
 مثال :

زهی ذاتک نهان واول نهاندن ماسوا پیدا

بحار صنعکه امواج پیدا قعر نابیدا

« زهی » لفظی انشای مدح واستحسانه موضوع ایسه ده

بعضاً تهکم طریقیه مقام ذم وتقییده استعمال اولونور : زهی

غیرت ! زهی حیت ! زهی تصور باطل ! کبی .

«سبحان الله»، «ما شاء الله» ترکیب لریده تعجب مقامنده قوللا-
نلدینی اکثر در .

(۳) — انشایه نقل اولونان خبر لردر که اشبو جمله خبریه لردن
اخبار قصد اولونمایوب دیگر اغراض مخصوصه مقصود اولور .
مثلا : الش ویر شده صاتان والان بیننده جریان ایدن «صا تدم» ،
«الدم» و نکاح جمعیتند ایکی طرف وکیللرینک امام افندی
طرفندن اولونان سؤالره جواباً «الدم» ، «ویردم» کله لری کبی که
بونلردن اخبار قصد اولونمایوب مجرد عقد بیع و نکاح مقصود در .
یوقاروده تعریف و بیان اولونان کلامک اجزاسی ایکیدر :
یا «عمده» اولور و یا خود «فضله» اولور .

«عمده» کلامک رکنلرندن معدود اولان (مسند الیه) ایله
(مسند) در . «فضله» ایسه بونلرک مضاف الیه ، صفت . . الخ
کبی قیوداتیله متممات جمله و متعلقات فعلدن عبارتدر که بونلرک
هربری ارکان کلامدن خارجدر .

کلامک اخراجنده سالف الذکر ارکان کلامه برطاقم حاللر
عارض اولور که هر برلری بوجه آتی بیان اولونور :

فصل

{ مسند الیهک احوالی }

مسند الیه عارض اولان احوال بوجه آتی :

(۱) — مسند الیهک ترکی .

(۲) — مسند اليهك ذكري.

(۳) — مسند اليهك تعريف وتنكيري.

(۴) — مسند اليهك توصيفي.

(۵) — مسند اليهك تقديم وتأخير.

كبي اموردن عبارت اولوب بونلرك هر برينك مقامات
مختلفه سي اجمالاً بيان اولونور :

۱

{ مسند اليهك تركي }

مسند اليه مواقع آتیه ده ترك اولونور :

۱ — کلامده سهؤال قرينه سي بولونور سه تکراردن
اجتناباً مسند اليه ترك اولونور . مثلاً : احمد اقدی کلامی ؟
سؤالنک جوابنده (کلامی) دینلوب « احمد اقدی ، مسند اليه
ترك اولونور . چونکه سؤالده ذکری قرينه اولدیغنی مخاطب
بیله دیکی چون جوابده ذکر ایتمهک لزوم کورمز ،

۲ — موقع تعظیمده مسند اليه ترك اولونور . مثلاً : بر مستدعی
رجائی بر بیوک ذاته عرض ایله منی بر کیمسه دن التماس ایدوبده
مستدعی « ناصل اولدی ، دیمسه جواباً او آدم (او ذات عالی
رجائی قبول بیوردی) دیه جک یرده مسند اليه اولان « ذات ،
لفظانی تعظیماً ترك ایدوب (قبول بیوردیلر) دیمسی کبی . و کذا

افندی حضرتلری تشریف ایتدیلرمی ؟ سؤالنه ویریلان
(تشریف ایتدیلر) جوابی دخی بو قبیلدندر .

۳ — موقع تحقیرده مسندالیه ترك اولونور . مثلاً : بر
کیمسه نك شایان حرمت بر ذاته قارشو ایاقلرینی اوزادارق
اوتوردیغنی کورن بر ذات، دیکرینه خطاباً (هله باق ناصل
اوتوریور) دهرک او کیمسه نك مسندالیه اولان اسمنی ترك
ایتمسی کی .

۴ — لدی الاقضا انکار ایتمک ملاحظه سنه مبنی مسندالیه
ترك اولونور . مثلاً : موضوع بحث اولان بر کیمسه حقنده
حاضروندن بری « شویله در ، بویله در » دهرک ایجابنده مقصدم
او کیمسه دکل ایدی باشقه سی ایدی دیه انکار ایده بیلمک ایچون
مسندالیه اولان اسمنی ترك ایتمسی کی .

۵ — مخاطبک غیر یسندن کتم ایتمک نکته سنه بناءً مسندالیه
ترك اولونور . مثلاً : حاضر بالمجلس اولان افندی نك کیزلیجه
کورمسنی ایستدیکی بر ذاتک کلدیکنی اوشاغی (کلدی) دیه
خبر و یروب مسندالیه اولان اسمنی ترك ایتمسی کی .

۶ — ضیق وقتده یعنی ذکریله فرصتک ضایع اولاجتی
ملاحظه اولونان موقعنده مسندالیه ترك اولونور . مثلاً : بر
خرسزی تعقیب ایدن کیمسه راست کلنلره (شوکیدن خرسزدو
طوتیکز) دیه جک یرده (خرسزدر) دیوب مسندالیه اولان
« شوکیدن ، لفظن ترك ایتمسی کی .

{ مسند الیهک ذکر }

مسند الیه مقامات آتی‌دهه ذکر اولونور:

۱ — ذکر عبث اولمایان هریرده ذکر اولونور .

۲ — مسند الیهک قرینه ایله حذفی ایجاب ایدن مقام .

کندیسیله تبرک اولوناچق بر مقام ایسه اول زمان مسند الیهک ذکر ای احسندره . مثلاً: بریسنک (حضرت پیغمبر صلی الله تعالی علیه وسلم افندمن قاج یاشنده آخرتی تشریف بیوردیلر) سوائنه قرینه‌نک وجودینه بناء « الشمس اوج یاشنده » دیه جواب ویریله بیلیرسه ده تبرکاً مسند الیه اولان « حضرت پیغمبر » لفظ شریفی دیگر لواحقیه برابر ذکر اولونارق (حضرت پیغمبر صلی الله تعالی علیه وسلم افندمن الشمس اوج یاشنده آخرتی تشریف بیوردیلر) دینلمسی کی .

۳ — مخاطبک غباوتنه بناء نئییه قصد اولونان یرلرده

مسند الیه ذکر اولونور . مثلاً بریسنی بکله‌ین احق بر آدمک اوشاغی اوکیسه‌نک کلدیکنی خبر ویرمک ایچون (کلدی) دیمک کفایت ایدرسده انتقال ایدمه‌یه چکی اوشاق بیلدیکی جهته مسند الیه اولان اسمیده ذکر ایدرک (حسن اغا کلدی) دیمسی کی .

۴ — تعظیم و تحقیر واقفخار موقعلرنده ذکر اولونور .

مثلاً: عثمان غازی کیمدرو؟ سوآلنه (عثمان غازی دولت ابد مدت عثمانیه نك مؤسسیدر) وهلا کو کیمدرو؟ سوآلنه (هلا کو بر ظالمدر) وهانکی تبعه دنسك؟ سوآلنه (دولت علیه عثمانیه تبعه سندنم) یوللو ویریلن جوابلر کبی که بونلرده سوأل قرینه سیله مسند الیهك ترکی ایجاب ایدر ایکن تعظیم و تحقیر و افتخار ایچون ذکر اولونمشدر.

۳

{ مسند الیهك تعریف و تنکیری }

مسند الیهده اصل اولان معرفه اولقدردر. مسند الیه صور آتیه ایله تعریف اولونور.

۱ — اضمار ایله تعریفدر که مقام تکلم و خطاب و غیبتده ضماثر شخصیه ونسییه استعمالیه اولور.

۲ — علمیتله تعریفدر. بوده مسند الیهی کندینه مخصوص اسم و لقب ایله ذکر ایتمکدر. حسن، حسین، عبد الرحیم، ابو البشر کبی.

۳ — صله ایله تعریفدر. بوده مخاطبک بر کیمسه بی بیلمه سی او کیمسه نك احوال مخصوصه سندن بریسنی ذکره محتاج اولدیفی، اسمنك ذکر ی قبیح عد ایدلیدیکی محللر ایله، حکمک سببنی بیان قصد اولوندیی، مخاطبک خطاسنی اخطار لازم کلدیدیکی مواقعه جریان ایدر: کچن کون فلان یرده کوردیکمز کیمسه

فاضل بر ذاندر - سبیلیندن چیقان شی ابدستی بوزار - علم
ومعارف تحصیل ایدن مسعود اولور - دوست صانیدیك آدم
باق سکا نلر یاپدی کبی.

۴ - اسم اشارتله تعریفدر. بوده مسند الیهك اسماء اشاراتدن
بریسيله ذکر و ایرادیدر که اکثریا تحقیر و بیان حال قصد اولونان
یرلرده جاری اولور : بو آدم سویلدی ، ایشته بو او آنکدر
حالا اتمام ایده مدی کبی.

۵ - اضافتله تعریفدر : سنك قرنداشك کلدی . انك
باباسی کیتدی کبی.

مسند الیهده اصل اولان معرفه ایسهده بعض کره تعظیم ،
تفخیم ، ذم کبی مواقعهده نکره کتیرلمسی التزام اولونور : بر
سخاسی وارکه خاتمله حیرت ویرر ، برمشکله تصادف ایتدم که
حالا ایچندن چیقاما یورم ، برحالی وارکه عالمی نفرت ایتدیرر کبی.

۴

{ مسند الیهك توصیفی }

مسند الیهك توصیفی اکثریا رفع احتمال ایچوندر : صاری
کل ، سیاه آت کبی .

مسند الیهك توصیفی بعض کره مدح و ذم و ترحم معنالری
مشعر اولور : بنده صادق ، وزیر عاقله ، ذات مبارک ، شخص
دنی ، مرد جاهل - زواللی چوجق ، یچاره آدم کبی .

{ مسند الیهک تقدیم و تأخیری }

مسند الیه محل حکم و مدار افاده اولدیفتمدن بر قاعده
 مسند اوزرینه تقدیم اولونورسهده بمضاضرورت شعریه و معنای
 قصر افاده سی ایچون تأخیر اولونور : (انساندر عمر وقوعات
 نیک و بد و صبر ایت کمال محنته این نیز بگذرد) بیتله اودر بوکا
 سبب) جمله سنده اولدیفنی کبی که بیت مذکورده مسند الیه اولان
 نیک و بد، وزن و قافیه نک توافقی ایچون و جمله ده دخی مسند الیه
 اولان سبب افاده قصر ایچون تأخیر قیلنمشدر که آنجق اودر
 معناسی مستفاد اولمشدر .

فصل

{ مسندک احوالی }

مسند عارض اولان احوال بوجه آتی :

(۱) — مسندک حذفی

(۲) — • ذکر

(۳) — • تعریف و تنکیری

کبی اموردن عبارت اولوب هر برینک مواقع مختلفه سی
 اجمالاً بیان اولونور :

۱

{ مسندك حذفی }

مسندده، مسندالیه کی کلامده سؤال قرینه سی بولونورسه
تکراردن اجتناباً حذف اولونور . مثلاً: «بوکتابی کیم اوقیوره
سؤالنه (بن اوقیورم) دینله جک یرده مسند اولان اوقیورم
لفظی حذف اولونارق یالکمز (بن) دینلمسی کی .
عباره ایکی جمله لی اولورسه بعضاً جمله نك برندن اختصاراً
مسند حذف اولونور : علم تحصیل ایله ، فضیلت علم و معرفتله
کسب اولونور کی که برنجی جمله دن (کسب اولونور) مسندی
حذف اولونمشدر .

۲

{ مسندك ذکر ی }

کلامده مسندك حذفنه دلالت ایدم جک برقرینه اولمازسه
مسند ذکر اولوندی کی قرینه ضعیف اولورسه احتیاطه رعایه
تعظیم ، تهدید ، تبرک ، اقتضای مقصود اولان یرلرده دخی ذکر
اولونور : (یرلی ، کوکلری کیم یاراتدی) سؤالنک جوابنده
تبرکا (عالمی یوقدن وارایدن اه تعالی و تقدس حضرتلری یاراتدی)
و « شو چشمه یی کیم یاپدردی » سؤالنک جوابنده تعظیماً (سلطان
سلیم خان حضرتلری یاپدردی) و « بوچو جنی کیم دوکدی » سؤالنک
جوابنده تهدیداً (نه ییاجقسک ؟ ایشته بن دوکدم) و برخرسزی

طوتان کیمسه نك بونی کیم طوتدی سوانك جوابنده افتخاراً
(بن طوتدم) دینله رك [یاراتدی ، یاپدردی ، بن دوکدم ،
طوتدم] مسندلرینك ذکر اولونماسی کی .

۳

{ مسندك تعریفی وتنکیری }

تعریف حصره دلالت ایتدیکندن کلامده حصرك عیدم
وجودینی ارانه قصد اولونورسه مسند نکره اولارق کتیریلیر:
احمد افندی کاتبدر ، صالح افندی خطاطدر . جمله لرنده اولدینی
کی . تحقیر وتفخیم موقعنده دخی مسند نکره کتیریلیر : صالح
افندی برشی دکلدز ، سعادت هنروز ایچوندر . جمله لرنده
اولدینی کی .

مخاطبه حکماً معلوم اولان بر شیئی افاده قصد اولونورسه
مسند معرفه اولارق ایراد ایدیلیر: احمد افندی سنك پدرکدر ،
صالح افندی شو اوتوران کیمسه در کی .



{ متعلقات فعل }

مسند و مسندالیهلر کی مفعوللرده دخی بروجه آتی حذف
و ذکر و تقدیم و تأخیر و قوعه کلیر . شویله که :
قرینه ظاهره . موجود اولوبده مفعولك ذکر ی عبث

کوریلیرسه حذف اولونور : (بروسه یه کیتدکی) سـوألنک
جوابنده (کیتدم) دینیلرکه بروسه یه کیتدم دیمک اولوب مفعول
صریح حذف اولونمشدر. وکذا (بورایه نه چوق کلوب کیدیورسک)
دینیلرکه بورایه نه چوق کلوب بورادن نه چوق کیدیورسک
دیمک اولوب مفعول غیر صریح حذف اولونمشدر .

ابهامی بیان تعقیب ایدرسه ینه مفعول حذف اولونور :
(او امر ایتدی بن کلام) دینیلرکه امر ایتدی ابهام اولوب
آنی کلدی بیانی تعقیب ایتمش و بناء علیه (کله یی) مفعولی حذف
اولونمشدرکه عباره (او کله یی امر ایتدی بن کلام) تقدیرنده دره
بعضاً انکاره مجال اولوق ویا کلامی اختصار ایتک ایچون
حذف اولونور : (اه خیرینی ویرسون) ، کتیر کوره یم) کبی که
« آنی » مفعولی حذف اولونمشدر .

نحو قسمنده بیان اولوندینی اوزره عبارده اولو مفعول
صریح محلر صوکره غیر صریح محلر ودها صوکره فاعل واک صوکره
فعل کلمک شیوه لسان عثمانی اقتضاسندن ایسه ده بعض یرلرده
بونلر بیننده تقدیم و تأخیر جائز اولور . شویله که عبارده فاعلک
اهمیتی عالی اولدینی تقدیرده مفعوللر تأخیر قیلنور : (فلان ذات
بر فقیره عطیه ویردی) جمله سنده اولدینی کبی .

افاده قصر ایچون مفعول صریح محلر غیر صریح محلردن صوکره
کله بیلیر : چارشویه احمدی کوندردم کبی که کوندردیکم آنجق
احمددر باشقه سی دکلدرد دیمکدر .

مسند الیه معرفه اولورسه مفعوله تقدیم اولونور : (احمد
 افندی کچن هفته بورایه کلدی) جمله سنده اولدینی کی .
 مفعول به معرفه اولورسه مفعول الیه تقدیم اولونور :
 (بن اوقلمی سزه ویزدم) جمله سنده اولدینی کی بعضاً مفعول
 بهده مفعول الیه عائد بر نسبت بولونورسه مفعول الیه تقدیم اولونور :
 (احمد افندی به ایشله مدیکی قباحتی عزو ایمشالر) جمله سنده
 اولدینی کی .



{ متممات جمله }

متممات جمله ، یوقاروده بیانی کچن متعلقات فعل ایله حال
 وتمیزدن عبارتدر . کلامک بونلر ایله تقيیدی فائده نك اتمام
 و تزیدی ایچوندر . زیرا کلامده بونلردن نه قدر زیاده قید
 بولونورسه فائده او نسبتده اکمل اولور .

کتابک قسم نایسنده حال وتمیز حقنده ویریلان معلومات
 کافی اولدیغنه ودها زیاده تفصیلات اعطاسنه کتابمزه کجی غیر
 مساعد بولوندیغنه مبنی بوراده ایضاحات زائده اعطاسندن
 صرف نظر اولوندی .



فصل

{ وصل — فصل }

« وصل ، یتشدرمک ، فصل ، آیرمق دیمک ایسهده »

علم معانی اصطلاحنده کلام و کلماتی بر برینه عطف و ربط اتمیه
 « وصل » و بر بردن آیرمایه « فصل » اطلاق اولونور . مثلاً :
 « حسن ، عثمان ، علی کلدی » دیدیکمزده حسن ، عثمان ، علی
 هر تقدیر بر حکم داخلنده جمع اولدیلسده حرف عطف
 واسطه سیله بر برلینه مربوط اولما دقلرندن بوکا « فصل » دینور .
 فقط تأکید حکم قصد اولوندینی تقدیرده فصل جائز اولمایوب
 « حسن ده عثمان ده علی ده کلدی » دیمک ایجاب ایدر که بوکا
 مماثل افاده لره « وصل » اطلاق اولونور .

لسان عثمانیده مستعمل ادوات عطف [و ، صوکره ، تا ،
 یا ، اما ، بلکه ، دخی - ده ، یاخود ، یوقسه ، لیکن ، هم] کبی
 کلمه لر در که بونلرک معانی مستعمله لری ادوات بخشنده آیری آیری
 ذکر و بیان اولوندی .

(و) عربیدن مأخوذدر . عربیده اولدینی کبی لسان
 عثمانیده دخی ادوات عطف اولارق مطلقاً جمع ایچ-ون اولوب
 معطوف ایله معطوف علیهی جمع ایدر . « حسن کلدی ، علی
 کلدی » دینیله جک یرده « حسن و علی کلدیلر » دینور .

مثال مذکورده اولدینی اوزره ایکی مفردک بر حکمده
 تشریکی مرام اولوندینی زمان مفردلر بربری اوزرینه عطف
 اولوندینی مثللو ایکنجی جمله نك برنجی جمله یه حکمده تشریکی
 مقصود اولدینی وقت جمله ده جمله اوزرینه عطف اولونور .
 و او ایله عطفده معطوف ایله معطوف علیه بیننده جهت جامعیه

بولونماسی مشروطدر . اگر بولونمازسه حرف عطف ایله دکل
بربرینه خلاطله باغلانسه ینه جمله وکلمات بربرینه یاقلاشماز .
« جهت جامعه » معطوف ایله معطوف علیهی ذهنده جمع
ایده جک بر علاقه و مناسبتنه دینیر که بوده : عقلی ، وهمی ،
خیالی اولور .

(جهت جامعه عقلیه) — عقلك قوه مفكرده جمع ایده جکی
اشیا بیننده اولان علاقه حقیقه در . بوده « تامل ، تضاد ،
تضایف » نامیله اوج نوعدر .

تمائل : ایکی شی بری برینک مثلی اولمقدیر یعنی ایکی شیدک
نوعده اتحاد ایتسیدرکه مشخصات خارجیه لرندن تجرید ایدلسه لر
ارالرنده کی تعددی عقل قوه مفکرده دن رفع ایده رک اوایکی شی
متحد اولور . بو کبی شیلر حقیقه ده متفق اولوب احوال
عارضه ده مختلفدر . مثلاً (حسن ایله بکر) کبی که بونلر بیننده
شکل و سیما و سائرجه تخالف و تعدد وار ایه ده نوعده یعنی
انسانیتده متحددرلر . بونلرک شکل و سیما و سائر احوال
عارضه لرندن صرف نظر ایدلسه عقل قوه مفکره یالکنز
انسانیتلرینی ابقا ایدر : مثلاً (احمد درس او قویور ایدی و صالح
یازی یازیور ایدی) عبارده سننده ایکنجی جمله برنجی جمله اوزرینه
واو ایله عطف اولونمش اولوب بوراده احمد ایله صالح بیننده
تمائل اولدینی کبی فعللر دخی نوعیتده متحد یعنی هر ایکسیده
فعل حکایه اولمسیله تمائل بولوندقلرندن عطف مقبولدر .

تضاد : ایکی شی بیننده اولان کمال ضدیت و تقابله درکه او ایکی شی بر برینک محلیه توارد ایدر یعنی بری کیدرسه دیکری البته کلیر : کیجه ایله کوندوز ، آق ایله قاره ، حرکت ایله سکون ، علم ایله جهل کبی . مثلاً « عالم مرغوب و جاهل منفوردر » عبارته سنده معطوف ایله معطوف علیه بیننده تضاد بولوندیغندن عطف مقبولدر . چونکه جمله لرده کی عالم ایله جاهل بیننده تضاد بولوندیغنی کبی مرغوب ایله منفور بیننده دخی تضاد موجوددر .

تضایف : ایکی شیدن برینک قوه مفکرده حصولی بالضروره دیکرینک حصولنی مستلزم اولاندر . علتله معلول ، سببله مسبب ، اقل ایله اکثر ، ابوتله ، بنوت کبی که بونلردن برینی تعقل دیکرینی تعقله محتاجدر : مثلاً (احمدک باباسی کاتب واوغلی شاعردر) عبارته سنده معطوف ایله معطوف علیه بیننده تضایف بولوندیغندن عطف مقبولدر .

(جهت جامع و همیه) — بوده و همک قوه مفکرده جمع ایلیه جکی اشیا بیننده اولان علاقه موهومه درکه « شبه تمائل ، شبه تضاد ، شبه تضایف نامیله اوج نوعه آریلیر .

شبه تمائل : عقلک تضاد دیه ویردیکی حکمه و همک تمائل ذهابنده بولونماسندن عبارت بر جهت جامعدر : بیاض ایله آچیق صاری کبی که عقل بونلر بیننده تضاد اولدیغنه حکم ویرسهده بو ایکی رنگ بر برینه قریب اولدیغندن وهم بعض کره بونلر بیننده تمائل بولوندیغنه ذاهب اولور .

شبه تضاد : ایکی شی بیننده ضدیت تامه اولمایوب ضدیته یاقین بر حالت بولونمقدر : ارض ایله سما ، اول ایله ثانی کی که ارض ایله سما بیننده ارتفاع وانحطاط جهتیله ضدیت وارسهده بونلر بر برینک محله توارد ایده میه جکندن بینلرنده «تضاد تام» یوقدر . کذا اول ایله ثانی ضدیت وارسهده بونلرده بری برینک محله توارد ایتدکلرندن یکدیگرینه لیل ونهار کی ضدیت تامه سی اولمایوب بینلرنده شبه تضاد واردر .

(مهت هامة ضیالیه) — بر حالتدر که ایکی شیئک قوه مفکرده اجتماعنی عقل و وهم اقتضا ایتیهوب خیال اقتضا ایدر که بوکا (تقان فی الحیال) تسمیه اولونور . ایکی شیئک خیالده مقارن اولماسنک بر چوق مختلف سبیلری واردر . مثلاً : کاتب اولان شخصی [کاغذ ، قلم ، مرکب ، حقه] و مرانغوزه [بورغو ، کسر ، دستره] و ترییه [ایکنه ، ایملک . . . الخ] مثللو آلات وادوات لازم اولدیغندن هر صنفک خیالنده کندینک مألوف اولدیغنی شی ثابت اولوب دیگر صنفک آلات وادواتی خاطرینه کلز . عقلی ووهمی اولان شیلری هر کس ذهنتده جمع ایدرسهده خیالی اولانلرک قوه مفکرده اجتماعی هر صنفک اختلافیه مختلفدر . تقارن فی الحیال یالکیز ارباب صنایعک آلات وادواتی اولمایوب هر شیئک اوصاف واحوالی آنی ملاحظه ایدنک خیالنده تقارن ایدر .

ایشته بورایه قدر ذکر اولونان تقارن فی الحیال دخی ایکی جمله نک حرف عطفله وصلنده بعضاً موجود اولور .

واو عاطفه ایله برجهله یی دیگر جمله اوزرینه عطف، ایکی جمله یی بر حکمه جمع ایتمکدر . حکملرده اتحاد قصد اولونمازسه
 واو ایله عطف جائز دکلدر : (حسن افندی ادرنه دن استانبوله
 کلدی . کمال افندی ارتق ادرنه یه کیتمکدن وازچکدی) عباره سنده کی
 ایکی جمله نك حکملری بینده اتحادی ایجاب ایدر بر جهت
 بولونمادیغندن بونلرک واو ایله عطفی جائز اولاماز .

ایکی جمله نك حکملرنده نفی واثبات جهتیه اختلاف اولورسه
 عطفلری جائز اولاماز : (وهی افندی ادرنه یه کیتدی . تحسین
 افندی کیتدی) عباره سنده اولدینی کبی که عطفله « و تحسین
 افندی کیتدی » دینیله من .

جمله لرك بری ماضی دیگرى مستقبل معناسنی حاوی اولورسه
 ینا واو ایله عطفلری جائز دکلدر : (وهی افندی ادرنه یه
 کیتدی . تحسین افندی کیده جکدر) کبی که « و تحسین افندی
 کیده جکدر » یولنده عطف ایدیله من .

ایکی جمله نك بری اخباری دیگرى انشائی اولورسه ینا
 ینلرنده عطف جریان ایتمز : (بن اورایه کیده میه جکم . سن
 بورایه کل) کبی که عطفله « و سن بورایه کل » دینیله من .

فصل

« سبک و انشا »

کلامک شامل اولدینی جمله و متممات جمله لری مقتضای

حال و مقامه توفیقاً ترکیب و تنظیم ایتمه به « سبک و انشا »
 تسمیه اولونوزکه موصول، مفصول، مرکب نامیله اوچ قسمدر:
 سبک موصول — عبارته نك شامل اولدینی جمله و متممات
 جمله لری سالف الذکر وصل و عطف طریقله ایراد ایتمه به دینورکه
 مبحث مخصوصنده بیان اولوندینی اوزره جمله بیننده شرائط
 عطف و مناسبت تامه موجود اولور: احمد افندی کوزل یازی
 یازار وای شعر سویلر کی .

سبک مفصول — عبارته نك شامل اولدینی جمله و متممات
 جمله لری فصل طریقله اتیان ایتمه به دیرلرکه بوکی جمله و متممات
 جمله لر بیننده شرائط و مناسبت بولونا مایا جفندن یکدیگره وصللری
 جائز اولاماز: بوسوزی بن سویله یورم سن دیکله کی .

سبک مرکب — عبارته نك شامل اولدینی جمله و متممات
 جمله لردن بعضی وصل و بعضی فصول طریقله ایراد و اتیان
 ایتمکدرکه بواصول اوزون عبارته لرده اختیار اولونور: « افراد
 بشرک یکدیگره نسبتله درکار اولان قدر و مزیتی و بلکه حیوانات
 سائردهن نوع بشرک فرق و امتیازی جهتی انحق فضائل
 علمیله ایله در . بوضورتده هر بر آدم اسباب لازمه تحصیلیه
 یابیشوب هیچ اولماز ایسه کندیسنی انواع مشترکه حیوانیه دن
 تمیز و فریق چالشمالیدره کی که مثال مذکورده اولان فقره لرك
 بعضی فصل و بعضی فصل طریقله اتیان قیلنمشدر .

فصل

{ ایجاز، اطناب، مساوات }

معنای مقصودی متعارف اولان عبارت ایله ادا ایتمه
(مساواة) و بوندن اقل عبارت ایله ادا ایتمه (ایجاز) اندن
اکثر عبارت ایله ادایه ده (اطناب) تسمیه اولونور . عبارت
متعارفه دیمک اورتیه صنفده بولونان اهاالینک معاملات و محاوراتده
قوللاندقیری عبارت لردرکه مقصدلری معنایی دلالت وضعیه لریله
افاده دن عبارتدر .

ایجاز ، مقبول و مغل قسملرینه آریلیر :

ایجاز مقبول — معنای مقصودی شامل اولان عبارتده
ارکان جمله و یا متممات جهادن بعضی لرینک حذفیه مخاطبک
آ کلایاجنی صورتده کلامی اختصار ایتمکدر . اقدی بروسه دن
کلدیمی ؟ سؤالنک جوابنده (اوت کلدی) دینلمسی کی .

ایجاز مغل — اجزای کلامدن مغل فائده اولان برینی
حذف ایله کلامی ساممک آ کلایاجنی صورتده اختصار ایتمکدر :
بورساله نه دن بحث ایدیور ؟ سؤالنک جوابنده مفعول منه
اولان دعلم حسابدن ، جرئی حذف ایله (بورساله بحث ایدیور)
دیمک کی .

اطناب دخی مقبول و مغل قسملرینه آریلیر :

اطناب مقبول — ساممه ملال و یرمیه جک صورتده کلامی

اوزاتمقدر : اقدی حجن کادیمی ؟ سوائک جوابنده (اوت !
اقدی حجن کچن هفته کادی) دیمک کبی .

المناب محل — کلامی سامعه ملال ویره جک صـورتده
اوزاتمقدر : اقدی حجه کیتدیمی ؟ سوائک جوابنده (اوت !
اقدی کچن جمعه ایرته سی صباحی ساعت اوچ راده لرنده اداره
مخصوصه نك شرف واپورینه را کبآ جده طریقله حجه کیتدی)
دینلمک کبی .



{ علم بیان }

یوقاروده علم بیانی ، افاده مرامک طرق مختلفه سنی بیلدیرن
برقدر ، دیه تعریف ایتمشیدک . طرق افاده اوچدره : حقیقت ،
مجاز ، کنایه درکه بونلرک هربری برر فصلده لزومی قدر بیان
اولونا جقدر .

{ باب - ۱ }

فصل

{ حقیقت - مجاز }

(حقیقت) وضع اولون دینی معنایه دلالت ایدن لفظدر .
مثلا (کونش) کبی که معروف کوکبه دیرلر . (آت) کبی که
معلوم حیوانه دیرلر .

(مجاز) وضع اولوندینی معنائک غیرتی اولان بر معناده استعمال اولونان لفظدر . مثلاً (کونش) لفظی معلوم اولان بیوک، پارلاق کوکبه موضوع اولوب لفظ مذکوری شومعنای موضوعنده استعمال ایدر ایسه ک حقیقت ، وکوزلیوز یاخود کوزل یوزلو کیمسه معناسنده استعمال ایدر سه ک مجاز اولور . مجاز اصلاً ایکی نوعدر . بری (استعاره) دیکری (مجاز مرسل) در .

مجاز ، بر لفظک معنای اصلیسندن دیکر معنایه نقلی اولوب بو ایکی معنی ییتنده اولان علاقه و مناسبت مشابّهت ایسه آکا «استعاره» واکر مشابّهتک غیرتی ایسه «مجاز مرسل» تسمیه اولونور .

بو تعریفه نظراً استعاره «معنای اصلیسنه تشبیه اولونان معناده مستعمل لفظه» ویا «مشبه بهک مشبهده استعمالی مفهومه» اطلاق اولونور :

(آرسلان) لفظنک شجیع کیمسه ، (تیلکی) لفظنک شخص حیله کار معناسنده استعمالی کی .

فصل

بحث التشبيه

تشبیه ، بر شیئی دیکر بر شیئه بکزمکدر . بونلردن بکزمه دیلن شیئه «مشبه» بکزمه دلدیکی شیئه «مشبه به» و آنلری

بر برینه بکز تلمک ایچون استعمال اولونان لفظه « ادات تشبیه »
 و مشبه ايله مشبه بهک ییننده اولان مناسبتنه « وجه تشبیه » ،
 « جهت تشبیه » ، « جامع » . « وجه شبه » اطلاق اولونور .
 مثلاً (حسن شجاعته آرسلان کیدر) عبارته سنده تشبیه موجود
 اولوب « حسن » مشبه « آرسلان » مشبه به « شجاعت » وجه
 شبه « کبی » لفظی ادات تشبیهدر .

بو تفصیلاتدن آکلاشیلاجنی اوزره ارکان تشبیه (مشبه ،
 مشبه به ، وجه شبه ، ادات تشبیه) دن عبارت اولمق اوزره درتدر .
 بونلردن مشبه ايله مشبه به ارکان مذکورنهک اصل اصیلی
 اولوب وجه شبه بو ایکی اصل ايله قائم بر وصفدر که آنی
 متکلم قصد ایدر .

لسان عثمانیده مستعمل ادات تشبیه قسم ناینک ادوات
 بحثده بیان اولوندینی اوزره پک چوق ایسهده اک مشهور
 و مستعملی (کبی) لفظیدر .

بعضاً تشبیهده ارکان اربعهک جمله سی موجود اولور . کچن
 مثالده اولدینی کبی . بعضاً دخی « وجه شبه » ذکر اولونمایوب
 دیگر ارکان ثلثه سی موجود اولور : (احمد آرسلان کیدر)
 ترکیبی کبی . بعضاً ادات تشبیهده حذف اولوب ایکی رکن
 موجود قالیر : (احمد آرسلاندر) کبی که بو مثل اولره [تشبیه
 بلیغ] تسمیه اولونور .

بر تشبیهده وجه شبه مذکور اولورسه آکا (تشبیه مفصل)

محدوف اولورسه (تشبیه مجمل) ادات تشبیه مذکور اولورسه
 (تشبیه مرسل) محدوف اولورسه (تشبیه مؤکد) مشبه ايله
 مشبه بهدن بریمی محدوف اولورسه (استعاره) دینور .
 بوندن باشقه وجه شېك طرفینده وجودی نفس الامری
 اولورسه آکا (تشبیه تحقیقی) دینور : زید ايله آرسلانده
 شجاعت کی . نفس الامری اولمایوب قوه متخیله نك احتراعاتندن
 اولورسه (تشبیه تحیلی) دینور : پارلاقلقده فکرك کونشه
 تشبیهی کی .

فصل

{ مجاز مرسل }

یوقاروده دخی بیان اولوندیغی اوزره مشابھتک غیرى بر
 علاقه ومناسبتیه منی وضع اولوندیغی معنائک غیرى معناده
 مستعمل اولان لفظه (مجاز مرسل) دینور .

مشابھتک غیرى علاقه اوتوزه قریب ایسه ده لسان عثمانیده
 مشهور اولانلری بوجه آتیدر :

۱ - کلیت جزئیت درکه بعض کره کل اولان برشی ذکر اولونورده
 آنک جزئی اراده ایدیلیر که بوکا (ذکر کل اراده جزء)
 دینور : فلان ذات حجازدن کلیور کی که کلدیکی مکه اولوب
 حجاز قطعه سندن بر جزء در . بعض کره جزء اولان بر شی

ذکر اولونوب کل اراده ایدیلیرکه بوکاده (ذکر جزء اراده کل) دینور : باشک صاغ اولسون کبی که ذکر اولونان باش انسانک جزئی اولوب مرام باش اولمایوب انسانک کلیدر .

۲ - سببیت مسببیت درکه بر شینک سببیتی ذکر ایدوب مسببیتی ویاخود مسببیتی ذکر ایدوب سببیتی اراده ایتمکدر: بودکان خیلی پاره قزاندی - رحمت کلیور کبی که برنجی مثالده دکان سبب اولوب پارمی قازانان مال ، ایکنجیده رحمتیه سبب اولان یاغمور اراده ایدلمشدر .

۳ - حالت محلیت درکه حالی ذکر ایدوب محلی اراده ویاخود محلی ذکر ایدوب حالی اراده ایله مکدر: نمازدن چیقدم - چشمه آقیور کبی که برنجی مثالده نماز حال اولوب محل اولان جامع و ایکنجیده چشمه محل اولوب حال اولان صو اراده ایدلمشدر .

۴ - خصوصیت عمومیت درکه عمومیه موضوع برکلهی ذکر ایدوب خصوصی و بالعکس خصوصی ذکر ایدوب عمومی اراده ایتمکدر: حیوانی حاضر لاسونلر - انسانک احتیاجی بر لقمه نانه در کبی که حیوان لفظ هاننده انسان، دوه، آت... الخ داخل اولوب بوندن خاص اولان آت ونان لفظ خصوصیت صیسندن حیات بشری کافل اولان بالجمله مأکولات اراده ایدلمشدر .

۵ - مصدریت در که محل صدوری ذکر ایدوب صدور ایدن
شیئی اراده ایتمکدر: برچوق آدم انک الله باقیور کبی که
انک نعمته و عطاسنه دیمکدر.

۶ - مظهریت در: او بنم المدن کلمز کبی که بنم قدرتم اکا تعلق ایتمز
دیمک اولور. زیرا قوت و قدرتك اثری الله ظهور
ایتدیکندن ال مظهر اولور.

۷ - اولیت در که برشیئی صوکره بولوناجنی حالک اسمیه ذکر
وتسمیه ایتمکدر: آتش یا قدم، بغدادی بیتدی کبی که یانان
کمورددر صوکره آتش اولور. كذلك بیتن اکیندر صوکره
بغدادی اولور.

۸ - الیت در که بوده معنای حقیقینک معنای مجازی به الت
اولمسیدر. عضو معلومه موضوع اولان لسان لفظنی لغت
معناسنده استعمال ایدوب لسان عرب دیمک کبی.

فصل

{ کنایه }

کنایه ، لغتده تصریحک ضدیدر که بوکا تعبیر عامیانه ایله
«سوز آتق» دینور. اصطلاح قنده معنای اصلینک اراده سیده
جائز اولق شرطیله معنای لازمی اراده اولونان لفظدر.
مجاز ایله کنایه نك فرقی، معنای حقیقتك اراده وعدم اراده سیدر.

زیرا مجازده معنای حقیقت اراده اولونماز، کنایه ده ایسه معنای حقیقتك اراده سی جائزدر .

کنایه موقعنده مستعمل اولان لفظ (مکنی به) ، دلالت ایندیکی معنای لازمه (مکنی عنه) تسیمیه اولونور : شرابدن کنایه اولان « ام الحبائث » لفظی کبی که لفظ مذکور (مکنی به) ومعنای لازمی اولان شراب (مکنی عنه) در .

مکنی عنه یا ذات اولور یعنی کنایه دن یا لکز ذات مقصود اولور . بوضورتده کنایه اگر مکنی عنه متعلق معنای واحدی حاوی اولورسه « کنایه مفرده » و اگر معانی متعدده بی حاوی اولورسه « کنایه مرکبه » اطلاق اولونور : « حسد اولان محله خلوص اولماز » و « ایکی ایغی اوزره یورر ، طوغری بویلی ، طرناقلری کنیش بر حیوان » کبی که برنجی مثاله مکنی عنه قلب و کنایه نك حاوی اولدینی معنای واحد محل حسد اولمق وایکنجی مثاله مکنی عنه انسان و معانی متعدده توالی ایدن لفظلرك مفهومیدر .

مکنی عنه یا صفت اولور : بوده ایکی نوعدر .

۱ — کنایه قریبه در که مکنی عنه ذهنك انتقالی بروسطه یه محتاج اولور . اگر ذهنك انتقالنده سرعت اولورسه اکا (کنایه قریبه واضح) دینور : « فلانك البسه سی بکا پك طار کلیر » کبی که بوکلام مکنی عنه ك متکلمدن زیاده ضعیف اولدیغندن کنایه اولوب بوکا ذهن بداهتله انتقال ایدر .

اگر مکنی عنه ذهنک انتقالنده سرعت اولمازسه (کنایه
 قریبه خفیه) دینور: دیک باشلی، قالین قفالری، یک یوزلو،
 کبی که برنجیسی عنادجیلقدن وایکنجیسی حماقتدن و اوچنجیسی
 دخی حیاسزلقدن کنایه اولوب بونلره ذهن بردنبره انتقال
 ایتیوب براز ملاحظهیه محتاج اولور.

۲ — کنایه بعیده درکه مکنی عنه ذهنک انتقالی واسطهیه
 محتاج اولور: «فلانک خانه سنده قاشق طیائماز» کبی که قاشق
 چوق تلف اولسی چوق استعمال اولونماسنه، وچوق استعمالی
 چوق مسافر کلمه سنه، چوق مسافر کلمه سی اوصاحبنک مسافر
 پرورلکنه واسطه اولوب مذکور کلام اشبو واسطه لرله او
 صاحبنک مکرم اولماسندن کنایه اولمشدر.

مکنی عنه یانسیبت اولورکه کنایه ایله صفت موصوفه اثبات
 ویا آندن نفی اولونور: بورجلی اولمز بکزی صرارر —
 ایتدکلرینی سویله دیکمده یوزی بیله قیزارمادی کبی که برنجی
 مثاله «کدورت ثابت اولور» دیمکدن کنایه اولوب صفت موصوفه
 اثبات وایکنجی مثاله «آنده حجالتدن اثر کورلمدی» دیمکدن
 کنایه اولوب حجالت صفقی نفی ایدلمشدر.

کنایه ده برجهت کوستریلوبده جهت دیگر قصد اولونورسه
 اکا (تعریض) دینور: اوته کنه بریکنه فنا معامله ایدن بر
 کیمسه نک یوزینه قارشی «انسان کامل خلقه حسن معامله ایدن

کیمسه در ، دیمک کبی که سن انسان کامل دکلک معناسی قصد اولونور .

کنایه : تلویح ، رمز ، ایما و اشارت نامیده اقسامه آریلیر .
کنایه ده اگر لازم ایله ملزوم آراسنده کی واسطه لر چوق اولورسه اکا (تلویح) دینور : یوقاروده کچن « فلانک خانه سنده قاشیق طیانماز ، مثالی کبی .

اگر واسطه آز اولوبده لزومده خفا اولورسه اکا (رمز) دینور : کنایه قریبه خفیه لر کبی .

اگر واسطه آز اولوبده لزومده خفا دخی اولمازسه (ایما و اشارت) دینور : « مجد و شرف برشجره مشمره درکه فلانک خانه سنده بیتوب کوکلشمش » کبی .

« تکمله »

همزه نك امروسی

کلمات عربیه ده بولونان همزه لر ، کلمات اولنده ، اورته سنده ، آخرنده بولوندیغنه نظراً صور آتیه اوزره یازیلیرلر :
اولده کلن همزه لر عمومیتله عموداً شویله (ا) یازیلیر
واوچ درلو حرکه ایله مدی قبول ایدر . الم ، اذن . اجرت ، آمر کبی .

همزه اورته ده بولوندیغنی تقدیرده یامتحرك اولور ویاسا کن

اولور. اگر ساکن اولورسه، اوست طرفی مفتوح ایسه الف یازیلوب اوزرینه همزه اشارتی قونور: مامور، مألوف کبی. اوست طرفی مکسور اولورسه بر دندان یازیلوب اوزرینه همزه قونور: بئر، استثناس کبی.

اگر اوست طرفی مضموم اولورسه واو یازیلوب اوزرینه همزه اشارتی قونور: مؤمن، مؤتمن کبی.

اشبو اورته ده بولونان همزه متحرک اولدینی صورتده اوست طرفی یا مفتوح، یا مکسور ویا مضموم اولور.

مفتوح اولورسه برالف، مکسور ویا برحرف مد اولورسه بر دندان یازیلوب اوزرینه همزه اشارتی قونور: سآله، فته، قائل کبی. اگر مضموم اولورسه بر واو یازیلوب اوزرینه همزه اشارتی قونور: سؤال، مؤجل کبی. امرائه، مائه کله لری شاذدر.

اگر اوست طرفی ساکن اولورسه کندی حرکه سنک مقتضاسنه تابع اولور. یعنی حرکه می فتحه ایسه الف، کسره ایسه دندان، ضمه ایسه واو یازیلیر: مسآله، اسئله، مسؤل کبی. (بوکی کله لری الفسز اولارق مسئله، هیئت، نشئت صورتنده یازمقده جائزدر).

همزه کله نك صوکنده اولورسه اوست طرفنك حرکه سنه تابع اولوب اوست طرفی مفتوح ایسه الف یازیلیر: منشأ، ملجا کبی. مکسور ایسه بر یاه غیر منقوطه اوزرینه یازیلیر:

متملی . منشیء کبی . ا کر همزه نك اوست طرفی سا کن ویا الف
اولورسه اول وقت یالکیز همزه اشارتی قونور : بدء ، جزء ،
افتراء کبی .



لسان عثمانیده ، ظ ، کبی اوقونان ضالی کلمات عربیہ نك بعضاری

حضرت ، تضمین ، ضمان ، مضمون ، مضمار ، قضا ،
ضم ، فضا ، مقراض ، مضارع ، مضبطه ، مضراب ، ماضی ،
مضمضه ، غضب ، بیاض ، موضوع ، بغض ، مرئضی ،
قضیه ، ضربخانه ، رضا ، بیضا ، مریض ، بیضه ، مرض ،
امراض ، بعش ، ضیافت ، اضافت ، ضیا ، روضه ، ممضی ،
محضر ، حاضر ، احضار ، فیضی ، عارض ، عرض ، غرض ،
قبض ، قبضه ، نقض ، تناقض ، ضایع ، ضیاع ، تضرع ، وضع ،
فضله ، اضطراب ، حامض .




{لسان عثمانیده اکثریتله قوللانیلان صفات تأکیدیه لر}


آب آچیق ، اوپ اوزون ، سیپ سیوری ، آب آکسزین ،
 صاپ صاری ، طوپ طولی ، قاپ قاره ، صاپ ، صاغلام ،
 قپ قیرمزی ، قپ قیزیک ، بس بللی ، بوس بتون ، قوپ
 قوری ، تاس تمام ، باس بیانغی ، قاس قاتی ، قوس قوجه ،
 طوس طوغری ، موس مور ، قیس قیوراق ، خام خالات ،
 بوم بوش ، طام طاقیر ، یوس یووارلاق ، بام باشقه ، ماس
 ماوی ، دیم دیک ، یام یاصی ، سیم سیاه ، صیم صیقی .

— صوک —



معارف نظارت جلیله سنک فی ۶ تشرین ثانی سنه ۱۳۱۵ تاریخ
 و ۵۰۰ نومرولی رخصتنامه سنی حائزدر





فینائی ۱۰ فروشدر
